

PL
2687
.C53
v.1

秦少游淮海集序

古之文人聲氣感召千里比肩百年旦暮世地曾莫能限也如
長卿之慕蘭太白之懷謝精神結契處冥通獨映有不能喻諸
人者余郡徐文長抱間世之才其生平學不濫宗書不罔讀而
余於遺篋中得其手批秦少游先生淮海集丹鉛錯落似不啻
編之屢絕者何耶蓋其耿介寡合澹泊自如性相同也風流蘊
藉結撰芳華才相同也落魄風塵幽憂憤抑遇又同也其深嗜
也宜哉第繹其點評惟於秦公句之極雋處論之極微處始一
爲拈出似甚惜賞譽者然蓋不知作者固豪識者亦別正如石
家珊瑚樹子惟取數尺亭亭餘雖供如意物未嘗非人間世所



寶也集中如論列古人其抑揚予奪確乎千古定案雖眉山父子弗及也其章疏奏牘洋洋纚纚皆牖主忠言救時石畫漢之賈誼唐之陸贄弗及也其歌行近體句適調逸雖高岑劉孟諸人弗及也其長調小令尤爲藝林膾炙流輩所推他如歷數醫藥之術靡不精探奧理洞析微幾則又東方曼倩之流亞矣緬想當時與蘇黃文賈輩詩酒流連一時唱予和汝之什居然具在公於中自是錚錚露奇雖然文固美矣殆亦若人之能尚友耳借如司馬相如不與鄒陽枚乘吳莊忌夫子之徒遊而文賦渠若是則少游之文不朽於天壤者予重有感於與遊焉武林段斐君者博雅士也篤好剗剗久欲取是集而新之畢搜善本

其渭陽鍾瑞先余辱在社末遂以此本屬之會稽許吉人譔

淮海集序

同龔張 縉 撰

縉每進見搢紳先生未有不詢及秦公者流風遺韻隱然如高山巨川人皆識其爲一鄉之望迺知地以人而勝也公沒已數百年而盛名不泯亦以文之有傳焉耳北監舊有集板歲久漫漶近日山東新刻不全予迺以二集相校刻之郡齋序曰凡古人之文有餘有精華有源本得其源本則精華悉舉之矣況緒餘乎今大江河之水東流入於海而岷陽崑崙則其發源之地草木花實之盛其得於地土之力必厚矣名勝傳世之文亦江河之流草木之花實也獨不有源本者乎故曰其源深者其

流長其本殖者其末茂秦公之名世亦豈偶然哉今之後生聞風興慕者率惟其緒餘是好不復知其精華源本以是求公不亦遠乎蓋其逸情豪興圍紅袖而寫烏絲驅風雨於揮毫落珠璣於滿紙婉約綺麗之句綽乎如步春時女華乎如貴游子弟此特公之緒餘者耳至於灼見一代之利害建事揆策與賈誼陸贄爭長沈味幽玄博參諸子之精蘊雄篇大筆宛然古作者之風此則其精華也迺若孝友出於天性行義孚於朋友少年慷慨論事嘗有繫咎二虜回幽夏故墟之志方王氏用事時公能少貶其說可立登顯要獨守正不撓乃至謫死窮荒沒齒無怨是其曠度高懷藐萬鍾而弗顧堅操勁氣厯九折而不同中

之所存有過人者浩然一傳其殆自見也嗚呼以此爲文茲其所以名世者也豈非吾鄉百世之師乎孟子論夷惠清和而稱其爲百世之師他日又謂伯夷隘柳下惠不恭隘與不恭君子不由者何耶蓋聖之清和此其源本也隘與不恭則緒餘末流之弊耳是以君子由其清和不由其隘不恭也夫公之文旣已著於天下矣余小子其敢以譴陋贅言獨念公一鄉之望恐向慕者昧於所求序而論之使知公之名世在此而不在彼也公名觀少游其字一字太虛高郵人淮海其名集云嘉靖己亥秋九月望日書於鄂之石鏡亭

淮海集序

江都盛儀撰

淮海集者宋高郵秦公觀少游之作也記者曰淮海集三十卷
淮海閒居集十卷淮海詩餘一卷宋史謂文集四十卷蓋合前
二集而言也經籍考歌詞有淮海集一卷旣詩餘也板舊藏國
子監歲久漫漶儀真黃雪洲中丞瓚一刻於山東高郵張世文
州守縝參校監本黃本再刻於鄂州爲淮海集四十卷爲後集
六卷爲長短句分卷上中下亦庶幾還其舊矣未久鄂板復燬
於火搢紳才哲過公故里不見公遺文往往惋惜而去高郵州
守胡君民表謂闡揚先哲盛舉不容已也乃求其善本捐俸復

刻以傳工既告成復問序於儀儀辭遜再四不獲乃作而言曰
淮海集豈可不傳哉嘗聞蘇長公謂李薦曰少游之文如美玉
無瑕琢磨之功殆未有出其右者張文潛則謂少游平生爲文
甚多而一一精好可傳呂居體則謂少游雖從東坡遊而其文
乃自學西漢邢和叔則謂少游文如鍾鼎然其體質重而簡易
其刻畫篆文則後之鑄師竭力莫能彷彿是非公文章之定品
乎長公初見公黃樓賦以爲有屈宋才及居惠州得公書詩讀
之歎曰如在齊聞韶也王介甫則謂公詩清新婉麗鮑謝似之
呂氏則謂少游過嶺後詩嚴重高古自成一家朱晦翁則謂少
游詩甚巧亦謂之對客揮毫想渠合下得句便巧是非公詩賦

之定品乎史謂少游長於議論文麗而思深黃魯直亦謂議論
文字乃特付之少游是非公議論之定品乎陳後山云今之詞
手惟秦七黃九朝溪子則謂少游歌詞當在東坡上是非公歌
詞之定品乎後學熟味而精擇之真見如諸公之所評品者而
更權度於吾心斯爲善讀淮海集者也抑公雖與長公同放而
不坐其放言之失雖爲介甫賞識而不入於熙豐之黨文章華
國議論通達國體而不爲詭遇少貶以徇人當時孫莘老徐仲
車皆安定先生門人也公與之詩文往復麗澤切磋甚多且其
少年高志非爲親養則不復應舉登第教其弟觀觀及子湛相
繼皆以詩文名世則公之事親也事君也友弟也教子也擇友

也天秩人倫可謂無慚德矣不幸爲羣奸所擠屢投窮荒百折不回竟以遷死君子猶以世豈復有斯人悲之此誦其詩讀其書者所以貴知其人論其世也淮海集豈可不傳也哉嗟乎昔人以詩文鳴世而人品未足稱重者有矣雖其集刻之傳亦未免爲訾議之資爾何足貴哉益見淮海集之不可不傳也已嘉靖乙巳孟夏月庚子日書

淮海集序

太原姚 鏞 撰

廣陵山川環巨濤聲挾秋瀨氣滃渤每鍾爲文人畸士而秦淮
海先生獨琅琅千古繫豈盡其風流蘊藉詞麗情深爲足摩盪
人間蓋亦其時有以成之也當先生與蘇黃諸君子修千秋之
業芳華的歷錯錦成霞倡和埧簾稱一時勝事然多發之震撼
流離中藉第令金鉉鵲起玉帳虎觀相與潤色皇猷佐太和之
盛豈不休嘉砵隱而乃投之寂寞之濱使得握縱橫不律抒其
牢騷不平之感愈窮愈工愈傳人與才竝憐聲與文共永
藏名日月鑄神金石則諸君子之不遇正其所以不朽耳噫英

雄之士身名俱泰。委蛇容與。不後人。惟坎壈侘傺。中豐城之氣。
在斗江侯之夢。生花以毫代舌。如秦之韓。非楚之屈。左漢之遷。
史唐之供奉。拾遺以至坡公。少游皆困頓終身。而獨畱其言於
天壤。如澄泥之珠。汨沒中光。怪益發。又何異焉。雖然。先生未爲
不遇也。結綬金馬勒。銘玉樓婦孺。稔其名。至今後生小子胸中。
吞一掬墨瀋。卽知有少游先生。豈無懷瑾握瑜之士。堪以鴈行。
埋沒蓬蒿。煙塵銷滅。如唐球之詩瓢。不可得安望千秋也。噫。先
生不可謂不遇矣。不佞故有概於其時之成之也。水部李公執
文壇牛耳。擅千秋之譽。取淮海集刻之署中。不佞行部維揚。相
與道平生歡。以序見屬。敬綴數語於簡端云。

萬曆戊午
仲夏既望

淮海集序

仁和李之藻 撰

世稱立言不朽至與立德立功並駕而能言之士競託於文焉
以傳乃羣史藝文志所載銷滅無聞者今亦何限卽蕪贅僅存
猶冀咸陽再烜之爲愉快也而秦少游先生身罹黨禍朝廷至
下詔毀其文顧其文迄今傳焉何物殘編能使萬乘威詘良亦
眞自有不可磨滅者令傳至今乎夫文之可傳詎必皆道德性
命語封禪書劇秦文千載味之不滅駝峯雞蹠彼其精神誠有
獨到則欣賞自繫人心火傳不盡鬼斧不摧誠無足訝何況人
品卓然才追屈宋其爲子瞻文潛和叔後山諸君子所推轂當

年既有定價而後世惡得無傳焉方其壯歲登朝致身史局才名重乎海內第令肯稍脂韋卽拾級可躋宰執乃獨守道不阿瘴鄉投骨坐朋黨坐增損實錄又坐謁告寫佛書紹聖諸奸渠何怨之修而相寤若是少游守死善道無媿此衷華光杯水正自含笑入地獨是繫二虜復幽夏志大見奇嘗試用之何遽不有瘳積弱而邇屯賁志令祖宗培養父兄師友陶鎔生平辛苦之所蘊蓄曾不供南箕卷舌之一逞三黜未已九辯誰招人謂宋忠厚立國所厚似獨愴邪於正人君子毒手固未貸也方今遭逢聖明士大夫卽骯髒忤時最重不過投閑削籍焉而止患不真才真品如少游不患橫罹意外如少游所值者乃瞻高

沙少游而後無幾少游豈其神居朝爽璧社夜光河嶽之鍾靈也如是而誇才子者尙必借才於異代然則西望荆塗當年風起雲飛攀鱗附翼此其人又何方之產也余所爲三復遺文重爲讐校而願與後進之賢思齊前烈者以此雖然又不徒以文也如以文則未暇論世者且或以其文掩其節以其風流蘊藉之辭調掩其瓌瑋閎麗之文章而少游幾無以自見亦曰此有宋之豪于文者而已矣露筋女子不有其文併不有其姓名而販豎輓卒不念謁祠宇而致敬其聲價蓋不落少游下人有不朽獨文也與哉晦翁曾以詩人被薦乃至抱悔沒齒夫隨城化石而更以蛾眉見嫵非其志也故吾儕所諷誦咨嗟彷彿若對

少游者其文在也若少游之所以爲少游者自有本末必不徒以其文而已也萬歷戊午孟夏之吉

郡志本傳

淮南王應元 撰

秦觀字少游一字太虛揚州高郵人少豪雋慷慨溢於文詞舉進士不中強志盛氣好大而見奇讀兵家書與己意合見蘇軾於徐爲賦黃樓軾以爲有屈宋才又介其詩於王安石安石亦謂清新似鮑謝軾勉以應舉爲親養始登第調定海主簿蔡州教授元祐初軾以賢良方正薦於朝除太學博士校正秘書省書籍遷正字而復爲兼國史院編修官上日有硯墨器幣之賜紹聖初坐黨籍出通判杭州以御史劉拯論其增損實錄貶監處州酒稅使者承風望指候伺過失旣而無所得則以謁告寫

佛書爲罪削秩徙郴州繼編管橫州又徙雷州徽宗立復宣德
郎放還至藤州出遊華光亭爲客道夢中長短句索水欲飲水
至笑視之而卒先自作挽詞其語哀甚讀者悲傷之年五十三
有淮海文集三十卷淮海閑居集十卷淮海詩餘三卷觀長於
議論文麗而思深及死軾聞之歎曰少游不幸死道路哀哉世
豈復有斯人乎弟覲字少儀元祐六年進士工於詩官至臨安
主簿覲字少章亦能文黃魯直詩云秦氏多英俊少游眉最白
頗聞鴻雁行筆皆萬人敵吾早知有覲而不知有覲觀子湛字
處度亦以文名仕爲宣教郎嘗註呂好問回天錄

淮漢先生遺像



以君為將仕也其服野其行方以君
為將隱也其言文其行昌置而不求
君不即而求之君不藏以為將仕
將隱者皆不知君者也蓋將絜所有
而乘所遇以游於世而卒返於其鄉
者乎

眉山蘇軾題

淮海集卷首增訂年譜

錫山

鏞

大音

編輯

錫山

瀛

小峴

重編

裔孫

韭溪

清錫

秉純

重訂

石公

元慶

筱浦

校刊

淮海先生年譜

謹案先生年譜舊有韭溪宗人雪巖公手鈔本又有錫山宗人小峴侍郎重編大音先生刊本兩相印證大同小異而此本經小峴侍郎辨誤補缺又得錢少詹辛楣先生釐正尤爲善本向刊宗譜卷首茲刊集中以見先生文章氣

節洵足並傳不朽也石公支裔孫元慶謹識

宋仁宗皇祐元年己丑先生生

先生姓秦氏名觀字太虛改字少游別號邗溝居士學者稱爲淮海先生先生居江南中徙維揚爲高郵州武寧鄉左廂里人大父承議府君諱某父元化公諱某師事胡安定先生瑗有聲太學母戚氏

案先生文集書王氏齋壁云皇祐元年余先大父赴官南康道出九江余實生焉

皇祐二年庚寅 三年辛卯

皇祐四年壬辰先生年四歲

大父承議府君滿歲受代猶寓止僧舍未幾代者卒王叔瞻
之先君來領其職事通家相好也

見書王
氏齋壁

皇祐五年癸巳

至和元年甲午先生年六歲

或書皇祐六年是年二月
太史言日當食改至和

先生始入小學元化公游太學歲時歸覲具言太學人物之
盛數稱海陵王君觀高才力學遂以其名名先生

案李氏王夫人墓誌銘但言元化公稱王君觀及其從弟
覲而不言名先生名先生之說見之舊譜然王君觀從弟
名覲而先生之季弟亦名覲或取二王之名先後以名其
子似可信也又案王夫人墓誌銘言至和中先君游太學

不指元年至和首尾幾及三年恐係至和二年事亦未可
定

至和二年乙未

嘉祐元年丙申

或書至和三年是年九月謝天地改嘉祐

二年丁酉

嘉祐三年戊戌先生年十歲

通孝經語孟大義

嘉祐四年己亥

五年庚子

六年辛丑

七年壬寅

嘉祐八年癸卯先生年十五

丁父元化公憂

英宗治平元年甲辰

二年乙巳

三年丙午

治平四年丁未先生年十九

娶徐氏名文美潭州甯鄉主簿徐成甫女

案徐君主簿行狀成甫初娶張氏繼娶蔡氏子五人文通
文仲文剛文饒文昌女三人文美文英文柔先生之配蓋
徐氏長女也

神宗熙甯元年戊申

熙甯二年己酉先生年二十一

作浮山堰賦

載集中
卷一

熙甯三年庚戌先生年二十二

叔父定登葉祖洽榜進士第授會稽尉

案大音先生鏞云高郵譜定先生諸父仕至端明殿學士卒葬江都西山秦家莊有秦端明定墓又案會稽尉至元豐三年始得代疑屬遷調非進士初官

熙甯四年辛亥

熙甯五年壬子先生年二十四

好讀兵家書作單騎見虜賦

載集中卷一

書屯田郎中俞汝尚

墓表 施元之東坡詩註退翁之卒孫莘老以爲事類龐公爲表其墓秦少游爲書之

案汝尚字退翁吳興人孫莘老於熙甯四年十二月自廣德移守吳興六年春移守廬州東坡有詩送之在寒食

俱是

施墓表之作必在守吳興時先生以同鄉在其幕府故爲
書之

案記夢咎劉全美七古起二句云歲逢困敦斗指甲辰次
庚辰漏傳子蓋子年七月庚辰日也考元豐七年甲子紹
聖三年丙子七月皆無庚辰李燾長編熙甯五年壬子六
月己酉朔閏七月戊申朔詩中所云辰次庚辰者七月初
二日也

熙甯六年癸丑

熙甯七年甲寅先生年二十六

聞眉山蘇公軾爲時文宗欲往游其門未果會蘇公自杭倅

徙知密州道經維揚先生預作公筆語題於一寺中公見之大驚及晤孫莘老出先生詩詞數百篇讀之乃歎曰向書壁者必此郎也遂結神交

熙甯八年乙卯先生年二十七

外父徐成甫卒繼室蔡氏殉焉爲撰行狀

載集中卷三十六

及蔡氏

哀詞

載集中卷四十

熙甯九年丙辰先生年二十八

同孫莘老參寥子訪漳南老人於歷陽之惠濟院浴湯泉游

龍洞山謁項羽祠極山水之勝得詩三十首湯泉賦一篇

載集

中卷一 孫莘老有初至湯泉詩先生次韻和之

載集中卷七莘老詩附

熙甯十年丁巳先生年二十九

蘇公自密州徙知徐州先生乃往候公於彭城贈之以詩

載集

中卷

蘇公次韻贈別

附載集中卷五

是歲孫莘老寄老庵成作寄

老庵賦

載集中卷一

漳南道人自湯泉來會於高郵追敘去年

登臨之美作游湯泉記

載集中卷三十八

元豐元年戊午先生年三十

先生舉鄉貢不售蘇公有詩云底事秋來不得解定中試與

間諸天又簡云此不足爲太虛損益但弔有司之不幸耳先

生退居高郵杜門卻掃以詩書自娛乃作掩關之銘

載集中卷三十

三

是時蘇公以泊河功成作黃樓先生作黃樓賦

載集中卷一

以寄公爲詩以謝

附載集中卷一

是歲又作歎二鶴賦

載集中卷一

月五日蘇公跋湯泉賦後

附載集中卷一湯泉賦後

案查慎行蘇公年表是年秦少游將入京應舉至徐謁公

黃魯直以古詩二首上公黃秦二君奉教於公始此蓋不

詳前一年先見公於彭城也蘇公年表始此二字誤

元豐二年己未先生年三十一

正月十五日作五百羅漢圖記

載集中卷三十八

將如越省大父承

議公及叔父定於會稽會蘇公自徐徙知湖州遂與偕行過

無錫遊惠山和唐人韻三首

載集中卷三

蘇公及參寥子同賦

均附

載集中卷三

又會於松江至吳興泊西觀音院端午日同公遍

遊諸寺尋別蘇公至德清道中作詩還寄

載集中卷七

遂如越七

月聞蘇公被詔獄亟渡江至吳興問訊得實乃復自吳興過

杭中秋後一日同參寥子月夜杖策度風篁嶺謁辯才法師

於潮音堂作龍井題名記

載集中卷三十
八子瞻跋尾附

又別作龍井記

載集

中卷三十八乃東遊鑑湖謁禹廟憩蓬萊閣是時給事廣平程公

闢領越州先生相得歡甚多登臨唱酬之什作會稽唱和詩

序

載集中卷三十九

錄寶林禪院事實

載集中卷三十六

又作會稽懷古諸

詞歲暮始還高郵除夕抵家是歲十二月蘇公謫黃州團練

副使

案先生客會稽作滿庭芳詞

載後集卷上

卽山抹微雲之篇蘇

公極賞此詞戲呼先生爲山抹微雲君

又案藝苑雌黃云范祖禹之子元實乃少游婿也爲人疑重終日不言有妓問之曰公亦解辭曲否答曰吾乃山抹微雲君女婿也

元豐三年庚申先生年三十二

是歲鮮于公侁字子駿爲揚州守待先生以禮爲作揚州集

序

載集中卷三十九

邵彥瞻爲揚州從事爲作集瑞圖序

載集中卷三十九

春三月作書唁蘇公於黃州公弟子由將赴高安過高郵相

從兩日先生送至邵伯埭子由賦詩見別先生次韻和之

原本

作贈詩而還子由和詩考集中卷十一有次韻子由畱廣陵

子由邵伯埭見別詩三首子由詩附今當從之

子由畱廣陵

甚久先生值寒食上塚不得從已而屬和其廣陵諸詩

載集中卷

八 四月爲杭州法惠院言師作雪齋記載集中卷三十八入夏得中

暑疾秋復大劇浹月始安時黃魯直將赴泰和令李端叔自楚如晉陵皆過訪魯直攜敝帚焦尾兩編先生爲之心折別次揚州以書來爲先生手寫龍井雪齋兩記字畫精美先生卽寓書參寥子寄錢塘僧勒石焉冬十一月得蘇黃州書是

歲有與李樂天簡載集中卷三十

元豐四年辛酉先生年三十三

春正月先生叔父定自會稽得替便道取疾入京改官先生侍大父承議公還高郵又安厝亡孀於揚州入夏與弟觀觀兩先生習制科之文秋應省試題名有答蘇黃州書云辱誨諭

且令勉強科舉如某者豈敢求異於時但長年頗慙爲兒女
子所嗤笑耳得公書重以親老之命頗自摧折不復如向來
簡慢盡取今人所謂時文者讀之就其體作數首輒有見推
可者因以應書遂亦蒙見錄今復加工如求應舉時矣冬十
月作徐氏張夫人墓誌銘載集中卷三十三遂西行赴京

元豐五年壬戌先生年三十四

先生應禮部試罷歸過南陽新亭有詩寄王子發載集中卷六遂

如黃州候公於官舍作弔鍾文載集中卷三十一過廬山訪大覺

璉公南遊玉笥而歸秋九月作圓通禪師行狀載集中卷三十六圓

通賢達觀穎禪師之法嗣也是歲大父承議公卒

案大音先生鏞曰先生游廬山玉笥於詩文無可考唯圖

通院白衣閣絕句三首

載集中卷十一

及後九年作俞紫芝字序

載集中卷三十九

述昔遊玉笥山云云因附見於此又元豐七年

蘇公遊廬山跋先生所與辯才題名疑卽此時所題也

又案若舫先生鈞儀云武昌府嘉魚縣太平湖相傳水嘗

涸時夜有光怪或誌其處而掘之得銅鐘一明一統志云

宋秦觀爲弔鋪鐘文卽此

元豐六年癸亥先生年三十五

先生取經傳子史之文選輯得若干卷題曰精騎集自爲之
序曰予少時讀書一見輒能誦暗疏之亦不甚失然負此自

放喜從滑稽飲酒者游旬朔之間把卷無幾日故雖有強記
之力而常廢於不勤比數年來頗發憤自懲艾悔前所爲而
聰明衰耗不如曩時十一二每閱一事必尋繹數終掩卷茫
然輒復不省故雖有勤苦之勞而常廢於善忘嗟夫敗吾業
者常此二物也比讀齊史見孫搢答邢詞云我精騎三年足
敵君羸卒數萬心善其說因取經傳子史事之可爲文用者
得若干條勒爲若干卷題曰精騎集云噫少而不勤無如之
何矣長而善忘庶幾以此補之是歲代俞次皋作御書手詔
記載集中卷三十八李氏王夫人墓誌銘載集中卷三十三夫人如皋王觀
之母也又作曾子固哀詞載集中卷四十亂曰矧不肖以薄技兮早

獲進於門牆先生與南豐交始末未詳據哀詞則其所從游舊矣

案先生蠶書予遊濟河之間見蠶者豫事時作一婦不蠶比屋詈之故知堯人可爲蠶師今予所書有與吳中蠶家不同者皆得之堯人也先生自高郵至汴必經堯境此當自京師歸閒居所作又案逆旅集自序亦云余閒居有所聞輒書然皆未詳年月無從編次附載於此

元豐七年甲子先生年三十六

正月蘇公量移汝州七月過金陵謁王荊公旣別去復致書有云才難之歎古今共之如觀等輩實不易得荊公答書有

云公奇秦君口之而不置我得其詩手之而不釋先生以小像寄蘇公索贊公舟至竹西報書尋爲先生作贊冬十月先生與蘇公會於金山先生將赴京索文稿刪其可存者得古今體詩一百十二首雜文四十有九篇從遊之詩附見者五十有六合二百一十七篇次爲十卷號淮海閒居集

案大音先生鏞云荆公自熙甯九年罷相以使相判江甯府凡數年矣先生所居止一江之隔非若徐黃之數千里也使先生肯就從遊亦何待蘇公之介紹哉然先生不以近相取而以遠相求其趣操可觀矣世乃以先生爲文章之士何哉然而蘇公且惓惓若此者蓋是時荆公落莫已

久且捨宅爲寺

王安石奏施金陵舊第爲寺賜額保甯在熙甯十年

蘇公自黃來流

連款洽以故人相託自是友朋文章道義氣誼在世局之外者也先生蘇公兩得之矣又案是年蘇公跋先生廬山題名云某與大覺禪師別十九年矣禪師脫屣當世雲棲海上謂不復見記乃爾拳拳耶撫卷太息欲一見之恐不可復得曾與參寥師自廬山之陽並出而東所至皆禪師舊跡山中人多能言之者乃復書於太虛辯才題名之後以遺參寥太虛今年三十六參寥四十二某四十九辯才七十四禪師七十六矣此吾五人者當復相從乎生者可一笑死者可以一歎也元豐七年五月十九日慧日院

大雨中書鏞按此跋見蘇公與先生交真道味蕭然遊方之外者也及其過金陵又復惓惓若此嗚呼此其所以爲

蘇公與

元豐八年乙丑先生年三十七

先生登焦蹈榜進士第作謝及第啟

載集中卷三十八

上王岐公論

薦士書上呂申公晦叔書

均載集中卷三十七

先生慕馬少游之爲

人改字少游陳無已師道爲作字序

除定海主簿尋調蔡

州教授奉母夫人赴蔡州任

錫按舊譜此下有書王氏齋壁云云今從錢辛楣先生更繫於

四年

蘇公未至汝乞居常州尋以常州團練副使復朝奉郎

知登州召爲禮部郎中先生具啟致賀

載集中卷二十八

是歲有

到任謁先師文

載集中卷三十一

神宗皇帝宴駕功德疏

載集中卷三十二

虞氏夫人墓誌銘

載集中卷三十三

哲宗元祐元年丙寅先生年三十八

先生在蔡州任是歲太皇太后皇太后上尊號受冊及坤成

節興隆節先生皆作賀表

載集中卷二十六

為太守某公作

錫案舊譜為向

公作辛楣先生云先生赴蔡在其時劉貢父實知州事其二

年未知何人作守至四年向宗回任郡守則賀表未可定為

為向

是歲

公作劉貢父放赴京過汝南先生作詩送之

載集中卷二十五

王定國註論語序

載集中卷三十九

瀘州

作汝水漲溢說

載集中卷三十三

使君任公墓表

蘇公為翰林學士

案舊譜於元豐八年載是歲有登第後青詞考之青詞內

輒取甲寅之歲句疑是丙寅之譌因編次於此

元祐二年丁卯先生年三十九

先生在蔡州任四月復制科蘇公與鮮于公侁共以賢良方

正薦先生於朝先生致鮮于公書

載集中卷三十七 錫案舊譜以此條繫於元年今

從辛楣先生更正

先生弟少章先生觀客京師游張文潛黃魯直之

門家構小室魯直以寄寂名其齋贈之以詩先生亦以詩寄

觀觀兩先生

載集中卷四

是歲作鮮于子駿行狀

載集中卷三十六 爲

高符仲書王摩詰輞川圖後跋高死悔書卷

均載集中三十四

案山谷集是年有晁張和答秦觀五言次韻詩云山林與

心違日月使鬢換儒衣相詬病文字奉娛玩自古非一秦

六籍蓋多難詩書或發冢熟念令人惋秦子銳本學驥子
已血汗相期驂天衢伯樂嘗一盼士爲欲心縛寸勇輒尺
懦要當觀此心日照雲霧散抹疏萬物影宇宙同璀璨置
規豈惟君亦自警弛慢

元祐三年戊辰先生年四十

先生自汝南被召至京師爲忌者所中復引疾歸汝南

錫案舊譜

此條係於二年今從辛楣先生更正

蘇公軾孫公覺同知貢舉少章觀與李

方叔薦竝落而殿試榜首李常甯先生父姑之夫也是歲書

裴秀才跋尾

載集中卷三十四

少章先生畱京師

案大音先生鏞云先生賢書甫上而旋掛吏議賢良方舉

而卽遭擯斥才人之不幸如此蓋其榮遇之時而已然固
非待於後之遷謫也又先生有對淮南詔獄詩

載集中
卷七

未

詳年月附記於此

又案山谷集於是年次韻秦少章晁適道贈答詩云二子
論文地陰風雪塞廬甯穿東郭履不奉子公書士固難推
挽時聞有詔除負暄真得計獻御恐成疏又次韻答秦少
章乞酒云朝事鞍馬早吏曹文墨拘初無尺寸補但於朋
友疏豈知簞瓢子臥起一牀書炙背道堯舜雪屋相與娛
步出城東門野鳥鳴廢墟頗知富貴事勢窮心亦舒詩來
獻窮狀水餅嚼冰蔬斗酒得醉否枵腹如瓠壺亦可召西

舍侯嬴非博徒又次韻答少章聞雁聽雞二首平生絕少
分甘處身要從師萬事忘霜雁叫羣傾半枕夢回兄弟綵
衣行朝士聞雞常半途朱門擁被不關渠秦郎五起聽三
唱殘燭貪傳未見書

元祐四年己巳先生年四十一

先生在蔡州夏四月蘇公力請外郡遂以龍圖閣學士出知
杭州弟子由代爲翰林學士是時洛蜀相攻頗多附會搆隙
先生與黃晁諸公實不與聞黨事也六月范公純仁罷相出
知許州先生在蔡爲屬吏特薦先生堪備著述之科檄至先
生作書以謝曰某淮海一介之士行能無取比因緣科第獲

列仕版又屬朝廷復置賢科而一二邇臣猥以充賦名實乖
戾果致多言相公當國憐其孤單不卽聞罷使得自便引疾
而歸僥倖深矣比遇相公而某承乏之地實在節制之下疵
賤無介紹不敢以書自通眷眷私懷何以云喻豈圖相公過
有采聽首賜論薦許備著述之科檄書初至發函伏讀且喜
且懼蓋相公於某昔既有保全之賜今又有論薦之恩顧惟
狂愚何以辱此屬拘守不得進謝門闌又不敢具啟事以謝
悃悃區區俗禮非國士所報知已也惟相公裁察

錫案舊譜此條繫於

二年今從辛
楣先生更正

是歲代向宗回作敕書獎諭記書晉賢圖後

書王氏齋壁

載後集
中卷六

案舊譜山谷以寄寂名少章齋贈之以詩在元祐二年而山谷集則編次所賜詩於元祐四年又有次韻寄少游云僻宣欲吏雲季氏或招閔此公胸中秋萬物欲收捆賣藥偶知名草元非近準才難不易得志大略細謹士生要宏毅天地爲蓋軫驥來鹽車驂井下短綆引難甘呼爾食聊寄粲然鞭誰能借前籌還婦用束縕吾聞調羹鼎異味及枌堇豈其供王羞而棄會稽筍又戲書秦少游壁云丁令威化作遼東白鶴歸朱顏未改故人非微服過宋風退飛宋父擁篲待來歸誰饋白牢鶚鵠妃秦氏烏生八九子雅烏之兄尾畢逋憶炊門牡烹伏雌未肯增巢令汝棲莫愁

野雉疎家雞但願主人印纍纍又贈秦少儀云汝南許文
休馬磨白衣食但聞郡功曹滿世名籍籍渠命有顯晦非
人作通塞秦氏多英俊少游眉最白頗聞鴻雁行筆皆萬
人敵吾早知有覲而不知有覲少儀袖詩來剖蚌珠的皪
乃能持一鏃與我箭鋒直自吾得此詩三日臥向壁挽士
不能寸推去輒數尺才難不其然有亦未易識又送少章
從翰林蘇公餘杭云東南淮海惟揚州國士無雙秦少游
欲攀天關守九府但有筆力迴萬牛文學縱橫乃如此故
應當家有季子時來誰能力作難鴻雁行飛入道山斑衣
兒啼真自樂從師學道也不惡但使新年勝故年卽如常

在郎罷前 又案張文潛亦有送秦少章序

元祐五年庚午先生年四十二

先生被召至京師應制科進策三十篇論二十篇進策序篇

均載集中卷十 既奏除太學博士校正秘書省書籍錫案舊譜載有

二至二十 三月初八日敕命一道辛駕幸太學先生和館閣詩載集中

又晚出左掖詩載集中 春日呈錢尚書戶部詩尚書和詩餉

米再為詩以謝均載集中 有唯有慈親食肉糜之句蓋先生

祿養之誠冰檠之操於此並見之云錫案玩詩首句似當繫於七年舊譜以先生為

太學博士在三年故 先生子處度公湛在都下應秋試未出

繫於此今姑仍之 先生獨坐興國浴室院有詩載集中 少章先生在杭別蘇公

而歸公作太息一篇以贈之其略云張文潛秦少游此兩人
者士之超逸絕塵者也非獨吾云爾二三子亦自以爲莫及
也士駭於所未聞不能無異同故紛紛之言常及吾與二子
吾策之審矣士如良金美玉市有定價豈可以愛憎口舌貴
賤之與少游之弟少章復從吾游不及期年而議論日新若
將施於用者欲歸省其親且不忍去烏乎子行矣歸而求諸
兄吾何加焉作太息一篇以餞其行使藏於家三年然後出
之 是歲作龍圖閣直學士李公擇行狀 載集中卷十六 建隆慶
禪師塔銘 載集中卷十三 禪師卽所稱漳南道人者也

案是年有重過興國浴室院次韻詩並序 載集中卷十一

又案大音先生鏞云慶禪師係黃龍南之法嗣先生爲作

銘

又嘗作慶和尚眞贊

載集中卷三十四

又禪師高郵乾明諸

開堂疏皆先生作語多透宗

載集中卷三十二

蓋先生所交禪衲

如參寥辯才無擇輩皆以詩文相契而其參究宗乘則得

諸慶禪師爲多亦猶坡公之於總老魯直之於晦堂也蘇

公嘗稱先生通曉佛理殆不誣矣先生又嘗有秋懷詩暮

有二客至俱以能禪聞一枝惠林出一派智海分言各不

相可往來劇絲勞謝客姑舍是妨余醉看雲又案山谷是

年題少章詩卷云少章別來文字疊疊日新不惟助秦氏

父兄歡喜子與晁張諸友亦喜交游間當復得一國士然

力行所聞是此物之根本冀少章深根固蒂令此枝葉暢茂也

元祐六年辛未先生年四十三

先生在京師弟少章先生登馬涓榜進士第調仁和主簿張文潛有送秦少章赴臨安主簿序先生作詩送之

載集中卷三

又

有寄少儀弟詩

載集中卷九

七月先生由博士遷正字八月罷

正字依舊校對黃本書籍

錫案此條從辛楣先生補

是年蘇公召入爲翰

林承旨得請外郡出知潁州

元祐七年壬申先生年四十四

先生在京師春三月上巳詔賜館閣官花酒以中澣日游金

明池瓊林院又會於國夫人園會者二十有六人作西城晏

集詩二首

載集中卷九

又作長調以金明池名篇

載後集中卷下

其卒章

云念故國情多新年愁苦縱寶馬嘶風紅塵拂面也則尋芳歸去與前詩末句意同蓋當極盛之時已作歸與之歎嗟乎

可以知先生之心矣 先生父姑卒作李常甯暨秦夫人合

葬墓誌銘

載集中卷三十三

常甯以元祐三年臨軒第一卽以是年

六月卒詔賜錢卹其家天下悲之 冬十月進南郊慶成詩

並表

載集中卷一

又作南郊祭告上請儲祥宮詩

載集中卷七錫案舊譜此條

繫在四年今從辛楣先生更正

作送馮梓州序

載集中卷三十九

錄壯愍劉公遺事

載集中卷三十四

蘇公召入爲端明殿學士禮部尙書

案大音先生鏞云先生春日寓直有懷參寥詩載集中卷九

又案顏魯公新廟記榻本乃先生是年所書有前署明州

定海主簿秘書省校對黃本書籍秦觀書一行先生始登

第除定海主簿尋調蔡州教授元祐三年錫案當作五年除太學

博士校正秘書省書籍六年遷正字錫案六年遷正字兩月即罷當作八年為

是此銜不列教授博士等官當是省文第先生是年已遷

正字而不署豈黃本書籍即正字之所掌耶錫案小峴先生此語亦仍

舊譜之誤故云爾蓋書新廟記實在七年而六年先生為正字兩月即罷至八年再除正字則七年正不得兼署正

字銜記為尚書職方員外郎華州曹輔撰今在山東費縣魯

公祠內筆意瘦勁深得二王遺法碑陰有米黻記文

元祐八年癸酉先生年四十五

先生在京師再除正字遷國史院編修授左宣德郎

續通鑑案據

長編先生六年之遷正字也以趙君錫薦既而賈易詆先生不檢君錫亦有章云臣前薦觀以其有文學今始知其薄於行願寢前薦罷觀新命而先生亦有辭史官表

載集中卷二十六

又

有謝館職啟

載集中卷二十八

是時先生與黃魯直張文潛晁无咎

竝列史官時人稱蘇公門四學士先生以才品見重於上日

有硯墨器幣之賜元日立春先生作絕句三首

載集中卷十一

故事

立春日漢苑供詩帖子蘇公和韻詩云詞鋒雄作楚騷寒德

意還同漢詔寬好遣秦郎供帖子盡驅春色入毫端蘇公作

上元扈從三絕先生亦有和詩

載集中卷十一

九月太皇太后高氏

崩先生作挽詞

載集中卷四十

是時哲宗始親政翰林學士范祖禹

慮小人乘間害政上疏不報祖禹之子元實先生壻也是

歲作宣德郎葛舉墓誌銘

載集中卷三十三

舉江陰人與先生叔父

定同年而其子張仲亦先生壻也是歲蘇公復請外郡出

知定州

案山谷年譜云元祐八年七月呂大防言神宗皇帝正史
限一年了畢契勘昨修兩朝正史係差史官五員今來止
有三員切慮卒難就緒欲差前實錄院檢討官黃庭堅正
字秦觀充編修官從之又近得先生賜硯記拓本於濟河
同知黃君易據云硯藏鉅野李忠愍祠其文云元祐八月

十二日臣觀始供史職是日詔遣中使賜李廷珪張近潘

谷郭玉墨溜石硯

闕闕

盤龍麥光紙點龍染黃越管筆後

三日乃賜器幣近世史臣唯遇開院有墨硯紙筆之賜續
除者但賜器幣而已續除備賜自臣觀始云國史院編修
左宣德郎秘書省正字臣秦觀謹記

紹聖元年甲戌先生年四十六

春三月李清臣發策試進士始有紹復熙豐之意畢漸迎合

擢首選於是執政呂大防范純仁蘇轍范祖禹皆罷先生坐

黨籍改館閣校勘出爲杭州通判先生至汴上作詩一絕

載後集卷

四至陳畱客舍作艇齋詩并序

載集中卷四

御史劉拯論先生在史

館時增損實錄道貶監處州酒稅是時端明蘇公自定州徙英州再貶惠州安置門下侍郎蘇公落職知汝州徙袁州再謫筠州居住黃公魯直出知鄂州再謫黔州張公文潛出知潤州徙宣州晁公无咎謫監信州酒稅 先生到處州任題

務中壁

載集中卷十一

先生元祐中納侍兒朝華時年十九先生賦天風吹月入

闌干詩

載集中卷十一

後三年先生欲修真斷世緣遣朝華歸作

詩以遣之

載集中卷十一

朝華既去不願嫁乃復取歸明年先生

出倅錢塘至淮上因與道友歎流光迅速乃謂朝華曰汝不去吾不得修真矣復作詩遣之曰玉人前去卻重來此

度分攜更不迴腸斷龜山離別處夕陽孤塔白崔嵬時紹
聖元年五月十一日先生嘗手書記此事未幾遂南竄按
此則所載三詩今考集中惟存天風吹月一首又贈道流
四時詩也未詳孰是

見舊譜附錄

紹聖二年乙亥先生年四十七

先生在處州頗以游咏自適釋山下隱士毛氏故居有文英
閣先生嘗寓此賦詩其遊水南庵有詩二絕

載集中卷十一

又嘗遊

府治南園作千秋歲詞

載後集卷中

先生既歿魯直始和此詩其

後范大成來爲處州絕愛其花影鶯聲之句卽其地建鶯花
亭陸放翁有詩云沙外春風柳十圍綠陰依舊著黃鸝故應

畱與行人恨不見秦郎半醉時

紹聖三年丙子先生年四十八

先生在處州旣罷職乃修懺於法海寺因題壁云紹聖元年
觀自國史院編修官蒙恩除館閣校勘通判杭州道貶處州
管庫三年以不職罷將自青田以歸因往山寺中修懺日書

絕句於住僧房壁

載集中卷

先是使者承望風指候伺過失卒

無所得至是遂以謁告寫佛書爲罪削秩徙郴州先生將

赴湖南作遣祭洞庭湖神文

載集中卷三十一

先生至郴陽道中

題一古寺壁二絕

載集中卷十一

歲暮抵郴州

是歲竄范祖禹於

賀州

附冷齋夜話云廬山邨亭湖廟甚靈能分風送往來之舟
秦少游南遷過廟下登岸縱望久之歸臥舟中聞風聲側
枕視微波月影縱橫追繹昔常宿雲老惜竹軒見西湖月
色如此遂夢美人自言維摩詰散花天女也以維摩詰像
來求贊少游愛其畫默念曰非道子不能作此天女以詩
戲少游曰不知水宿分風浦何似秋眠惜竹軒聞道詩詞
妙天下廬山對眼可無言少游夢中題其像曰竺儀華夢
瘴面囚首口雖不言十分似九天覆大千作獅子吼不如
搏取妙喜如陶家手予過雷州天甯與戒禪師夜話問少
游字畫戒出此贊爲示少游筆蹟也案覺範去先生未久

其所紀必實此贊作於夢中比好事近一詞更奇惜集中
不載案洪邁夷堅志載是年先生過長沙有遇義娼事又
考邁所著之容齋四筆云夷堅已志載潭州義娼事謂秦
少游南遷過潭與之往來後娼竟爲秦死常州教授鍾將
之得其說於李結次山爲作傳予反覆思之定無此事當
時失於審訂然悔之不及矣秦將赴杭倖時有妾邊朝華
旣而以妨其學道割愛去之未幾罹黨禍豈復眷戀一娼
女哉予記國史所書溫益知潭州當紹聖中逐臣在其巡
內若范忠宣劉仲馮韓川原伯呂希純子進呂陶元鈞皆
爲所侵因鄒公南遷過潭暮投宿村寺益卽遣州都監將

數卒夜出城逼使登舟竟凌風截江去幾於覆舟以是觀之豈肯容少游款昵累日此不待辨而明已志之失著矣

紹聖四年丁丑先生年四十九

先生在郴州

作法帖通解并自序

載集中卷三十五

作阮郎歸

詞

載後集卷下

又作踏莎行詞

載後集卷中

黃魯直跋此詞云絕似劉

夢得楚蜀閒詩坡公亦絕愛此詞尾兩句自書於扇曰嗟乎

少游已矣雖萬人何贖是歲范純仁謫永州呂大防謫循

州卒於虔州劉摯卒於新州梁燾卒於化州程頤編管涪州

范祖禹自貨州徙賓州蘇軾自惠州徙瓊州先生自郴州奉

詔編管橫州感而作冬蚊之詩

載後集卷四

案大音先生鏞云子瞻海外注易傳荆公退居作字說先生於流離播遷時作法帖通解古人不肯輕擲歲月類如此

元符元年戊寅先生年五十

先生自郴州赴橫州 五十自壽作反初古詩一首

載集中卷四

既至橫州荒落愈甚寓浮槎館居焉城西有海棠橋

案若航先生鈞

儀云明一統志載黃州府海棠橋題此詞非是橋南北皆有海棠書生祝姓者居之

先生嘗醉宿其家明日題其柱

載後集卷十

詞刻於州志海棠橋

至今有遺蹟云 作甯浦書事六言詩

載集中卷十

是歲范祖

禹自賓州再徙卒於化州

附王濟著曰詢手鏡云橫州海棠橋長百餘尺皆以鐵力
爲材宋時所建者其地建亭亦名海棠亭數年前建業黃
琮守州改爲淮海書院余嘗至訪遺蹟有壞碑數通漫滅
不可讀後一小碑什於地拂拭觀之乃刻晁无咎像也云
晁嘗不遠萬里來訪淮海故存其刻云

元符二年己卯先生年五十一

先生自橫州徙雷州先是子由自筠州徙雷州是時已改循
州故不相及而子瞻尙在瓊州瓊雷隔海而實近子瞻寄子
由詩云莫嫌瓊雷隔雲海聖恩尙許遙相望故先生至是復
得與蘇公通問不至寂寂如橫州時矣先生作雷陽書事三

首

載集中卷四

又作海康書事十首

載集中卷四

先生每有諷詠輒自

作書因便寄瓊州蘇公謂其少子過曰秦少游張文潛才識學問爲當世第一無能優劣二人皆辱與余游同升而並黜有自雷州來者遞至少游所惠書詩累幅近居蠻夷得此如在齊聞韶也公又跋先生書云少游近日草書便有東晉風味作詩增奇麗乃知此人不可使閒遂兼百技矣技進而道不進則不可少游乃技道兩進也

元符三年庚辰先生年五十二

先生在雷州

正月哲宗崩皇弟端王佖卽位向太后臨朝

韓忠彥相

先生於是歲之春自作挽詞

載集中卷四十

五月下赦

令遷臣多內徙蘇公量移廉州寓書來云頃得移廉之令治
裝十日可辦但須得泉人許九船卽牢穩可恃餘蜚船多不
堪而許見在外邑未還須至少畱待之約此月二十五六間
方可登舟竝海岸行一日至石排相風色過渡一日遞角場
但相風難克日耳有書託吳君僱二十壯夫來遞角場相等
若得及見少游卽大幸也至六月二十五日蘇公與先生相
會於海康先生因出自作挽詞呈公公撫其肩曰某嘗憂逝
未盡此理今復何言某亦嘗自爲誌墓文封付從者不使過
子知也遂相與嘯咏而別初先生謁公彭門詩有云更約後
期游汗漫蓋識於此云先生旣別公無何被命復宣德郎放

還於是作歸去來詞一篇和陶元亮

載集中卷一

先生於是

寓書廉州且云傳言未果公報書云海外孤老志節朽敗何

意復接平生欽友伏閱妙迹懔懔有生意幸甚前所聞果的

否若信然得文字後亦須得半月乃行自此徑乘蜑船至徐

聞出路不知猶及一見否示諭二范之賢不惟喜公得婿小

范且以慶吾友夢得之有子爲不死也言之淚落不已兒子

過蒙許與恐不副所期實能躬勞辱以佚厥考爾令子想大

成曾寄所作來否借一二亦佳文潛无咎得消耗否魯直云

宣義監鄂酒吳子野自五羊來云溫公贈太尉曾子宣右揆

的否未可知也廉州苟得安居取小子一房來終焉可也生

如暫寓亦何所擇果行衝冒慎重先生遂以七月啟行而歸
踰月至藤州尙無恙因醉臥光化亭忽索水飲家人以一盂
注水進先生笑視之而卒實八月十二日也先是先生嘗於
夢中作好事近詞一闕

載後集卷中

云春路雨添花花動一山春

色行到小溪深處有黃鸝千百飛雲當面化龍蛇天矯轉空
碧醉臥古藤陰下了不知南北至是卒於藤州人皆以爲詩
識方是時蘇公復自廉州內徙永州旣就道未至藤州十日
聞計驚悼因與友人書曰某與兒子八月二十九日離廉九
月六日到鬱林七日遂行初約畱書歐陽晦夫處忽聞秦少
游凶問畱書不可不言欲言又恐不的故不忍下筆今行至

白州見容守之猶子陸齋郎云少游過容畱多日飲酒賦詩如平常容守遣般家二卒送歸衡州至藤傷暑困臥至八月十二日啓手足於江亭上徐守甚照管其喪仍遣人報范承務范自梧州赴其喪此二卒申知陸守者止於如此其他莫知其詳也然其死則的矣哀哉痛哉何復可言當今文人第一流豈可復得此人在必大用於是不用必有所論著以曉後人前此所著已足不朽然未盡也哀哉哀哉其子甚奇俊有父風唯此一事差慰吾輩意某不過旬日到藤可以知其詳續奉報次旣而公又與李端叔書曰某六十五矣體力毛髮正與年相稱或得與公相見亦未可知已前者皆夢已後

者獨非夢乎置之不足道也所喜者淮南了得易書論語傳
數十卷似有益於骨朽後人耳目也少游遂死於道路哀哉
痛哉世豈復有斯人乎端叔亦老矣迨云鬚髮已浩然顏
極丹且渥僕亦如此耳各宜闕嗇庶復相見也嗟乎觀公二
書可以知公矣可以知先生矣是歲處度公湛自旅次匍匐
來奔扶櫬北還

案大音先生鏞云宋史及家譜皆言先生五十三卒譜又
以爲是建中靖國元年而不載日月及考蘇集乃知爲八
月十二日旣係八月則其非建中靖國甚明矣蓋蘇公實
以改元七月二十八日卒於常州使先生後公十五日死

則蘇公已前死矣又安得悲傷道路涕淚筆札且取其詩
詞墨蹟而讚歎之箋注之也哉再取蘇黃諸別集一一取
證則元符庚辰之八月爲先生觀化之期了無可疑鏞旣
與家弟鎡反覆校勘遂斷然命筆更定前譜又以蘇黃二
先生之書次第附列要以見古人文章道義之交至生死
患難尤勤惓若此微獨傳信示子孫而已亦使天下後世
之君子得以覽觀焉

徽宗建中靖國元年辛巳

處度公湛奉先生靈柩停殯於潭州 三月二十一日蘇公
跋先生好事近詞云少游昔在虔州嘗夢中作此詞供奉宮

莫君沔居湖南喜從遷客游尤爲呂元鈞所稱又能誦少游
事甚詳爲余道此詞至流涕乃錄本使藏之其後魯直又跋
云少游醉臥古藤下誰與愁眉唱一杯解作江南斷腸句只
今惟有賀方回 蘇公手錄先生挽詞書其後云庚辰歲六
月二十五日余與少游別於海康意色自若與平日不少異
但自作挽詞一篇人或怪之余以爲少游齊生死物我戲
出此語無足怪者已而北歸至藤州以八月十二日卒於光
化亭上嗚呼豈亦自知當然者耶 是歲黃魯直辭免吏部
郎待命荆南作荆江亭卽事詩其一云閉門覓句陳無已對
客揮毫秦少游正字不知溫飽未西風吹入古藤州蓋仿杜

詩存沒絕句篇中一存一沒時先生沒而已存也 七月二十八日前端明殿學士蘇公卒於常州時年六十六張文潛時爲潁州聞蘇公卒爲舉哀行服坐落職安置黃州 十二月陳無已師道卒無已以正字入館未幾以寒得疾樓異世可時爲登封令夜夢無已見別行李遽甚樓間是行何之曰暫往杏園東坡少游諸人在彼已久樓起視事而得參寥子報云無已逝矣無已操行高潔與李方叔廬晚遊蘇門次於四公世稱六君子云

崇甯元年壬午

詔立黨人碑於端禮門先生與焉 右正言鄒浩竄昭州哲

宗朝浩諫立后竄新州召還至是復竄浩作夢少游先生詩
曰淮海維揚第一流三關齊透萬緣休真心豈復隨灰劫遺
骨猶然寄橘洲專爲流通深歎賞莫相鈍置豁愁憂覺來欲
語無人聽屋角熒熒空斗牛蓋是時先後竄粵西者惟先生
與鄒忠公二人而已是歲處度公湛守制於潭州

崇甯二年癸未

黃魯直再謫宜州道經長沙遇處度公湛暨范元質贈詩五
首昔在秦少游許我同門友掘獄無張雷劍氣在斗牛今來
見令子文似前哲有何用相澆潑清江淥如酒范公太史僚
山立乃先達發揮百代史管以六經轄投身轉嶺海就木乃

京洛仲子見長沙且用慰饑渴秦郎水江漢范郎器鼎爾逝
者不可尋猶喜二子在相逢唾珠玉貧病問薪菜豫愁帆風
船目極別所愛往時高交友宰木已樅樅今我二三子事業
在燈窗秦范波瀾闊笑陸海潘江願茲秉經術出仕榮家邦
少游五十策其言明且清筆墨深關鍵開闔見日星陳友評

斯文如鐘磬鼓笙誰能續鳳鳴洗耳聽兩甥

案舊注云秦范相謂甥疑處度

公亦范氏婿也又案元實祖禹仲子先生易簣時范承務來
視其喪疑卽元實之兄意祖禹卒於化州二范奔赴亦遂流
寓無常故得相從於此耶蘇公答先生書亦稱二范
之賢合此詩觀之一時故人懷愴之懷千載如見 詔黨人

子弟毋得至闕下令州縣立黨人碑詔毀范祖禹唐鑑蘇軾

黃庭堅秦觀文集

案大音先生鏞云先生文集其見於自序者止閒居集十卷策論五十篇然此皆元祐以前作據宋史淮海集四十卷詩餘一卷今行世者卷帙雖不加少疑非當日之全書意當日所毀必有不盡於是者

崇甯三年甲申

魯直和先生千秋歲詞題曰少游得謫嘗夢中作詞云醉臥古藤陰下了不知南北竟以元符庚辰死於藤州光化亭下崇甯甲申庭堅竄宜州道過衡陽覽其遺墨始追和其千秋歲詞苑邊花外記得同朝退飛騎軋鳴珂碎齊謳雲繞扇趙舞風回帶嚴鼓斷杯盤狼籍猶想對灑淚誰能會醉臥藤陰

蓋人已去詞空在兔園高會悄虎觀英游改重感慨波濤萬
頃珠沈海又魯直和先生梅花詩題云花光仲仁出秦蘇詩
卷思兩國士不可復見開卷絕歎因花光爲我作梅數枝及
畫煙外遠山追少游韻記卷末夢蝶真人貌黃槁籬落逢花
須醉倒雅聞花光能畫梅更乞一枝洗煩惱扶持愛梅說道
理自許牛頭參已早長眠橘洲風雨寒今日梅開向誰好何
況東坡成古止不復龍蛇看揮掃我向湖南更嶺南繫船來
近花光老歎息斯人不可見喜我未學霜前草寫盡南枝與
北枝更作千峯倚晴昊

舊注橘州在湘江中因先生橐
殯長沙故有長眠橘州之語

是時

魯直又有絕句詩題云余去歲在長沙數與處度元實相從

把酒自過嶺來不復有此樂感歎之餘戲成一絕詩不復錄

崇甯四年乙酉

詔除黨人父兄子弟之禁於是處度公奉先生喪歸葬於廣陵道謁張文潛於黃州文潛爲文以祭焉其詞曰維崇甯四年歲次乙酉閏月某日甲子具位張耒謹以家餽清酒遣男秬敬祭於亡友少游之靈嗚呼少游淮海之英自其少時文章有聲脫略等輩論交老成眾譽歸之誰敢改評聿來秘書亦旣飛鳴脫身亟去事變隨生嗚呼位不過正字年不登下壽間關憂患橫得罵詬竄身障海隕什荒陋君孤奉喪歸葬廣陵拜我於黃尚有典型會葬撫孤我窮不能具此菲薄聊

致鄙誠隻雞斗酒懷想平昔嗟我少游尙肯來食尙饗是
歲九月三十日魯直黃先生卒於宜州年六十一

崇甯五年丙戌

詔毀黨人碑

大觀元年丁亥

張文潛跋先生投呂正獻公卷云予見少游投卷多矣黃樓
賦哀鏹鐘文卷卷有之豈其得志之文與少游平生爲文不
多而一一精好可傳在嶺外亦時爲文自爲輓詩一章殊可
悲也此卷是投正獻公者今藏居仁處居仁好其文出以示
余覽之令人愴恨大觀丁亥中春張耒書

大觀二年戊子

大觀三年己丑

大觀四年庚寅

是歲晁公无咎卒於泗州年五十八

案晁公卒後二年壬辰參政子由蘇公右史文潛張公竝
卒子由年七十四文潛年六十一

政和元年辛卯至政和七年丁酉

凡七年

處度公湛通判常州遷葬先生於無錫惠山西三里之璨山
宋張理秦太虛墓詩云九峯朝暮雲搖落少游墳野蔓碑全
沒晴庵磬亦聞洞偏泉路細松折鶴巢分高視太湖近雲濤

鷗起羣又元柳貫璨山詩云明陽觀後慧山前新營堂館貯
風煙藤陰不蔽淮海墓茶井遙連桑亭泉好景正須多領略
佳辰且復少流連劉伶一鋪太早計卻要冥靈受大年又明
朱昇過秦淮海墓詩云起塚錫山隅藤州旅櫬歸死生應不
愧用舍白多違薜荔山靈泣松林野鶴飛墓門荒草合樵牧
遍斜暉

案舊譜止云政和間遷葬不註何年今不敢妄定又崇甯
四年已歸葬廣陵矣今豈從廣陵遷葬於此耶據錫山志
其墓有誥命碑記歲久湮沒今僅存龍圖墓三字碑以識
其處云又案先生祭洞庭神文云母年七十令湛謀侍南

來其後未詳太夫人以何年卽世及到郴州與否豈以先生遠竄甯浦遂不復從耶先生歸去來兮詞云及我家於中途亦未審何地豈處度公流寓長沙已久故遂迎櫬藁殯於是耶凡此類多不可考姑闕之要之處度公間關數千里歷十數年之久卒能扶櫬以歸卜壤善地可謂不負蘇黃兩先生之期許者矣至若少章少儀兩先生隱者以何年仕仕者以何年歸皆莫得而詳焉惜哉

崇和元年戊戌

宣和元年己亥至宣和七年乙巳

凡七年

欽宗靖康元年丙午

高宗建炎元年丁未

建炎二年戊申

建炎三年己酉

建炎四年庚戌

詔追贈先生直龍圖閣與黃公庭堅張公耒晁公補之四人
同命詞云勅故宣德郎秦觀等自熙甯大臣用事變法始以
異同排斥士大夫維我神祖念之不忘元豐之末稍稍收召
接於元祐英俊盈朝而爾四人以文采風流爲一時冠學者
欣慕之及繼述之論起黨籍之禁行而爾四人每爲罪首則
學者以其言爲諱自是以來摺紳道喪綱紀日隳馴至宣和

之亂言之可爲痛心肆朕纂承旣從昭洗今爾四人復加褒
贈斯足以見朕志矣嗚呼西清之遊書殿之選唯爾曹爲稱
使生而得用能盡其才亦何止於是歟舉以追命聊伸賁志
之恨亦以少慰天下士大夫之心英爽不忘歆此休顯是
歲建亭墓下刻誥辭及山谷送少章先生詩置於亭中先生
卒庚辰至是庚戌凡二十年始蒙卹贈

淮海集年譜終

淮海集附錄

舒王答蘇內翰薦秦公書

安石啓得書知尙盤桓江北俯仰逾月不勝感悵示及秦君詩適葉致遠一見亦謂清新嫵麗鮑謝似之公奇秦君口之而不置我得其詩手之而不釋又聞秦君嘗學至言妙道無乃笑我與公嗜好過乎餘卷正眊眩未暇細讀嘗鼎一臠旨可知也愈遠自愛不宣安石啓上

曾子開答淮海居士書

某頓首復書太虛足下某比過高郵始得足下姓名於所書舅氏埋銘中後遊金山遇參寥詩愛其溫粹有文然未知與足下

善參寥至京久而復見自言與足下遊最舊一日出足下所爲詩并雜文讀之其辭瓌瑋閎麗言近指遠有騷人之風且誦且歎欣然如獲明珠大璧德非隋侯識非卞和未敢謂能辨之然磊落奇怪動人耳目固已知其爲希世之寶矣他日以示一二同舍皆咨嗟愛玩然後信其真靈蛇之珠荆山之璞也方其時雖未識足下面而心亦已相親因其文而想見其人余固知足下之爲也旣而辱顧敝廬未及再見而行李已東繼辱枉書歷敘未嘗相求而相知之意以謂有古人之風此非固陋之所敢當雖然吾二人者皆與參寥遊因參寥以相得雖異乎世俗之相求蓋所因者賢也又蒙示以詩賦文記七篇蓋見文章之富

擴而充之何所不至又區區竊望足下於他日也久欲以書敘萬一都城多故每以事奪足下旣相期以古人之誼則疏數淹滯固未足道也卽日且畱里中或寓他郡春寒眠食佳否未獲晤對嚮風馳千萬

蘇內翰答淮海居士書


寄示詩文皆超然勝絕疊疊爲來逼人矣如我輩亦不勞逼也太虛未免求祿仕方應舉不可必竊爲君謀宜多著書如所示論兵及盜賊等數篇但似此等數十首皆卓然有可用之實者不須及時事也但旋作此書亦不可廢應舉此書若成聊復相示當有知君者想喻此意也

後山居士陳師道撰淮海居士字序

熙甯元豐之間眉蘇公之守徐余以民事太守間見如客揚秦
子過焉置禮備樂如師弟子其時余病臥里中聞其行道雍容
逆者旋自論說偉辨坐者屬耳世以此奇之而亦有以此疑之
惟公以爲傑士是後數歲從吳歸見於廣陵逆旅之家夜半語
未卒別去余亦以爲當建侯萬里外也元豐之末余客東都秦
子從東來別數歲矣其容克然其口隱然余驚焉以問秦子曰
往吾少時如杜牧之強志盛氣好大而見奇讀兵家書乃與意
合謂功譽可立致而天下無難事顧今二虜有可勝之勢願効
至計以行天誅回幽夏之故墟弔唐晉之遺人流聲無窮爲計

不朽豈不偉哉於是字以太虛以導吾志今吾年至而慮易不待蹈險而悔及之願還四方之事歸老邑里如馬少游於是字以少游以識吾過常試以語公又以爲可於子何如余以謂取善於人以成其身君子偉之且夫二子或進以經世或退以存身可與爲仁矣然行者難工處者易持牧之之智得不若少游之拙失也子以倍人之才學益明矣猶屈意於少游豈過直以矯曲耶子年益高德益大余將屢驚焉不一再而已也雖然以子之才雖不効於世世不捨子余意子終有萬里行也如余之愚莫宜於世乃當守邱墓保田里力農以奉公子謹身以訓閭巷生稱善人死表於道曰處士陳君之墓或者天祚以年見子

功遂名成奉身以還王侯將相高車文馬祖行帳飲於是策庫
御驚候於上東門外舉酒相屬成公知人之名以爲子賀蓋自
此始元祐元年二月二日



PL
2687
C53
v. 2

淮海集目錄

卷首

序

本傳

遺像


像贊

年譜

附錄

卷之一

賦



浮山堰賦

并引

黃樓賦

并引

子瞻謝詩附

寄老庵賦

湯泉賦

子瞻跋語附

歎二崔賦

郭子儀單騎見虜賦

和淵明歸去來辭

卷之二

詩五言古

泊吳興西觀音院

三老堂

送僧歸遂州

送周裕之赴新息令

寄曾逢原

司馬遷

田居四首

寄題傅欽之草堂

次韻徐仲車見寄

次韻邢敦夫秋懷十首

春日雜興十首

和莘老題召伯斗野亭

莘老魯直子瞻子由
張琬張芸叟詩附

卷之三

詩 五言古

陪彥瞻游金山和子由詩

子由子
駿詩附

同子瞻端午日游諸寺賦得深字

子瞻
詩附

寄陳季常

同子瞻參寥游惠山三首

子瞻參
寥詩附

送少章弟赴仁和主簿

送李端叔從辟中山

贈賽法師翊之

送劉貢父舍人二首

南京妙峯亭

次韻奉酬丹元先生

送裴仲謨

題雙松寄陳季常

徐仲車食於學官吏或以爲不可欲罷去之太守不聽
禮遇如初感之而作

卷之四

詩五言古

次韻夏侯太冲秀才

送張叔和兼簡魯直

和王忠玉提刑

飲酒詩四首

艇齋

并序

和裴仲謨摘白鬚行

覲覲二弟作小室請書魯直名曰寄寂作此寄之用孫

子實韻

子實詩附

反初

精思

送楊康功守蘇

偶戲

正仲左丞生日

病犬

和子瞻雙石

雷陽書事三首

海康書事十首

次韻曾存之嘯竹軒

游仙二首

次韻答張文潛病中見寄

與子瞻參寥會松江得浪字

子瞻參寥詩附

卷之五

詩七言古

觀易元吉獐猿圖歌

夜坐懷莘老司諫

答朱廣微

送僧歸保寧

和王通叟琵琶

醫者

漫郎

記夢答劉全美

和虛飄飄魯直子瞻詩附

馬上口占二首

別子瞻子瞻詩附

卷之六

詩七言古

和黃法曹憶建溪梅花同參寥賦參寥子瞻子由詩附

題驪裘圖

和東坡紅鞋帶

題楊康公醉道士石

送蔡子驤用蔡子駿韻

和裴仲謨放兔行

南都新亭行寄王子發

以萼薑法魚糟蟹寄子瞻

贈女冠暢師

次韻黃冕仲寄題順興步雲閣

徐得之閑軒

送喬希聖

卷之七

詩 五言律 排律

輦下春晴

睡起

次韻莘老初至湯泉二首

莘老詩附

過六合水亭懷裴博士次韻三首

懷孫子實

對淮南詔獄二首

次韻答米元章

宿參寥房

次韻米元章齋居卽事

次韻酬陳傳道

次韻傳道自適兼呈都司芸叟學士

次韻子由題斗野亭

子由詩附

德清道附寄子瞻

以下排律

鮮于子駿使君生日

次韻蔣穎叔南郊祭告上清儲祥宮二十七韻

擬郡學試東風解凍

卷之八

詩七言律

駕幸太學

題闕求仁虛樂亭三首

懷李公擇學士

次韻二首

題湯泉二首

寄題王欽之自圓庵

流觴亭次韻二首

游龍門山次程公韻

游龍瑞宮次程公韻

次韻朱李二君見寄二首

睡足軒二首

寄孫莘老少監

次韻馬忠玉喜王定國還自濱州

寄李公擇郎中

寄李端叔編修

寄題倪敦復北軒

寄題廬君斗齋

次韻酬周開祖宣義

送王元龍赴泗州糧料院

次韻子由九曲池

子由詩附

次韻子由平山堂

子由詩附

次韻子由題蜀井

子由詩附

次韻子由摘星亭

子由詩附

次韻子由題光化塔

子由詩附

次韻子瞻贈金山寶覺大師

子瞻詩附

游鑑湖

謁禹廟

蓬萊閣

公闢詩附

別程公闢給事

公闢次韻詩附

中秋口號

客有傳朝議欲以子瞻使高麗大臣有惜其去者白罷

之作詩以紀其事

莘老詩附

卷之九

詩七言律

顯之禪老許以草庵見處作詩以約之二首

參寥詩附

和莘老游龍洞

莘老參寥詩附

送蔣穎叔帥熙河二首

和劉僕射感舊言懷寄蘇左丞

西城宴集元祐七年三月上巳詔賜館閣官花酒以申

滌日游金明池瓊林院又會於國夫人園會者二十

有六人

清明前一日李觀察席上得風字

次韻羅正之惠絲扇

寄新息王令藏春塢

送劉承議解職歸養

次韻王仲至侍郎會李觀察池上

慶張君俞都尉畱後得子

寄題趙侯澄碧軒

寄張文潛右史

次韻裴君上太守向公二首

次韻太守向公登樓眺望二首

寄錢節

贈劉使君景文

答龔深之

次韻答裴仲謨

答曾存之

春日寓直有懷參寥

次韻裴仲謨和何先輩二首

答闕求仁謝參寥彥溫訪於墳所

次韻劉遜父以寧齋詩二軸作以還之

次韻何子溫

次韻宋履中近謁大慶退食館中

與鄧慎思沐於啓聖遇李端叔

和程給事賢閣黎化去之什

再賦流觴亭

燕觴亭

會蓬萊閣

次韻侍祠南郊

與李端叔游智海用前韻

和黃冕仲寄題延平冷風閣

次韻謝李安上惠茶

次韻范純夫戲答李方叔饋筍兼簡鄧慎思

寄少儀弟

九月八日夜大風雨寄王定國

林次中奉使契丹劉仲平出倅鄆州同舍十有六人飲
餞于丁氏園次少蓬韻二首

卷之十

詩 五六言絕

題趙團練江干曉景四首

夢中得此

甯浦書事六首

卷之十一

詩 七言絕

寄孫傳師著作

泗州東城晚望

戲雲龍山人二首

圓通院白衣閣三首

照閣

睡足寮寄震鼎二弟

次韻參寥見別

與倪老伯輝宿九曲池有懷元龍參寥

春日五首

秋日三首

次韻子由召伯埭見別三首

子由詩附

還自廣陵四首

元日立春三首

次韻宋履中題李侯檀欒亭

春日偶題呈錢尚書

戶部錢尚書和詩餉米再成二章上謝

擬題織錦閣

晚出左掖

次韻蔡子駿瓊花

處州水南庵二首

三月晦日偶題

次韻東坡上元扈從三絕

四時四首贈道流

奉別牛司理

送酒與泗州太守張朝請

題郴陽道中古寺壁二首

又別牛司理

和工部侍郎新章

題金華山寺壁

出省馬上有懷蔣穎叔次韻

穎叔詩附

元祐三年余被召至京師從翰林蘇先生過興國浴室
院始識汶師後二年復來閱諸公詩因次韻

客有遺予以假山石池聞陳元發有石菖蒲作詩乞之
興國浴室院獨坐時兒子湛就試未出

題務中壁

題法海平閣黎

畱別平閣黎

卷之十二

進策

序篇

國論

主術

治勢上

治勢下

卷之十三

進策

安都

任臣上

任臣下

朋黨上

朋黨下

卷之十四

進策

人材

法律上

法律下

論議上

論議下

卷之十五

進策

官制上

官制下

財用上

財用下

卷之十六

進策

將帥

奇兵

辯士

謀主

卷之十七

進策

兵法

盜賊上

盜賊中

盜賊下

卷之十八

進策

邊防上

邊防中

邊防下

卷之十九

進論

鼂錯

韋元成

石慶

張安世

卷之二十

進論

李陵

司馬遷

李固

陳寔

卷之二十一

進論

袁紹

魯肅

諸葛亮

臧洪

王導

崔浩

卷之二十二

進論

王儉

韓愈

李泌

白敏中

李訓

王朴

卷之二十三

論

擬郡學試近世社稷之臣論

聖人繼天測靈論

變化論

君子終日乾乾論

以德分人謂之聖論

卷之二十四

傳

浩氣傳

卷之二十五

傳說

陳偕傳

眇倡傳

魏景傳

汝水漲溢說

心說

二侯說

十二經合義

卷之二十六

表

賀坤城節表

賀興龍節表

代賀太皇太后受冊表

代賀皇太后受冊表

代賀皇太后生辰表

代賀明堂禮畢表

代賀皇太后受冊表

爵史官表

代蘄守謝上表

代程給事乞致仕表

代王承事乞回授一官表

卷之二十七

表

代謝勅書獎諭表

代謝加勳封表

代賀元會表

代謝工部侍郎表

代中書舍人謝表

代南京謝上表

代中書舍人謝上表

代謝歷日表

卷之二十八

啓

謝及第啓

賀呂相公啓

賀蘇禮部啓

賀中書蘇舍人啓

謝程公闢啓

謝館職啓

賀崔學士啓

代賀呂司空啓

代賀中書僕射范相公啓

代賀門下孫侍郎啓

代賀中書劉侍郎啓

卷之二十九

啓

代賀王左丞啓

代賀胡右丞啓

代賀京西運判啓

賀京西運使啓

代賀簽書趙樞密啓

代賀蔡相公啓

代賀司馬相公啓

代賀胡右丞知陳州啓

代賀錢學士啓

代賀提刑啓

代回胡右承年節啓

代回呂吏部啓

代謝中書舍人啓

代賀運使啓

代賀提刑落權發遣字啓

謝胡晉侯啓

代參寥與鍾公實啓

卷之三十

簡

答傅彬老簡

與蘇先生簡

與邵彥瞻簡

與孫莘老簡

與黃魯直簡

與蘇子由著作簡

與李德叟簡

與蘇黃州簡

與李樂天簡

與參寥簡

卷之三十一

文

謁先師文

祈晴文

祭馬通議文

弔罇鍾文

遣瘡鬼文

祭洞庭文

謁宣聖文

告狄梁公文

告李太尉文

祭勾芒神文

代蔡州太守謁先聖文

謁嶽廟文

謁城隍文

祈晴文

謝晴文

卷之三十二

文疏

謝雨文

獲賊祭廟文

赦後省賽文

祭歐陽夫人文

祭韓康公文

祭酺神文

登第後醺謝青詞

代蔡州進興龍節功德疏

正賜庫功德疏

興龍節功德疏二道

蔡州進生辰疏

神宗功德疏

高郵長老開堂疏

寶林開堂疏

乾明開堂疏

醴泉開堂疏

卷之三十三

誌銘

李狀元墓銘

慶禪師塔銘

葛宣德墓銘

徐氏墓銘

虞氏墓銘

李氏墓銘

掩關銘

劉氏研銘

穎師研銘

廬州任使君墓表

卷之三十四

贊跋

龍邱子眞贊

李潭漢馬圖贊

南都法寶一長老眞贊

建隆慶和尚眞贊

書王蠋後事

書輞川圖後

高無晦跋尾

裴秀才跋尾

錄壯愍劉公遺事

卷之三十五

跋

法帖通解序

漢章帝書

倉頡書

仲尼書

史籀李斯書

鍾繇書

懷素書

書晉賢圖後

書蘭亭敘後

卷之三十六

狀

鮮于子駿行狀

徐主簿行狀

蔡氏行狀

圓通禪師行狀

錄寶林事實

代蔡州進銀絹狀

代蔡州進瑞麥圖狀

代薦蔡奉議狀

卷之三十七

書

上王岐公論薦士書

上呂晦叔書

謝王學士書

謝曾子開書

與喬希聖論黃連書

與鮮于學士書

婚書

卷之三十八

記

御書手詔記

五百羅漢記

雪齋記

龍井記

龍井題名記

子瞻跋
尾附

閒軒記

芝室記

祖氏先塋芝記

羅君生祠記

蔡州勅書獎諭記

游湯泉記

卷之三十九

序

俞紫芝字序

曹虢州序

逆旅詩序

揚州集序

會稽唱和詩序

懷樂安蔣公唱和詩序

送錢秀才序

王定國注論語序

集瑞圖序

送馮梓州序

卷之四十

哀挽

大行皇太后挽詞二首

韓樞密夫人挽詞二首

俞公達待制挽詞二首

陳承事挽詞

永壽縣君挽詞

曾子固哀詞

蔡氏哀詞

時宣義挽詞

中書侍郎挽詞

呂與叔挽詞

東平夫人挽章

開封李公挽章

孫莘老挽詞

陳用之挽詞四首

滕達道挽詞二首

自作挽詞

淮海集

目錄

三

淮海集目錄終

淮海集卷一


宋秦觀少游著

明徐渭天池評

裔孫元

愷湘屏
慶筱浦
恆鏡秋

校刊



賦附辭

浮山堰賦

并引

梁武帝天監十三年用魏降人王足計欲以淮水灌壽陽乃假
太子右衛康絢節督卒二十萬作浮山堰於鍾離而淮流湍駛
漂疾將合復潰或曰淮有蛟龍喜乘風雨壞岸其性惡鐵絢以
爲然乃引東西治鐵器數千萬斤益以薪石沈之猶踰年乃合
堰袤九里水逆淮而上所蒙被甚廣魏人患之果徙壽陽戍頓

入公山餘民分就岡隴未幾淮暴漲堰壞奔于海有聲如雷水之怪妖蔽流而下死者數十萬人初鎮星犯天江而堰實退舍而壞嗚呼異哉感而作浮山堰賦其詞曰

緊四瀆之竝醜兮寔脈絡於坤靈惟長淮之淩漫兮自桐柏而發源貫江河以下鶩兮拉泗沂而左奔走獐雷以赴海兮駕扶搖而薄山固元氣之宣節兮熄眾兆之災患粵蕭梁之服命兮抗北魏以爭衡信降虜之詭計兮阻湯湯而倒征依兩崖以受上兮羌合脊於中央撻竹留石之不足兮又沈鐵以厭不祥袤九里以中峙兮截萬派之奔茫大隄屹乎如墉兮杞柳薨其成行展源深而支永兮雖斲否而必通倏鯨吼以奔潰兮與蒼蒼

而俱東。若燃犀之照渚兮。旅百怪而爭遁。駢馬怒而噓蹠兮。虎
蛟咆而相糾。哀死者之數萬兮。孤魂逝其焉游。背自然以司鑿
兮。固神禹之所惡。世苟近以昧遠兮。或不改其此度。螳蜋怒臂
以當車兮。飛衛銜石而填海。憐梁人之不思兮。卒取非於異代。
豈方迫於尋引兮。不遑議夫無窮。將姦臣取容以幸入兮。公相
援而欺蒙。抑五材囚壯之有數兮。特假手於憧憧。系曰。敦阜寇
冥大川屯。精氣扶輿變。乾文運徒力。頓漂無根。潮波復故。彌億
年。

黃樓賦

并引

太守蘇公守彭城之明年。旣治河決之變。民以更生。又因修繕

其城作黃樓於東門之上。以爲水受制於土。而土之色黃。故取名焉。樓成。使其客高郵秦觀賦之。其詞曰。

惟黃樓之瓌瑋兮。冠雉堞之左方。挾光晷以橫出兮。干雲氣而上征。旣要眇以有度兮。又洞達而無旁。斥丹雘而不御兮。爰取法乎中央。列千山而環峙兮。交二水而旁奔。岡陵奮其攫拏兮。谿谷效其吐吞。覽形勢之四塞兮。識諸雄之所存。意天作以遺公兮。慰平日之憂勤。繫大河之初決兮。狂流漫而稽天。御扶搖以東下兮。紛萬馬而爭前。象罔出而侮人兮。螭蜃過而垂涎。微精誠之所貫兮。幾孤墉之不全。偷朝夕以昧遠兮。固前識之所羞。慮異日之或然兮。復壓之以茲樓。時不可以驟得兮。姑從容。

而浮遊。儻登臨之信美兮。又何必乎故丘。觴酒醪以爲壽兮。旅
殽核以爲儀。儼雲髻以侍側兮。笑言樂而忘時。發哀彈與豪吹
兮。飛鳥起而參差。悵所思之遲暮兮。綴明月而成詞。噫變故之
相詭兮。適傳馬之更馳。昔何負而遑遽兮。今何暇而遨嬉。豈造
物之莫詔兮。惟元元之自貽。將苦逸之有數兮。疇工拙之能爲。
騷哲人之知其故兮。蹈夷險而皆宜。視蚊虻之過前兮。曾不介
乎心思。正余冠之崔嵬兮。服余佩之焜煌。從公於斯樓兮。聊裴
回以徜徉。子瞻因太虛以黃樓賦見寄作詩爲謝云。我坐黃樓上。欲作黃樓詩。忽得故人書。中有黃樓詞。黃樓高十丈。下建五丈旗。楚山以爲城。泗水以爲池。我詩無傑句。萬景驕莫隨。夫子獨何妙。雨雹散雷摧。雄辭雜今古。中有屈宋資。南山多磬石。清滑如流脂。朱蠟爲摹刻。細妙分毫釐。佳處未易識。當有來者知。

寄老庵賦

或問孫先生之遊湯泉山也。嘗於佛祠之旁。二松之下。誅薙草茅。平夷土塗。規以爲庵。曰寄老焉。予時實從與見其事。願揚摧而陳之。僕曰唯唯。寄老之區。在於湯泉。實惟歷陽。東城之域。山林鬱其修阻。水土婉而滋息。風和氣平。物無癘疫。其出遊也。南則峯巒經亘。二百餘里。前望建業之都。卻顧項王之亭。龍窟呀其旁出。江漫漫而徂征。東則惠濟真相。二刹相望。殿寢中開。四注修廊。閒從遊子。於焉相羊。沈燎茗飲。樂未渠央。西則赭落之前。三井天出。幽瑟白浪。明晦如一。旁輸有斛。上底有室。解衣入遊。百疾爲失。北則瓦梁之河。陰陵之澤。水潦之所聚會。魚鼈之

收得風致

工琢而有
幽趣

所充斥。芡菱蒲蓴。毛髮之富。被及鄰國。其入居也。則閉關卻掃。反聽收視。內外既進。與妙自會。湛乎若玉淵之澄。枵然如槁木之廢。其游也。其居也。無所適而非道者。世奚足以識之哉。雖然。先生方爲侍從之臣。充諫諍之官。論思獻納。日不遑給。雖欲復從二三子於寄老之上。未可得也。一旦功成事畢。引老乞身。天子憫之。不煩以政。公卿大夫。設祖道供帳於國門之外。酒闋升車。望寄老而歸焉。則僕也。亦將負杖屨而從之矣。

湯泉賦

大江之濱。東城之野。有泉出焉。直回峯。負深谷。分埒引源。迤邐相屬。晨夜有聲。涵雲注玉。薄爲虎鬚。泫爲魚目。鱗介莫潛。遇者

摹寫溫滑
處

斯浴此何水也哉。野老告余曰：泓泓涓涓，莫虞歲年不火而燠。其名湯泉。嗚呼，豈非熒惑莅於上耶？燭龍隱於中耶？旁通咸池，日御之所經耶？幽精沈魄，陰僮其負耶？丹砂黃硫，金石之氣，酷悍之所激耶？德有常仁，惠公而決，寒凝海兮不冰，旱焦山兮不竭。其或燥溼外干，精氣散越，膚革瘡瘍，億筋淫血，欣漸汨之，慙游悅幽憂之，永脫以沐，則髮澤以頰，則膚悅。其羨流穴，浸捐棄於溝壑者，猶能灌蔬稻之畦。已牛馬之渴，此又何其然耶？吾聞天下之水，厥類實繁。至於弱水，儲陰投羽，必沈。火井，羣陽燭石，灼金。祥標醴泉，病飲而瘳。異紀滋穴，神瀝以流。焦溪乏胃，蔓之飾沸潭，謝聲取之游。其餘酒墨所發，膠鹽是滋，啜懷千金，飲狂。

一國哀王乳以中涵橫金絲而徑度詭品繆名紛莫爲數咸受
命於元精亦各私其所遇若夫匡廬汝水之旁尉氏驪山之下
煙霏掩褥王孫鳥隼之所娛金穴椒房專寵靡曼之所占則湯
泉之中又有顯晦者焉野老羈然而笑曰善乎齊給之士曳杖
而去行歌於塗曰澤沸滂沱奮此泉兮被彼山阿吾唯灌沐兮
不知其他子瞻跋云余之所聞湯泉七其五則今三子之所
遊與太虛之所賦所謂匡廬汝水尉氏驪山其二則
余之所見鳳翔之駱谷與渝州之陳氏山居也皆棄於窮山之
中山猶野人之所浴麋鹿援獐獐之所飲惟驪山當往來之衝華
堂王蠶獨爲勝絕然坐明皇之累爲楊李祿山所汚使口舌之
士援筆唾罵以爲亡國之餘辱孰甚焉今惠濟之泉獨爲三子
者詠歎如此豈非所寄僻遠不爲當塗者所溷而爲高人逸才
與世異趣者之所樂乎或曰明皇之累楊李祿山之汚泉豈知
汚之然則幽遠僻陋之歎亦非泉所病也泉固無所榮辱特以
人意推之可以爲抱器適用而不擇所處者之戒元豐元年十

日月五

歎二鶴賦

廣陵郡宅之園有二鶴焉。昂然如人。處乎幽閒。翅翮摧傷而弗能飛翻。雖雄雌之相從。常悵悵其鮮懣。時引吭而哀喚。若對客而永歎。園吏告予曰。此紫微錢公之鶴也。公熙寧時實守此邦。心虛一而體道。治清淨而忘言。既不眈乎豆觴。又不嗜乎匏絃。惟此二鶴與之周旋。居則俛仰於賓掾之後。出則飛鳴乎導從之先。故鶴之來也。則知使君之將至。鶴之往也。則知使君之將還。是時一郡之人。好甚於姻。敬愈於客。如愛子之居家。若寵臣之在國。晝從乎風亭之濱。夜棲乎月臺之側。謂此幸之可常。願

史中如許
情事四語
括之

超搖而自得。逮公之去。於今幾時。人各有好。鶴誰汝私。具名物
於有司。雞鷺易而侮之。傍軒楹而蒙叱。歷階所而遭麾。惟主人
之故客。閒一遇而嗟咨。余聞而歎曰。噫嘻。有恃而生者。失其所
恃則悲。彼有啄乎廣莫之野。飲於清冷之淵。隨林止而止息。順
風氣而騰騫。一鳴九皋。聲聞於天。若然者。又豈衛侯之能好。而
支遁之可憐哉。

郭子儀單騎見虜賦

回紇入寇。汾陽出征。何單騎以見虜。蓋臨戎而示情。匹馬雄趨
方傳呼而免胄。諸羌駭矚。俄下拜以投兵。方其唐祚中微。胡塵
內侮。承范陽猖獗之亂。值永泰因循之主。金繒不足以塞其貪。

語趣而流

嗜鎧仗不足以止其攘取。雲屯三輔。但分諸將之兵。烏合萬羣。難破重圍之虜。子儀乃外弛嚴備。中輸至誠。氣干霄而直上。身按轡以徐行。於是露刃者膽喪。控弦者骨驚。謂令公尙臨於金甲。想可汗未厭於寰瀛。頓釋前憾。來尋舊盟。彼何人斯。忽去幢幡之盛果。吾父也。敢論戈甲之精。豈非事方急則宜有異謀。軍旣孤則難拘常法。遭彼虜之悍勁。屬我師之困乏。校之力則理必敗露。示以誠則意當親狎。所以徹衛四環。去兵兩夾。雖鋒無鏑邪之銳。而勢有泰山之壓。據鞍以出。若乘擒虎之驪。失仗而驚。如棄華元之甲。金石至堅也。以誠可動。天地至大也。以誠可聞。矧爾熊羆之屬。困乎蛇豕之羣。於是時也。將乘驕而必敗。兵

不戢則將焚。惟有明信。乃成茂勳。吐蕃由是而引歸。師殲靈夏。僕固於焉而暴卒。禍息并汾。非不知猛虎無助也。受侮於狐狸。神龍失水也。見侵於螻蟻。曷爲鋒鏑之交。下遽遺紀綱而不以。蓋念至威無恃於張皇。大智不資於恢詭。遠同光武。輕行銅馬之營。近類曹威。獨造國良之壘。向若怨結不解。禍連未央。養威嚴於將軍之幕。角技巧於勇士之場。攻且攻。今天變色。戰復戰。兮星動芒。如此則雖驍雄而必弊。顧創病以何長。符秦夸南伐之師。坐投肥水。新室恃北來之眾。立潰昆陽。固知精擊刺者非爲將之良。敢殺伐者非用兵之至。況德善之身積。宜福祥之天畀。故中書二十四考焉。由此而致。

和淵明歸去來辭

歸去來兮。眷眷懷歸。今得歸。念我生之多艱。心知免而猶悲。天
風飄兮。余迎海月。炯兮余追。省已空之憂患。疑是夢而復非。及
我家於中途。兒女欣而牽衣。望松楸而長慟。悲心極而更微。升
沈幾何。歲月如奔。嗟我宿昔。通籍壁門。賜金雖盡。給札尙存。愧
此散木。繆爲犧尊。屬黨論之云興。雷霆發乎威顏。淮南謫於天
庖。予小子其何安。歲七官而五譴。越鬼門之幽關。化猿鶴之有
日。詎國光之復觀。忽大明之生東。釋纍囚而北還。醺天漢而一
洗。覺宇宙之隨寬。歸去來兮。請逍遙於至游。內取足於一身。復
從物兮何求。榮莫榮於不辱。樂莫樂於無憂。鄉人告予以有年。

黍稷鬱乎盈疇。止有弊廬。泛有扁舟。濯予足兮寒泉。振予衣兮
古丘。洞骨中之滯礙。眇雲散而風流。識此行之匪禍。乃造物之
餘休已矣哉。桔槔俛仰無已時。舉觴自屬聊淹留。汝今不已將
安之。封侯已絕念。仙事亦難期。依先塋而灑掃。從稚子而耘耔。
修杜康之廢祠。補由庚之亡詩。爲太平之幸老。幅巾待盡更奚
疑。

淮海集卷一終

淮海集卷二

詩 五言古

泊吳興西觀音院

金刹負城闐闐然美栖止卞山直穹窿茗水相依倚霜檣鬱冥
冥海棕鮮蕤蕤廣除庇夏陰飛棟明朝晷溪光鳬鶩遶天色孤
蒲裏緒風傳晝焚壁月窺夜禮洩雲曄層空規荷鑑幽汴舩鯢
煙際下鐘磬林端起聲牙戲清深嶽嶺撲空紫所遇信悠然此
生如寄耳志士恥溝瀆征夫念桑梓攬衣軒楹間嘯歌何窮已

三老堂

趙少師張少
保趙通議

堂堂三元老業履冠儔匹蹇諤橫秋霜高明麗朝日竝道謁溫

宣連科收甲乙東南奠藩服西北馳使驛解鞅環堵安岸幘擅
裘屈羣姦懾警歎眾廢起咄叱至今領麾地謳吟徧蓬華出入
雖異途歸潔固如一晚厭方內遊把袂訪閒逸雲壑慶安車風
川駛飛鷁獻酬埃壒外珠玉在揮筆風標傲松鶴顏髮移丹漆
遂令吳越人藻繪恣稱述邈然超世姿髣髴得十七辟靡禮寂
滅麟閣事蕭瑟茲焉出民願名實更炳蔚琬琰琢高詞龍蘭燎
深室福履既所綏光華無終畢

送僧歸遂州

寶師本巴蜀浪跡遊淮海定水湛虛明戒珠爛圓彩飄零鄉縣
異晚晚星霜改明發又西征孤帆破煙靄

送周裕之赴新息令

丈人淮海英抗節浮雲外揮毫錯星錦抵掌參竿籟青春抱修
能脫略無范蔡晚營三徑資百里聊束帶扁舟歲欲徂古刹夜
仍艾去去整羽儀行與高風會

寄曾逢原

孟夏氣候好林塘媚晴輝回渠轉清流藻荇相因依叢薄起疏
籟眾鳥鳴且飛高城帶落日光景酣夕霏卽事遠興託撫已幽
思微超搖弄柔翰徙倚絃金徽美人邈雲眇志願固有違丹青
儻不逾與子同裳衣

司馬遷

分韻得
壑字

置之陶章
集中不復
可辨

子長少不羈發軔徧丘壑晚遭李陵禍憤悱思遠託高辭振幽
光直筆誅隱惡馳騁數千載貫穿百家作至今青簡上文彩炳
金釐高才忽小疵難用常情度譬彼海運鵬豈復顧繒繳區區
班叔皮未易議疏略

田居四首

雞號四鄰起結束赴中原戒婦預爲黍呼兒隨掩門犂鋤帶晨
景道路更笑喧宿潦濯芒屨野芳簪髻根霽色披宵靄春空正
鮮繁辛夷茂橫阜錦雉嬌空園少壯已雲趨伶俜尙鴟蹲蟹黃
經雨潤野馬從風犇村落次第集隔牆致寒暄眷言月占好努
力競晨昏

入夏桑柘稠。陰陰翳虛落。新麥已登場。餘蠶猶占箔。隆曦破層陰。霽霽收遠壑。雌蜺臥淪漪。鮮飈泛藪薄。林深鳥更鳴。水漫魚知樂。羸老厭煩鼓。解衣屢槃礴。蔭樹濯涼颺。起行遺帶索。冢婦餉初還。丁男耘有託。倒苒備青錢。鹽茗恐垂橐。明日輸絹租。鄰兒入城郭。

昔我蒔青秧。廉纖屬梅雨。及茲欲成穗。已復頽星暑。遲暮易昏晨。搖落多砧杵。村迴少過從。客來旋炊黍。興發卽杖藜。未嘗先處所。褰裳涉淺瀨。矯首沒孤羽。藪祠土鼓悲。野隸鷄雞舞。雉子隨販夫。老翁拜巫女。辛勤稼穡事。惻愴田疇語。得穀不敢儲。催

科吏旁午。

辛勤一作艱難

嚴冬百草枯。鄰曲富休暇。上井時一汲。柴車久停駕。寥寥場圃
空。跼跼烏鵲下。孤榜傍橫塘。喧春起旁舍。田家重農隙。翁媼相
邀迓。班坐醺酒醪。一行三四謝。陶盤奉旨蓄。行筯羞雞炙。飲酣
爭獻酬。語闕或悲咤。悠悠燈火暗。刺刺風飈射。客散靜柴門。星
蟾耿寒夜。富疑作當

寄題傅欽之草堂

河陽有洑流。經營太行根。盛德不終晦。發爲清濟源。斯堂濟源
上。太行正當門。仰視浮雲作。俯窺流水奔。修竹帶藩籬。百禽鳴
朝暾。相望有盤谷。李愿故居存。主人國之老。實惟商巖孫。班行
昔供奉。亟進逆耳言。天子色爲動。羣公聲亦吞。蕭條冰霜際。不

改白玉溫出處士所重其微難具論公勿思草堂朝廷待公尊

次韻酬徐仲車見寄

渭清非勝涇蘭芳水無慕我生季葉中乃與古人遇職當供灑
掃匏繫愧遲暮來章感存沒三讀淚如注

次韻邢敦夫秋懷十首

以微雲淡河漢疏
雨滴梧桐爲韻

驅車陟高邱卻望大梁圻馳道入雙闕勾陳連太微夷門壯下
屬清洛相因依美哉吾黨士皋禹良可希

暮有二客至俱以能禪聞一枝惠林出一派智海分言各不相
可往來劇絲夢謝客姑舍是妨余醉看雲

昔者曾中書門戶實難瞰筆勢如長淮初源可觴濫經營終入

海欲語焉能暫斯人今則亡悲歌風慘愴

渤海有巨鼇其顛冠嵯峨宿昔嘗小并八絃相盪摩忽遭龍伯人一舉空潮波取皮剪作膠清此崑崙河

蝮蛇初螫手壯士斷其腕豈不悲毀傷所卹在軀幹西羌沙鹵地置戍或煩漢雞肋不足云阿瞞妙思筭

湯湯辟靡流中有學子居但說若稽古言有三萬餘來者轉相祖詞林日凋疏稍喜續溪令入校天祿書

匠氏構明堂百材入斤斧儻非豫章棟穴長亦焉取英英范與蘇器識兼文武胡爲先一州不用作霖雨

憬彼高句麗來修裔夷職天都富如海勞汝送涓滴軸轡尾相

銜遠近困供億止沸當絕薪揚湯百無益

祖宗舉賢良充賦多名儒執事惡言者此科爲之無雖有仲舒
錯或橫江潭魚果欲鳴鳳至還當種椅梧

邗侯秋臥病揮毫見深衷賡者二三子翕然笙磬同不爲兒女
姿頗形四方風屬有山水念因之絲與桐

春日雜興十首

飄忽星氣徂青陽迫遲暮鳴飛各有適赤白紛無數雨砌墮危
芳風軒納飛絮褰幃香霧橫岸幘雲峯度林影舞窗扉池光染
衣屨參差花鳥期躡蹻琴觴趣撫事動幽尋感時遺近慕秣馬
膏余車行行不周路

結髮謝外好，僂俛希前修。繆挾江海志，恥爲升斗謀。齟齬歷難刻，畫賤貧多覺。尤發軔背伊闕，解驂憩邗溝。丹鉛費永晷，麴糵歐深愁。璧月鑒簾櫳，珠星絡梧楸。泯泯渠水駛，霏霏花霧浮。公子悵何許，撫膺徒離憂。

潭潭故邑井，猗猗上宮蘭。不食自清潔，莫服更幽閒。志士恥弱植，卷跡甘饑寒。佳晨追良覲，觸物懸悲端。川途眇回遠，經歲曠音翰。豈不慕裘馬，詭得非所安。蟬冕多怵迫，繩樞尠憂患。枉尋竟何補，方枘誠獨難。

吳會雖褊小，海濱富奇峯。天雞一號叫，劍戟明遙空。谿谷相徑復，深林杳攢叢。猿吟虎豹嘯，雲氣迷西東。中有遯世士，超然閟

孤蹤被蘭服。明月起坐松聲中。夜鍛吸沆瀣。朝琴庇青蔥。騎星
友元氣。巢許安可同。俛眄區中人。飛埃集毛鋒。問津或不繆。從
子游鴻蒙。

東方有美人。容華茂春榮。抱影守單棲。含睇理哀彈。聲意一何
切。所歡邈雲漢。徒然事膏沐。孰與徂昏旦。微誠浪自持。嘉月忽
復晏。巧轉度虛櫺。飛紅觸幽幔。歲歲芳草滋。夜夜明星爛。合并
會有時。索居不必歎。

寢瘵倦文史。駕言從遨嬉。颺風舉遙激。規日麗清漪。含桃粲朱
實。杜若懷碧滋。娉娉弱絮墮。圉圉文魴馳。明霞廓遠矚。哀禽攪
離思。緝草天際合。孤雲川上移。寬閒絕輪鞅。重複多路岐。信美

雖久佇歸歎從所治

昔我遊京室。交通五陵間。主客各英妙。袍馬相追攀。千金具飲
啜。百金雇吹彈。纓弁羅廣席。當頭舞交竿。鮮妝耀淥酒。采纈生
風瀾。燈燭暗夜艾。士女紛相班。歡娛易徂歇。轉眄如飛翰。疊疊
負孤願。離離銜永歡。山鳥窺茗飲。簷花笑蔬飧。棄捐勿重陳。事
定須蓋棺。

客從遠方來。遺我昭華管。吹之動人心。異境生虛窾。礚礚青障
橫。泱泱春溜漸。馬蹏交狹邪。車轂錯平坦。士女競芳辰。禽魚蔭
修竿。依微認睇笑。凌沒見纖短。停吹歎泯滅。眈眈復空館。靈物
信所珍。顧恨知音罕。

桃李用事辰鮮明奪雲綺繁華一朝去默然慚杞梓時徂鷹化
鳩地遷橘爲枳獨有羨門生後天猶不死藝籍燔祖龍斯文就
淪喪帝矜黔首愚諸雋出相望楊馬操宏綱韓柳激頽浪建安
妙謳吟風槩亦超放

玉繩帶華月豔豔青冥上奕世希末光經緯得無妄兒曹獨何
事詆斥幾覆醬原心良自誣猥欲私所向螳蜋拒飛轍精衛填
溟漲咄咄徒爾爲東海固無恙鵠鸞日彫滅黃口紛冗長投袂
睇層霄茲懷誰與亮

和孫莘老題召伯斗野亭

淮海破冬仲雪霜滋不平菱荷枯折盡積水寒更清輟棹得佳

觀湖天繞朱甍，信美無與娛。濁醪聊自傾，北眺桑梓國。悠然白雲生，南望古邗溝。滄波帶蕪城，村墟翳茅竹。孤煙起晨烹，簷間鳥聲落。客子念當行，攬衣視日景。薄陰漏微明，何時復來遊。春風發鮮榮。

孫莘老唱云：淮海無林丘，曠澤千里平。一渠閑防豬，物色故不清。老僧喜穿築，北戶延朱甍。簷楹斗杓落，簾幃河漢傾。平湖杳無涯，湛湛春波生。結纜嗟已晚，不見芙蓉城。尙想紫茱盤，明珠出新烹。平生有微尙，一舟聊寄行。遇勝輒偃蹇，霜鬚刷澄明。可待齒牙豁，歸歎謝浮雲。黃魯直和云：謝公所築壞，未歎曲池平。蘇州來賦詩，句與秋氣清。結構擅空闊，湖光浮棟莖。維斗天司南，其下百瀆傾。具宮產明月，舍澤遍諸生。盤薄淮海間，風煙浸十城。簫簫吹木末，浪波沸庖烹。我來杪搖落，霜清見魚行。白鷗遠飛回，得我若眼明。佳人歸何時，解衣繞廂榮。蘇子瞻和云：落帆謝公渚，日脚東西平。孤亭得心憩，暮景含餘清。坐待斗與牛，錯落掛南甍。老僧如宿昔，一笑意已傾。新詩出故人，舊事疑前生。吾生七往來，送老海上城。逢人輒自晒，得魚不

忍烹似聞續溪老復作東都行小詩如秋菊。豔豔霜中明過此
感我言長篇發春榮。蘇子由和云扁舟未得解坐待兩闌
平濁水汙人思野寺爲我清昔遊有遺詠枯墨存高蔓故人獨
未來一罇誰與傾北風吹微雲暮寒依月生前望邛溝路卻指
鐵壘城茅簷卜茲地江水供晨烹試問東坡翁畢老幾此行奔
馳力不足隱約性愈明早爲歸耕計免慙老僧榮。張琬和云
維舟得古寺望遠天四平晴日揮揮散晚風冷冷清危亭下
瞰野層閣高連蔓起望斗與牛淮海相奔傾往來誰百年今昔
我平生悠悠何所寓臺上多化城與其逐影死甯似不鳴烹咄
哉應有止老矣將安行中庭桂子落丈室霜月明此意竟蕭條
猶然笑安榮。張芸叟和云我登甘棠隸所向殊未平舟行
汙池中頓失江湖清蛙聲亂僧眼鷗吻嚇市農意同伯喈死苟
與衛士傾開池種白蓮壘石擬三生猶淹南斗墟終遠北斗城
設我紫藕供報之白芽烹三年猿鶴友萬里秦楚行秋風隴首
至落日淮南明寄言
懷士士慎勿慕官榮

淮海集卷二終

淮海集卷三

詩 五言古

陪彥瞻遊金山和子由詩

江流會楊子，洶洶東南驚。海門劃前開，金山屹中據。鼓鐘食萬指，金艫棲千柱。夜庭游月波，曉觀搏香霧。天清猿鳥哀，風暗魚龍怒。雲物橫古今，濤波閱晨暮。三州氣色來，上下端倪露。偉哉元氣間，此勝知誰聚。念昔憩精廬，登臨輒忘去。汲新試團月，飯素羹魁芋。妙興入芳籐，真境在芒屨。別來星暑換，寤寐經從處。忽蒙珠璧投，了與雲巒遇。幽光炯肝肺，爽氣森庭戶。區中多滯念，方外饒奇趣。寄語山阿人，冷然行復御。

子由詩唱云揚州望金山隱隱大如幘

淮海集

卷三

揭來長江上孤高二千尺僧居厭山小面面貼蒼石虛樓三百
間正壓江潮白清風斂霽霧曉日曜金碧直侵魚龍居似有鬼
神役我行有程度欲去空自惜風吹渡江水山僧午方食波瀾
洗我心筍蕨飽我腹平生足游衍壯觀此云極鐵甕本誰安海
門復誰植東南遞隱見遙與此山正茲遊幾不遂深愧幕府客
歸時日已暮正值江月黑顧視天水并坐思星斗溼使君何時
罷登覽不可失鮮于子駿和云蓬萊二神山橫絕倚鼇背
鼇傾海水動一峯失所在飛來大江心盤礴幾千載化為金僊
居龍象錯朱貝夙昔愛山水江湖不慙忘君前或剖竹匏繫古
維揚隱然勝絕境旦旦遇相望不意二君子招攜一葦航高攀
躡雪梯闊視瞰溟漲潮來隱天地萬里卷白浪波清霄漢淨澄
澈迷下上更深月正中山影杳無象蛟鼉四面穴形勢三州壯
融結既難窮丹青殊莫狀蘇侯韻高遠邵子雅趨尚奇觀極無
邊幽尋端未放浮生閱流水清話造方丈畢景趣言歸侵星搖
兩槳武功真好奇落筆埽珠璣持與淮南守茲
遊不可遺君恩早晚東南下一棹扁舟信所之

同子瞻端午日遊諸寺賦得深字

太史抱孤韻暢懷在登臨別乘載鄒枚佳辰事幽尋參差水石

瘦窈窕房櫳深。清磬發疏箔。妙香橫素襟。復登翠堵坡。環回矚
嶽峯。雙溪貫城郭。暝色帶孤禽。涼飈動爽籟。薄雨生微陰。塵想
澹清漣。牢愁洗芳斟。揮筵訂往古。援毫示來今。愧無刻燭敏。續
此金玉音。子瞻詩云。肩輿任所適。遇勝輒畱連。焚香引幽步。
酌茗開淨筵。微雨止還作。小窗幽更妍。盆山不見日。
草木自蒼然。忽登最高塔。眼界窮大千。卞峯照城郭。震澤浮雲
天。深沈既可喜。曠蕩亦所便。幽尋未云畢。墟落生晚煙。歸來記
所歷。耿耿清不眠。道人亦未寢。孤燈同夜禪。

寄陳季常

一鉤五十犛。始具任公釣。揭竿趣灌瀆。與爾不同調。先生本西
蜀。俠氣見英妙。哀憐世間兒。細點似黃鵠。侍童雙擢玉。鬢髮光
可照。駿馬錦障泥。相隨窮海嶠。平生攜手好。十七登廊廟。小生

相吏耶。徒往尺書召暮年。更折節學佛。得心要。鬻馬放阿樊。幅巾對沈燎。泠泠屋外泉。兀兀原頭燒。欲知山中樂。萬古同一笑。
同子瞻參寥遊惠山三首

輟棹縱幽討。籃輿入青蒼。圓頂相邀迓。旃檀燎深堂。層巒淡如洗。傑閣森欲翔。林芳含雨滋。岫日隔林光。涓涓續清溜。靡靡傳幽香。俯仰佳覽眺。悠哉身世忘。
用王武陵韻

使君厭機械。所與惟散人。顧慙兼葭陋。繆倚瓊枝新。上午青礧礧。下屬白磷磷。洞天不知老。金界無棲塵。緬彼人間世。烏蟾閱青旻。詎得踵三隱。山阿相與鄰。
用竇羣韻

樓觀相複重。邈然闕深樾。九龍吐青泠。灑灑曾未絕。罍缶馳千

里眞珠猶不滅。況復從茶僊。茲焉試葵月。岸巾塵想消散策佳

興發何以慰。遨嬉操觚繼前轍。

用朱宿韻

子瞻云余昔爲錢塘倅往來無錫未嘗不至惠山

既去五年復爲湖州與高郵秦少游杭僧參寥同至覽唐處士

王陵竇羣朱宿所賦詩愛其語清簡蕭然有出塵之姿追用其

韻各賦夢裏五年過覺來雙鬢蒼蒼還將塵土足一步漪瀾堂

俯窺松桂影仰見鵲鶴翔炯然肝肺間已作冰玉光虛明中有

色清淨自生香還從世俗去永與世俗忘薄雲不遮山疏雨

不溼人蕭蕭松桂滑策策芒鞋新嘉我二三子皎然無淄磷勝

遊豈殊昔清句仍絕塵弔古泣舊史疾譏歌小旻哀哉扶風子

難與巢許鄰鼓火發山泉烹茶避林樾明窗傾紫盞色味兩

奇絕吾生眠食耳一飽萬想滅頗笑玉川子饑弄三百月豈如

山中人睡起山花發一甌誰與共門外無來轍參寥同賦

山煙弄滅沒山木含蒼蒼刺舟傍遙岸理策升虛堂周遭矚層

巘矯矯如翺翔下瞰平田流澹然浮日光青篁解初籜洗雨聞

新香雖云迫前途眞賞豈易忘松門暗朝雨寂歷無行人蔓

草復穿徑卉木鬱以新堦泉漱石齒照眼光磷磷使君美無度

卓犖遺囂塵風標傲竹柏談笑凌窮旻何愧沈冥子臥霞吞結

鄰揚帆渡江來洗眼驚翠樾雲姿旣容裔鳥弄更清絕凌梯

訪前蹤琬琰亦未滅嗟我魚目光疇能綴明月狂
墨埽琅玕風煙座中發殊勝區中人茫茫走飛轍

送少章弟赴仁和主簿

我宗本江南爲將門列戟中葉徙淮海不仕但潛德先祖實起
家先君始縫掖議郎爲名士余亦忝詞客風流以及汝三通桂
堂籍汝弱不好弄文章有新格久從先生游術業良未測武林
一都會山水富南國下有賢別駕上有明方伯干將入砥礪腰
褭就銜勒勿矜孔鸞姿不樂棲枳棘吳中多高士往往寄老釋
辯才雖物化參寥猶夙昔投閑數訪之可得三友益少來輕別
離老去重乖隔念汝遠行役惘惘意不懌道山雖云佳久寓有
饑色功名已絕意政苦婚嫁迫終從大人議稅駕邗溝側追蹤

漢兩疏父子老阡陌

送李端叔從辟中山

人畏朔風聲我聞獨寬懷豈不知凜冽爲自中山來端叔天下
士淹畱蹇無成去從中山辟良亦慰平生與君英妙時俠氣上
參天孰云行半百身世各茫然當時兒戲念今日已灰死著書
如結贅聊以忘憂耳駸駸歲邁盡淮海歸無期功名良獨難雖
成定奚爲念君遠行役中夜憂反側攬衣起成章贈以當馬策
贈蹇法師翊之

天都九經緯人物如紡績豈無仙聖遊但未見高識蹇師蜀方
士鬼物克服役竭來長安城摩挲金銅狄大蛇死已論葛陂囚

且釋是事何足云聊爾恤艱厄方從馬明生西去鍊金液丹成
得度世造化爲莫逆予亦江海人名宦偶牽迫投劾去未能見
師三歎息

送劉貢父舍人二首

虎去藜藿採珠在其川媚君子一詘信實繫天下事念昔元豐
閒公初謫南裔託詞弔湘水聞者爲心醉踰年懷臣逐國老起
相繼除公守襄陽士始有生意茲焉歸法從乃是朝廷計在公
何足云事業本餘棄掖垣美花木入直春正麗同僚看家風立
馬揮九制

觀也本諸生早與世參商方柄不量鑿交親指爲狂末路辱公

壺瓠屬負
之免溺

知賜出非所望相期古人處豈止事文章汝南雖奧區校官實
始張解鞅百無有栖栖寄僧坊築室從有徒皆公借餘光一壺
千金直所濟在倉黃萬里猶比鄰別離無足傷何以報公德修
好以爲常

南京妙峯亭

王勝之所作
蘇子瞻題榜

王公厭承明出守南宮鑰結搆得崇邱巋然瞰清洛是時謫仙
人發軔自廬霍郊原春鳥鳴來此動豪酌報投一何富玉按金
刀錯新勝揭中楹千載見遠託揭來訪陳迹物色屬搖落人煙
隔鳬田疇帶城郭紅葉隕風漪砂礫卷飛簾青青陵上麥獨
汝森自若人生如博弈得喪難前約金鎚初控頤已復東方作

大明昇中天龍鸞入階閣深懲漁奪弊法令一刊削斯民如解
懸喜氣鬱磅礴公平數登覽行矣翔寥廓

次韻奉酬丹元先生

金華紫煙客來作牧羊兒至言初無文尋繹自成詩二景入妙
解元氣含煙詞憐我鬣蒼浪黃埃眩蟲絲勸解冠上纓一濯含
風漪攝身列缺外倒躡蜿蜒鬚維斗錯明珠望舒耿修眉真游
無疆界浩蕩天風吹

送裴仲謨

君子出於德妙高如匠石但見廣廈成不見斧斤迹厚爲諸兄
奉自奉頗云嗇三生陽亢宗薄俗有慙色汝南古佳郡月旦評

一易爾來似揚州。不辨龍蜥蜴。短簿髯參軍。喜怒移頃刻。正平
竟獲免。實我文舉力。念公多乖隔。憂思如紡績。恥爲兒女仁。到
此淚橫臆。熙朝大哀飪。賢者不家食。朝爲郡縣吏。暮作臺省客。
矧聞諸法從。久欲薦言責。去去勿重陳。九萬自此擊。

題雙松寄陳季常

遙聞連理松。託根黃麻城。枝枝相鉤帶。葉葉同死生。雖云金石
姿。未免兒女情。想應風月夕。滿庭合歡聲。

徐仲車食於學官吏或以爲不可欲罷去之太守不聽禮
遇如初感之而作

許丞老病龔督郵白欲廢賢哉黃次公鑒裁實精詣殷勤謝督

邇此丞乃廉吏重聽庸何傷善助無失意古人骨已朽來者復
誰繼仲車天下士固非許丞類至行通神明問學有根柢若克
老更聘自革風俗弊太守前已聞粟帛俄見賜柰何少年子轍
効督郵事道喪賢哲窮聞之爲流涕人心如其面難以一律揆
所望在次公督郵何足議

淮海集卷四

詩 五言古

次韻夏侯太冲秀才

儒官飽閒散，室若僧坊靜。北窗腹便便，支枕看斗柄。或時得名酒，停午猶中聖。醒來復何事，秉筆賦秋興。焉知懶是真，但覺貧非病。茫茫流水意，會有知音聽。鐘鼎與山林，人生各天性。

送張和叔兼簡黃魯直

汝南如一器，百千聚飛蚊。終然狂鼓鬧，啾啾竟誰聞。議郎盛德後，清修繼先芬。未試霹靂手，低回從此君。學官冷如水，蟄鹽度朝曛。閒蒙相煖熱，破憂發孤欣。君今又復去，冀北遂空羣。豈無

一樽酒誰與通殷勤。大梁多豪英，故人滿青雲。爲謝黃叔度，鬢毛今白紛。

和王忠玉提刑

嵩峯何其高，峯高氣尤清。念昔秋欲老，從公峯下行。古木上參天，哀禽報新晴。修塗雲外轉，槁葉風中零。曛黑度伊水，眇然古今情。黎明出龍門，山川莽難名。信美非吾土，顧瞻懷楚萍。美人天一方，傷哉誰目成。黃綬我聊爾，白鷗公勿驚。糟醕可餽啜，古人忌偏醒。

飲酒詩四首

我觀人間世，無如醉中真。虛空爲消隕，況乃百憂身。惜哉知此

晚坐令華髮新。聖人難驟得。得且致賢人。
左手執蟹螯。舉觴屬雲漢。天生此神物。爲我洗憂患。
山川同恍惚。魚鳥共蕭散。客至壺自傾。欲去不容閒。

客從南方來。酌我一甌茗。我酌初不啜。疆啜且復醒。
旣鑿渾沌

氏。遂出華胥境。操戈逐儒生。舉觴還酩酊。

氏一作竅

雷觴淡如水。經年不濡脣。爰有擾龍系。爲造英靈春。
英靈韻何高。葡萄難爲鄰。他年血食汝。應配杜康神。

艇齋并序

予以典校史。領俸錢塘。邂逅得友。丁君彥良。於陳畱官舍。丁君
彥良。年少氣雋。誦詩文。疊疊不休。動有過人語。深恨得之晚也。

臨分以艇齋詩速予賦爲寄題一篇

平生樂漁釣放浪江湖閒兀兀寄幽艇不憂浪如山聞君城郭
居左右羣書環有齋亦名艇何時許追攀釣古不釣今所得孔
與顏不然如爾祖跨鶴出塵寰

和裴仲謨摘白鬚行

仲將題凌雲比訖鬚盡白陸展媚側室星星染爲黑人生如寄
耳況復形與色澤壑藏山舟夜半輸有力龐眉三不遇已矣何
所惜二毛賦秋興自愛頗姑息聞諸古竺乾毛髮因地得數窮
反其本螻螳得而食妙年光可鑒炯若鴉羽戢映梳漸蕭蕭變
化了無隙所以梵志云昔人已非昔皤然君勿笑子羽以貌失

信美如客兒終翦施摩詰我作白鬚行而得蒼生術

覲覲二弟作小室請書魯直名曰寄寂作此寄之用孫子

實韻

力田不逢年識者未宜閔他時歲在金百兩無虛糴士生當自
量天道平如準汝兄魯叔山正坐不前謹有琴亦無絃何心尙
求軫客來欲頽玉太白輒滿引官長既屢罵諸生亦時驪一口
吸西江玄哉居士蘊歲寒知蒼松日暮識丹槿夢想八九椽森
然羅玉筍孫子實詩 辭宣欲吏雲季氏或招閔此分冒中秋
萬物既收糴賣藥偶知名章玄非近準才難不易得
志大略細謹士生要弘毅天地如蓋軫驥令鹽車驂井下知綆
引難甘吁爾食聊寄粲然驪誰能借前籌還婦用束蘊吾聞調
羹鼎異味及粉槿豈其俱王羞而棄會稽筍

反初

昔年淮海末邂逅安期生謂我有靈骨法當遊太清區中緣未
斷方外道難成一落世間網五十換嘉平夜參半不寢披衣涕
縱橫誓當反初服仍先謝諸彭晞髮陽之阿舖餒太和精心將
虛無合身與元氣并陟降三境中高真相送迎琅函紀前績金
蒲錫嘉名耿光洞寥廓不借日月明故棲黃埃裏絕想空復情

精思

精思洞元化白日昇高旻俯仰凌倒景龍行速如神半道過紫
府弭節聊逡巡金牀設寶几璀璨明月珍僊者二三子眷然骨
肉親飲我霞一杯放懷煖如春遂朝玉虛上冠劍班列真無端

拜失儀放斥令自新雲霄難遽返下土多埃塵淮南守天庖嗟
我實何人

送楊康功守蘇

公於萬事輕獨嗜山水重寓直西掖垣滄洲長入夢廣陵以都
會廚酒萬斯甕每歎闕登臨持此將焉用比持蘇臺節論鬱摺
紳共翻云美泉石汜可小嬉弄忽忽泊行李草草別賓從乃知
仁智心所樂異庸眾梅花發春端百卉日興動公等行復反臺
閣俟鸞鳳

偶戲

偶戲失班龍坐謫崑崙陰崑崙一何高去天無數尋嘉禾穗盈

車珠玉爛成林天廳時一拂清哀動人心一面四百門官譙雲
氣侵闕然竹使符難矣顰登臨羣仙來按行憐我久滯淫力請
始云免反室歲已深親朋喜我來感歎或霑襟塵寰君勿悲殊
勝巢嶽峯

正仲左丞生日

元氣鍾英偉東皇賦炳靈冀數十一莢椿茂八千齡汗血來西
極搏風出北溟之無分襁褓詩禮學趨庭妙質珠遺海高材刃
發礪初更芸閣秘屢直瑣闥青史筆開凡例綸言正緯經文昌
頻曳履京兆屢空囹遂總臺綱紀常參國典刑兩宮隆眷遇諸
夏聳瞻聽武略驅雷電文鋒粲斗星乞閑辭亢滿分逸下青冥

綺甲雙朱服、腰橫萬寶釘、明峯春矗矗、汝水暮泠泠、散策花間徑、揮犀水上亭、壺觴延墨客、燈燭按歌伶、周袞歸公旦、商巖夢武丁、久聞虛揆席、佇見返皇局、別數汾陽考、重鐫宋父銘、巍然廟堂上、永作世儀形

病犬

犬以守禦用、老憊將何爲、踉蹌劣於行、纍然抱渴饑、主人恩義易、乃爲升斗資、追隨不肯去、猶若戀藩離、屠膾意得逞、哀庖在須斯、糟糠固非意、豚豕同一時、念昔初得寵、青韁纏璫絲、飼養候飢飽、動止常相隨、胡云不終始、委逐在衰遲、犬死不足道、固爲主人悲

和子瞻雙石

天鏡海濱石鬱若龜毛綠信爲小仇池氣象宛然足連巖下空
洞鼎張彭亨腹雙峯照清漣春眉鏡中蹙疑經女媧鍊或入金
華牧鑪燹充雲氣研滴當川瀆尤物足移人不必珠與玉道傍
初無異漢將疑虎伏支機亦何據但出君平卜奇礪入華林傾
都自追逐我願作陳那令吼震山谷一拳旣在夢二駒空所欲
大士捨寶陀仙人遺句曲惟詩落人間如傳置郵速

雷陽書事三首

駱越風俗殊有疾皆勿藥束帶趨祀房瞽史巫紛若絃歌薦
栗奴主洽簾酌呻吟殊未央更把雞骨灼

一笛一腰鼓鳴聲甚悲涼借問此何爲居人朝送殤出郭披莽
蒼磨刀向猪羊何須作佳事鬼去百無殃

舊傳日南郡野女出成羣此去尙應遠東門已如雲蚩氓託絲
布相就通慇懃可憐秋胡子不遇卓文君

海康書事十首

白髮坐鉤黨南遷海瀕洲灌園以餬口身自雜蒼頭籬落秋暑
中碧花蔓牽牛誰知把鋤人舊日東陵侯

荔子無幾何黃柑遽如許遷臣不惜日恣意移寒暑層巢俯雲
木信美非吾土草芳自有時鳴鳩何關汝

卜居近流水小巢依嶽岑終日數椽閒但聞鳥遺音鑪香入幽

夢海月明孤斟鷓鴣一枝足所恨非故林

培塿無松柏駕言出焉遊讀書與意會卻掃可忘憂尺蠖以時
詘其信亦非求得歸良不惡未歸且淹留

粵女市無常所至輒成區一日三四遷處處售鰕魚青裊腳不
襪臭味援與狙孰云風土惡白州生綠珠

海康臘已酉不論冬孟仲殺牛撾祭鼓城郭爲沸動雖非羣麻
頽自我先人用大笑荆楚人嘉平獵雲夢

粲粲庵摩勒作湯美無有上客賦驪駒玉匳開素手那知蒼梧
野棄置同芻狗荆山玉抵鵲此事繇來久

裔土桑柘希蠶月不紡績吳絹與魯縞取具艤舩客一朝南風

發家室相忱迫半賈鬻我藏倍稱還君息

一雨復一暘蒼茫颶風發怒號兼晝夜山海爲顛蹶云何大塊
噫乃爾不可遏黎明眾竅虛白日麗空闊

合浦古珠池一熟胎如山試問池邊蜺云今累年閑豈無明月
珍轉徙溟渤閒何關二千石時至自當還

次韻曾存之嘯竹軒

翩翩曾公子子猷定前身嗜好準疇昔了然不淄磷寄食平準
官植竹當比鄰朝與竹相對暮與竹相親安可一日無此君真
可人

遊仙二首

服形百神朝，刳心萬緣盡。我無退轉境，何以有精進。戲爲汗漫遊，八極一何近。渺渺東海水，纍纍北邙墳。向來歌舞處，忽復成荒村。愚人如鹿耳，其死了無魂。孰知九霄閒，玄圃枕崑崙。緇塵化人衣，蒼蘿誰與捫。

雲車自天來，駕言遊混茫。手持太一節，身佩使者章。龍虎傍天矯，馬龜伏以翔。朝元紫薇上，所覩浩難量。寶網結萬珠，參伍相焜煌。花品不知數，妙英折玄房。宮殿隨人身，處處輒清涼。危髻擢眞玉，高謝人間敕。二、三古鬚眉，冠雲帶含光。遺我飛霞佩，副以明月璫。再拜敬服之，白毛發靈香。

次韻答張文潛病中見寄

與君涉世網所得如鉤溫念昔相乖離俯仰變寒暄
期寄書囑加飧三年汝水濱孤懷誰與言末路非
所望聯鑣金馬門校文多豫暇玄談到羲軒孰云
咎簪小史書垂後昆匪惟以舊聞牴牾良可刊
比枉病中作筆端淮海奔亟駕問所苦兀坐一
室閑晤對不知夕歸途斗星翻平時帶十圍頗復
減臂環君其專精神微恙不足論愷悌神所勞
此理真如絃

與子瞻參寥會松江得浪字

松江浩蕪旁垂虹跨其上漫然銜洞庭領略非
一狀恍如陣平野萬馬攢穹帳離離雲抹山
窅窅天粘浪煙中漁唱起鳥外征帆颺愈知
宇宙寬斗覺東南壯太史主文盟諸豪盡詩將
超搖

外形檢語笑供頔頔嫵娟棄追逐撥刺亦從放獨畱三百缸聊

用沃軒曠

子瞻得風字

吳越溪山興未窮又扶衰病過垂虹

遠勝遊難復

古人同舟師不會畱連意擬看斜陽萬頃紅

二

子緣詩老更窮

人閒無處吐長虹平生睡足連江雨盡日舟行

擘岸風人笑年來

三出慣天教我輩一箇同知君欲寫長相憶

更送銀盤尾鬣紅

參寥得岸字

淪連幾萬頃放目失

垠岸倒境射遙山青螺點空半從來勝震

澤勝事無昏旦

破浪湧長髻排空度飛翰肺肝入清境劃若春

冰泮安得凌九

垓從公遊汗漫

淮海集卷四終

淮海集卷五

詩七言古

觀易元吉獐猿圖歌

參天老木相樛枝。嵌空怪石銜青漪。兩猿上下一旁掛。兩猿熟視蒼蛙疑。蕭蕭叢竹山風吹。海棠杜宇相因依。下有兩獐從兩兒。花飡草嚼含春嬉。易老筆精湖海推。畫意忘形形更奇。解衣一掃神扶持。他日自見猶嗟咨。金錢百萬酒千鷗。荆南將軍欣得之。老禪豪取橐爲垂。白晝掩門初許窺。房櫳炯炯明冬曦。榛蕪羽革分毫釐。殘編未終且歸讀。歲暮有閒重借披。

夜坐懷莘老司諫

次韻參寥

六合寥寥信茫昧。中有日月無根抵。古往今來漫不休。青髮素顏從此逝。嗟予自少多遭迴。氣血未衰心已艾。北渡長淮霜入屨。南窺禹穴塵生袂。日鑿一竅渾沌死。雖有餘風終破碎。回車復路可無緣。三問道人三不對。

答朱廣微

廣微才華殆天賦。十歲孤山有佳句。又夢東林飲虎溪。歎息清風人不悟。自爾所見無全牛。桐柏崑崙日傾注。蔥蘢曉景破新花。躡蹻老拳擒脫兔。身勤事左竟何成。巧迫化工天所怒。兩鬢星星滄海頭。強學禪那慰遲暮。昨夜燈花吐金粟。曉裒鯉魚得尺素。笑我徜徉吳楚間。經卷酒卮隨所遇。人生迂意十八九。月

得解顏能幾度。著書準易空自疲。服藥求仙良亦悞。北風老矣無能爲。行看黃鸝語飛絮。安得從君醉百場。落筆珠璣不論數。

送僧歸保甯

西湖環繞皆招提。樓閣晦明如臥披。保甯復在最佳處。水光四合無端倪。車塵不來馬足斷。時有海月相因依。上人弱齡已隸此。心目所證惟瑰琦。白玉芙蓉出清沼。天然不受緇塵擾。坐客一語不入意。目如明星視飛鳥。冠切雲兮佩玉難。上人顧之真等閒。應緣聊入人間世。興盡卻歸湖上山。伊余久欲窺禹穴。矧今仲父官東越。行挽秋風入剡溪。爲君先醉西湖月。

和王通叟琵琶夢

鮮俊在唐
人中瞻之
間

淮海集

卷五

鷓鴣鳴時眾芳歇華堂夢斷音容絕風驚玉露不成圓一夜芙
蕖泣秋月金紋捍面紫檀槽曾抱花前送酒舫庾郎江令費珠
璧小研紅牋揮兔毫風流雲散令人瘦忍看麴塵昏錦綬楚水
悠悠更不西上天破鑑空依舊。

醫者

塊然一氣初渾淪散作六物相吐吞主承客禦勝復存是爲萬
物疾病原寥寥空陂遊寬魂誨此法術成軒轅金書玉冊要不
煩煥如星宿不可捫時遷聖祖遂幽昏弊俗竊以資利源余嘗
感槩期明論世無妙質孰與言因君乞詩置屋軒聊賦援筆賦
本根

漫郎

分韻得桃字

元公機鑒天所高中興諸彥非其曹自呼漫郎示真率日與聲
叟爲嬉遨是時胡星殞未久關輔擾擾猶弓刀百里不聞易五
殺三四空傳殺二桃心知不得載行事俛首刻意追風騷字皆
華星章對月漏洩元氣煩揮毫倚玕春深茂花竹九疑日暮吟
哀猱紅顏白骨付清醪一官於我真鴻毛乃知達人妙如水濁
清顯晦惟所遭無時有祿亦可隱何必龕巖遠遁逃

記夢答劉全美

歲逢困敦斗申指辰次庚辰漏傳子夢出城闌登古原草木榮
天帶流水千夫荷鍤開久殯前有一人狀瓌偉素冠長跪烝酒

夢回景色
如畫

殺云是劉郎字全美馬鳴車響斷還續人境晦明秋色裏既寤
茫然失所遭河轉星翻汗如洗世傳夢凶常得吉神物戲人良
有旨全美聲名海縣聞閉久當開乃其理娟娟二十四橋月月
下吹簫聊爾耳洗眼看君先一鳴九萬扶搖從此始

和虛飄飄

總以物之
易滅者人
詠詩之比
體也

虛飄飄虛飄飄風寒飄絮浪春暖履冰橋勢緩霜垂霰聲乾葉
下條雨中漚點沒流水風裏綵雲鋪遠霄虛飄飄比時光影猶

堅牢

魯直唱虛飄飄雲千疊遊空絲萬條蜃樓百尺聳滄海鴈字一行書絳霄

虛飄飄

比人生猶堅牢子瞻和虛飄飄虛飄飄畫簷蛛

結網

銀漢鵲成橋塵積雨梧葉霜飛風柳條露凝殘點見紅日

星曳餘光橫碧霄

虛飄飄

飄比

浮名利猶堅牢

馬上口占二首

向晨結束事長途、利風刮面冰在鬚、岡窮得水馬不進霧暗失
道人相呼悠悠旁舍見汲井、軋軋隔林聞輓車、游目騁懷自可
樂、勿憶鄉縣增煩紆、

霜風稜稜萬木枯、梅花破萼猶含鬚、田家往往事游獵、追逐狐
兔相號呼、微茫山中起狂燒、隱約林梢低日車、馬頭漸覺有佳
趣、勿厭阡陌多縈紆、

別子瞻

人生異趣各有求、繫風捕影祇懷憂、我獨不願萬戶侯、惟願一
識蘇徐州、徐州英偉非人力、世有高名擅區域、珠樹三株詎可

攀玉海千尋真莫測一昨秋風動遠情便憶鱸魚訪洞庭芝蘭
不獨庭中秀松柏仍當雪後青故人持節過鄉縣教以東來償
所願天上麒麟昔漫聞河東鶯鶯今纔見不將俗物擬天真北
斗已南能幾人八博學士風標遠五馬使君恩意新黃塵冥冥
日月換中有盈虛亦何算據龜食蛤暫相從請結後期游汗漫
子瞻詩云夜光明月非所投逢年遇合百無憂將軍百戰竟
不侯伯郎一斗得涼州翹關負重君無力十年不入紛華域故
人坐上見君文謂是古人吁莫測新詩說盡萬物情硬黃小字
臨黃庭故人已去君未到空吟河畔草青青誰爲他鄉各異
天遣君來破吾願一聞君語識君心短李髯孫眼中見江湖放
浪久全真忽然一鳴驚倒人從橫所值無不可知君不怕新詩
新千金弊帚那堪換我亦淹留豈長算山中既未決同歸我聊
爾耳君其漫淮南三歲吾何求使君到後消人憂君言有客
輕公侯扁舟相從古揚州置之匹馬恨無力千里相忘同異域
新詩空使四座驚隱居未易凡人測使君南歸無恨情鴻飛攜

書墮我庭此書兼置昔年客袖中麗句淮山青老夫強顏依府
縣堆案文書本作願清談疊疊解人頤安得座右長相見狂客
吾非賀季真醉吟君似謫仙人未契長遭少年笑白髮應慙傾
蓋新都城酒貴誰當換塵埃妬面非良算歸來泗上正思君莫
侍黃花
霜爛熳

淮海集卷五終

淮海集卷六

詩七言古

和黃法曹憶建溪梅花同參寥賦

允稱清新
流利

末句用杜
妙當

海陵參軍不枯槁。醉憶梅花愁絕倒。爲憐一樹傍寒溪。花水多情自相惱。清淚班班知有根。恨春相逢苦不早。甘心結子待君來。洗雨梳風爲誰好。誰云廣平心似鐵。不惜珠璣與揮掃。月沒參橫畫角哀。暗香銷盡令人老。天分四時不相貸。孤芳轉盼同衰草。要須健步遠移歸。亂插繁華向晴昊。參寥詩云。朝風蕭蕭。方振槁雪。壓茆齋。欲欹倒。門前誰送一枝梅。問訊山僧少。病惱強將筆力爲君寫。麗句已輸何遜早。碧桃丹杏空自妍。嚼蘂香無比。好先生攜酒傍玉叢。醉裏雄辭驚電掃。東溪不見謫仙人。江路還逢少陵老。我雖不飲爲誰牽。不惜山衣同藉草。要須陶令插花歸。醉臥

春風軼軒昊 子瞻和云 西湖處士骨應槁 只有此詩君壓
倒東坡先生心 已灰爲愛君詩 被花惱多情 立馬待黃昏 殘雪
消遲月出早 江頭千樹春 欲暗竹外一枝斜 更好孤山山下醉
眠處 點綴綴褰腰 紛不掃 萬里春隨逐 客來十年花 送佳人老去
年花開 我已病 今年對花還草草 不如風雨卷春歸 收拾餘香
還畀昊 子瞻和云 化工未識蘇羣槁 先向梅花一傾倒 江
南無雪春瘴生 爲散冰花除熱惱 風清月落無人見 洗妝自趁
嚴鍾早 惟有飛來雙白鷺 玉羽瓊枝鬪清好 吳山道人見 洗妝自趁
眼淨塵空無可掃 故將妙語寄多情 橫機欲寄東坡老 東坡習
氣除未盡 時復長篇書小草 且慙長條煢落英 忍饑未忍呼穹
昊 子由和云 老夫毛骨日凋槁 愁見米鹽惟醉倒 忽傳騷
客賦 寒梅感物傷春同 懊惱江邊不識北風勁 牆頭知有南枝
早 未開素質夜光明 半落清香春更好 鄰家小婦學開媚 靚妝
惟有長眉掃 孤芳已與飛霰競 結子仍先百花老 苦遭橫笛亂
飛英 不見遊人醉芳草 可憐物性空自知 羞作繁華助芒昊
子由和云 憐君古木依巖槁 西江飲醉須彌倒 野花幽草亦
何爲 嶮語長篇空自惱 萬點浮溪轍 長歎一枝過 嶺誇先早拾
香不忍游塵污 嚼蘂更憐真味好 道人遇物心有得 瓦竹相敲
緣白埽 誰知真妄了不妨 令我至今思漣老 妙明眞覺昔未
識 但向寒窗看詩草 浮雲時起鳥四飛 畢竟安能亂清昊

酷於凝杜

題驪鬘圖

雙瞳夾鏡權協月。尾鬣蕭森澤於髮。鞍銜不施韁復脫。旁無馭者氣騰越。地如砥平邱隴滅。天寒日暮抱饑渴。驤首號鳴思一發。超軼絕塵入恍忽。東門金鑄久銷歇。曹霸丹青亦云沒。賴有龍眠戲揮筆。眼前時見千里骨。玉臺閭闔相因依。嗟爾龍媒空自奇。鸞旗日行三千里。焉用逐風追電爲。

和東坡紅鞵帶

君不見相如容貌窮不枯。卓氏恥之分百奴。一朝奉旨使節符。駟馬赤車從萬夫。仲元君平更高妙。寄食耕卜霜眉鬚。兩川人物古不乏。數子風流今可無。參軍少年飽經術。期作侍中司御。

壺老披青衫。更翼鑠上馬。不用兒孫扶。一朝忽解印綬去。恥將詩禮攘褻襦。懸知百年事已定。卻笑列仙形甚臞。東阡北陌西風入。瑞草橋邊人叫呼。相見紅圍照白髮。頽然醉臥文君壚。

題楊康公醉道士石

黃冠初飲何人醉。徑醉頽然不知久。風吹化石楚山阿。藤蔓纏身蘚封口。常隨白鶴亦飛去。但有衣冠同不朽。異物終爲賢俊得。野老田夫豈宜有。華陰楊公香案吏。一見遂作忘年友。日暮西垣視草歸。往往對之傾數斗。大夢之間無定論。啓母望夫天所誘。穀城或與子房期。西域更爲陳那吼。我疑黃冠反見玩。若此堅頑定醒否。何當一笑凌蒼霞。顧謝主人聊舉手。

送蔡子驤用蔡子駿韻

越絕山川遠相屬，萬壑千巖抱青綠。臥龍一峯稱是奇，繞趾清
漪如帶束鏡水。春生鵬尾，銜稽山日暮，猿聲續。三休上與蓬萊
接，登眺使人遺寵辱。我昔東遊觀禹穴，痛飲狂歌得所欲。上天
何曾有官府，鸞鳳日日遭鞭朴。僧坊畫壁閱幾徧，神妙難忘獨
金粟。華胥夢斷已十年，又見春風煮餠粥。苧羅若耶固依舊，可
憐雲月誰追逐。故人淡泊出天性，鷦鷯巢林一枝足。不肯絃歌甘
甕庫，還同市門隨梅福。惟應月下小叢歌，尙有哀音傳舊俗。

和裴仲謨放兔行

兔饑食山林，兔渴飲川澤。與人不瑕疵，焉用苦求索。天寒草枯

死見窘何太迫上有蒼鷹禍下有黃犬厄一死無足悲所恥敗
頭額敢期揮金遇倒橐無難色雖乖獵者意頗塞仁人責免兮
免兮聽我言月中仙子最汝憐不如亟返月中宿休顧商巖并
嶽麓

南都新亭行寄王子發

洛水沄沄天上動道入隋渠下梁宋宋都隄上十二亭一一飛
驚若鸞鳳光華遠繼周王雅宴喜還歸魯侯頌玉觴巖令肅衣
冠金縷哀音繞梁棟娟娟殘月照波瀾習習暖風吹鳥哢何處
高帆落文鷁誰家駿馬嘶征鞍柳枝芳草恨連天暮雨朝雲同
昨夢借問亭名製者誰畱守王公才望重胸中雲夢吞八九日

解千牛節皆中祥符相公實曾祖庭列三槐多伯仲承明厭直
出荊州轉守此都行大用此都去天纔尺五交廣荊陽歸引控
兔園事迹化黃埃清冷文雅堪長慟舳艫銜尾車挂轄昨日出
迎今日送送故迎新無已時古往今來相戲弄亭下嶽峙淮海
客末路逢公詩酒共一樽明日難重持豈恤官期後芒種今年
氣候頗云早天矯梅花春欲縱行見亭中祖帳開千乘送公歸
法從

以蓴薑法魚糟蟹寄子瞻

鮮鯽經年漬醯醢團臍紫蟹脂填腹後春蓴茁滑於酥先社薑
芽肥勝肉鳧卵纍纍何足道飢餒盤飧亦時欲淮南風俗事瓶

罌方法相傳爲旨蓄魚鱸蜃醢薦籩豆山菽溪毛例蒙錄輒送
行庖當擊鮮澤居備禮無麋鹿

贈女冠暢師

瞳人翦水腰如束一幅烏紗裹寒玉飄然自有姑射姿回看粉
黛皆塵俗霧閣雲牕人莫窺門前車馬任東西禮罷曉壇春日
靜落紅滿地乳鴉啼

次韻黃冕仲寄題順興步雲閣

故山無期大刀頭黃塵溽暑未罷休步雲之篇忽我投便見冰
玉懸清秋順興山川甲閩甌無風萬壑松颼颼步雲之人人品
優御風禦寇眞其儔仙人乘槎凌斗牛回環十見天星周爰鶴

忽驚空蕙帳周家正要礪溪望


徐得之閑軒

建安自古多俊髦徐子磊落尤其豪論兵說劍走湖海身勤事
左無所遭綠水五校已屠臙黑衣三衛嗟徒勞歸來故山便卜
築脫棄萬事輕鴻毛橫前澗水漱哀玉傍舍老櫪藏飛猱山蔬
何用媿梁肉鶴氅未必輸青袍追寒弄月有真意慎勿輕語傳
兒曹

送喬希聖

鷗翔蓬蒿非所悲鵬擊風雲非所喜貴賤窮通盡偶然回頭總
是東流水我思田文昔相齊朱袍照日如雲霓三千冠佩醉明

月清歌一曲傾玻璃如今陳迹知何在但見荒冢煙蕪迷又思
原憲昔居魯門戶東西閉還堵杖藜對客騁高談自覺胸襟輩
堯禹如今寂寞已成塵空有聲名掛千古送君去何時回世閒
如此令人哀我徒駐足不可久笑指白雲歸去來



PL
2687
.C53
V3
淮海集卷七

詩 五言律 排律附

輦下春晴



樓閣過朝雨，參差動霽光。
衣冠紛禁路，雲氣繞宮牆。
亂絮迷春闊，驚花困日長。
經旬牽酒伴，猶未獻長楊。

睡起

睡起東軒下，悠悠春緒長。
爬搔失幽囀，款欠墮危芳。
蛛網留晴絮，蜂房受晚香。
欲尋初斷夢，雲霧已冥茫。

次韻莘老初至湯泉二首

夾路山重復，參天樹老蒼。
一區成小市，數埒引溫湯。
洗沐同幽



客館煖就梵坊未輸朝市子斗酒得西涼

年華行已老林莽尙蔥蒼地勝連龍洞泉溫注鬼湯人風遠城

市鍾梵近僧坊九夏來投錫棲心應更涼

莘老詩云川谷悶深阻天時正莽蒼聊

同不速客來浴自然湯茂宰藹休政道人棲淨坊恍如登十地熱惱頓清涼

過六合水亭懷裴博士次韻三首

次莘老

昔同裴博士酌酒俯庭柯晚岫潭潭碧風池瑟瑟波蒼崖遺老
沒白首故人過轉眄成陳迹勞生可柰何

晚憩孤亭上羸驂繫斷柯荒門寒帶路空檻閣增波往事青山
在餘生白鳥過譎言成絕語疊疊迫陰何

折柳相從地重來失舊柯林光延晚照岸影動微波隔浦檀欒

密當簷翡翠過主人成異物搔首柰情何

懷孫子實

舉眼趨浮末斯人獨好修青春三不惑黃卷百無憂玉出方流
潤鸞停翠竹幽相思自成韻不必寄西郵

對淮南詔獄二首

一室如懸磬人音盡不聞老兵隨臥起漂母給朝飢樊雉思秋
野鞠鷹望暮雲念歸忘食事日減臂環分

淮海行搖落文書亦罷休風霜欺獨宿燈火伴冥搜筋動朱樓
曉參橫粉蝶秋更拚飛鏡破應得大刀頭

次韻答米元章

嗜好清無滓周旋粲有文揮毫春在手岸幘海生雲花鳥空撩
我蓴鱸止屬君惟應讀雌蜺差不愧王筠

宿參寥房

鄉國秋雲暮房櫳日已暝驚風多犯竹破月不藏星鉤箔簷花
動鈔書燭燼零非關相見喜自是眼長青

次韻米元章齋居卽事

庭木雙株茂盆池一掬攄支頤魚出樂入背鳥知還老境行將
及仙書讀未閒因君歌鳳過通夕夢歸山

次韻酬陳傳道

白髮三冬學青衫八尺身誰知人傑上聊作吏中循揮翰通元

氣開編友古人寄聲張氏子曲逆豈長貧

次韻傳道自適兼呈都司芸叟學士

楚國陳夫子周南頗滯留弊袍披槁葉瘦馬兀扁舟藥餌過三
伏文書散百憂何人共禪悅居士有浮休

次韻子由題斗野亭

滿市花風起平隄漕水流不堪春解手更爲晚停舟古堞天連

鴈荒祠木蔽牛杖藜聊復爾轉眄夕煙浮子由詩云細雨添
春色微風動聞流勞

生兩蓬鬢生計一扁舟飲食隨魚蠅封
疆入斗生風波方在眼轉覺此生浮

德清道中還寄子瞻以下排律

投曉理竿櫂溪行耳目醒蟲魚各蕭散雲日共晶熒水荇重深

翠煙山疊亂青路。同逢短榜。崖斷點孤翎。叢薄開羅帳。淪漪寫鏡屏。疏籬窺窈窕。支港泛笳簫。遠澈依微見。哀猿斷續聽。夢長天杳杳。人遠樹冥冥。旅思搖風旆。歸期數月。莫何時。燃蜜炬。復聽閣前鈴。

鮮于子駿使君生日

往昔高堂夢熊羆。兆吉占氣鍾西蜀。秀時應仲秋。嚴江漢。揮犀尾。風雲下筆尖。微辭追屈宋。精義到黃炎。操履森寒柏。名聲耿夜蟾。擊疆鵬。鳴健治。劇鵬鵠。銛使者旌旄。易將軍印綬。添鴛鴻。隨步武。虎豹入韜鈴。錦覆郎官綬。彤垂太守檐。兩行分蜜炬。十里上珠簾。禮士常懸榻。誅姦或奮髯。雨堂昏絳帳。風帙亂牙籤。

銀漢星初換金莖露已霑歡聲連北固壽邑旦東漸麗句充文
几奇香物玉匳簪紳五福具罇俎四難兼賤子真殊幸清標獲
屢覘誤蒙雕朽木猥辱畫無鹽嘉運方熙洽英才豈滯淹佇公
歸法從行道慰民瞻

次韻蔣穎叔南郊祭告上清儲祥宮二十七韻

特起朝陽內祠宮極邃清高窗闕玉女巨闌守昌明盛掩秦諸
峙雄偷漢兩京垣橫天上紫洲露海中瀛黃帝初龍躍中原罷
虎爭樵夫亦談道行旅不持兵此地修禳禱于時保利亨柏梁
災未幾陳寶照重營御帑金繒出慈闈服玩并標題動宸翰撰
次屬鴻生玉刻黃冠印金書祕殿名妙經藏洞觀真籙佩威盟

仙溜花閒靜瓊枝物外榮肇煙承帝祉肆眚順民情天施甯論
報風行不計程近傳聞磬管時或見旌旄海嶽朝雙闕星辰集
上楹禮如尊太一事異寵文成大似圓邱報長於至日迎侍臣
來祭告法駕欲時行釐事通元氣高真達孝誠慶增黃帝系壽
續太陰精西北夷門峻東南道路傾雲行博山氣風卷步虛聲
符貺方期應英髦各彙征謳歌興法從行見秦階平

擬郡學試東風解凍

寶歷開新歲春回斗柄東漪生天際水凍解日邊風浩蕩依蘋
起侵尋帶雪融江河霜練靜池沼玉匳空魚藻雍容裏雲霄俯
仰中更無舟楫礙從此百川通

淮海集卷八

詩 七言律

駕幸太學

原廟初更十二章還輿詔蹕幸諸庠法天壁水遙迎伏應夜深
衣不亂行風動四夷將遣子禮行三舍遂賓王前知此舉追虞
氏果有球音發舜堂

題閣求仁虛樂亭三首

禪房幽構徑彎環噪鵲鳴鳩盡日閒隱几冥濛超物表畫圖髣
髴見林閒褰簾雲吐池中月岸噴天橫竹外山秋興已闌成麗
句板輿時此慰慈顏

長官平昔嗜林邱，僧與開亭待勝遊。
修竹回環扶碧瓦，小池方折轉清流。
春深鶗鴂催詩句，夜靜蟾蜍入酒舟。
只恐政成畱不得，縣人空此憶常游。

誰構新亭近翠微，似教陶令狎天機。
池光引月來簷廡，竹影疏風到客衣。
愛酒有時攜玉斝，無絃聊自拂金徽。
人間此樂應無幾，肯向良辰與物違。

懷李公擇學士

一辭行旆楚亭高，幾爲登臨掛鬱陶。
蓬斷草枯時節晚，山長水遠夢魂勞。
流傳玉刻皆黃絹，早晚金閨報大刀。
宣室方疑鬼神事，順風行看駛鴻毛。

次韻二首

青髮從遊各白袍老來邂逅更陶陶尺書繼月傳雙鯉相見何
時詠百勞諫草十年聊閣筆坐棠三郡不更刀靈崖深水堪行
樂時事紛紛劇蝟毛

畫船京口見停橈蕭灑渾疑謝與陶但把好山供勝踐不將餘
論掛塵勞諫垣天上經焚草藩國年來屢夢刀北路近傳新政
美未嘗因物彊吹毛

題湯泉二首

蒲斛泠泠注不窮幻塵乾慧洗皆空法流水接諸天上神瀛香
聞一國中金粟示爲除病惱跋陀仍已獲圓通馬蹏又入風埃

去回首吳吟謝逌翁

湯泉有
逌翁

溫井霜寒碧甃澄飛塵不動玉匳清老翁仙去羸驂共太子東
歸廢沼平據石聊爲寶陀觀決渠還落堰溪聲洗腸灌頂雖殊
事一洗勞生病惱輕

寄題王欽之白圓庵

誅茅北戶結圓廬從事風流入畫圖珠箔粉垣藏混沌葛巾藜
杖造虛無春閒居士天花室畫靜仙人白玉壺遙想吏行鳬鷺
散沈煙一穗對團蒲

流觴亭并次韻二首

縹縹雲巒欲盡頭灑然華構別飛流朱盤激灩開冰鑑碧甃縈

紆走玉虬毛骨漸驚超濁界風煙驟覺變清秋更憐白足如霜
句可羨溪邊六逸遊

臥龍西畔北池頭水擘華堂瑟瑟流幾曲漪漣盤翠帶一峯孤
秀浴蒼虬香囊近午清無汗素扇生涼爽入秋待喚畫師來貌
取圖成便是竹溪遊

遊龍門山次程公韻

路轉橫塘入亂峯徧尋瀟灑興無窮樓臺特起喧卑外村落隨
生指點中溪傍五雲清逗玉松分八面翠成宮歸途父老欣相
語今日程公昔謝公

遊龍瑞宮次程公韻

靈祠真館閣山隈形勢相高對越臺莓徑翠依屏上轉藕花紅
繞鑑中開鶴銜寶箭排煙去龍護金書帶雨來夾道萬星攢騎
火滿城爭看使君回

次韻朱李二君見寄二首

東阡北陌坐淹時偶爲風高振羽儀十丈蓮花開處遠三年楮
葉刻成遲鬢毛但速安仁老錢粟難輸曼倩饑尙賴故人遙想
憶發揮春色有新詩

萬古流空一鳥沈衣冠常苦事違心七行俱下知君舊四者難
并笑我今梅已偷春成國色雲猶馮臘造天陰美人綠綺煩遙
贈莫致南金增永吟

睡足軒二首

長年憂患百端慵開戶僧坊頗有功德撒蔽虧僧界淨人除荒
穢玉匳空青天併入揮毫裏白鳥時興隱几中最是人閒佳絕
處夢殘風鐵響丁東

數椽空屋枕清流一榻蕭然散百憂終日掩關塵境謝有時開
卷古人遊鳴鳩去後滄浪晚飛雨來初菡萏秋此處便令君睡
足何須雲夢澤南州

寄孫莘老少監

一出承明七換麾君恩復許上彤墀白衣蒼狗無常態璞玉渾
金有定姿天上圖書森似舊人閒歲月浪如馳黿頭只在蓬山

畔行赴蟠桃熟後期

次韻馬忠玉喜王定國還自濱州

淮海相逢一解顏紛紛歲月夢魂閒
初驚漁艇迷花去忽認星槎拂斗還
桂嶺暮登援斷續槐堂春到鳥綿蠻
石渠舊議行當復未信佳時得白閒

寄李公擇郎中

節旄淮畔脫秋風忽跨鯨魚上碧空
華秀兩跗當重露文成五色在高桐
江南又說衣冠盛廷右仍瞻禮樂隆
朝覲旣升淮海見灑灑雨雪自消融

寄李端叔編修

旗亭解手屢冬春聞道歸來白髮新馬革裹尸心未艾金龜換
酒氣方震夢魂偷繞邊城月導從公穿禁路塵知有新編號橫
槩爲憑東使寄淮濱

寄題倪敦復北軒

倪郎才韻照冰壺北向開軒頗自娛簷度蕙風鳴鵠鵲壁經梅
雨畫蠅螭觥籌交錯銀河掛文史縱橫角簟鋪官舍私居同是
漫莫嗟三徑就荒蕪

寄題盧君斗齋

俠氣軒軒翰墨場邇迴世路鬢成霜出從車馬行千里歸與琴
書寄一方鳥嚙入簾春欲破鑪香侵夢日初長扁舟會有山陽

役聊借狂夫挹酒漿

次韻酬周開祖宣義

并州令尹古人風
淮海相忘十載中
麗句曉披花綽約
清談初扣玉丁東
追攀昔共猗猗子
嗜好今同桑苧翁
所惜華船輕解絳
未窺笠澤故書叢

送王元龍赴泗州糧料院

子猷風味最諸王
試吏聊懷筦庫章
鷁峙碧桐初振羽
珠遺滄海漸騰光
淮山暮眺千峯耀
洛水秋輸萬鷁翔
顧我行爲大梁役
一卮薄酒話愁腸

次韻子由題九曲池

廣陵五題

蕭瑟通池闕茂林岸傍無復屬車音涵春似恨隋家遠漲曉疑
連蜀井深鬪草事空煙冉冉司花人遠樹陰陰勞生俛仰成陳
迹縱有遺音可用尋子由詩云稽老清彈怨廣陵隋家水調寄哀音可憐九曲遺聲盡惟有一池春水
深鳳闕蕭條荒草外龍舟想像綠楊陰
都人似有興亡恨每到殘春一度尋

次韻子由題平山堂

棟宇高開古寺閒盡收佳處入雕欄山浮海上青螺遠天轉江
南碧玉寬雨檻幽花滋淺淚風扈清酒漲微瀾遊人若論登臨
美須作淮東第一觀子由詩云堂上平看江上山清光千里對憑欄海門僅可一二數雲夢猶吞八九
寬簷外小棠陰蔽芾壁間遺墨涕洟瀾
人亡坐覺風流盡遺構仍須子細觀

次韻子由題蜀井

蜀岡精氣滄多年故有清泉發石田
乍飲肺肝俱澡雪反窺杖屨亦輕便
炊成香稻流珠滑羹出新茶潑乳鮮
坐使二公鄉思動放杯西望欲揮鞭
子由詩云信胸東遊十一年甘泉香稻憶歸田行逢蜀井恍如夢試煮山茶意自便短綆不收容鹽濯紅泥仍許置清鮮早知鄉國勝爲客遊宦何須更著鞭

次韻子由題摘星亭

迷樓舊址

崑崙左右兩招提中起孤高雉堞西
不見燒香成宿霧虛傳裁錦作障泥
螢流花苑飛星亂蕪滿春城綠髮齊
長憶凭欄風雨後斷虹明處海天低
子由詩云關角孤高特地迷迷藏渾忘日東西江流入海情無限暮雨連山酸似泥夢裏興忘應未覺後來愁思獨難齊只湛雷作遊觀地看徧峯巒處處低

次韻子由題光化塔

古佛悲憐得度人應緣來現比邱身水流月落知何處花發鶯
啼又一春方外笑談清似玉夢中煩惱細如塵老僧自說從居
此卻悔平時事遠巡子由詩云山頭孤塔闍真人云是僧伽
第二身處處金錢追晚供家家蠶麥保新
春欲求世外無心地一掃曾中累劫塵
方丈近聞延老宿清朝畱客語逡巡

次韻子瞻贈金山寶覺大師

雲峯一變隔炎涼猶喜重來飯積香宿鳥水干迎曉鬧亂帆天
際受風忙青鞋踏雨尋幽徑朱火籠紗語上方珍重故人敦妙
契子瞻詩云誰能斗酒博西涼但記齋廚
法政香往事真同一夢覺高談誰洗五年
忙清風漫與山阿曲明月常隨屋角方
稽首願師憐久客直將歸路指茫茫

遊鑑湖

畫舫珠簾出繚牆。天風吹到芰荷鄉。水光入座杯盤瑩。花氣侵人笑語香。翡翠側身窺綠酒。蜻蜓偷眼避紅妝。葡萄力緩單衣怯。始信潮中五月涼。

謁禹廟

陰陰古殿注修廊。海伯川靈儼在傍。一代衣冠埋石窆。千年風雨鎖梅梁。碧雲暮合稽山暗。紅芰秋開鑑水香。令我免魚繇帝力。恨無歌舞奠椒漿。

蓬萊閣

雄簷傑檻跨崢嶸。席上風雲指顧生。千里勝形歸俎豆。七州和氣入簫笙。人遊晚岸朱樓遠。鳥度晴空碧嶂橫。今夜請看東越

分藩星應帶少微明

程公闢次韻

半天鐘鼓宴崢嶸早晚陰晴景旋生湖暖水香春載酒月寒雪白夜

聞笙金鼇破海頭爭並玉鷺排煙障白橫我自蓬萊東道主倚欄先占日初明

別程公闢給事

人物風流推鎮東
少郎持節作元戎
鱗前倦客劉師命
月下清歌盛小叢
裘弊黑貂霜正急
書傳黃犬歲將窮
買舟江上辭公去
迴首蓬萊夢寐中

程公闢次韻

君家從父早相從晚接清談有阿戎曲水暢情林竹茂小山招隱桂

枝叢與時搏擊飛終遠隨處登月興莫窮人下天來應問得高名已到臨華中

中秋口號

雲山簷楯接低空
公宴初開氣鬱蔥
照海旌幢秋色裏
激天鼓吹月明中
香槽旋滴珠千顆
歌扇驚圍玉一叢
二十四橋人望

處台星正在廣寒宮

客有傳朝議欲以子瞻使高麗大臣有惜其去者自罷之

作詩以紀其事

與莘老同賦

學士風流異域傳幾航雲海使南天不因名動五千里豈見文
高二百年貢外別題求妙札錦中翻樣織新篇淹留卻恨駕行
舊不得飛觴駐驛前

莘老原唱云

文章異域有知音鵬鯨差池一醉吟穎士聲名動倭國樂天辭筆過

雞林節髦零落瓊吞雪辯舌縱橫印佩金奉使風流家世事幾隨浪拍海東岑

淮海集卷九

詩 七言律

顯之禪老許以草庵見處作詩以約之

汨汨塵勞不自堪
駝裘鞭馬度晴嵐
洞天窅窅清都邃
神水敲蒸星釜涵
列岫過霜仍晻曖
雙松迎臘正驂驪
此心久已蒙師指
更許山中爲結庵

橡葉岡頭釋馬銜
區中奇觀得窮探
崖空飛鼠聲相應
江靜羣

峯影倒涵居士碧
雲裁秀句道人哀
玉扣清談偶成二
老風流

事不是三乘宿草庵

參寥次韻 盤盤秀嶺拱層簷
方丈門門揖翠嵐
風激松梢聲闕發
月留泉底影相

涵天機清曉現臺
震險句窮宵虎穴
探白傳異時修故
事杖藜應許到雲
庵

和孫莘老遊龍洞

葦蕭傳火度冥冥，乍入清都醉魄醒。
草隱月崖垂鳳尾，風生陰穴帶龍腥。
壁閒泉貯千鐘碧，門外天橫數尺青。
更欲仗筇畱頃刻，卻疑朝市已千齡。
莘老詩：側徑縈紆人杳冥，神鑱鬼鑿露巖肩。天懸乳石映華蓋，壁隱莓苔蘊翠屏。九道寒江雲外白，一池陽井雪中青。還同康樂登臨海，可共羊河筆不停。參寥和：瞳龍杲日破林洞，笑語相將馬暫停。路與猿獠爭險磴，身隨鴻鵠入青冥。曉巖曲穴疑無底，蟠屈蒼虬信有靈。能使謝公詩興動，宛如游刃發新硎。

送蔣穎叔帥熙河二首

侍臣不合出都門，爲有威名藩漢尊。
戶部左曹回妙手，匈奴右臂落清罇。
揮毫珠璧生談笑，轉盼龍鸞在夢魂。
潮海一空何足道，歸來黃閣坐調元。

天馬蒲萄隔域門漢庭誰更勇如尊行臺曉日屯千騎祖道春
風屬一罇莫許畱犁輕結好更令甌脫復游魂要須盡取隄河
地打鼓梁州看上元

和劉僕射感舊言懷寄蘇左丞左丞昔守南京僕射方爲
幕客今同爲執政作此詩僕射詩略記其一聯云論交
青眼今猶在報國丹心老更同

三禁提衡繫擾龍拜無燒尾有家風班行舊號青雲士賓主今
爲黃閣公炯炯坐屏雲母隔珊珊行佩水蒼同自驚初到蓬萊
上便見驪珠出海宮

西城宴集元祐七年三月上巳詔賜館閣官花酒以中澣

日遊金明池瓊林苑又會於國夫人園會者二十有六

人二首

唐人應制
詩無此清
楚

春溜泱泱初滿池，晨光欲轉萬年枝。
樓臺四望煙雲合，簾幕千家錦繡垂。
風過忽聞花外笑，日長時奏水中嬉。
太平誰謂全無象，寓在羣仙把酒時。

次王敏中
少監韻

宜秋門外喜參尋，豪竹哀絲發妙音。
金爵日邊棲壯麗，彩虹天際臥清深。
已煩逸少書陳迹，更屬相如賦上林。
猶恨真人足官府，不如魚鳥自飛沈。

次王仲至
侍郎韻

清明前一日李觀察席上得風字

病軀寒食百無悰，偶到平陽舊第中。
池籩信爲三輔冠，杯盤真

有五陵風美人賦韻分春色上客揮毫奪化工白髮漸於花柳
薄但憐流水碧相通

次韻羅正之惠綿扇

吳扇新翻製素綿名郎持贈意俱圓有人充戶修明月無女乘
鸞向紫煙供奉宜升清暑殿動搖合作御風仙誰知揮卻青
鸞輩功在春蠶一覺眠

寄新息王令藏春塢

令尹才高寺爲空歲時行樂與民同旋開小塢藏春色更製新
聲寫土風客向樽前忘爾汝路穿花去失西東無言嬌女今焉
在桃李相傳恨未窮

送劉承議解職歸養

征馬蕭蕭柳外鳴
議郎歸養洛陽城
登山尚記飛雲處
罷吏端如棄唾輕
爲米折腰知我拙
下車入里見君榮
堂前嵩少宜秋色
獻壽還應旋製聲

次韻王仲至侍郎

會李觀察池上

蛺蝶口清漪
下玉欄
隔花時
聽鳥關關酒行寒
食清明際
人在蓬壺閬苑間
天近省闈卿月麗
春偏戚里將星閑
忽思歸去焚香坐
靜取楞嚴看八還

慶張君俞都尉畱後得子

天上吹簫玉作樓
蟠桃熟後更無憂
內家報喜車凌曉
太史占

祥斗掛秋龍得一珠應獻佛虎生三日便吞牛魯元福祿何人似坐見張敖數子侯

寄題趙侯澄碧軒

風流公子四難并更引清漪作小亭潤及玉階春漲雨光浮藻井夜涵星捲簾几硯成圖畫倚檻鬚鬟入鏡屏何日解衣容借榻臥聽螭口瀉泠泠

寄張文潛右史

解手亭皋纔幾月春風已復動林塘稍遷右史公何忝初闕除書國爲狂日出想驚儒發冢風行應罷女爭桑東坡手種千株柳聞說邦人比召棠

次韻裴秀才上太守向公二首

東風已動北風歸，寒氣侵尋自霽威。
何處管絃傳臘酒，誰家刀尺製春衣。
使君英妙開蓮幕，別駕風流出粉闥。
惟有廣文官獨冷，終年如坐水邊磯。

上客新從穎尾歸，使君高會列南威。
風將沈燎縈歌扇，雪帶梅香上舞衣。
翻樣雪團分御帑，如椽密炬出宮闈。
食前方丈羅珍怪，卻訝犀燃牛渚磯。

次韻太守向公登樓眺望二首

茫茫汝水抱城根，野色偷春入燒痕。
千點湘妃枝上淚，一聲杜宇水邊魂。
遙憐鴻隙陂穿路，尙想元和賊負恩。
粉堞女牆都已

盡恍如陶侃夢天門

庖煙起處認孤村
天色清寒不見痕
車網湖邊梅濺淚
壺公祠畔月銷魂
封疆盡是春秋國
廟食多懷將相恩
試問李斯長歎後
誰牽黃犬出東門

寄錢節

時節出爲揚州從事
新錄兼簡參寥

論月柴門不浪開
命車良爲故人來
茫然極目春千里
尙想愁腸日九回
綠水池邊聊復爾
黃梁枕上信悠哉
何時其約參寥子
自擷青蒿作飯材

贈劉使君景文

落落日冠八尺雄
魚符新賜大河東
穰苴兵法申司馬
曹植詩

原出國風枯筆古心生篆刻引觴俠氣上雲空石渠病客君應
笑手校黃書兩鬢蓬

答龔深之

深巷茅簷日漸長臥看花鳥競朝陽惜無好事攜罇酒賴有鄰
家振燭光尙友頗存書萬卷封侯正闕木千章錯刀錦段相仍
至小子都忘進取狂

次韻答裴仲謨

十年淮海閒居草偶遣兒童次第成方愧貧家矜敝帚忽蒙鄰
壁借餘明文昌但願花前老張翰何須身後名移病闔門參拜
阻臥聽車馬去來聲

答曾存之

環堵蕭然汝水隈，孤懷炯炯向誰開。
青春不覺書邊過，白髮無端鏡上來。
祭竈請鄰聊復爾，賣刀買犢豈難哉。
故人休說封侯事，歸釣江天有舊臺。

春日寓直有懷參寥

觚稜金爵自岿巍，藏室春深更寂寥。
捫虱幽花欹露葉，岸巾高柳轉風條。
文書几上鬚髯變，鞍馬塵中歲月銷。
何日一筇江海去，與君徐步看生潮。

次韻裴仲謨和何先輩二首

聞說何郎操行端，蕭然環堵若爲安。
鳥嘯花發阻攜手，水遠山

高空凭欄別後想多黃絹作春來尤厭惠文彈兩章讀罷知高義貴賤交情自古難

汝南古郡寡參尋兀兀長如鶴在陰支枕星河橫醉後入簾風絮報春深青山未落詩人手白髮誰知國士心多謝名郎傳綠綺愧無佳句比南金

答閻求仁謝參寥彥溫訪於墳所

老滄城西木半摧崑崙岡下路新開故人此地銜憂去禪客他時問疾回聞爲樹風增永感卻因水鳥證西來已謀寒食驅羸馬細聽清談動玉哀

次韻劉遜父以甯齋詩二軸作以還之

揚舫偶過海邊州一見名郎破百憂荀氏諸龍俱俊偉河東小
鳳最風流明珠白璧堪投報細草幽花入獻酬別駕舊齋何足
念文昌新府待公遊

次韻何子溫

一星就起海隅傍縣弩前驅過射陽行見斯民無重困坐令吾
道有餘光簿書不礙詩人筆猿鳥常窺使者章談笑自然羣吏
肅何須酒後次公狂

次韻宋履中近謁大慶退食館中

翠華初到殿中開三館諸儒共一班迎謁曉廷清蹕近退穿春
仗綵旂閒病來怕飲東西玉老去慚陪大小山知續春明退朝

錄借觀當奉一鵬還

與鄧慎思沐於啓聖遇李端叔

羸兵瘦馬犯黃塵
自笑區區夢裏身
不是對花能伏老
白緣無酒可澆春
校書天祿陪羣彥
晞髮陽阿遇故人
三百六人如此少
更添香火坐逡巡

和程給事賢閣黎化去之什

風流雲散越王城
珍重閣黎願力成
不使鄧尼驚倒化
祇教白傳歎先行
早因妙契窺曹洞
竟以清芬繼肇生
迴首中庭旌騎散
月華還可一方明

再賦流觴亭

仙山遊觀甲寰瀛。不比人間目雨亭。歌斷瑤池雲杳杳。酒行金谷水泠泠。珠簾捲雨驚秋近。羅襪凌波笑客醒。月下珮環聲更好。應容揮麈伴公聽。

燕觴亭

碧流如鏡羽觴飛。夏木陰陰五月時。清渭日長遊女困。武陵春去落花遲。玉笙吹罷觥籌錯。蜜炬燒殘簪珥遺。吳越風流公第一。未輸山簡習家池。

會蓬萊閣

冠裳蓋坐灑清風。軒外時間韻籟龍。人面春生紅玉液。銀盤煙覆紫駝峯。天涵秋色山山共。樹覺鄉思葉葉重。便欲買船江北

去爲懷明德更從容

次韻侍祠南郊

風馬雲車下九天郊柴初告帝心虔
天如倚蓋臨壇上星若連珠繞御前
縹緲佩環參雅奏嵒巍樓閣抱非煙
侍臣舉酒欣相屬醉看參橫左右肩

與李端叔遊智海用前韻

點目誰能化兩龍超然相覓古人風
紅塵稍與僧家遠白髮偏於我輩公
休計浮名千載後且欣湯餅一杯同
何時並築邗溝上引水澆花半畝宮

和黃冕仲寄題延平冷風閣

冷風三伏是清秋雖有炎蒸不汝出滿地溪山歸藻井有時絲
管下滄洲快哉便得逍遙趣偶爾還成汗漫遊誰謂發揮無妙
手賦凌楚玉有家邱

次韻謝李安上惠茶

故人早歲佩飛霞故遣長須致茗芽寒壺遽收諸品玉午甌初
試一團花著書懶復追鴻漸辨水時能効易牙從此道山春因
少黃書牘校兩三家

次韻范純夫戲荅李方叔饋筍兼簡鄧慎思

楚山冬筍斲寒空北客長嗟食不重秀色可憐刀切玉清香不
斷鼎烹龍論羹未愧萁千里入貢當隨傳一封薄祿養親甘旨

少滿包時賴故人供

寄少儀弟

一隔音塵月屢遷○忽收來問涕潛然○棲遲冊府吾如昨○流落江村汝可憐○夢裏漫成池草句○愁來空誦棣華篇○卑飛暫爾無多恨○會有高風送上天○

九月八日夜大風雨寄王定國

長年身外事都捐○節物驚心一悵然○正是山川秋入夢○可堪風雨夜連天○桐梢撼撼增悽斷○燈燼飛飛落小圓○瀚洗此情須痛飲○明朝試就酒中仙○

林次中奉使契丹劉仲平出倅鄆州同舍十有六人飲餞

於丁氏園次少蓬韻二首

鮮車百乘使龍庭路指金燕古北平祖帳列山修故事行臺諸
部奏新聲畱犁撓酒知胡意尺牘移書示漢情納節便應歸法
從中途已報制書行

右送次
中諫議

須句別駕偉儀刑陵谷初無見坦平七子建安推世藝五經中
秘擅家聲南宮參綴端如夢東觀分攜空復情莫愛谿堂好風
月早來龍尾道前行

右送
仲平

淮海集卷九終

淮海集卷十

詩 五六言

題趙團練畫江干曉景四絕

本自江湖客。宦游常苦心。看君小平遠。懷我舊登臨。
鳥外雲峯晚。沙頭草樹晴。想初揮灑就。侍女一齊驚。
公子歌鐘裏。何從識渺茫。惟應斗帳夢。曾到水雲鄉。
曉浦煙籠樹。春江水拍空。煩君添小艇。畫我作漁翁。

夢中得此

縞帶橫秋匣。寒流爛暮堂。風塵如未息。持此奉君王。

甯浦書事六首

揮汗讀書不已人皆怪我何求我豈更求榮達日長聊以銷憂
魚稻有如淮右溪山宛類江南自是遷臣多病非干此地煙嵐
南土四時盡熱愁人日夜俱長安得此身作石一齊忘了家鄉
洛邑太師奄謝龍川僕射云亾他日歸然獨在不知誰似靈光
身與杖藜爲二對影和月成三骨肉未知消息人生到此何堪
寒暑更捩三十同歸滅盡無疑縱復玉關生入何殊死葬蠻夷

淮海集卷十一

詩 七言絕

寄孫傳師著作

上林池籞富春風十里宮青錯御紅應與少年修故事誤隨遊
轂柳花中

泗州東城晚望

渺渺孤城白水環舳艫人語夕霏閒林梢一抹青如畫應是淮
流轉處山

戲雲龍山人二絕

芳草未應羞鳴鳩潛鱗終是畏提壺蔡經背上痕猶在更念麻

姑指爪無

選勝只攜長脰鶴入塵還駕短轅車時人若問虛玄事笑答無
過李老書

圓通院白衣閣三首

白衣閣外繞朱欄人在琉璃菡萏閒誰把此花爲刻漏修行不
放一時間

無邊刹境一毫端同住澄清覺海閒還是此花并此葉壞空成
住未曾閒

一根反本六根同古佛傳家有此風滿目紅蕖參翠蓋不惟門
裏獲圓通

照閣

彌猴鏡裏三身現
龍女珠中萬象開
未若北軒人散後
水光清泛月華來

睡足寮寄震鼎二弟

與物無營但欲眠
客來從笑腹便便
秋生淮海涼如水
得句還應夢阿連

次韻參寥見別

鑪香冉冉紆寒穗
篝火熒熒擢夜芒
預想江天回首處
雪風橫急鴈聲長

與倪老伯輝九曲池有懷元龍參寥

雲月娟娟淮海秋，隋家池上共浮游。
可憐一段風流事，特欠支郎與子猷。

春日五首

幅巾投曉入西園，春動林塘物物鮮。
卻憩小庭纔日出，海棠花發麝香眠。

一夕輕雷落萬絲，霽光浮瓦碧差差。
有情芍藥含春淚，無力薔薇臥曉枝。

袂衣新著倦琴書，散策池塘返照初。
翠碧黃鸝相續去，蒼絲深處見遊魚。

春禽葉底引圓吭，臨罷黃庭日正長。
滿院柳花寒食後，旋鑽新

火焚鑪香

金屋舊題煩乙子蜜脾新採賴蜂臣
蜻蜓蛺蝶無情思隨例顛

忙過一春

忙一作狂

秋日三首

霜落邗溝積水清寒星無數傍船明
菰蒲深處疑無地忽有人家笑語聲

月團新碾瀹花蘂飲罷呼兒課楚詞
風定小軒無落葉青蟲相

對吐秋絲

連卷雌蜺掛西樓逐雨追晴意未休
安得萬畝相向舞酒酣聊

把作纏頭

次韻子由召伯埭見別三首

孤蓬短榜沂河流，無賴寒侵紫綺裘。召伯埭南春欲盡，爲公重

賦伴牢愁。

子由詩云：濛濛春雨溼邛溝，蓬底安眠晝擁裘。知有故人家在此，速將詩卷洗閒愁。

青熒燈火照深更，逐客舟航冷似冰。到處故應山作主，隨方還

有月爲朋。

子由詩云：筆端大字鴉棲壁，袖裏新詩句琢冰。送我扁舟六十里，未嫌罪垢污交朋。

冠蓋紛紛不我謀，掩關聊與古人遊。會須匹馬淮西去，雲巘風

溪逐所求。

子由詩云：高安此去風濤惡，還有廬山得縱遊。便欲攜君將船去，念君無罪去何求。

還自廣陵四首

薄茶便當鳥程酒，短艇聊充下澤車。墳墓去家無百里，往來仍

不廢觀書。

南北悠悠三十年○謝公遺堞故依然○欲論一事無人共○臥聽鍾魚古寺邊○

邗溝繚繞上雲空○坐阻層冰不得通○賴有東風可人意○爲開明鏡玉奩中○

天寒水鳥自相依○十百爲羣戲落暉○過盡行人都不起○忽聞水響一齊飛○

元日立春三絕

此度春非草草回○美人休著剪刀催○直須殘臘十分盡○始共新年一併來○

發春獻歲偶然同○新歷觀天最有功○頭上兩般幡勝影○一時飛

入酒杯中

攝提東直斗杓寒。驟覺中原氣象寬。天爲兩宮同號令。不教春歲各開端。

次韻宋履中題李侯檀欒亭

陰陰數畝籜龍稠。亭外危通一徑幽。頗似竹林當日集。酒狂莫笑阮陳留。

春日偶題呈錢尙書

三年京國鬢如絲。又見新花發故枝。日典春衣非爲酒。家貧食粥已多時。

戶部錢尙書和詩餉米再成二章上謝

本欲先生一解頤。頓煩分米慰長飢。客無貴賤皆蔬飯。惟有慈親食肉糜。

夢裏光陰挽不回。掩關獨坐萬緣灰。偶因問訊維摩病。香積天中施飯來。

擬題織錦圖

悲風鳴葉秋宵冷。寒絲縈手淚殘妝。微燭窺人愁斷腸。機翻雲錦妙成章。

晚出左掖

金爵觚稜轉夕暉。翩翩宮葉墮秋衣。出門塵障如黃霧。始覺身從天上歸。

次韻蔡子駿瓊花

無雙亭上傳觴處最惜人歸月上時相見異鄉心欲絕可憐花與月應知

處州水南庵二首

竹柏蕭森溪水南道人爲作小圓庵市區收罷魚豚稅來與彌陀共一龕

此身分付一蒲團靜對蕭蕭玉數竿偶爲老僧煎茗粥自攜修綆汲清泉

三月晦日偶題

節物相摧各自新癡心兒女挽留春芳菲歇去何須恨夏木陰

陰正可人

次韻東坡上元扈從三絕

赭黃織底望龍章不斷惟聞蠟炬香
一片韶音歸複道重瞳左右列英皇

端門魏闕鬱崢嶸燈火成山輦路平
不待上林鶯百轉敎坊先已進新聲

仗下番夷各一羣機泉如雨自繽紛
細看香案旁邊吏卻是茅家大小君

四時四首贈道流

本是匡山種杏人出山來事碧虛君
上清欲問因何事請看先

山十賚文

天風吹月入欄干鳥鵲無聲子夜闌織女明星來枕上了知身
不在人閒

夜深樓上撥書眠天在欄干四角邊風拂亂雲毫髮盡獨留璧
月向人圓

陰風一夜攪青冥風定雲霏霰雪零遙想玉真清境上白虛光
裏誦黃庭

奉別牛司理

堂堂先德擅才名詞賦高凌墨客卿之子妙齡初筮仕好修文
史繼家聲

送酒與泗州太守張朝請

莫笑杭州別駕村○昔曾柱下數承恩○而今雖是江湖吏○猶有當時七字尊

題郴陽道中一古寺壁二絕

門掩荒寒僧未歸○蕭蕭庭菊兩三枝○行人到此無腸斷○問爾黃花知不知

哀歌巫女隔祠叢○飢鼠相追壞壁中○北客念家渾不睡○荒山一夜雨吹風

又別牛司理

半年淹卹越溪濱○好愛如君只數人○解手莫令書信斷○故園桑

梓幸相鄰

和工部侍郎新章

薨棟相連數畝中，出門遙見大明宮。
朝元雖共浮邱伯，煮茗還同桑苧翁。

題金華山寺壁

鸞鶴同爲汗漫遊，天風吹散下滄洲。
金華有路通元氣，水繞高寒不斷流。

出省馬上有懷蔣穎叔次韻二首

新淬魚腸玉似泥，將軍唾手取河西。
偏裨萬戶封龍額，部曲千金賜褭蹄。

制詔行聞降紫泥簪花且醉玉東西羌人誰謂多籌策止有黔

驢技一蹶

唱首云春雪京城一尺泥並鞍還意蔣征西碧幢紅旆出關去一路東風送馬蹶不論挨牆與塗泥

封印還家日正西豈比元戎碧油下貌貅繞帳馬千蹶

元祐三年余被召至京師從翰林蘇先生過興國浴室院

始識汶師後二年復來閱諸公詩因次韻

聊移小榻就風廊臥久衣巾帶佛香白髮道人還省記前年引

去病賢良

客有遺予以假山石盆池者聞陳元發有石菖蒲作此詩

乞之

瑟瑟風漪心爲清更窺窗翠眼增明可憐一片江山樣只欠菖

蒲十數莖

興國浴室院獨坐時兒子湛就試未出

句雖平淡
而老情閒
致依然可
想

滿城車馬沒深泥
院裏安閒總不知
兒輩未來鉤箔坐
長春花
上雨如絲

題務中壁

醺頭春酒響潺潺
壚下黃翁寢正安
夢入平陽舊池館
隔花螭
口吐清寒

題法海平閣黎

寒食山州百鳥喧
春風花雨暗川原
因循移病依香火
寫得彌
陀七萬言

留別平閣黎

緣盡山城且不歸。此生相見了無期。保持異日蓮花上。重說如今結社時。

紹聖元年觀自國史編修官蒙恩除館閣校勘通判杭州道。貶處州管庫三年以不職罷。將自青田以歸。因往山寺中修懺。日書絕句於住僧房壁。

淮海集卷十一終

淮海集卷十二

進策

序篇

臣聞春則倉庚鳴夏則蜩螗鳴秋則寒蟬鳴冬則雉鳴此數物者微眇矣然其候未至則寂寞而無聞既至則日夜鳴而不已何則陰陽之所鼓動四時之所感發氣變於外則情迫於中雖欲不鳴不可得也淮海小臣不聞廟堂之議帷幄之謀獨耳剽目采頗知當世利病之所以然者嘗欲輸肝膽效情素上書於北闕之下則又念身非諫官職非御史出位犯分重煩有司之誅隱忍逡巡而不敢發幸陛下發德音下明詔使大臣任舉賢

文法古健
何老子

良方正能直言極諫之士將修祖宗故事而親策於庭鳴呼此亦愚臣效鳴之秋也輒忘疏賤條其意之所欲言者爲三十篇以獻惟陛下財擇焉其目曰以意寓言以言寓文示變化之所終始使天下曉然知之作國論瑟不鳴二十五絃各以其聲應轂不運三十幅各以其力旋默則制語靜則制動作主術急不極則緩不生緩不極則急不成一債一起如環無端作治勢二篇以剛爲險山川是資以兵爲險不厭通遠作安都自信者不避嫌自許者不求合倚而容之績乃可底作任臣二篇眾賢聚於本朝姦人之所不利巧爲詆誣以幻羣聽作朋黨二篇烏有鳳魚有鯢超絕之材宜見閭略作人材楊墨塞路孟氏所摻申

商岨興莫或汝遏。作法律二篇。得與失爲鄰。利與害同門。非至
精莫之能分。作論議二篇。爵祿者所以勵世。磨鈍科條。品目其
可不悉。作官制二篇。善治水者以四海爲壑。善治財者以天地
爲資。國之大計。於是乎在。作財用二篇。料敵之虛實。若別牛馬。
應變之倉卒。如數一二。非有道之士。不能作將帥。以寡覆衆。來
如風雨。去如絕絃。作奇兵美言。可以市三寸之舌。勝百萬之師。
作辯士機會之來。間不容髮。匪龜匪鏡。其能勿失。作謀主心不
治。則神擾。氣不養。則精喪。治心養氣。四術自得。作兵法。愚民弄
兵。依阻山谷。銷亡不時。或爲大釁。作盜賊三篇。黨項微種。盜我
靈武。逾八十年。天誅不迄。作邊防三篇。東西爲緯。南北爲經。織

者就綜而文成其詳在彼其略在此作序篇

國論

臣聞古之人君以其祖考之志而升黜人材弛張法度者多矣
太上忘言其次有言其下不及言何則昔舜舉十六相去四凶
肇十有二州皆堯志也而精誠所動神化所移不待告之以言
而天下曉然固已心知其本末此所謂太上忘言者也盤庚之
遷亳武王之伐商所以從先王之業承文考之志也而浮言橫
議二三不一至以其遷伐之意託於詞令丁寧而告於庭委曲
而誓諸野然後民始悅然而服從此所謂其次有言也秦孝公
用商君之說變法令易風俗所以修繆公之業成獻公之志也

然未嘗以其變法之意告民疑而不服則痛法以繩之此所謂其下不及言者也夫秦之不及言固無足道而舜之忘言又不可以遽及然則後世人君有以祖考之命而升黜人材弛張法度者安得不法盤庚武王之有言哉陛下卽位以來圖任元老眷禮名儒屏棄姦臣投竄刻吏所以照臨海內甚盛罷青苗之使廢市易之司削保甲之條刊免役之令至於摘山煮海治鑄之事他日吏緣以爲姦者臨遣信臣更定其法所以加惠元元甚厚臣竊聞之凡此大功數十淹速輕重雖出於聖母之裁成其大概則皆先帝之末命也然大道之行小人所不利或作爲詆欺之言悖亂羣聽以爲先帝之道陛下當終身奉以周旋而

數年之間，遽聽一二大臣，更張幾盡，異乎所謂父作之子述之者矣。自非明智不惑之士，往往聞其說而疑之。嗚呼！此殆陛下不法盤庚、武王有言之過也。夫子之事父，其生也養，志爲大，養口體次之；其歿也，繼志爲大，述事次之。知述事而不知繼志，猶養口體而不養志也，非所以爲達孝。秦皇、漢武皆以蓋世之氣，闢闔宇宙之材，并吞諸侯，攘卻胡粵，若以功業言之，則始皇之英偉傑特，又非武帝之可比也。然而萬世之下，號始皇爲暴主，稱武帝爲賢君，秦祚遽傾，漢基益大，者何哉？二世不變始皇之事，孝昭能改武帝之法，故也。向使先帝晚年於人材法度，初無升黜之心，弛張之意，陛下猶當繼其志，不述其事，又況親承於

末命乎。臣願陛下具以意作爲明詔。丁寧反覆。如古訓誥誓命之文。布告天下。咸使聞之。則小人雖有詆欺之言。不能以疑眾矣。然後被之於詩章。傳示無窮。以明德意。使後世皆知成先帝之功者。陛下也。豈不休哉。

主術

臣聞人主之術無他。其要在乎能任政事之臣。與議論之臣。而已。政事之臣者。宰相執政。和陰陽萬物。宰制百辟。鎮撫四夷。與天子經綸於帷幄之中者也。議論之臣者。諫官御史。學術知古始。器識通世務。奮不顧身。與天子辨曲直。爭是非者也。今天下之事。有執政之臣以行之。有議論之臣以言之。則人主可以弁

冕端委而無所事。不然則雖弊精神竭筋力以夜繼日猶無益也。臣請以用人一事明之士大夫以名列於仕版者蓋以萬計有智者有愚者有賢者有不肖者若智與賢則功利之所從興也愚與不肖則罪害之所從起也。夫人主以一身之思慮一耳目之聰明而當天下功罪利害之機非有政事之臣則百官之進退柰何而不亂也。然人之難知久矣。實愚而似智實智而似愚者有之。實賢而似不肖實不肖而似賢者有之。申以親疏之異重以好惡之偏。夫以天下之智愚賢不肖而付之於二三大臣之手非有議論之臣則進退當否柰何而知之也。雖然政事之臣者人主之股肱議論之臣者人主之耳目任政事之臣而

忽諫官。略御史。猶股肱。便利而耳目盲瞶也。任議論之臣而輕宰相。薄執政。猶耳目聰明而股肱折也。要之二者不可偏勝。使之適平而已。漢成帝用王鳳爲大將軍。政事大小皆自鳳出。天子曾不一舉手。京兆尹王章言之。爲鳳所陷。罪至大逆。故陽朔之後。天下以言爲諱。唐明皇用李林甫爲相。十有九年。顯政用事。補闕杜璡上書。斥爲下邳令。由是諫諍路絕。此則任政事之臣太勝也。漢武帝擢嚴助。朱買臣。吾邱壽王。司馬相如。東方朔之徒於左右。朝廷有政事。輒令助等與大臣辯論。大臣數絀。唐德宗晚年。宰相唯奉行詔書。所與圖事者。李齊運。裴延齡。韋渠牟而已。此則任議論之臣太勝也。臣聞仁祖時。天下之事。一切

委之執政羣臣無得預者除授或不當雖貴戚近屬自從中出輒爲固執不行一旦諫官列其罪御史數其失雖元老名儒上所眷禮者亦稱病而賜罷政事之臣得以舉其職議論之臣得以行其言兩者之勢適平是以治功之隆過越漢唐與成康相先後蓋繇此也陛下卽位以來圖任老成屬以事屢下明詔使中外大臣舉諫官薦御史保任骨鯁以備獻納之科可謂得人主之要術矣願鑒漢唐之弊專取法於仁祖常使兩者之勢適平足以相制而不足以相勝則陛下可以弁冕端委而無事矣

治勢上

臣聞御天下之術必審天下之勢不審其勢而已信臆決行其

深入處如
鯨沈魚

所謂道守。其所謂法則雖有剛嚴果斷之材。或失而爲刻深慈。惠惻隱之意。或壞而爲姑息。何則。設之不當也。夫聖主之於天下。豈嘗有意用術哉。天下有強勢。吾則有寬術。天下有弱勢。吾則有猛術。非強非弱。天下無勢。非寬非猛。吾亦無術。蓋無勢者。天下之常勢。而無術者。天下之至術也。雖然。御強勢者。必以寬。而強之弊。實生於寬。御弱勢者。必以猛。而弱之弊。實生於猛。何則。昔漢之文景。承高祖開創之後。接呂氏蹂躪之餘。除誹謗。去肉刑。減笞法。定箠令。可謂寬矣。而諸侯逆命。夷狄侵邊。孝武不勝其憤。力攘匈奴。誅兩粵。大臣相繼而入獄。二千石連頸而伏誅。巫蠱之禍。至於夫婦父子之間。而不相保。由是言之。豈非強

之弊實生於寬耶。昔唐肅宗器本刻深，以刑名自喜。安史之亂，來歸者戮於獨柳之下，待罪者斃於繯纆之中，可謂猛矣。而慶緒薦興，思明復起，代宗深鑒其事，舍脇從之罪，緩污染之誅。至於封豕長蛇，無所懲艾。忠臣義士，切齒不平。王室陵夷之漸，蓋基於此。由是言之，豈非弱之弊實生於猛耶？是故救強之弊，必於崇寬之時；救弱之弊，必於尚猛之日。夫強弱之相乘，寬猛之相代，猶東之有西，晝之有夜，理之所必至，事之所固然也。顧昧者不知耳。昔陵陽嚴訥將去潁川，謂掾史曰：「我以柔弱召，必選剛猛代到；將有僵仆者矣。」及何並至郡，首治鍾威、趙季、李款之獄。果如訥言，以訥並觀之，則天下之勢可以前百年而預定。古

者刑罰世輕世重。不爲定論。文王之時。關市譏而不征。周公成王之時。則關市有征矣。至凶年然後弛之。推此類而言。則先王之法度。大抵皆審天下之勢而爲之者也。傳曰。政寬則民慢。慢則糾之以猛。猛則民殘。殘則施之以寬。寬以濟猛。猛以濟寬。政是以和。夫傳所謂和者。則臣之所謂聖人之至術者歟。

治勢下

臣聞祖宗之時。天下新脫割據戰伐之禍。天厭久亂。俱欲無爲。而又掃除煩苛之患。足以深結海寓之心。削平僭僞之威。足以逆折姦俠之氣。當是時。天下之勢如元氣在乎混沌之中。固莫得而名已。逮嘉祐之後。習安玩治。爲日旣久。大臣以厚重相高。

小臣以苟簡自便。肉食者鄙。未能遠謀。誰能無偷朝不及夕故。先皇卽位之始。大講法度。作而新之。覈名實。以興百辟。攘夷狄。以布威靈。有司奉行於中。使者刺舉於外。此真得所謂以猛政救緩勢之術也。元豐之後。執事者矯枉過直。矜鉤距。以爲法術。任惠交。以取愉快。上下道脇。民不堪命。故陛下卽位之始。黜鍛鍊之吏。逐聚斂之臣。登老成於散地。擢忠鯁於謫籍。平冤獄。振乏餒。與天下休息。此真得所謂以寬政解急勢之術也。而比日已來。執事者又將矯枉而過直矣。何告訐詆欺之言。率然敢陳。而王體未嚴也。嚮背異同之見。各自爲守。而國論未決也。蠻夷猾夏。寇賊姦宄。隱忍羈縻。冀其自罷。而天誅未迄也。推此言之。

天下之緩急雖曰未見而固已臚渾於冥冥之中矣。夫致先帝之用猛術者嘉祐之緩勢也。致陛下之用寬術者元豐之急勢也。今又矯枉過直則勢必復緩。緩甚則術又將出於猛矣。猛術一用天下固已震動。若再用緩則安危之計未可知也。何則天下之勢猶一人之身。緩而救之以猛猶關鬲不通而涌泄之也。其急而解之以寬猶虛中暴下而補養之也。補養至平則可以已矣。平而不已則又將至於關鬲不通。再加涌泄正氣必傷。重被猛術國本必伐。故曰安危之計未可知也。臣願陛下遏通慢之原杜懈弛之漸明詔內外一乎中和使天下之緩勢不得而成。緩勢不成則後世雖有猛術不可得而用之。

淮海集卷十二終

淮海集卷十三

進策

安都

臣聞世之議者皆以謂天下之形勢莫如雍。其次莫如周。至於梁。則天下之衝而已。非形勢之地也。故漢唐定都。皆在周雍至五季已來。實始都梁。本朝縱未能遠規長安。蓋亦近卜於洛陽。乎而安土重遷。眷眷於開封之境。非所以爲萬世計也。臣竊以爲不然。何則。唐漢之都。必於周雍。本朝之都。必於梁。而後可也。夫長安之地。左殽函。右隴蜀。襟屏終南。太華之山。縈帶涇渭。洪河之水。地方數千里。皆膏腴沃野。卒有急。百萬之眾可具。形勢

便利。下兵於諸侯。如建瓴水。四塞之國也。故其地利。守自古號
爲天府。開封地平。四出諸道。輻湊。南與楚境。西與韓境。北與趙
境。東與齊境。無名山大川之限。而汴蔡諸水參貫。巾車錯轂。蹢
踵交道。軸轡銜尾。千里不絕。四通五達之郊也。故其地利。戰自
古號爲戰場。洛陽左瀍。右澗。表裏山河。扼殽黽之隘。阻成皋之
險。直伊闕之固。廣袤六百里。四面受敵。以守則不如雍。以戰則
不如梁。然雍得之可以爲重。自古號爲天下之咽喉。凡天下之
形勢。無過此三者也。故彼蜀之成都。吳之建業。皆霸據一方之
具。而楚之彭城。特盜賊之窟耳。易曰。天險不可升也。地險山川
邱陵也。王公設險以守其國。所謂險者。豈必山川邱陵之謂哉。

在天而不可升在人而不可奪則皆爲險矣。夫雍爲天府梁爲戰場周爲天下之咽喉而臣以謂漢唐之都必於周雍本朝之都必於梁而後可者漢唐以地爲險本朝以兵爲險故也。漢高祖曰吾以羽檄召天下兵莫有至者武帝曰吾初卽位不欲出虎符發兵郡國蓋漢踵秦事郡國背道材官有變則以符檄發之京師惟有南北兩軍有期門羽林孤兒以備扈從唐分天下爲十道置兵六百三十四府其在關中者惟二百六十有一府府兵廢始置神策爲禁軍亦不過數萬人以此見唐漢之兵皆在外也故非都四塞之國則不足以制海內之命此所謂以地爲險者也。本朝懲五季之弊舉天下之兵宿於京師名挂於籍

者號百餘萬而衣食之給一毫已上皆仰縣官。又非若府兵之制一寓之於農也。非都四通五達之郊則不足以養天下之兵。此所謂以兵爲險者也。夫以兵爲險者不可以都周。雍猶以地爲險者不可以都梁也。而昧者乃以梁不如周。周不如雍。嗚呼亦不達於時變矣。夫大農之家連田阡陌積粟萬斛兼陂池之利并林麓之饒則其居必卜於郊野。大賈之室斂散金錢以逐什一之利出納百貨以收倍稱之息則其居必卜於市區。何則所操之術殊則所託之地異也。今梁據天下之衝歲漕東南六百萬斛以給軍食猶恐不贍矧欲襲漢唐之迹而都周雍之墟何異操大賈之術而欲託大農之地也。由是言之彼周雍之地

者漢唐之險耳。本朝何賴焉。

任臣上

臣聞明君之御臣也不致疑。忠臣之事君也不避嫌。嫌疑之事皆出於姦臣庸君。度量狹隘。心意頗僻。不能以至誠相期而已。古之人有自舉其身者。有舉其子者。有舉其弟者。有舉其姪者。有舉其內外之親舊者。而其君不以爲疑。其臣不以爲嫌者。何哉。以其所舉者當而已矣。漢宣帝欲擊先零。問誰可將者。趙充國曰。無如老臣者矣。宣帝用之。遂破先零。此所謂自舉其身者也。晉君問孰可爲國尉。祈奚曰。午也可。君曰。非子之子耶。對曰。君問可否。不問子也。君子謂祁奚能舉善矣。此所謂有舉其子

者也。李石當國薦弟福可任治人。繇監察御史爲戶部侍郎。此所謂有舉其弟者也。晉求文武良將謝安以其姪幼度應舉郗超聞而歎曰。安違眾舉親明也。幼度不負舉才也。果破苻堅於淝水之上。此所謂有舉其姪者也。崔貽孫爲相未踰年除吏八百莫不諧允。德宗曰。人言卿擬官多親舊何耶。對曰。陛下令臣進擬庶官。夫進擬者必悉其材行。如不與聞何由得其實。此所謂有舉其內外之親舊者也。此數子者皆內有以自信外有以信於人。仰無所愧俯無所忤。其視身也與人等。其視子弟親舊也與不相誰何者等。故能立功於當年垂名於後世。千載之下想見其風向使念瓜李之小嫌忘事君之大節匿名迹遠權勢。

意從李
助逐客來

心知其然而不敢發。則與糞壤同朽耳。尙何功名之立哉。陛下
卽位以來。委政於六七大臣。其人自以曠世遭遇。莫不悉心竭
力。知無不爲。言無不盡。可謂千載一時之嘉會也。而臣竊有所
不然者。未能去用親之嫌而已。奇材異行。實爲時輩所見推者。
一涉大臣之親。則相顧繆悠。莫敢援之以進。幸而不顧進之。則
諫官御史之章。相隨而至矣。臣以爲此風一成。非聖朝之事也。
何則。大臣之親。嫌而不用。則侍臣之親。亦當嫌而不用。引而下
之。至於臺省寺監之官。推而廣之。至於漕刑郡縣之吏。其親者
皆嫌而不用矣。夫奇材異行。不常有於天下。幸而有焉。又以親
與嫌而棄之。則是非得草萊巖穴之士。終不用也。昔西漢之韋

氏平氏東漢之袁氏楊氏唐之韋杜蘇李陸蕭諸氏皆兄弟爲三公父子爲宰相盛者至於國相始終其間建功立業號爲名臣者蓋不可勝數奈何專用草萊巖穴之士哉願詔中外之臣惟賢是進惟不肖是退而勿以用親爲嫌諫官御史惟進退之當否是察而勿以親嫌爲劾則天下之奇材異行庶乎皆得而用也

任臣下

臣聞人主之於諫諍之臣非獨聽其言之難也取其大節而略其小過是爲難矣夫骨鯁自信以身許國不爲利害之所撓屈者所謂大節也材智之不周思慮之不密學術之不至聞聽之

不審所謂小過也。必有大節而無小過者，然後得爲諫諍之臣。則窮年沒世，不可得其人矣。如或不然，則與其無一時之小過，孰若有終身之大節哉？昔汲黯通經術，則不如平津侯恢武功，則不如大將軍。明習法令，則不如張湯。文章儒雅，則不如司馬相如。謹厚自全，則不如石慶。術略橫出，則不如主父偃。然淮南王謀反，惟憚曰：黯好直諫，守節死義，說平津侯等如發蒙耳。由是言之，諫諍之臣，其功在於正綱紀、立風憲、通上下之情、使亂臣賊子顧憚而不敢發，如此而已。一舉之不當理，一發之不合節，曾何足以深咎耶？陛下卽位以來，首下明詔，使中外大臣保任諫官御史，蓋充職者百有餘人，其見用者十數人耳。選擇旣

精人頗自重。皆毅然有仗節死誼之心。興利除害。甚於嗜慾。攘擊姦惡。如報私讐。首尾數年之間。遂成冠古之治。雖神功聖化。敏妙自然。亦此曹獻替可否之力也。然比者。嘗以所言不效。諫官御史接迹引去。或遷他官。或補外郡。臺省爲之一空。臣愚疏遠。不知朝廷之事。切怪陛下何取之之難。而去之之易也。且人非蒼龜。不無過誤。顧其設心措意何如耳。昔漢酈食其。有撓楚之非。唐魏鄭公有縱辭延陀之過。本朝趙中令。有遣趙保忠之失。此三人者。皆天下之豪傑。一時之名臣也。猶有非繆過失如此。又況不及於三人者乎。臣願陛下鑒師古始。追御來今。重諫官之進退。慎御史之升黜。取其大節而略其小過。使天下之士

得以盡忠畢力於前則神功聖化又將有新於此矣或謂臣曰古者諫諍之臣職於廣聰明除壅蔽成德業而已後世狂夫小子狡猾不道之人或假其名以資盜竊其器以售姦如谷永者王鳳之客也而譏斥帷幄劉栖楚者李逢吉之黨也而額叩龍墀陽爲劄拂之迹陰成附麗之謀以此言之小過其可略乎略其小過則成其大惡矣臣應之曰不然夫藥石所以瘡病也而致病者有矣然自古及今未有廢藥石者何哉以其所愈者眾所害者寡也諫諍之臣雖器有遠近才有修短大抵搢紳之選也安可盡誣以谷永劉栖楚之徒歟就使有一二人焉則去其一二二人者可也何至空臺省而逐之耶陸贄曰天不以地有惡

木而廢發生，天子不以時有小人而廢聽納。又曰：諫者多表我之能，好諫者直示我之能，賢諫者之狂誣，明我之能，怨諫者之漏泄，彰我之能。從有一于斯，皆爲盛德。嗚呼！人主用諫諍之臣，贊之論盡矣。

朋黨上

臣聞朋黨者，君子小人不免也。人主御羣臣之術，不務嫉朋黨，務辨邪正而已。邪正不辨，而朋黨是嫉，則君子小人必至於兩廢。或至於兩存。君子小人兩廢兩存，則小人卒得志而君子終受禍矣。何則？君子信道篤，自知明，不肯偷爲一切之計，小人投隙抵巇，無所不至也。臣請以易道與夫堯舜漢唐之事明之。

易以陽爲君子陰爲小人一陽之生則爲復復者反本也三陽用事則爲泰泰者亨通之時也而五陽之極則爲夬夬者剛決柔也以此見君子之道必得其類然後能勝小人也一陰之生則爲姤姤者柔遇剛也三陰用事則爲否否者閉塞之時也而五陰之極則爲剝剝者窮上反下也以此見小人之道亦必得其類然後能勝君子也陰陽相與消長而爲慘舒爲生殺君子小人相與勝負而爲盛衰爲治亂然皆以其類也臣故曰朋黨者君子小人所不免也堯之時有八元八凱十六族者君子之黨也又有渾沌窮奇檮杌饕餮四凶族者小人之黨也舜之佐堯有大功二十者舉十六相去四凶而已不聞以其朋黨而兩

廢之亦不聞以其朋黨而兩存之也臣故曰人主御羣臣之術
不務嫉朋黨務辨邪正而已東海鉤黨之獄海內塗炭二十餘
年蓋始於周福房植謂之甘陵南北部至於李膺陳蕃王暢張
儉之徒遂有三君八顧八俊八及八廚之號人主不復察其邪
正惟知震怒而已故曹節侯覽牢修朱竝得以始終表裏成其
姦謀至於刑章討捕錮及五族死徒廢禁者六七百人卒不知
修竝者乃節覽之黨也唐室之季朋黨相軋四十餘年搢紳之
禍不解蓋始於李宗閔李德裕二人而已嫌怨既結各有植立
根本牢甚互相傾擠牛僧孺李逢吉之屬則宗閔之黨也李紳
韋處厚之屬則德裕之黨也而逢吉之黨又有八關十六子之

名。人主不復察其邪正。惟曰去河北賊。易去此朋黨。難。而其徒亦曰左右佩劔。彼此相笑。蓋言未知孰是也。其後李訓鄭注用事。欲以權市天下。凡不附己者。皆指以爲二人之黨。而逐去之。至於人人駭慄。連月霽晦。卒不知訓注者。實逢吉之黨也。臣故曰邪正不辨。而朋黨是嫉。則君子小人必至於兩廢。或至於兩存。君子與小人兩廢。兩存。則小人卒得志。君子終受禍矣。

朋黨下

臣聞陛下卽位以來。虛懷仄席。博採公論。悉引天下名士與之。經綸至有去散地。而執鈞衡。起謫籍。而參侍從者。雖古版築飯牛之遇。不過如此而已。君子得時。則其類自至。數年之間。眾賢

彈冠相繼而起聚於本朝夫眾賢聚於本朝小人之所深不利也。是以日夜恟恟作爲無當不根眩惑誣罔之計而朋黨之議起焉。臣聞比日以來此風猶甚漸不可長自執政從官臺閣省寺之臣凡被進用者輒爲小人一切指以爲黨又至於三君八顧八俊八及八廚之名八關十六子之號巧爲標榜公肆詆欺一人名之於前萬人實之於後傳曰下輕其上爵賤人圖柄臣則國家搖動而人不靜也然則其可以不察歟臣聞慶曆中仁祖銳於求治始用韓琦富弼范仲淹以爲執政從官又擢尹洙歐陽修余靖蔡襄之徒列於臺閣小人不勝其憤遂以朋黨之議陷之琦弼仲淹等果皆罷去是時天下義士扼腕切齒髮上

衝冠而小人至於舉酒相屬以爲一網盡矣。賴天子明聖察見其事。琦弼仲淹等旋被召擢。復蒙器使。遂得成其功名。今所謂元老。大儒。社稷之臣。想望風采而不可見者。皆當時所謂黨人者也。向使仁祖但惡朋黨之名。不求邪正之實。赫然震怒。斥而不反。則彼數人者。皆爲黨人而死耳。尙使後世想望風采而不可見耶。今日之勢。蓋亦無異於此。臣願陛下觀易道消長之理。稽帝虞廢舉之事。鑒漢唐審聽之失。法仁祖察見之明。杜媒孽之端。窒中傷之隙。求賢益急。用賢益堅。而信賢益篤。使姦邪情得而無所售其謀。讒佞氣索而無所啓其口。則今之所謂黨人者。後世必爲元老。大儒。社稷之臣者矣。

淮海集卷十三終

淮海集卷十四

進策

人材

臣聞天下之材有成材者，有奇材者，有散材者，有不材者。器識閎而風節勵，問學博而治行純，通當世之務，明道德之歸，此成材者也。經術藝文，吏方將略，有一卓然過人數等而不能飾小行，矜小廉以自託於閭里，此奇材者也。隨羣而入，逐隊而趨，既無善最之可記，又無顯過之可繩，攝空承乏，取位而已，此散材者也。寡聞見，暗機會，乖物理，昧人情，執百有司之事，無一施而可，此不材者也。古之人主於成材，則付以大任而備責之；於奇

重奇材是
大旨

材則隨所長而器使之於散材則明賞罰而磨礪之於不材則棄之而已四者各有所處然而奇材者尤人主所宜深惜者也蓋天下之人材不世出而散材者又不足以任能事不材者適足以敗事而已是則任天下之能事者常取乎奇材有奇材而不深惜焉則將與不材同棄而曾散材之不如矣夫匠氏之於木也榱桷豫章易直而十圍者必以爲明堂之棟路寢之楹七圍八圍者雖多節必以爲高明之麗拱把而上者雖小橈必以爲狙猿之杙稍修則以爲榱桷甚短則以爲侏儒至於椳栳軸解亟沉而易蠹者然後以之爨也今有榱桷豫章於此七圍八圍拱把而上特以多節小橈之故遂并棄之豈不惜哉人主用

文勢迅利
歸似長公

天下之材，亦何以異於此？今國家之人材，可謂富矣。養之以學，校而取之，以貢舉名在仕版者，無慮數萬。然一旦有事，則常若乏人。何哉？以臣觀之，未能深惜天下之奇材故也。蓋不深惜天下之奇材，則用之或違其長，取之將責其備。雖有嶔嶔歷落，穎脫絕倫之士，執事者始以名聞，未及試之而媒孽其短者，固已圍視而起矣。夫奇材多自重，又不材者之所甚嫉也。以自重之勢而被甚嫉之毀，其求免也豈不難哉？一旦有事而常若乏人，其勢之使然，無足怪也。昔孟公綽爲趙魏老，則優不可以爲滕辭大夫；裨諶能謀於野，則獲於邑則否。黃霸爲丞相，功名損於治郡。時人固有所長，亦有所短也。皋陶暗而爲大理，天下無虛

刑師曠瞽而爲太宰。晉國無亂政。賢如蕭何而有市田請地之
汙。直如汲黯而有褊心忿罵之鄙。文如長卿而有臨邛滌器之
陋。將如韓信而有胯下蒲伏之辱。吏如張敞而有便面拊馬之
事。此數子者。責其備則彼將老於耒耜之旁。死於大山龕巖之
下耳。人主豈得而用之。陛下卽位以來。屢下明詔。舉監官御史
臺閣學校之臣。刺史牧民之吏。與夫可備十科之選者。所得人
材。蓋不可勝數。臣願陛下取其名實尤異者用之。而不疑人情
不能無小過。非有顯惡犯大義所當免者。宜一切置而不問。以
責異時之功。則彼將輸瀝肝膽。捐委軀命。求報朝廷而不可得。
一旦有天下四夷之事。何足患哉。

法律上

臣竊觀唐虞以後有天下者安危榮辱之所從長久亟絕之所自無不出於其所任之術而所任之術大抵不過詩書法律二端而已。蓋純用詩書者三代也。純用法律者秦也。詩書法律雜舉而並用。迭相本末。遞爲名實者。漢唐也。何以知其然耶。夏商周之興也。治教政令。旣本於道德之意。而舟車器械。亦出於義理之文。其迹載於典謨訓告誓命之篇。而其旨寓於國風雅頌之什。當是時也。聖賢之學著。而百家之說熄。帝王之制舉。而霸者之事廢。議事以制。不爲刑辟。故曰純用詩書者三代也。魏文侯之師李悝。論次諸國之法。著爲法經。其徒商鞅。用以相秦。始

作收司連坐告匿之法而輔以詆欺文致細微之事晚節末路
至於焚書坑儒偶語者棄市以是古非今者族吏見知不舉與
同罪故曰純用法律者秦也漢自高祖納陸賈之言命爲新語
用叔孫通之說而使定禮儀可謂知所取矣而以三章之約不
足禦姦於是蕭何攬撫秦法作律九章而張湯趙禹之徒又爲
見知故縱監臨部主之法唐自太宗詘封倫秦漢之論用魏公
帝王之謀可謂知取舍矣而朝廷郡縣百官有司所以朝夕從
事者一出於律令格式之文故曰詩書法律雜舉而竝用迭相
本末遞爲名實者漢唐也惟其純用詩書故三代享國安榮而
歷年長久惟其純用法律故秦危辱而亟絕惟其詩書法律雜

舉而竝用。迭相本末。遞爲名實。故漢唐之有天下。雖號長久而安榮之日少。危辱之日多。僅免亟絕而已。蓋詩書者所以崇德其事。皆孝弟忠信人之所欲者也。而安榮長久人之所欲者也。而法律所以制姦其事。皆鞭笞斬艾人之所惡。欲以報所惡之讎者也。以所惡之術報所惡之讎。亦其理之然哉。賈生曰。今或言禮諛之不如法令。教化之不如刑罰。人主胡不引商周秦事以觀之也。嗚呼。若賈生者可謂知治體矣。

法律下

臣聞古今異勢。不可同日而語。以今天下而欲純用詩書。盡去法律。則是腐儒不通之論也。要使詩書不爲法律所勝而已。祖

宗之時二端雖號竝行而士大夫頗自愛重以經術爲職文藝相推間有喜刑名精案牘者則眾指以爲俗吏而恥與之言近世則不然士大夫急於功利不師古始相與習者莫非柱後惠文之事父教其子兄詔其弟以爲速化之術無以過此間有引古義決嫌疑則掩口而笑曰此老生之常談耳何所用於今哉嗚呼此風一成非天下之福也蓋昔者以詩書爲本法律爲末而近世以法律爲實詩書爲名臣以天下之大弊君子所宜奮不顧身而救之者無甚於此何則廢詩書而從法律則是舉天下而入於申韓之術也楊子曰申韓之術不仁之至矣夫不仁者三代之所以失天下也君子救之其可以緩耶臣嘗思之其

所以然者無他始於試法而已朝廷試士以法者欲其習爲吏也而假之太優擢之太峻至於黃綬中選數歲之間持斧杖節領一道之權任二千石之重而制策進士留滯於州縣之官有十年而不得調者嗚呼欲士大夫之不廢詩書而從法律也豈可得乎且法吏之與儒臣所聞異趣所見異塗猶方圓曲直之不相入也昔匈奴渾邪王降漢長安賈人與市者當坐死五百餘人而汲黯固爭以爲不可若使法吏言之則必以爲闕出財物矣密人有告郭亭長受其米肉遺者而卓茂折之以禮以爲汝能高飛遠走不在人間乎若使法吏言之則以爲受所監臨矣朱博曰如太守漢吏奉三尺律令以從事耳亾柰生所言聖

人道何也且持此道歸堯舜君出爲陳說之今天下所以未受其禍者以異時制策進士所得之臣有如汲黯卓茂者在也十數年之後耆老大臣相繼得謝而試法所得之吏有如朱博者當軸而處中焉則君子雖欲奮不顧身以救之亦無及已臣以爲縱未能盡罷其士宜稍變革以抑其風使吏非有出身毋得試法其餘出仕換官之類可一切試以經術藝文要令天下皆知法律之不如詩書也則申韓之禍熄矣

論議上

臣竊聞役法之議不決久矣有司閱四方之牘眩蠹起之說牽制優游相視而不斷者二年于茲雖稍復筆削著爲一切之令

取濟其月卒未有確然定論可以厭服人情傳萬世不弊者也其所以然者無他焉士大夫據偏守獨各有系吝不能以至公爲心故耳何則夫所謂役法者其科條品目雖曲折不同大抵不過差免二法而已差役之法雖曰迭任府史胥徒之士率數年而一更然而捕盜者奔命不遑主藏者備償無筭困倉竭於飛輓資產破於廚傳執事者患其弊也於是變而爲免役之法雖曰歲使中外之民悉輸僦直以免其身然而平估至於室廬檢括及於車馬裒多以爲寬剩厚積以爲封樁則其弊又有甚於差役者矣蓋差役之法不弊則免役之法不作免役之法不弊則今日之議不興然而士大夫進用於嘉祐之前者則以差

爲是而免爲非進用於熙甯之後者則以免爲得而差爲失私
意既搖於中公議遂移於外嗚呼豈特二年而無定論哉雖十
年而無定論不足怪也昔唐室賦役之法有租庸調者最爲近
古自開元之後版圖旣隳丁口田畝皆失其實法以大弊故楊
炎變之以爲兩稅之法已而盜起兵興征求無節法又大弊故
陸贄以七事者力詆其非然而終唐之世不復改也夫唐之諸
臣豈不知兩稅爲非古租庸調爲近古哉蓋以晚節末路俱爲
弊法以此易彼實無益也今差役免役之法蓋類於此然則何
爲而可耶臣聞楚人有第二區者其甲則長子之所築也其乙
則少子之所築也規模不同而歲久皆弊其父謀所止二子各

請止其所建之廬至數日不決有鄰人告之曰昔少君以甲第
壞甚於是營乙以舍族人今乙第又壞而長官復欲徙之於甲
是以壞易壞非計之得也何不合二第可用之材別營一區而
棄其腐橈者乎父以爲然其論遂定今陛下以役法之議付於
嘉祐熙甯之臣何異楚人之謀於二子也蓋亦質諸鄰人之論
哉陛下若以臣言爲然願詔有司無牽於故新之論毋必於差
免之名悉取二法之可用於今者別爲一書謂之元祐役法則
嘉祐熙甯之臣皆默然而心服矣若夫酌民情之利病因五方
之所宜條去取之科列輕重之目此則有司之事臣所不能知
之亦猶楚人之第某材可棄某材可畱皆當付之匠氏不可問

諸鄰人也。傳曰：雖有絲麻，無棄菅蒯；雖有姜姬，無棄蕉萃。唯陛下擇焉。

論議下

臣聞世之議貢舉者，大率有三焉。務華藻者，以窮經爲迂闊，尙義理者，以綴文爲輕浮。好爲高世之論者，則又以經術文辭皆言而已矣。未嘗以爲德行德行者，道也是三者各有所見而不能相通。臣請原其本末而備論之，則貢舉之議決矣。古者諸侯卿大夫交接鄰國，以微言相感動。當周旋進退之時，必稱詩以喻其志。蓋以別賢不肖而觀盛衰焉。其後聘問不行於列國，學詩之士逸於布衣。於是賢人失志之賦興，屈原離騷之詞作矣。

此文詞之習所由起也。及其衰也，雕篆相夸，組繪相侈，苟以譁世取寵，而不適於用，故孝武好神仙，相如作大人賦，以風其上。乃飄飄然有凌雲之志，此文辭之弊也。昔孔子患易道之不明，乃作彖象繫辭文言說序雜卦十篇，以發天人之奧。而左氏亦以春秋之法，弟子傳失其真，於是論本事作傳，以記善惡之實。此經術之學所由起也。及其衰也，幼童而守一藝，白首而後能言，故漢儒之陋有曰秦近君能記說堯典二字，至十餘萬言，但說若稽古猶三萬言也。此經術之弊也。古者民有恭敏任恤者，則閭胥書之；孝悌睦婣有學者，則族師書之；有德行道藝者，則黨正書之。而又攷之於州長，興之於鄉老大夫，而論之於司徒。

樂正司馬所謂秀選進造之士者是也。然後官而爵祿之。此德行之選所由起也。及其衰也。鄉舉里選之法亡。郡國孝廉之科設。而山林遺逸之聘興。於是矯言僞行之人。弊車羸馬。竄伏巖穴。以幸上之爵祿。故東漢之士有廬墓而生子。唐室之季。或號嵩少。爲仕途捷徑。此德行之弊也。是三者莫不有弊。而晚節末路。文辭特甚焉。蓋學屈宋而不至者。爲賈馬。班楊。學賈馬。班楊而不至者。爲鄴中七子。學鄴中七子而不至者。爲謝靈運。沈休文之撰四聲譜也。自謂靈均以來。此秘未覩。武帝雅不好焉。而隋唐因之。遂以設科取士。謂之聲律。於是敦朴根柢之學。或以不合而罷去。靡曼剽奪之伎。或以中程而見收。自非豪傑不待

文王而興者往往溺於其間此楊綰李德裕之徒所爲切齒者也熙甯中朝廷深鑒其失始詔有司削去詩賦而易以經義使學者得以盡心於六藝之文其意信美矣然士或苟於所習不能博物洽聞以稱朝廷之意至於歷世治亂興衰之迹例以爲祭終之芻狗雨後之土龍而莫之省焉此何異斤桑間濮上之曲而奏以舉動勸力之歌雖華質不同其非正音一也傳曰梁麗可以衝城而不可以窒穴言殊器也驊騮騏驎一日而馳千里捕鼠則不如狸狌言殊技也鴟鵂夜撮蚤察毫末晝出瞑目而不見邱山言殊性也今欲去經術而復詩賦近乎棄本而趨末并爲一科則幾於取人而求備爲今計者莫若以文詞經術

德行各自爲科。以籠天下之士。則性各盡其方。技各盡其能。器各致其用。而英俊豪傑。庶乎其無遺矣。

淮海集卷十五

進策

官制上

臣聞王者用人之要術惟資望而已歲月有等功勞有差天下莫得躡而進者謂之資行能術業卓然高妙爲世所推者謂之望用人以資而已則盛德尊行魁奇雋偉之人或拘格而違回如張釋之十年不得調楊子雲位不過侍郎之類是也用人以望而已則狂繆之流矯亢之士或以虛名而進拔如晉用王衍唐用房琯之類是也古之善用人者不然以資待天下有常之士以望待天下非常之材使二者各有所得足以相推而不足

以相礙故自一命以至九命自受職以至作牧非有功不遷非有缺不補而天下不以爲淹或舉於耕或舉於版築或舉於屠釣加之士民之上委以將相之權而天下不以爲驟何者資之所當然望之所宜爾也國家以寄祿格爲有定之制而以職事官爲不次之選於先王用資望之術可謂得其意矣然臣愚猶以爲未者太必於用資太不必於用望也何則夫郡守者民之師帥天子所與共理者也衣冠而坐堂皇之上則賓客造謁於前掾屬趨走於下政教賞罰軍旅之事一皆聽其可否所爲是則千里蒙其賜所爲非則數十萬人受其害可謂天下之重任矣今將相大臣自朝廷而出者不過爲郡守而仕嘗再爲通判

者苟無大惡顯過有保任人亦必至於郡守是將相大臣與保
任嘗再爲通判者相去無幾耳夫賢者能使所居官重不肖者
反之今二千石所以不至尊重難居者非特法令使然亦其人
材之所致也豈非所謂太必於用資乎館閣者圖書之府長育
英材之地也從官於此乎次補執政於此乎遷升故士非學術
藝文屹然爲一時之望者莫得而居之可謂天下之妙選矣今
中材凡吏一爲大臣之所論薦則皆得居其位嘗有金穀之職
兵刑之勞則皆得假其名嗚呼比歲已來校書正字之職龍圖
集賢之號何其紛紛也傳曰惟名與器不可以假人此不幾於
以名器而假諸人乎臣所謂太不必於用望者此也昔漢制郡

守入爲三公學者以東觀爲老氏藏室道家蓬萊山言其清祕
常人所不能到也願下明詔應中州已上非更臺省寺監漕刑
之任者不得爲郡守慎惜館閣之除以待文學之士則用人之
術庶乎其盡矣

官制下

臣聞國家次五代一切之制百官稱號最爲雜揉名存而器不
設文具而實不應所謂臺省寺監者朝廷之官也而其汎及於
州縣筦庫之吏其濫至於浮屠黃冠之師乖違之條爽繆之目
至不可勝數先皇帝惻然憫之始詔有司作寄祿格以易天下
之官而歸之於臺省還之於寺監然後循名可知其器而緣實

亦得其文可謂帝王之盛典矣然有所未盡者臣竊昧死而妄
議焉向之則自正議大夫以上遷進太略自中散大夫以下清
濁不分也夫遷進太略則大臣僥倖而其弊也至於無以復加
而法制亂清濁不分則小臣偷惰而其弊也至於莫爲之寵而
資望乖舊制侍郎至僕射凡十二遷其兼侍從之職者八遷九
遷其任執政之官猶六遷也蓋侍郎以上皆天子之臣非多其
等級則勢必至易極易極則國家慶賞將窒而不得行此制官
之深意也今寄祿格則不然自正議大夫不問人之如何四遷
而至特進故大臣爲特進者遇朝廷有大慶賞則不得已而以
司空之官予之夫司空者職事官也寄祿無以復加而予焉豈

非所謂亂法制之甚歟舊制少卿之官率一秩而有四名太常
光祿衛尉司農是也郎官員外率一秩而有八名如禮工祠屯
主膳虞水之類是也京朝之官率一秩而有三名如太常祕書
殿中諸丞是也蓋入仕之門有制策進士明經諸科任子雜色
之異歷官之途有臺省寺監漕刑郡縣之殊非銖銖而較之色
色而別之則牛驥同皂賢不肖混殽而天下皆將汎汎然偷取
一切不復淬勵激昂以功名爲己任此亦制官之深意也今寄
祿格則不然自中散大夫以下至承務郎秩爲一名而已故嘗
任臺省之職或任漕刑之司者人心有所不厭而莫爲之寵則
往往假以龍圖集賢之號夫龍圖集賢之號所以待天下文學

之士也而以諸吏莫爲之寵而假焉豈非乖資望之甚歟蓋爵祿者天下之砥石聖人所以礪世磨鈍者也夫不爲爵勸不爲祿勉古之人有行之者蒙穀是也齊死生同貧富等貴賤古之人有行之者莊周是也今朝廷之臣皆得莊周蒙穀而爲之則爵祿之器雖不復設可矣如其不然則遷進太略清濁不分之弊安得而不革哉晁錯曰爵者上之所命出於口而無窮韓愈曰聖君所行卽是故事自古豈有定制也願詔有司以寄格再加論定稍放舊制自正議大夫以上更增四秩之號自中散大夫以下秩之號爲三等之名如此則遷進頗詳而法制不亂清濁稍異而資望不乖是亦先皇之志也惟陛下畱神省察

財用上

臣聞先王之理財也若持衡然天下之財不使之偏歸於公室亦不使之偏入於私家惟其適平而已故邦國有以供祭祀奉養祿廩賜予之費而民有以給朝晡伏臘冠婚喪祭之資其取民之制謂之什一什一者天下之中正也多乎什一小桀大桀寡乎什一小貉大貉魯哀公曰二吾猶不足桀之道也白圭以二十而取一貉之道也推此言之則先王理財之意惟其適平而已自什一之法壞天下之財始失其平其偏歸於公室也則有鬻鹽冶鑄以管山海之饒榷酒酤以漁井邑之利筭舟車告緡錢以摧抑商賈造皮幣省酎金以侵牟封君甚者至令吏坐

列肆販物以來利焉其偏入於私家也則有以農田而甲一州。販脂而傾都邑賣漿而踰侈酒削而鼎食貨脯而連騎馬醫而擊鍾甚者至累萬金而不佐公家之急是以民常困於聚斂之吏而吏常嫉夫兼并之民所謂事勢之流相激使然曷足怪哉本朝至和嘉祐之間承平百餘年矣天子以慈儉爲寶貢賦經常之外殆無一毫取諸民田疇邸第莫爲限量衣食器皿靡有約束俯仰如意豪氣浸生貨賄充盈侈心自動於是大農富賈或從僮騎帶刀劍以武斷於鄉曲畢弋漁獵聲伎之奉擬於侯王而一邑之財十五六入於私家矣熙甯元豐之間大臣用事始作法度與時變通青苗免役市易之利相次而作有司日夜

手畫口說區處於中使者旁午冠蓋相望奉行於外而言利之臣析秋毫矣江淮則增煮海之息閩蜀則倍摘山之贏青徐則竭冶鑄之利其他希風旨效計數無名之取額外之求蓋不可勝數而天下之財大半歸於公室矣陛下卽位之始深知其弊凡法度之不便於民者一切罷去吏嘗以掊克進者相繼而黜數因赦令而弛逋負大出廩廩以振乏絕於是公私之財滋向於平然而有大弊者士大夫矯枉過直邈然以風裁自持不復肯言財利之事易曰天地之大德曰生聖人之大寶曰位何以守位曰仁何以聚人曰財理財正辭禁民爲非曰義而洪範八政一曰食二曰貨以此見理財先食貨者帝王之要務所以安

辨此良難

中國服四夷者也。特不可使之偏入於公私耳。今國家北有抗衡之虜。西有假息之羌。中有大河之費。數萬之吏。取給於水衡之錢。百萬之兵。仰食於大倉之粟。公私窘急。可爲寒心。此正人臣揚推斂散以究虛盈以濟用度之秋也。而恥言財用之事。是晉人而已矣。晉人王衍者。口不言錢。而指以爲阿堵物。臣竊笑之以爲此乃姦人故爲矯亢盜虛名於暗世也。何則。使顏閔言錢。不害爲君子。盜跖呼阿堵物。豈免爲小人哉。晉人尙清談而廢實務。大抵皆類此矣。昔管仲道輕重之權。范蠡計然否之策。蕭何漕關中之粟。財利之臣也。東郭咸陽之鬻鹽。孔僅之冶鑄。桑洪羊之均輸。亦財利之臣也。士大夫言財利有如東郭咸陽。

孔僅桑洪羊所爲也。則不可。有如管仲范蠡蕭何之所爲也。亦惡乎而不可哉。

財用下


臣嘗以爲君子理財之術莫若盡地力節浮費二者而已。何則。理財之要在乎原其所自有而爲之道要其所從無而制之法。風霆雨露之發生。山林川澤之滋養。財之所從出也。不原其所自有。不要其所從無。切切焉從事於闔閭斂散之中。則是賤丈夫爭錐刀之末耳。豈君子所謂理財者耶。是故原其所自有而爲之道。則莫若盡地力要其所從無而制之法。則莫若節浮費。君子理財之術。蓋無以易於此。臣請爲陛下遂言之。夫理天下

之財譬如治水增繕隄防決之於鄰國非治水之善也橫賦疆
市取之於百姓非治財之善也善治水者以四海爲壑善理財
者以天地爲資今天下之田稱沃衍者莫如吳越閩蜀其一畝
所出視他州輒數倍彼閩蜀吳越者古揚州梁州之地也按禹
貢揚州之田第九梁州之田第七是二州之田在九州之中等
最爲下而乃今以沃衍稱者何哉吳越閩蜀地狹人眾培糞灌
漑之功至也夫以第七第九之田培糞灌漑之功至猶能倍他
州之所出又況其上之數等乎以此言之今天下之田地力未
盡者亦多矣李惺曰治田勤則晦益三升不勤亦如之地方萬
里增減輒爲粟百八十萬石然趙過爲代田一晦歲次常過縵

田一斛以上善又倍之秦漢開鄭白渠溉田四萬四千餘頃至唐大歷初兩渠所溉纔六千三百頃耳以代田鄭白渠事言之則治田之勤不勤何止晦有三升之損益也今二千石雖兼勸農之事而例爲虛名莫有任其責者爲今之計莫若詔天下州置勸農一司以守將爲長聽於倅介之中自擇一人爲副先籍境內定墾田與夫陂塘溝渠之數而周知其利害歲時出行諸郊召見耆老問以疾苦及所願欲而不得者爲罷行之而罰其游惰不聽命者歲終部使者第其殿最以聞功效尤異者寵用之如此則天下之田皆與閩蜀等而地力盡矣古者吉凶之服則一比共之祭器則一閭共之喪器則一族共之吉凶禮樂之

器則一鄉共之。凡嫁子娶妻，純帛無過五兩。凶荒則又殺禮而多婚。夫一鄉者五百家，而五兩者五匹耳。其用財可謂約也。今則不然。嫁子娶妻，喪葬之費，其約者錢數萬，其豐者至數百萬。中人家一有吉凶之事，則賣田疇，鬻邸第，舉倍稱之息，猶弗能給。然則今時吉凶之費，絕長補短，殆二十倍於古也。財用安得而不竭乎？周之太宰王之大臣也，其職曰以九式均節財用。漢之許劭、魏之毛玠、唐之楊綰，人臣耳，而能使一時士大夫心化，其風損車馬，毀池觀，減騶馭，散音樂，以此見法制者雖盛世不可去，而風化者雖衰世亦可行也。今令雖有儀制之文，毛舉數事，不能委曲爲今計者，莫若自宗室外戚以至品官民庶之

家宮室輿馬飲食衣服皆倣典禮而爲之變數稍寬其制使可
久行其冠婚喪祭之事則視歲上下而隆殺之使諫官御史得
以彈奏於中而漕刑守令得以舉劾於外敢不承者雖貴且親
必罰無赦然後陛下崇節儉尙敦樸以爲之率棄難得之貨卻
無用之器罷不急之務以爲之先如此則天下淫侈之俗曠然
一變而浮費節矣賈生曰今背本而趨末食者甚眾是天下之
大殘也淫侈之俗日以長是天下之大賊也殘賊公行莫之或
止大命將傾嗚呼如賈生者可謂知理財之術矣





PL
2687
C53
v.4

淮海集卷十六

進策

將帥

臣聞將帥之難其人久矣。勢有彊弱。任有久近。敵有堅脆。地有遠邇。時有治亂。而勝敗之機不繫焉。惟其將而已矣。昔智氏以韓魏三國之兵伐趙。馬服君之子以四十萬之眾抗秦。可謂彊矣。而潰於晉陽。坑於長平。廉頗率老弱之卒守邯鄲。田單鳩創病之餘保即墨。可謂弱矣。而栗腹以摧騎劫以走。是不在乎勢之彊弱也。穰苴之用於齊。拔於閭伍之中也。一日斬莊賈。晉師罷去。燕師渡水而解。韓信之擊趙。非素拊循士大夫也。背水一



王鍊

戰而擒趙王歇。斬成安君。是不在乎任之久近也。以周瑜之望曹公。不啻虎狼。而吳兵捷於赤壁。以玄德之視陸遜。甚於雛鷺。而蜀師勦於白帝。是不在乎敵之堅脆也。東西異壤也。而鄧艾以縋兵取成都。南北異習也。而王鎮惡以舟師平關中。是不在乎地之遠邇也。夫以東晉之衰。而謝元得志於淝水。開元之盛。而哥舒翰失利於潼關。是不在乎時之治亂也。故善將者。勢無彊弱。任無久近。敵無堅脆。地無遠邇。時無治亂。不用則已。用之無不勝焉。故曰。惟其將而已矣。雖然。有一軍之將。有一國之將。有天下之將。走及犇馬。射中飛鳥。攻堅城。破彊敵。所向無前。此有勇之士。一軍之將也。出奇制勝。無窮如天地。不竭如江河。攻

歷敘雄爽
然多祖蒙
莊說劍篇

輒破。擊輒服。此有智之士一國之將也。福於己而禍於人。則功有所不立。利於今而害於後。則事有所不爲。功成事畢。自視缺然。無矜大之色。此有道之士。天下之將也。古者闔外之事。將軍制之。軍中不聞天子之詔。其委任責成如此。非有道士其可以輕付之哉。國家將帥可謂盛矣。閱禮樂而敦詩書者。肩摩而戟擊。縱橫剽悍。稱智囊而號肉飛者。至不可勝計。然驛騎有赤白囊。至則廟堂之上爲之紛然進止。賞罰皆從中決者。何也。豈以爲將帥者皆智勇之人。非有道士不可獨任。故邪。夫廟堂議邊事。則王體不嚴。將帥之權輕。則武功不立。嗚呼。可謂兩失之也。臣以爲西北二邊宜各置統帥一人。用大臣材兼文武可。

任天下之將者爲之凡有軍事惟以大義上聞進退賞罰盡付其手得以便宜從事如此則雖有邊警可以不煩廟堂之論而豪傑之材得以成其功矣

奇兵

筆端奇橫
是古今文
中利器

臣聞萬物莫不有奇。馬有驥犬有盧畜之奇也。鷹隼將擊必匿其形。虎擬而後動。動而有獲禽獸之奇也。天雄烏喙莖葛之毒奇於藥。繁弱忘歸奇於弓。矢鵠鵠莫邪奇於刀。劒雲爲山奇濤爲海奇。陰陽之氣怒爲風交爲電亂爲霧薄而爲雷激而爲霆融散而爲雨露凝結而爲霜雪天地之奇也。惟兵亦然。嚴溝壘盛輜重傳檄而出訂里而行尅期而戰此兵之正也。提百一之

士力扛鼎而射命中者。縋山航海。依叢薄而晝伏。乘風雨而夜起。恍焉如鬼之無迹。忽焉如水之無制。此兵之奇也。兵之道。莫難於用奇。莫巧於用奇。莫妙如用奇。何以言之。凡用奇之法。必以正兵爲主。無正兵爲主而出者。謂之孤軍。孤軍勝敗。未可知也。霍去病所將。常選有大軍繼其後。是以深入而未嘗困絕。李陵提步卒五千。轉鬪單于於漠北。而無他將援之。其擒宜矣。故曰。莫難於用奇。夫材有勇怯。技有精冗。勇者克敵。則怯者奮。冗爲敵破。則精者郤。自然之勢也。善將者。擇其精勇以爲奇。悉其冗怯以爲正。奇兵雖少。而以銳爲正之勢。正兵雖雜。而以眾爲奇之勢。長短相補。彊弱相資。則寡者亦爲眾。冗怯者亦爲精勇。

也。故曰莫巧於用奇。昔岑彭沂都江而上，以拔武陽，繞出延岑軍後，而公孫述驚。鄧艾取陰平道，下油江，破綿竹徑，薄成都，而劉禪降。孫處自江左浮大海，直掩番禺，而盧循破。李勣越交成，戍殲張柴柵，夜襲蔡州，而吳元濟擒。此數子者，皆智謀足以料敵，勇敢足以決勝，故能乘變投隙，而就其功名。使敵雖有彊將勁卒，不得盡試其能，而固已敗也。故曰莫妙於用奇。孫嬪白解雜亂糾紛者，不控捲救鬪者，不搏擊批亢擣虛，形禁勢格，則自爲解耳。則非夫通陰陽之幾，達萬物之變，以得用奇之奧者，何足以及此。今夫屠者之解牛也，經肯綮則以刀，遇大軋則以斧，至庖丁則不然，批隙導窾，游其刃於空虛，而磔然已解矣。奕者

之鬪。碁也。諦分審布。失其守者。逐而攻之。至爽秋則不然。倒行而逆施。用意於所爭之外。而沛然已勝矣。夫屠奕鄙事也。有奇技則無與抗者。況於兵乎。兵法曰。兵以正合。以奇勝。然而天下之狃於常而駭於變。知所以合者多。而悟所以勝者少也。

辯士

臣聞兵之大槩。我爲主。彼爲客。是守之而已。彼爲主。我爲客。是攻之而已。客主不分。彼我相埒。塗觀而卒遇。是戰之而已。此兵之常法也。且事固有常法所不能辦者。守則形不便。攻則勢不利。戰則氣不克。當是時也。雖有智勇無所用之。獨可馳一介之使。憑軾擗御。喻以禍福而得志。此軍中所以不可無辯士也。然

司馬公
子說難

則所謂辯士者必以其具三德。明五機。而利口者不與焉。蓋上
知道德性命之原。下達禮義形器之變。旁通幽明時物之所宜
者。識也。寤之而益出。費之而益新。掩之以卒而不亂。壓之以重
而不懾者。才也。經傳子史。天星地志。醫方卜筮。百家之書。無所
不涉。而能謹守其宗者。學也。夫是之謂三德。俯而質。仰而弔。聞
者違懷。心折骨驚。手足俱廢。其名曰恐機。道以令名。贊以美利。
聞者悅懌。陽氣浸淫。上滿大宅。其名曰喜機。許過差而不貸。觸
忌諱而無疑。聞者忿然。髮上衝冠。目眦盡裂。其名曰怒機。旁刺
其所悼念。逆釣其所感傷。聞者泣然。涕下霑臆。不復自勝。其名
曰悲機。發端而指隙。其說泛而不根。其意圓而無主。聞者茫然。

如獲異物。不知其名。欲捨之而行。則恐其寶也。欲取之而去。則恐其怪也。徒倚周章。狐疑而不決。其名曰思機。此五者天之所以命於人有觸之則發。莫能禦已。夫是之謂五機。蓋三德不具。不足以立已。五機不明。不足以移人。故曰所謂辯士者。必具三德。明五機。而利口者。不與焉。昔蘇秦張儀犀首陳軫。代厲之屬。嘗以辯名於世矣。然三德不足。而五機有餘。故事求遂而不問禮之得失。功求成而不恤義之存亡。偷合苟容。取濟一時而已。此其所以爲利口之雄。而君子不道也。然後世之人。見其如此。遂以辯爲縱橫之術。諱問而恥言之。則所謂因咽而廢食也。孔子曰。賜能辯而不能訥。孟子曰。予豈好辯哉。予不得已。

也由此觀之孔孟之間未嘗廢辯特貴夫時然後發不得已而後用爾古者列國之大夫聘於塗者肩摩而轂擊兵之交則使在其間若非辯士爲之則安能專對而不辱於君命耶或曰戰國之時無定勢無常形橫則秦帝縱則楚王故辯士足以乘間而執其機自漢以來形勢異矣尙安所事辯乎曰是不然人之生也有手足則知搏擊有心智則知思慮有口舌則知語言天下之亂常生於此三者然反而用之亦可已亂蓋搏擊爲力思慮爲謀語言爲辯天下未嘗一日不用力與謀也何獨於辯而疑之昔酈食其使齊田橫以七十城下漢陸賈使南越尉它去黃屋而稱臣賈林致李抱眞命而王武俊倒戈韓愈入鎮州而

牛元翼出矣。此後世用辯士之明效也。天下不用兵則已矣。如用兵。辯士不可無也。

謀主

臣聞兵家之所以取勝者。非特將良而士卒勁也。必有精深敏悟之士。料敵合變出奇無窮者。爲之謀主焉。古之人將有天下之事。未嘗不先於謀。故考訂卿士之議。參酌庶人之言。所以謀之於明也。拂龜端策。灼之而辨兆。揲之而分卦。所以謀之於幽也。易曰。天地設位。聖人成能。人謀鬼謀。百姓與能。夫謀者。聖人所不能免也。況於兵乎。兵之道。猶一人之身。將者。心也。謀主者。思慮也。圖籍者。臟腑也。法制者。脈絡也。號令者。聲音也。旌旗鼓

鐸者耳目也車騎步兵者四肢也心之統臟腑惣脈絡出聲音用耳目役四肢也精以思慮則外不攘於人事內不寇於陰陽思焉而不精慮焉而不熟則饑飽勞佚之遇漫然而不知寒暑溫清之變冥然而不察冒犯水火嬰觸金石無所不至矣故心雖明臟腑雖安脉絡雖通聲音雖和耳目雖聰明四肢雖便利不可以無思慮將雖良圖籍雖具法制雖謹號令雖嚴旌旗鼓鐸雖修車騎步兵雖練不可以無謀主蓋將軍之於謀主也有之者勝無之者敗已棄之而資敵者敗敵取之而助已者勝嘗用矣而或棄者亦敗棄矣而或用者亦勝何以知其然耶昔楚漢之強弱者不待較而知也而項氏乘百戰之威身死東城劉

氏以顛沛奔北之餘五載而成帝業何故漢有良平之屬爲之
謀楚有一范增而不能用也故楊雄曰漢屈羣策羣策屈羣力
楚懣羣策而自屈其力屈人者勝自屈者負此所謂有之者勝
無之者敗也昔陳餘捨李左車之計死泚水上韓信釋縛而師
事之遂收燕齊袁本初棄許攸之策攸奔曹公公跣而迎之遂
破冀州夫攸左車者豈欲負彼而忠此哉用舍之勢然也此所
謂已棄之而資敵者敗敵取之而助已者勝也昔張繡以精卒
追魏師賈詡以爲不可已而果敗旣又請收散卒而攻之已而
果勝夫詡之爲繡謀一也從違不同則勝敗異變可不察哉此
所謂嘗用矣而棄之者亦敗嘗棄矣而用之者亦勝也是以良

將之待謀主也致之以禮而不敢慢交之以誠而不敢欺結之以恩而不敢厭遺其過差而略其缺失所與圖畫者雖父子兄弟有不得而知焉古之人所以談笑而折衝偃息而銷釁者繇此道也後世則不然將受命之日士大夫莫敢仰視而所謂幕府從事者往往皆鬬茸取具之人一旦敵傳於陴隍之下變發乎肘腋之間召而問之五色已無主矣是豈有補於萬分之一哉臣病夫世之論兵者止知重將帥之選急士卒之練講器械陣營之所宜究山川形勢之便而推風角鳥占之說至於謀主則未始一言及焉不知夫謀主者一軍勝敗之樞機也

淮海集卷十七

進策

兵法

臣聞御兵者將而將所以御之者法兵不得將與無兵同將不知法與無將同蓋斷木爲棋剗革爲鞠亦皆有法況於帥無罪之人披堅執銳從事於萬死一生之地哉兵之有法猶人之有精神魂魄也精神失守魂喪而魄奪則雖有七尺之軀死無日矣何則所以使形者亡也故知兵有法正行無間不知而將是謂妄行古之論兵者多矣大率不過有四一曰權謀二曰形勢三曰陰陽四曰技巧然此四術者以道用之則爲四勝不以道

用之則爲四敗事同而功異不可不察也何以知其然耶昔孫臏伏萬弩於馬陵之下魏軍至而伏發龐涓死焉王恢伏車騎材官三十萬於馬邑之旁匈奴覺之而去恢以自殺此則用權謀之異也馬服君救閼與旣遣秦間卷甲而趨之二日一夜遂破秦軍曹公追劉先主一日一夜行三百里敗於烏林此則用形勢之異也西伯將獵卜之曰獲霸王之輔果得太公望而克商漢武封諸將貳師最吉因以爲將卒降匈奴此則用陰陽之異也申公巫臣教吳以車戰吳是以始通上國房琯用車以抗祿山賊投芻而火之王師奔潰此則用技巧之異也豈非以道用之則爲四勝不以道用之則爲四敗乎雖然所謂道者何也

治心養氣而已矣。蓋心不搖於死生之變，氣不奪於寵辱利害之交，則四者之勝敗自然洞見如形影，入於水鏡之中，是兵法之大要也。夫鏃金羽，鶚以爲矢，傅膠合漆以爲弓，天下所同也。而羿爲善射，服在箱，驂在旁，制以銜轡之利，而加以鞭策之威，天下之所同也。而王良爲善御，是何也？其所以用之者，道也。今世之學兵法者，肩相摩，袂相屬，雖其精粗不同，然率向之所謂四術而已。至於治心養氣之道，則以爲書生之語，而不與焉。嗚呼！是守弓矢與馬而欲爲羿、王良也。

盜賊上

臣聞治平之世，內無大臣擅權之患，外無諸侯不服之憂，其所

事乎兵者夷狄盜賊而已夷狄之害士大夫講之詳論之熟矣
至於盜賊之變則未嘗有言之者夫豈智之不及哉其意以爲
不足恤也天下之禍嘗生於不足恤昔秦旣稱帝以爲六國已
亡海內無足復慮爲秦患者獨胡人耳於是使蒙恬北築長城
卻匈奴七百餘里然而陳勝吳廣之亂乃起於行伍阡陌之間
由此言之盜賊未嘗無也夫平盜賊與攘夷狄之術異何則夷
狄之兵甲馬如雲矢石如雨牛羊橐駝轉輸不絕其人便習而
整其器犀利而精故方其犯邊也利速戰以折其氣盜賊則不
然險阻是憑抄奪是資亡命是聚勝則烏合非有法制相縻敗
則獸遊非有恩信相結然揭竿持挺郡縣之卒或不能制者人

人有必死之心而已。故方其羣起也。速戰以折其氣。勿迫以攜其心。蓋非速戰以折其氣。則緩而勢縱。非勿迫以攜其心。則急而變生。今夫虎之爲物。嘯則風生。怒則百獸震恐。其氣暴悍。可殺而不可辱。故捕虎之術。必先設機穽。旁置網罟。撞以利戟。射以彊弓。鳴金鼓而乘之。不旋踵而無虎矣。至蛇與鼠。則不然。雖其毒足以害人。而非有風生之勇。其貪足以蠹物。而非有震恐百獸之威。然不可以驟而取者。以其急則入於窟穴而已。故捕蛇鼠之術。必環其窟穴而伺之。薰以艾。注以水。彼將無所得食而出焉。則尺捶可以制其命。夷狄者虎也。盜賊者蛇鼠也。虎不可以艾薰。而水注蛇鼠不可以弓射而戟撞。故曰平盜賊與攘

夷狄之術異也。雖然盜賊者平之非難，絕之爲難，平而不絕其
弊有二，不可不知也。蓋招降與窮治是已。夫患莫大於招降，禍
莫深於窮治。何則？凡盜賊之起，必有梟桀而難制者，追討之官
素無奇略，不知計之所出，則往往招其渠帥而降之。彼姦惡之
民，見其負罪者未必死也，則曰與其俛首下氣以甘饑寒之辱，
孰若剽攘攻劫而不失爵祿之榮？由此言之，是乃誘民以爲亂
也。故曰患莫大於招降。凡盜賊之首，旣以伏其辜矣，而刀筆之
吏不能長慮，鄙顧簡節而疏目，則往往窮支黨而治之，迫脅之
民見被污者必不免也，則將曰與其嬰錮金木束手而受斃，孰
若逖逸山海脫身而求生？由此言之，是驅民以爲亂也。故曰禍

莫深於窮治。且王者所以感服天下者，惠與威也。仁及有罪，則傷惠；戮及不辜，則損威。威惠兩失，而欲天下心畏而力服，堯舜所不能也。夏書曰：殲厥渠魁，脅從罔治。舊染污俗，咸與惟新。蓋渠魁盡殺而不赦，則足以奪姦雄之氣；脅從污染不治而許其自新，則足以安反側之心。夫如是，天下之人孰肯舍生之塗而投必死之地哉？嗚呼！先王已亂之道，可謂至矣。

盜賊中

臣聞自古盜之所以興，皆出於仍歲水旱，賦斂橫出，徭役數發。故愚民爲盜，弄兵於山海險阻之間，以爲假息之計。自陛下卽位以來，輕徭役，薄賦斂，善氣旣應，年穀胥熟，是宜外戶不閉，道

不拾遺而郡縣之間枹鼓或驚遊徼旁午未見休已者何也以臣思之蓋不任吏之弊也夫任法不任吏爲弊至多而於盜賊尤甚何則今盜賊之法可謂密矣強盜得財滿匹及傷人者輒棄市殺一家三人以上若支解人者論如律案問欲舉者得減重論殺併徒伴及告獲它盜者降除其罪爲之囊橐通行飲食者從末減若文致於法而人心不厭者輒讞考之若此之類與夫捕獲亡逸賞罰之格凡數十條然皆畫一之制也夫名之所以爲盜賊者其情不一或閭里惡少自負其氣椎埋鼓鑄不復齒於平人或驕兵惰卒窮若無聊亡命嘯聚或執左道轉相誑惑以爲徒黨或困於饑寒迫於逋負剽奪衣食以延一日之命

或故吏善家子，失計隨流，輒舉妄動，若此之類，特盜賊之大情耳。其間夤緣曲折，可矜可疾者，蓋不可勝數。夫以畫一之法，御不可勝數之情，而吏莫敢爲輕重，則宜殺而生，宜生而殺者，有之矣。吏果於生殺而不察其宜，則威惠不行，盜賊所以充斥也。臣嘗觀古之能吏盜賊之課，尤異者，其術不過數端而已。蓋有使吏民雜舉，少年惡子，鮮衣凶服之人，悉籍記之。一旦收捕，納於虎穴中者，尹賞之治長安也。有明設購賞，令相斬捕，吏追胥有功而上名，尚書調補縣令者，張敞之治膠東也。有耳目具知主名區處，窮里空舍，坐語未訖，捕吏已至者，趙廣漢之治京兆也。有擇縣之豪傑，用以爲吏，一旦竊發，則移書詭責，取辦其人

者朱博之治渤海也。有置正五長閭里阡陌有非常吏輒聞知。姦不得舍者。韓延壽之治潁川也。省遣發之兵罷捕逐之吏。單車獨行務以德化撫之而安之者。龔遂之治鄆瑯也。此數子者可謂善治盜賊矣。然以今日之法繩之。則彼將皇恐救過之。不暇尙何功名之有哉。何則。非賊殺不辜則故縱反者也。夫以龔遂韓延壽張敞朱博趙廣漢賞爲吏於今之時。猶不能最盜賊之課。又可責於常人乎。爲今計者。莫若寬法而任吏。稍重郡守之權。責以大綱而略其小過。凡重法之地。皆慎擇其人。聽於法外。處置盜賊。有司覆按不得劾以出入其所賜緝捕緝錢使得益以釀酒。賞格之外。得酒數百石。亦足以布設耳目而畜養。

爪牙如此則守臣之威權稍重而盜賊可以清矣王嘉曰國家有急取辦於二千石尊重難危乃能使其下嗚呼一千石能使其下則雖有黃巾赤眉無足畏也

盜賊下

臣聞盜賊之起小則蜂屯蟻聚虜掠閭里大則擅名號攻城邑取庫兵釋死罪殺掠吏民然皆無足深慮如臣前說計足以辦所可深慮者其間有豪俊而已何則人之有豪俊猶馬之有驥犬之有盧雖上觀下獲一日千里而縱踉蹌之變亦可畏也昔周亞夫得劇孟喜曰吳楚舉大事而不求劇孟吾知其無能爲也天下騷動大將得之隱如一敵國云唐縱朱克融北還盧龍

未幾軍亂遂復失河朔夫孟克融皆匹夫耳而得失去就之間
繫吾楚之成敗爲河朔之存亡以此言之盜賊之間而有豪俊
豈不爲可深慮也哉臣以爲銷亡大盜之術莫大乎籠取天下
之豪俊天下豪俊爲我籠取則彼卒材鼠輩雖有千百爲羣不
足以置齒牙之間矣國家取人之制其選高者惟制策進士夫
豪傑之士固有文武縱橫之間無不可者亦有椎魯少文獨可
以付之大事者使天下豪傑皆文武縱橫之才二科足以取之
若有椎魯少文之人則不可得而取之矣是制策進士所得之
外不能無遺材也臣嘗爲朝廷患之未知所處有搢紳先生告
臣曰漢法郡縣秀民推擇爲吏考行察廉以次遷補或至於三

千石入爲公卿古者不專以文詞取人故得士爲多黃霸起於
卒史薛宣奮於書佐朱邑選於嗇夫邴吉出於獄史其餘名臣
循吏由此而進者不可勝數唐自中葉以後方鎮皆選列校以
掌牙兵是時四方豪傑不能以科舉自達者皆爭爲之往往積
功以取旄鉞雖老姦宿盜或出其中而名卿賢將如高仙芝封
常清李光弼來瑱李抱玉段秀實之流所得亦已多矣王者用
人如江河江河之所趨百川赴焉蛟龍生焉及其去而之他則
魚鼈無所還其體而鯢鰈爲之制今世胥吏牙校皆奴僕庸人
者無他以朝廷不用也今欲用胥吏牙校而胥吏行文書治刑
獄錢穀其勢不可棄鞭撻鞭撻一行則豪傑不出於其間故凡

刑者不可用而用者不可刑朝廷若採唐之舊制使諸路監司
郡守慎選士人以補衙職課之以鎮稅場務督捕盜賊之類有
公罪則贖焉使長吏得薦其材者第其功閤書歲月使得出仕
比任子而不以流外限其所至朝廷察其尤異者擢用數人則
豪傑英偉之士漸出於此塗而姦猾之黨可得而籠入也臣嘗
思之逆銷盜賊之術未有以過於此者竊取其說以獻惟陛下
裁擇之

縱按富鄭公蘇長公論彌盜嘗有此說秦公謂有摺紳先生
告臣者其實指蘇公殆非設言也

淮海集卷十八

進策

邊防上

臣嘗以謂方今夷狄之患未有甚於西邊者夫契丹強大幾與中國抗衡黨項遺種假息之地不當漢之數縣而臣以謂夷狄之患未有甚於西邊者何也蓋大遼自景德結好之後雖有餘孽金帛綿絮他物之賂而一歲不過七十餘萬西邊自熙甯犯境以來雖絕夏人賜予熙河蘭會轉輸飛輓之費一歲至四百餘萬北邊歲賂七十餘萬而兵寢士休累世無犬吠之警西邊歲費四百餘萬而羌虜數入逆執事如鴈行將吏被介冑而臥

以此言之北邊之患孰與西邊之患重乎今天下謀臣策士議欲緩西邊之患者多大率不過有二臣請具陳其說而去取之有曰晉漢武以遼陽九百里之地斗辟難守棄以予胡元帝亦以關東歲饑納賈捐之疏罷朱崖郡蓋王者不以無用弊所恃也狄道枹罕故爲吐蕃諸夷之巢穴五泉會甯亦久爲夏人所據若以蘭會之地復賜夏人用府州故事擇土酋以爲熙河之守則數百萬之費可一朝而省此其說一也有曰狄道枹罕五泉會甯皆中國故地自漢唐以至國初不聞苦其難守者以靈武內屬故也今置靈武於度外者八十餘年蕃漢地形相錯如繡耕鑿則有蹂踐之患饋運則有鈔奪之虞是以苦其難守也

若遂取橫山次復靈武則蘭會熙河自爲內地尙安有數百萬之費乎此又一說也以臣觀之以前說可以施於陛下卽位之初後說可以施於今日之後何則陛下卽位之初羌虜各率種落交臂屈膝請命下吏是若赦其罪戾與之更始假以熙河之節賜以蘭會之區則外足以懷犬羊之心內足以寬元元之力今則不然天奪其魄自干誅夷相爲輔車遊魂疆場邊屯吏士攘袂切齒皆欲犁其庭而掃其閭夫順逆之勢殊則撫御之術異爲今計者獨有取橫山而復靈武耳羈縻不絕之說可復道哉臣故曰前說可施於陛下卽位之初後說可以施於今日之後也昔曹公征漢中而弗克乃下教曰雞肋楊修以爲雞肋者

食之無所得棄之如可惜公將歸矣已而果然蓋是時成都方爲劉氏所據曹公以爲雖得漢中之地必有輸將之費禦捍之勤其勢未易久守故不若棄之便也及鄧艾襲取成都而漢中遂爲控引輸寫之地豈可謂食之無所得棄之如可惜者乎然則曹公之棄漢中特以未暇取成都耳以此言之則知前二說者去取各有時也且天下之形勢固有不相關而實相待者飛者以翼而繫其足則不能飛走者以足而縛其手則不能走瓶罄則壘恥唇亡則齒寒矣橫山靈武亦蘭會熙河之手足而蘭會熙河亦橫山靈武之壘齒也功成於彼則患紓於此矣杜欽議夜郎以爲不毛之地無用之民聖王不以勞中國宜罷郡放

棄其民絕其侯王勿復通如以先帝所立之功不可墮壞亦宜因其萌芽絕之嗚呼是今日西邊之勢也

邊防中

或謂臣曰咸平中賊繼遷者攻陷靈武進圍麟州朝廷檄召諸鎮兵討之僅能解圍而已逮寶元慶曆之間元昊僭逆兵拏而
不解者數年竟亦不能致其頭於北闕下元豐初大舉弔伐之
師五道並進輒無功而返未幾永樂陷沒詔使死者二人夫羌
之勁悍不可以力屈久矣柰何輕議取橫山復靈武哉臣應之
曰不然夫勝有勢敗有時聖人不能生其時時至而不失其勢
昔咸平之時海內初離分裂之禍上下厭苦於兵俱欲休息而

繼遷之黨以兇悍狡險之姿據平夏之全壤扼瀚海之要衝故其壤清遠而竊靈武也朝廷置之度外而不復問寶元慶曆之間天下承平日久邊防之備大率皆弛將不知兵而兵不習戰彼元昊者雖生於砂磧牛馬之區而計數足以濟其姦勇決足以成其惡料敵合變有古單于之風小羌人事請盟唯恐居後於是盡有河南之地又取河西之境乃歸節旄僭名號卷甲一出其鋒不可當者矣先皇帝自熙寧以來懲累朝之事爲萬世之計申嚴武備命將出征戎軒啓行枹罕請命干戈再指五原內屬元豐之初遂決策大舉夏人震懼不知所爲然猶未卽伏辜者其形勢已成其支黨具在譬如不肖子守其先人之廬雖

終賣鬻而期月之間資用尙饒未可問也今則不然承先皇帝
飭勵之後懲艾胡粵之餘將帥之銓擇士卒之蒐練器甲之犀
利財用之充委皆數倍於寶元慶曆之間而天方厭羌內難屢
起權臣擅事呿鷸相持旣狃於永樂之役常以中國爲易與耳
又謂陛下新卽位方務休靖未能外事四夷夫戰而輕驕與夫
懈不設備在兵法皆滅亡之道也由是言之彼無敗形我無勝
勢者咸平之時是也我之勝勢已具彼之敗勝未成者元豐之
初是也我有必勝之勢彼有必敗之形者今日是也且時難得
而易失一日縱敵數世之患也柰何不議取橫山而復靈武哉
昔漢武帝擊匈奴追奔逐北者二十餘年浮西河絕大漠破真

顏襲王庭、封狼居胥山、禪於姑衍、以臨瀚海、虜名王貢人以百數、築單于邸城於長安、然竟不能南面而臣之也、逮宣帝匈奴內亂、五單于爭立、漢以威德覆之、於是始肯臣服、甘露中呼韓邪單于遂來朝於甘泉之宮、唐太宗伐高麗、至身屬橐鞬、鞍結兩服、雖拔遼東白崖諸城、而駐蹕之後、韎韝犯陣、李勣等力戰破之、軍還悵然思魏徵在、朕豈有此行邪、迨高宗時、蓋蘇文死、諸子閔狼怨禍構連、饑饉頻仍、災異並見、於是唐遣勣等討之、遂滅其國、以其地置安東都護、夫孝武太宗用武之主也、宣帝高宗守文之君也、然而匈奴之所以叛服、高麗之所以存亡者、何哉、用武之主奮威而擊於前、守文之君乘弊而取於後、亦其

形勢茫然無足怪也臣以爲陛下觀匈奴高麗之所以破則知夏國之可夷觀宣帝高宗之所以克則知天誅之可致觀武帝文皇之功則先帝之志不可忘也願陛下擇大臣知兵者一人以爲統帥盡護諸將之軍使之毋顧小利毋急近功而專以橫山靈武爲事不過三年河南之地復歸於中國矣

邊防下

臣旣言靈武蘭會之形勢因請遂陳攻守之策今夫盡堅悉銳傳壘而陣八部並進晝夜不息是知攻而已者也增障濬隍嬰城自固屈指計功以須援兵是知守而已者也知攻而已者可以擒小敵矣而不可以擒大敵知守而已者可以保堅城矣而

不可以保危城古之知攻守者不然堅壁不戰自養其鋒則雖大敵而可擒直前逆擊折其盛勢則雖危城而可保是之謂以守爲攻以攻爲守非天下之奇材何足以知之乎諸葛相蜀歲出師以伐魏魏人患之及亮死師不復出而蜀遂以亡蓋亮以蜀者險阻新造之國而四面皆迫強敵非數出銳師以挫之則其勢不能自保此則以攻爲守者也漢使趙充國擊先零而請罷騎兵畱步士萬人屯田以待其敝宣帝從其議遂滅先零蓋充國以先零窮寇急與之角則中國必有饋輓轉輸之勞故罷騎畱屯而圖以羣月此則以守爲攻者也臣以爲孔明所以保蜀之策可以守蘭會而充國所以破先零之計可以取靈武何

則今蘭會之地與夏人接界犬牙相入若積粟儲械端坐而守
彼必時入而寇我小則掠羊馬大則拔障隧援兵將至羌輒引
去旣解而歸則又復入如此連年則我數搖動而車甲疲非長
久之道也爲今之策莫若以秦鳳涇原麟府鄜延環慶五路之
兵與蘭會相表裏約以兵萬人歲各一出雖大勝無輕入雖小
卻無久畱務以撓羌人而已夫以五路之兵歲各一出則是我
之兵歲一戰而羌人歲五戰也羌雖魁健豈有歲五戰而不罷
極者也彼旣救死扶傷之不給則蘭會之地自然無事此則孔
明守蜀之遺意也自靈武陷沒八十餘年其地北拒大河南抵
環慶瀚海七百里烏鹵無水泉若誠舉大兵徑薄其下則虜將

嬰其巢穴竄伏不出而潛以精兵擊吾歸路吾軍糧盡引還則腹背受敵而進退不可得非萬全也爲今之策莫若興屯田假以歲月以爲必誅之計今屯田自關中以至塞下往往而有然水利不興人力未盡內無良吏爲之教督外無遊兵爲之捍敵是以雖有其名而未享其利願置使者一人如漢之搜粟都尉之類專領其事凡要害之利盡發吏卒屯之濬溝澮繕亭障頻出騎士以爲田者遊兵積粟數百萬斛則靈武在吾掌股中矣此亦克國破先零之遺意也夫羌以數縣之衆乃能與中國之師抗者無他吾軍動以轉輸輜重自隨非饋餉不行彼則各贏斗升之糧負於馬上而戰耳是中國所長者兵多所短者難餉

羌所長者易食所短者兵少也今旣大興屯田假以歲月以爲
必誅之計又分諸路之兵歲各一出以爲撓賊之謀則吾之所
短者無足慮彼之所長者無所施臣謂不過三年羌必大困然
後遣一介之使告之曰能以靈武之地歸中國則罷兵不然并
戢夏臺數州矣彼知我不得靈武兵未息也必自割其地獻於
朝廷如有迷悞不從則以數萬人自鄜時度塞門抵回東阪可
唾手而取也傳曰猛虎在深山百獸恐及其在陷穽之中搖尾
而求食積威約之漸也夫能以積威約之漸則羌雖勁悍將搖
尾而求食矣

淮海集

卷十八

淮海集卷十九

進論

晁錯論

臣聞世之論者皆以爲漢用爰盎之謀斬晁錯以謝天下爲非是以臣觀之漢斬錯七國之兵所以破也何則勝敗之機繫於理之曲直理直則師壯師壯勝之機也理曲則師老師老敗之機也故善戰者戰理昔晉欲報楚之惠退師三舍軍吏以爲師老子犯曰師直爲壯曲爲老豈在久乎若子犯可謂善戰理矣蓋不退師則背惠食言而曲在晉師退而楚不還則曲在楚我直彼曲所以勝也漢斬晁錯之事何異於此夫漢之諸侯連城

數十地方千里。雖號疆大。然則皆高帝之封也。一旦用錯計。擿其罪過而削奪之。則天下忿然。皆有不直。漢之心當此之時。諸侯直而漢曲。故吳王得以藉口反也。然吳王卽山鑄錢煮海爲鹽。以其子故招致天下亡命。欲爲反者三十餘年。其稱兵也。發憤削地以誅錯爲名耳。漢斬錯而兵不罷。則逆節暴露天下。亦忿然有不直。七國之心當此之時。諸侯曲而漢直。故太尉得以破其兵也。雖然。漢之斬錯也。其謀發於爰盎。盎與錯有隙。故世之論者以錯死爲冤。此正樓緩所謂以母言之則爲是。以妻言之則爲妬。夫言之者異。而其意同也。就使盎與錯素無睚眦之嫌。其爲漢計亦當出此。然則漢不斬錯柰何。卽七國之兵未易

以忠形錯復
以錯形忠兩
案於一論發
之可謂條貫
貫革

破也。何以知之以唐安祿山之事可知也。方明皇之時，姦臣楊國忠用事，天下皆切齒不平。故祿山以誅國忠爲名而反。是時唐若斬國忠以謝天下，則祿山安得而至長安乎？惜其不知此。至賊入潼關，人神共怒，然後爲陳元禮之所殺也。由是觀之，漢不斬錯，則七國之兵豈易破哉？或曰：王思禮之徒嘗以此勸哥舒翰用其計，畱卒三萬守關，悉精銳渡澧水以誅君側。祿山可遂破乎？曰：不然。漢斬晁錯，事出景帝，爰益發其端而已。故足以激忠義之氣而折姦雄之心。使翰雖斬國忠，事不出於人主，亦不能感動天下，祇足以危身矣。尙爲祿山之成敗哉？故斬國忠以破祿山事，非明皇不可爲也。

韋元成論

臣觀韋元成等議漢宗廟之事。未嘗不竊笑之。以爲此乃不達時變。腐儒之論也。何則。禮非天降地出。出於人心而已。合於先王之迹。而不合於人心。君子不以爲禮也。夫事死如事生。事亡如事存。古今之情一也。上古之世。生養之具未備。巢居而穴處。食草木之實。鳥獸之肉。飲其血。茹其毛。則祭其先也。亦不過薦毛血於中野而已。中古以來。養生之具漸備。範金合土。以爲臺榭宮室。以炮以燔。以烹以炙。以爲醴醕。夫以備者。自奉而以不備者。奉其先。則非人心之所安也。於是如制宗廟之禮。祭祀之儀。故有天下者。事七世。日有祭。月有祀。時有享。歲有貢。始終有

歸其物則天之所生地之所長苟可薦者莫不咸在夫豈求勝於上古之世哉蓋以謂不如是則人心慌焉而不安此制禮之本意也昔惠帝作複道叔孫通因請以爲原廟又嘗出遊於離宮因請獻櫻桃夫原廟與諸果之獻前此未嘗有而通輒以爲請者知制禮之本意則可以義起之也被元成等不然徒見漢之宗廟祭祀不合六藝之文遂欲一切毀之不知六藝之文中古之事也上古之事不可盡行於中古中古之事豈可盡行於後世哉古者君子將營宮室宗廟爲先廡庫次之宮室爲後將毀宮室廡庫爲先宗廟爲後何則營之先親而後身毀之先身而後親可知也漢之制度不合於六藝之文者多矣彼元成等

徒知陵廟園寢便殿祭祀之爲過而不知神仙長年合歡增成飛廉象玉之爲過也知廟在郡國月游衣冠之爲非而不知千門萬戶之官神明通天之臺離宮別館百有餘區之爲非也元帝初元中雖以侈異嘗罷角抵上林宮館希御幸者而永元中幸長楊射熊館布車騎大獵則是宮室宴享之事未能如禮也宮室宴享非禮則置而不議宗廟祭祀非禮則議而毀之漢之祖宗神靈不存則已神靈若存能不發怒於子孫乎元帝寢疾而夢祖宗譴責也豈非以此乎史稱元帝少而好儒及卽位用元成等爲宰相而孝宣之業衰焉後世遂以儒爲不足用嗚呼以元成等議宗廟祭祀之事言之元帝所用者蓋腐儒耳安得

眞儒用之哉

石慶論

臣聞漢武帝旣招英俊程其器能用之如不及內修法度外攘胡粵封泰山宗決河朝廷多事丞相李蔡嚴青翟趙周公孫賀劉屈釐之屬皆以罪伏誅其免者平津侯公孫洪牧丘侯石慶而已平津以賢良爲舉首用經術取漢相辯論有餘習文法吏事其免固宜牧丘鄙人耳爲相已非其分又以全終何也蓋慶之終於相位非其才智之足以自免也事勢之流相激使然而已矣何則夫君之與臣猶陰之與陽也陰勝而僭陽則發生之道缺陽勝而偏陰則刻制之功虧僭實生偏偏亦生僭兩者無

有是謂太和萬物以生變化以成方武帝卽位之始富於春秋
武安侯田蚡以肺腑爲丞相權移主上上滋不平特以太后之
故隱忍而不發當此之時臣強君弱陰勝而僭陽武安侯旣死
上懲其事盡收威柄於掌握之中大臣取充位而已稍不如意
則痛法以繩之自丞相以下皆惶恐救過而不暇當此之時君
強臣弱陽勝而偪陰夫豪傑之士類多自重莫肯少殺其鋒鄙
人則唯恐失之無所不至也當君強臣弱陽勝偪陰之時雖有
豪傑安得而用雖用之安得而終然則用之而終者惟鄙人而
後可也慶爲相時九卿更進用事不關決於慶慶醇謹而已在
位九歲無能有所正言嘗欲治上近臣反受其過上書乞骸骨

詔報反室。自以爲得計。旣而不知所爲。復起視事。嗚呼。此其所
以見容於武帝者歟。夫慶終於相位。是田蚡之所致也。故曰事
勢之流。相激使然而已矣。然則平津之免何也。洪之才術雖不
與慶同日而語。至於朝奏暮議。開其端。使人主自擇。不肯面折
廷爭。公卿約議。至上前。皆背其約。以順上旨。如此之類。則與慶
相去爲幾何耶。洪與慶爲人不同。其所以獲免者一也。蓋是時
非特丞相也。如東方朔枚舉司馬相如嚴助吾丘壽王朱買臣
主父偃之屬。號爲左右親幸之臣。而亦多以罪誅。唯相如稱疾
避事。朔舉不根持論。以此獲免。由是觀之。武帝之廷臣鄙人者
多矣。豈特慶也哉。故淮南王謀反。惟憚汲黯好直諫守節死義。

至說公孫洪等如發蒙耳嗚呼如黯者可謂豪傑之士也

張安世論

臣聞張安世匿名迹遠權勢自前史皆以爲賢以臣觀之安世亦具臣耳賢則未也何則有大臣者有具臣者有姦臣者天下之士於道可進則請於君而進於道可退則請於君而退進退在道而不在我進之不從退之不聽去而已此之謂以道事君不可則止大臣者也進賢而不能固退不肖而不能必取充位而已具臣者也同乎已雖不肖必與異乎已雖賢必擠專爲利而已此姦臣者也安世身爲漢之大臣與聞政事當天下進賢退不肖之責而竊竊焉專爲匿名迹遠權勢之事進之不從退

之不聽也。能致爲臣而去乎？臣知安世之不能也。蓋安世與霍光同功一體之人，其女孫敬又霍氏之外屬婦也，光得薨而子禹謀反，夷宗族，敬尙相坐。宣帝雖赦之，而安世心不自安。顧上懲博陸之顓，方貪權勢在已，是以深思熟計，欲以自媚於上。故每定大政，已決輒移病出，聞有詔令，乃驚，使吏之丞相府問焉。謂其長史曰：「明主在上，賢不肖較然，臣下自修而已。何知士而薦之？嗚呼！其視姦臣則有閒矣。」豈大臣之所以事君者乎？臣故曰：「安世則具臣矣，賢則未也。」昔伊尹之相湯，曰：「阿衡。」周公之相周，曰：「太宰。」衡者，所以權萬物之輕重而歸於平；宰者，所以制百味之多寡而適於和。惟其和平而已矣。故爲重爲多者，無所於

德爲輕爲寡者無所於怨衡宰之工實無心也伊尹周公所以
事其君者如此曾若安世遠權勢者乎雖號不同而其於有心
則同也昔叔向被囚祈奚免之叔向不告免焉而朝范滂被繫
霍諝理之適往候之而不謝管氏奪伯氏駢邑三百沒齒無怨
言諸葛亮廢廖立李平及亮卒立泣涕平致死嗚呼國之大臣
其好賢也如祁奚之於叔向霍諝之於范滂其疾惡也如管仲
之於伯氏諸葛之於廖立李平則名迹之或匿或見權勢之或
遠或近皆可以兩忘矣山濤爲吏部拔賢進善時無知者身沒
之後天子出其奏於朝然後知羣才皆濤所進而王通以爲密
不以仁予之也嗚呼知通之不與濤則知臣之不與安世矣

淮海集卷十九終

洧澤集

卷十九

淮海集卷二十

進論

李陵論

臣聞草食之獸不疾而易藪，水生之蟲不疾而易水。行小變不失其大常也。知此者可以用兵矣。何則？夫用兵之法有所謂常，有所謂變。什則圍之，伍則攻之，不敵則逃之。兵之所謂常也，以寡覆眾，兵之所謂變也。古之善用兵者，雖能以寡覆眾，而什圍伍攻之道未嘗忽焉。所謂行小變而不失其大常也。嗚呼！李陵之所以敗者，其不達於此乎？兵法曰：小敵之堅，大敵之擒也。方漢武時，匈奴承冒頓之後，號爲強盛，控弦百萬，幾與中國抗衡。

衛青霍去病之徒每出塞至少不下三萬騎其多至十萬騎又有諸將相爲應援然後有功陵乃以步卒五千出居延行三十日至浚稽山與單于七八萬騎接戰一日數十合安得而不敗哉蓋陵嘗將八百騎深入匈奴二千餘里過居延北不見虜還又嘗將輕騎五百出燉煌至鹽水迎貳師未聞困絕謂以少擊衆可以爲常不知幸之不可以數也昔秦始皇問李信曰吾欲取荆將軍度用幾何人而足李信曰不過二十萬人又問王翦曰非六十萬人不可始皇使信伐荆旣而軍敗復欲使翦翦曰大王必不得已用臣非六十萬人不可始皇從之遂平荆地夫王翦豈不知以少擊衆爲利哉以爲小變不可恃大常不可失

也。故田單疑趙奢之用眾，而奢以爲鏌鋣之劍，肉試則斷牛馬，金試則截盤匱，薄之柱上而擊之，則折爲三質之石上而擊之，則碎爲百嗚呼。以王翦之事，趙奢之言，觀之則陵之敗也。其自取之哉。夫豪傑之士，不患無才，患不能養其氣而已。不能養其氣，則雖有奇才，適足以殺其身也。方陵之召見武臺，天子欲使爲貳師將，輜重陵心恥之，不敢言也。遂請當一隊，以分單于兵。夫以陵之奇才，向使少加持重，則衛霍之功，豈難繼耶？而不勝一旦之憤，輕用其鋒，至兵敗降匈奴，頽其家聲，是以不能養其氣而已矣。或曰：李陵以孤軍深入，其亡也宜矣。然則李靖以騎三千，喋血虜庭，遂取定襄，何也？曰：唐之擊突厥也，六總管師十

萬皆授靖節制所向。○輒克虜勢窘甚矣。○頡利諸酋皆勒所部來奔。○所謂傷弓之禽。○可以虛弦下也。○況於勁騎三千乎。○與陵之事異矣。

司馬遷論

班固贊司馬遷以爲是非頗謬於聖人。論大道則先黃老而後六經。序游俠則退處士而進姦雄。述貨殖則崇勢利而羞賤賈。先黃老而後六經。求古今摺紳先生之論。尙或有之。至於退處士而進姦雄。崇勢利而羞貧賤。則非閭里至愚極陋之人不至是也。孰知遷之高才博洽而至於此乎。以臣觀之。不然。彼實有見而發有激而云耳。孟子曰。仁者人也。合而言之道也。楊子亦

曰道以導之德以得之仁以人之義以宜之禮以體之天也合則渾離則散蓋道德者仁義禮之大全而仁義禮者道德之一偏黃老之學貴合而賤離故以道爲本六經之教於渾者略於散者詳故以仁義禮爲用遷之論大道也先黃老而後六經豈非有見於此而發哉方漢武用法刻深急於功利大臣一言不合輒下吏就誅有罪當刑得以貨白贖因而補官者有焉於是朝廷皆以偷合苟免爲事而天下皆以竊資殖貨爲風遷之遭李陵禍也家貧無財賄白贖交遊莫救左右親近不爲一言以陷腐刑其憤懣不平之氣無所發泄乃一切寓之於書故其序游俠也稱昔虞舜窘於井廩伊尹負於鼎俎傳說匿於傅巖呂

尙困於棘津夷吾桎梏百里飯牛仲尼阨於陳蔡蓋遷自況也
又曰士窮窘得委命此豈非人所謂賢豪者耶誠使鄉曲之俠
與季次原憲比權量力効功於當世不同日而論矣蓋言當世
號爲修行仁義者皆畏避自保莫肯急於人之難曾匹夫之不
若也其述貨殖也稱秦始皇令烏氏倮比封君與列臣朝請以
巴蜀寡婦清爲正婦而客之爲築女懷清臺蓋以譏孝武也又
云諺曰千金之子不灰於市非空言也蓋遷自傷砥節礪行特
以貧故不免於刑戮也以此言退處士而進姦雄崇勢利而羞
貧賤豈非有激而云哉彼班固不達其意遂以爲是非頗謬於
聖人亦已過矣然遷爲人多愛不忍雖刺客滑稽佞幸之類猶

屑屑焉稱其所長。況於黃老游俠貨殖之事。有見而發。有激而
言者。其所稱道。不能無溢美之言也。若以春秋之法。明善惡。定
邪正。責之則非矣。楊子曰。太史公。聖人將有取焉。又曰。多愛不
忍。子長也。仲尼多愛。愛義也。子長多愛。愛奇也。夫惟所愛不主
於義。而主於奇。則遷不爲無過。若以是非頗謬於聖人。曷爲乎
有取也。

李固論

取天下者。必有功臣。守天下者。必有名臣。雖然。有國家者。甯無
功臣。不可以無名臣。何則。功臣以乘逐便利爲能。名臣以伏節
死義爲任也。昔西漢之末。海內承平。四夷賓服。而王氏竊持國

柄談笑而輒移之。東漢之季，姦雄崛起，中原大亂，而曹公睥睨神器，終身不敢取。臣嘗疑焉。及讀李固與杜喬之誅門生弟子，貫械腰鉄鎖，願俱死者相屬，然後始知其所以然也。何則？西漢多功臣也。蓋西漢自高祖以馬上得天下，不悅諸生。其取人也先器識，所以朝多功臣。則乘便逐利者眾，形不便，勢不利，彼不爲也。故晚節末路，王鳳用事，王章以直言被誅，而天下靡然以苟患失之爲風矣。其大臣如張禹、孔光輩，皆持祿取容，偷爲一切之計。其清節之士如龔勝、郭欽、蔣詡之徒，亦不過謝病免歸而已。其風如此，亂匪賊子柰何而有懼哉！此王氏所以談笑而移之也。東漢自光武不任功臣，銳意文士，其取人也先經術所

以朝多名臣。則伏節死義者眾。節之所在。義之所存。彼必爲也。故晚節末路。梁冀擅命。固與杜喬以死抗之。而天下靡然以殺身成仁爲俗矣。其大臣如陳蕃。黃琬輩。皆捐覆宗族。以急國家之難。黨錮之士。如李膺。任密。范滂之徒。至連頸就誅。而無愠色。其俗如此。亂臣賊子。柰何而不懼哉。曹公之所以終身而不敢取也。然西漢易亡而復興。東漢難亡而易絕者。何也。孟子曰。三代之得天下也。以仁。其失天下也。以不仁。故三代之君。其始也。雖勢強大。非有仁心。則不興。及其季也。雖德失政亂。非有不仁之罪。則不絕。哀成之君。失德甚矣。然其事止於女寵佞幸而已。未犯不仁之罪也。故國亡而復興。桓靈之時。無道極矣。鉤黨之

獄忠臣義士死者百有餘人。諸所夷滅至不可勝數。則是不仁之罪已貫盈矣。故國亡而遂絕。此亦理之必至。事之固然。無足怪也。嗚呼。國者天下之大器也。君臣者相與持此器者也。視器之安危。則知人之能否。視國之理亂。則知君臣之賢不肖。以二漢論之。報施之道。其不殊也如此。然則爲君臣者。可不戒哉。

陳寔論

孟子曰。伯夷聖之清者也。柳下惠聖之和者也。又曰。伯夷隘。柳下惠不恭。何也。蓋古之君子。初無意於制行。其制行也。因時而已。伯夷之時。天下失於太濁。於是制其行以清。柳下惠之時。天下失於太潔。故制其行以和。雖然。清者所以激濁也。非激濁而

爲清是隘而已和者所以救潔也非救潔而爲和是不恭而已
故由其本而言之則爲清爲和由其弊而言之則爲隘爲不恭
故伯夷柳下惠者實未嘗清未嘗和也安有隘不恭之弊哉前
史稱中常侍侯覽託太守高倫用吏陳寔曰此人不宜用而侯常
侍不可違乞從外舉又中常侍張讓歸葬潁川雖一郡畢至而
名士無往者張甚恥之寔乃獨弔焉嗚呼若實者可謂殆庶幾
於夷惠矣何則桓靈之時政在宦人而天下之士方以高節相
高疾之已甚至使其屬無所發憤常欲以身死黨錮之禍海內
塗炭者二十餘年豈特小人之罪哉君子亦有以取之也實知
其然故於用吏送葬之事稍詘其身應之所以因時救弊而已

其後復誅黨人張德寔以此多所全宥。則其效蓋可見也。嗚呼使東海之士大夫制行皆如寔也。黨錮之禍何從而興乎。以此言之寔殆庶幾於夷惠信不誣矣。然則寔爲侯張而身誣也不爲過則元稹之徒囚宦官以得宰相亦不爲過歟。斯不然也。昔孔子於衛見南子矣。於魯敬陽虎矣。至彌子以爲主我衛卿可得也。則曰有命。蓋見南子敬陽虎者身可誣也不主彌子者道不可誣也。寔於侯張亦誣身以伸道耳。豈若元稹之徒誣道而伸身者哉。然則士大夫爲道而或誣身於宦人者亦可乎。斯又不然也。昔齊人獲臧堅。齊侯使人唁之。且曰無死。堅稽首曰拜命之辱。抑君賜不終始。又使其刑臣禮於士。以杙扶傷而死。古

之人耻其身之辱於刑也是故爲伯夷之清而非其時者是隘
而已爲柳下惠之和而非其時者是不恭而已若陳寔之屈身
於宦人而非其時者是爲姦而已

淮海集

卷二十一

淮海集卷二十一終

淮海集卷二十一

進論

袁紹論

天下之禍莫大於殺士。古之人欲有爲於世者，雖負其豪俊傑特之才，據強大不可拔之勢，疑若殺一士不足以爲損益，然而未始不亡者，何耶？士國之重器，社稷安危之所繫，四海治亂之所屬也。是故師士者王，友士者霸，臣士者疆，失士者辱，慢士者危。殺士者亡。世之論者皆以袁紹之亡繫於官渡，臣竊以謂不然。紹之所以亡者，殺田豐耳。使紹不殺田豐，雖有官渡之敗，未至亡也。何則？昔楚漢相距於京索之間，高祖絳北，狼狽甚於袁

紹者數矣。而卒有天下。項籍以百戰百勝之威。非特曹公比也。而竟死東城。其所以然者。無他。士之得失而已。故高祖以爲張子房。韓信。蕭何三者皆人傑。吾能用之。所以取天下。項羽有一范增而不能用。所以爲我擒。以楚漢之事言之。則知紹之亡。果在於田豐。不在於官渡也。且紹之戒繫田豐也。何異高祖戒繫婁敬於廣武乎。高祖圍於平城而還。以二千戶封敬。號建信侯。紹敗而還。慚豐而殺之。嗚呼。人之量度相遠。一至於此哉。傳曰。善敗者不亡。故楚昭王玲越王勾踐皆濱於絕滅而復續。紹雖敗於官渡。而冀州之地。南據大河。北阻燕代。形勢之勝。尚可用也。向使出豐於獄。東向而事之。問以計策。卑身折節。以撫傷殘。

之餘親執金鼓以厲奔走之氣內修農戰外結英雄縱不能并吞天下豈遽至於亡哉方紹與董卓異議橫刀不應長揖而出及起兵渤海遂有四州之地連百萬之眾威震河朔名重天下不可謂非一時之傑也然殺一田豐遂至於此則天下之禍其有大於殺士者乎文若曰袁紹布衣之雄耳能聚人而不能用臣竊以爲知言也

魯肅論

魯肅勸吳以荊州之地借先主先主因以取蜀吳王悔之歸咎於肅夫以肅之籌略過人而其昧有至於此乎以臣觀之吳人雖欲不借荊州以資先主不可得也肅策之善矣何則是時曹

氏已據中原。挾天子以令天下。毅然有并吞諸雄之心。袁紹呂布皆爲擒滅。其能合縱并力以抗之者。獨仲謀與玄德耳。此所謂胡越之人未嘗相識。一旦同舟而遇風波。則相應如左右手。勢使然也。吳人雖欲不借荊州以資先主。其可得乎。且吳不借荊州。則先主必還公安。不然則當殺之。二者皆不可也。昔高祖入關。與秦父老約法三章。秋毫無所犯。秦民大悅。項羽雖徙之於漢中。而高祖還定三秦。如探囊中物耳。何則。秦民之心已繫於漢也。方先主東下荊州。之人歸者十餘萬。或勸速行。以據江陵。先主曰。夫舉大事。必以人爲主。今人歸吾。何棄去。是時先主若還公安。吳爲讐也。夫以董卓之罪。上通於天。王允以順誅之。

有此案論
更惟

而李傕郭汜糾合黨與。猶能爲之報讐。何則。卓雖兇逆。亦一時之望也。先主以宗室之英名。蓋當代。士之歸者如水之赴海。烏林之役。曹公以百萬之衆。泝江而下。非其雄略。則周瑜水軍。豈能獨勝耶。吳若殺之。豪傑四面而至。必矣。孫氏之亡。可立待也。由是言之。先主借荊州之事。拒之則爲讐。殺之則招禍。因而借之。則可以合縱并力。而抗曹公。肅之爲吳策者。豈不善乎。然則周瑜嘗欲徙先主置吳。盛爲築宮。多其美女。好玩其策。何如此。又大不可也。先主嘗見其髀肉生。慨然流涕。歎功業之不建。其在許也。曹公與之出則同輿。坐則同席。竟亦不畱。此其志豈以美女玩好老於吳者耶。史稱曹公聞孫權以土地借備。方作書。

落筆於地。彼知先主得荊州輔車之勢。成天下未可以遽取也。由是言之。借荊州之事。豈惟劉氏所以取蜀。亦孫氏之所以保吳者矣。

諸葛亮論

晁錯曰。五帝神聖。其臣莫及。三王臣主俱賢。五霸不及其臣。臣竊以爲不然。夫覆杯水於坳堂之上。置杯焉則膠。焦鵬之翮拔而傳鳴鳩。則累矣。故有帝者之君。則有帝者之臣。有王者之君。則有王者之臣。有霸者之君。則有霸者之臣。諸葛亮雖天下之奇材。亦霸者之臣耳。何則。亮帝王之輔。肯爲蜀先主而委耶。王通以爲使亮而無死。禮樂其有興乎。尤非也。臣以爲亮雖無死。

曾不足以取天下。況於興禮樂乎。何則。亮之所事者蜀先主。而所自比者。管仲樂毅也。先主雖號人傑。然取天下則不及曹孟德。保一方則不如孫仲謀。其所以得蜀者。以劉璋之闇弱而已。先主雖存。司馬仲達陸伯言諸公皆無恙。尙不足以取魏而死。其能取天下乎。管仲相齊。九合諸侯。一匡天下。然不能先自治而後治人。故孔子以爲小器。樂毅爲弱燕。合五國之從。夷萬乘之齊。然曠日持久。不能下莒。與卽墨。至間者得行。捐燕之趙。管仲樂毅雖得志於天下。尙不能興禮樂。亮而無死。其能興禮樂乎。夫古之君子。進難而退易。伊尹耕於有莘之野也。則固已曰。使是君爲堯舜之君。使是民爲堯舜之民。蓋求之而不用其道。

則彼有不出而已。孔子曰：如有用我者，吾其爲東周乎？蓋用之而不盡其蘊，則彼有不畱而已。是故有所不出，出則可以取天下，有所不畱，畱則可以興禮樂。方先主之顧亮於草廬之中，所言者取荆益二州耳。至言天下有變，則一軍向宛洛，一軍出秦川，所謂俟河之清，人壽幾何者耶？關羽之死，大舉伐吳，亮曾不能強諫，及兵敗，乃歎曰：法孝直若在，能制主上令不東，就復東行，必不危矣。所謂虎兕出於柙，龜玉毀於櫝中，是誰之過歟？以此論之，亮不足以取天下，而興禮樂，亦明矣。然亮與先主一言道合，遂能霸有荆益，成鼎峙之勢，及受寄託孤義，盡於主，國無閒言，身死之日，雖遷廢之人爲之泣下，有致死者，雖古往社稷

之臣。何以加諸。陳壽以謂管蕭之亞匹。蓋近之矣。然壽以謂應變將略。非其所長。信乎此非也。亮之征孟獲。曰公天威也。南人不復反矣。其卒於渭上。司馬仲達按行其營壘處所。曰天下之奇材也。所作八陣圖。後世言兵者必稽焉。則亮之應變將略。不言可知矣。嗚呼。豈壽果挾髡其父之故耶。抑其所自見如此也。

臧洪論

臣聞臧洪以袁紹不救張超。絕不與通。至於敗死。以臣觀之。洪實游俠之靡也。豈臣子之義哉。何則。夫欲生而惡死。天下之真情也。然古之君子。或捐軀命。棄親族。不爲苟得者。非不欲生。以其所欲有甚於生而已。觸鼎鑊。冒鋒鏑。患有所不避者。非不惡

死以其所惡有甚於死而已使其所欲未有甚於生所惡未有甚於死則君子豈有矯世絕俗拂其所謂真情者耶詩云旣明且哲以保其身君子之常也傳曰志士仁人有殺身以成仁無求生以害仁君子之變也不得已而爲之者也世衰道微士大夫講學不明於是始惑於輕重趨舍之際徒知保身之爲易殺身之爲難不知妄死之與苟生其失一也齊有崔氏之難其臣死者十有餘人晏子獨以爲君爲社稷死則死之爲社稷亡則亡之若爲已死而爲已亡非其私暱誰敢任之以晏子之言論之洪爲張超而死者果何爲也夫曹操呂布皆漢之姦臣然方是時操挾天子其勢爲順布背朝廷其勢爲逆使超去逆就順

紹弗爲救。猶或可責。矧叛操而歸布。安能責其不救乎。夫張超
袁紹之於洪。雖交有故。新遇有薄。厚然受其表用。則皆主也。使
舊主爲新主所殺。洪絕之而致死。猶或近義。矧滅超者曹氏焉。
得與紹爲讐乎。由是言之。洪爲張超而死者。果何謂也。孔融嘗
爲管亥所困。太史慈爲突重圍。求救於先主。先主從之。遂解都
昌之急。蓋是時俗尙名節甚矣。天下之士。惟以然諾不終爲媿。
禍亂不解。爲恥。厥志有在。生死以之。故事成則爲太史慈。不成
則爲臧洪。以臣子之義。責之。皆罪人也。楊子以要離爲蝮螫之
靡。聶政爲壯士之靡。荆軻爲刺客之靡者耶。孟子曰。可以死可
以無死。死死傷勇。若數子者。可謂傷勇矣。亦足以悲夫。

王導論

臣聞春秋書趙盾之罪，而三傳皆以爲實，其族穿，非盾也。盾爲正卿，亡不越境，反不討賊，故被大惡之名。臣始疑之，及讀晉史，見王導周顗之事，然後知三傳之說爲不誣矣。何則？經誅其志，傳述其事也。王敦之舉兵也，劉隗勸帝盡誅王導之族，導嘗求救於顗，顗申救甚切，而不與之言，導心銜之。及敦得志，問顗於導，不答。顗遂見誅，後見其表，始流涕曰：「吾雖不殺伯仁，伯仁由我而死，然則顗之死，雖假手於敦，實導意也。」若使後世良史書曰：「王導殺周顗，不亦宜乎？」以此觀之，則趙盾之事，從可知矣。夫盾以驟諫不入，靈公使鉏麇賊之，麇不忍殺，又伏甲而攻之，僅

以身免故其族穿攻靈公於桃園然則靈公之死雖假手於穿實盾志也不然則其返也曷爲其不討穿乎傳以爲志同則書重信不誣矣豈非經誅其志而傳述其事耶然則穿首惡也盾疑似者也舍首惡而誅疑似者何也蓋名實俱善者天下不疑爲君子心迹俱惡者天下不疑爲小人有善之名無善之實有惡之心無惡之迹是爲姦人姦人者嘗託身於疑似之間天下莫得而誅之此春秋所以誅之也太史公以春秋別嫌疑明是非定猶豫蓋以此矣漢淮南厲王母坐趙氏死厲王以爲辟陽侯力能釋之而不爭輒椎殺之唐高宗欲立武后畏大臣異議李勣曰此陛下家事無須問外人帝意遂定唐人以爲立武后

者勳也。由此觀之。誅志不誅事。非特春秋。古今人情之所同然也。春秋能發之耳。然則王導之罪。與趙盾同乎。曰。非也。導實江左之名臣。東晉之興。導力爲多。特其殺周顗之事。有似於盾而已。

崔浩論

臣聞有有道之士。有有才之士。至明而持之以晦。至智而守之以愚。與物並游而不離其域者。有道之士也。以明濟明。以智資智。穎然獨出。不肯與眾爲耦者。有才之士也。夫有道之與有才。相去遠矣。不可不知也。史稱崔浩自比張良。謂稽古過之。以臣觀之。浩曾不及荀賈。何敢望子房乎。夫子房之於漢。荀攸賈詡。

之於魏。浩於元魏運籌制勝。算無遺策。實各一時之謀臣也。高祖以子房與韓信。蕭何爲三人傑。用之以取天下。韓信王楚。數十城。蕭何封侯第一。而子房獨願封畱而已。及太子監關中兵。乃行少傅事。晏然處於叔孫通之下。了無矜伐不平之意。故司馬遷以爲無智名。無勇功。可謂有道之士也。荀賈雖不足以與於此。然攸謀謨帷幄。時人子弟莫知其言。詡亦闔門自守。退無交私。皆以令終。故陳壽以爲良平之亞。雖有才之士。亦頗聞君子之道者也。浩則不然。其設心錯意。惟恐功之不著。名之不顯而已。李順之死。浩既有力而奏五寅元歷。章尤夸誕。妄詆古人。所撰圖書。至鐫石道傍。公彰直筆。明哲之所爲固如此乎。正孟

子所謂小有才未聞君子之大道適足以殺其身而已。盆城括之流也。以此論之。浩曾不及荀賈明矣。何敢望子房乎。夫以其精治身。以緒餘治天下。功成事遂。奉身而退者。道家之流也。觀天文。察時變。以輔人事。明於末而不知本。陰陽家之流也。子房始遊下邳。受書圯上。老人終曰。願棄人間。從赤松子遊耳。則其術蓋出於道家也。浩精於術數之學。其言熒惑之入秦。彗星之滅晉。與夫免出後宮。姚興獻女之事。尤異。及黜莊老。乃以爲矯誣之言。則其術蓋出於陰陽而已。此其所以不同也。然高帝用子房之謀。棄咸陽。還定三秦。滅項羽於垓下。太武用浩亦取赫連昌。破蠕蠕。平沮渠。收犍於涼州。惠帝得不廢者。子房之本謀。

而太武爲國副主。亦自浩發之。其迹蓋相似也。嗚呼。豈欲爲子房而不知所以爲子房者與。

淮海集卷二十一終

淮海集卷二十二

進論

王儉論

臣聞君子之論人觀其終身之大節。大節喪矣。雖有一時之美。一日之長。足以夸污世而矯流俗。君子無取焉。史稱王儉嘗謂江左風流宰相。惟有謝安。蓋自況也。以臣觀之。儉實安之罪人也。豈可同日而語哉。何則。自晉以閥閱用人。王謝二氏最爲望族。江左以來。公卿將相出其門者。十七八。子爲主婿。女爲王妃。布臺省而列州郡者。不可勝數。亦猶齊之諸田。楚之昭屈景氏。皆與國同其休戚者也。安之仕晉。始爲桓溫司馬。孝武之世。政

由溫出摺紳顧望不知所爲而安與王坦之盡忠王室蔑有二心至於屢改袁宏之文以寢九錫之命可謂以身許國社稷之臣者矣儉之仕宋襲封選尚其爲親貴固非安之比也蕭公雖有異志而謝朓褚彥回之屬初無從意齊室之建儉實發之至引梁王魯國之事使臣珥貂所居稱殿何異取六藝以文姦言者安之於晉其大節如彼儉之於宋其大節如此臣故曰儉實安之罪人也至於該洽經史明習故事工詞令妙威儀動爲名流之所稱所謂一時之美一日之長夸污世而矯流俗者也君子何取焉安少有重名累年辟召不至其後雖受朝寄而東山之志始末不渝形於言色則安之功名出於無意者也儉少時

志在宰執見於所賦之詩及生子字曰元成取仍世作相之義則儉之富貴取於有心者也夫無意之與有心相去遠矣豈可同日而語哉宋初受命陶潛自以祖侃晉世宰輔恥復屈身投劾而歸躬耕於潯陽之野其所著書自義熙以前題晉年號永初以後但稱甲子而已以此論之則儉之爲人蓋可見也

韓愈論

臣聞先王之時一道德同風俗士大夫無意於爲文故六藝之文事詞相稱始終本末如出一人之手後世道術爲天下裂士大夫始有意於爲文故自周衰以來作者班班相望而起奮其私知各自名家然總而論之未有如韓愈者也何則夫所謂文

有百川歸
海之致

者有論理之文有論事之文有敘事之文有託詞之文有成體
之文探道德之理述性命之情發天人之奧明死生之變此論
理之文如列禦寇莊周之所作是也別白黑陰陽要其歸宿決
其嫌疑此論事之文如蘇秦張儀之所作是也同考異次舊聞
不虛美不隱惡人以爲實錄此敘事之文如司馬遷班固之作
是也原本山川極命草木比物屬事駭耳目變心意此託詞之
文如屈原宋玉之作是也鉤列莊之微按蘇張之辯撫班馬之
實獵屈宋之英本之以詩書折之以孔氏此成體之文韓愈之
所作是也蓋前之作者多矣而莫有備於愈後之作者亦多矣
而無以加於愈故曰總而論之未有如韓愈者也然則列莊蘇

張班馬屈宋之流其學術才氣皆出於愈之文猶杜子美之於詩實積眾家之長適當其時而已昔蘇武李陵之詩長於高妙曹植劉公幹之詩長於豪逸陶潛阮籍之詩長於冲澹謝靈運鮑昭之詩長於峻潔徐陵庾信之詩長於藻麗於是杜子美者窮高妙之格極豪逸之氣包冲澹之趣兼峻潔之姿備藻麗之態而諸家之作所不及焉然不集諸家之長杜氏亦不能獨至於斯也豈非適當其時故耶孟子曰伯夷聖之清者也伊尹聖之任者也柳下惠聖之和者也孔子聖之時者也孔子之謂集大成嗚呼杜氏韓氏亦集詩文之大成者歟

李泌論

臣聞有善聽無良謀。有善謀無利勢。天下之勢善謀之則無不利。天下之謀善聽之則無不良。臣嘗以爲唐室方鎮之患。至於百有餘年。而不能解者。其弊蓋始於天寶之際。肅宗不用李泌之謀。先取范陽而已。何則。夫范陽者。祿山之巢穴也。烏焚其巢。雖有勁翮。無所歸獸。失其穴。雖有絕足。無所恃其勢。然也。祿山帥范陽。專三道。勁兵不徙者。十有四年矣。其人視之。猶子之於父也。一旦舉兵犯順。天下之人。以爲反虜。切齒攘袂。惟恐其不滅。而范陽之人。獨以爲主。引領企踵。惟恐其不興。此所謂家臣不知有國。自古小人之常情。故郭子儀。李光弼。自朔方起兵。皆欲先圖范陽。而必爲肅宗言之最悉。此蓋天下之利勢遠之。不

可失者也。使肅宗能聽其謀，先詔李郭諸將，犄角而取范陽，賊失巢穴，則其眾自潰。兩京可以傳檄而定，兵亦遂息矣。惟其不用泌謀，是以慶緒、思明相繼復起。至兇徒逆黨久稽天誅，則儉爲一切之計，瓜分渭北地以付之。此方鎮之患所從起也。昔之取天下者，皆以首事之地爲根本。故雖困敗而能復振。高祖之保關中，光武之據河內，魏武之完兖州是也。夫范陽者，亦祿山之關中、河內、兖州也。方其陷兩京，所得禁府珍寶，輒以橐駝載歸。其俗至謂祿山、思明爲二聖。後十七年，張洪靖欲懲其事，發墓毀棺，而眾猶不悅。以至於亂。由是言之，天寶之際，若非唐之威德在人，忠臣義士乃心王室，則天下之事可勝言哉！柳玭稱

兩京之復。泌謀居多。其功大於魯連。范蠡若以范陽言之。泌之謀不見聽者多矣。其言王者之師。當務萬全。圖久安。使無後害。又得兩京。則賊再亂已而果然。嗚呼。使泌之謀盡見聽也。豈有方鎮之患哉。

白敏中論

臣聞白敏中用。李德裕薦入翰林爲學士。及德裕貶。敏中爲相。抵之甚力。或曰。人臣事君。公義而已。何以私恩爲乎。敏中之事。未足深咎也。臣竊以爲不然。人臣能盡私恩。然後能盡公義。敏中之罪不容誅矣。孔子曰。事親孝。故忠可移於君。事兄弟。故順可移於長。推此言之。則背師賣友之人。必不能以身許國。何則。

於所厚者薄。則所施無不薄也。昔呂布爲丁原主簿。爲董卓而殺原。爲卓之子。又爲王允而殺卓。及兵敗被執。魏祖欲生之。劉先主曰。明公不見布之事。丁建陽董卓師乎。於是殺布。漢封陳平。辭曰。非魏無知。臣安得進。上曰。若子可謂不背本矣。乃復賞魏。無知其後誅呂氏而安劉氏者。平與周勃也。夫以布之不忠於董卓。董也。其肯忠於曹氏乎。以陳平之不負魏。無知也。豈肯負於劉氏乎。此魏所以誅布。漢所以屬平者也。然則敏中之事。蓋可見矣。雖然。敏中所以負德裕也。亦有繇焉。傳曰。盜憎主人。主人何負於盜。而盜憎之乎。蓋自度其事必爲主人所惡。故也。白氏素與楊虞卿姻家。居易又與李宗閔牛僧孺厚。若敏中本無

得此駁意
方完

英氣雖緣德裕以進而不能無意於僧孺宗閔虞卿之徒自度其事必爲德裕惡也故因其勢盡力以擠之耳夫德裕忠臣也以非罪被斥天下皆知其冤使敏中素與仇猶當爲社稷而救之況因之以進也然則敏中豈惟不忠於德裕亦不忠於唐也臣故曰人臣能盡私恩然後能盡公義敏中之罪不容誅矣然則公義私恩適不兩全則如之何以道權之而已義重而恩輕則不以私害公若河曲之役趙宣子使人以其乘車千行韓厥執而戮之是也恩重而義輕則不以公廢私若庾公之斯追子濯孺子抽矢叩輪去其鏃發乘矢而後反是也夫公義私恩適不兩全猶當以道權其輕重柰何無故而廢之哉雖然逢蒙殺

羿。孟子以爲是亦羿有罪焉。以此言之。德裕之薦敏中。亦不得爲無罪也。

李訓論

臣聞天下無易事。非其人則難於登天。天下無難事。得其人則易於反掌。難無定勢。易無常形。惟其人也。昔漢有諸侯彊大之患。連城數十。地方千里。擅爵人。赦死罪。戴黃屋。刺客公行。景帝用晁錯之謀。始議削之。法令未及行。而七國合從而起矣。何其難耶。逮武帝用主父偃之謀。令諸侯得推恩分其子弟。詔下之日。人人各得所願。法令不更。疆境不變。而尾大之患亡矣。又何其易耶。以此言之。則知天下之事。惟其人也。臣讀唐史。至甘露

之事未嘗不爲文宗而歎息。何則。欲除累世之姦。而倚一區區之李訓。豈不疏哉。宦官之禍深矣。自德宗懲北軍之變。以左右神策。天威等軍。分委宦官主之。由是太阿倒持。不復可取。憲宗之賊。歷三世而不能討。天下憤焉。是時故老名臣如裴度。李德裕之徒。皆在也。向使文宗有知人之明。委任二臣。俾之圖畫。則刀鋸之殘。豈難制哉。何則。以訓之輕躁。寡謀。尙能殺王守澄。則知度與德裕。可以制仇士良之屬無疑矣。惟其不用二臣。而委之訓與鄭注。是以事敗。謀泄。害及忠良。喋血觀闕之前。不勝飲恨而已。非事之難。不知人之禍也。或曰。注之帥鳳翔也。欲因宦者。送守澄之喪。以鎮兵。誅之。訓忌其功。乃先五日舉事。使注不

爲訓所忌也。庶幾有濟乎。臣曰不然。惟其訓之事敗。則唐之禍在士良。使注之功成。則康之禍在注矣。何則。袁紹董卓崔休朱溫之事。蓋嘗成矣。其禍何如哉。以此觀之。事敗亦受禍。成亦受禍。禍在用小人而已矣。德裕嘗曰。舉大事非北軍無以成功。此所謂天下之常勢也。又曰。焚林而畋。明年無獸。竭澤而漁。明年無魚。旣經李訓之猖獗。則天下常勢亦不用。臣以爲德裕能不爲於會昌之時也。則知其能爲太和之時必矣。

王朴論

臣聞適用而不窮者。天下之真材也。材而不適用。用而有所窮。雖有高世之名。難能之行。實庸人耳。何有補於世耶。臣讀五代

史見王朴爲周世宗決平邊之策，然後知朴者天下之真材也。夫用兵之要在乎識序之先後，而識先後之要在於知敵之難易。天下之敵非大而堅，則小而脆也。其難易孰不知之？所以不知者，敵大而脆，則疑於難；敵小而堅，則疑於易也。昔漢兵圍宛丘，光武以別將徇昆陽，王邑欲攻之，嚴尤以謂昆陽城小而堅，宜進擊宛，宛敗，昆陽自服。邑不聽，盡銳攻之，兵以大敗。邑之所以不聽尤者，疑於難而已。朴嘗爲世宗畫平邊之策，其言曰：「攻取之道，從易者始。當今吳、易、圖、得、吳，則桂、廣皆爲內臣，閩、蜀可飛書而召之，如不至，則四面並進，席卷而平之，必矣。惟并必死之寇，可爲後圖。」蓋李氏雖據江南之地，二十一州爲桂、廣、閩、蜀。

之脊。然南帶江東距海。可撓者二千餘里。其人易動搖。輕擾亂。不能持久。號爲大國。實脆敵也。劉氏雖據河東十州之面。與中國爲境。然左有常山之險。右有大河之固。北有契丹之援。其人剽悍彊忍。精急高氣。樂聞而輕死。號爲小國。實堅敵也。是時中國欲取之也。譬如壯士操利兵於深山之中。左觸虎而右遇熊。不可並刺。則亦先虎而後熊矣。何則。虎躁悍。易乘。熊便捷。難制。舉虎困。則熊必畏威而逃。困於熊。虎將乘弊而至。形勢然也。故朴以大而脆者爲易。小而堅者爲難。易者宜先。難者宜後。則所以先吳而後并也。及皇朝受命。四方僭僞次第削平。皆如其策。非所謂天下之真材而孰能與於此。朴雖出於五代。擾攘傾側。

之中然其器識學術雖治世士大夫與之比者寡方世宗之時外事征伐內修法度而朴至於陰陽律歷之學無所不通所定欽天歷當世莫能異而其所作樂至今用之而不可改其五策之意彼民與此民之心同是與天意同契天人意同則無不成之功以此推之朴之所知者蓋未可量也使遭休明之時遇不世出之主則其所就者將不止於此哉

淮海集卷二十三

論

擬郡學試近世社稷之臣論

古之所謂社稷之臣者至矣忠足以竭才性之分敏足以應事物之變苟利社稷則遂事矯制雖君有所不從苟害社稷則伏節死誼雖身有所不顧夫人莫不尊於君莫不親於身君與身也猶有時而忘之知有社稷之事而已況其它乎此古之所謂社稷之臣者也楊子曰近世社稷之臣終之以禮樂可謂社稷之臣矣夫楊子之所以有取於四子者豈以運籌帷幄之中制勝於無形歟料敵制變筭無遺策攻城野戰前無堅敵歟出入

禁闔二十餘年、小心謹慎、未嘗有過歟、果在乎是、則戰國之末
士一介之庸人、皆可以爲社稷之臣矣、豈楊子之意哉、方高帝
之時、天下初定、諸將論功、日夜不決、子房辭齊三萬戶、願封於
留、又勸先封雍齒、諸將乃服、及欲廢太子、子房乃行少傅事、晏
然處於叔孫通之下、招致四老人者、以羽翼之、太子以安、此其
所以有取於子房者也、高后時、諸呂擅權、欲危劉氏、平勃用陸
賈之謀、深自相結、卒能誅諸呂、迎文帝於代而立之、此其所以
有取於陳平、絳侯勃者也、後元、元平之際、漢室多故、子孟擁昭
立、宣政繇已出、前後二十年、海內厭服、此其有取於霍將軍者
也、然光不學無術、闇於大體、死纔三年、宗族誅夷、勃免相、就國

不遠嫌疑陷於吏議幾致顛覆平多陰禍至孫而廢掌雖親貴終以不侯子房雖無三子之過然不能爲漢制禮作樂追迹三代之隆以聖人之道槩之皆未得爲全人也故曰終之以禮樂雖然四人者或氏而字之或氏而名之或爵而名之或氏而官之何也此蓋楊子之深意春秋之大法也春秋之法雖貴賤不嫌同號美惡不嫌同辭然而州不若國國不若氏氏不若人人不若名名不若字字不若爵爵不若子因此等以寄褒貶焉氏者別其所自出也字以言其德名以言其體爵以言其功官以言其業張子房以智蓋言其德也故氏而字之陳平以無誤蓋言其體也故氏而名之絳侯勃以果蓋言其功故爵而名之霍

將軍以勇蓋言其業故氏而官之四人者子房最優故獨字之絳侯勃爲下故獨不氏焉嗚呼不如是何足以爲法言

聖人繼天測靈論

古之語道德者未始不以聖人而論聖人者亦未始不以道德蓋捨道德則無以見聖人而微聖人則道德或幾乎息矣何者其體相俱而其用無以異也夫物生謂之化物極謂之變變化而不可知謂之神神也者其合則藏於無爲其散則寓於有得昔之命道者因其無爲也故強名之以天所謂莫之爲而常自然者是已自其有得也故強名之以靈所謂地得一以靈是已天者道也而於神爲無體之體靈者德也而於神爲無用之用

山淺人深

體則可以繼用。則可以測。由此兩者而不能知。百姓是也。知此兩者而不能行。智者是也。行此兩者而不能盡。仁者是也。由而能知。知而能行。行而能盡。靜可以繼。動可以測。此聖人所以至也。蓋聖人者。其聰無所不知。其明無所不察。積聰明而爲淵。則極天下之深。盡聰明而爲懿。則窮天下之美。夫人之所以喪已於物。失性於俗。而一切事變之來。不能以明辯而應對之者。以其質有不足。而修所未至爾。聖人既已具聰明之質。而又加之。以淵懿之修。則尙惡往而不至耶。是以合而爲體。則於上與造物者遊。而無以爲散。而爲用。則足以遂知來物之不窮。而各有得。夫合於無爲。則固以天也。散於有得。則固以靈也。以吾之天。

而繼天之天。以吾之靈而測物之靈。是猶操五寸之矩。求天下之方。其不合亦以鮮矣。易曰。無思也。無爲也。寂然不動。感而遂通天下之故。夫無思無爲。寂然不動者。所謂繼天也。感而遂通天下之故。所謂測靈也。蓋靈與天其始也。出於神。其終也。入於神。而聖人與之俱焉。故楊子曰。聖人聰明淵懿。繼天測靈。夫聰明淵懿者。乃所以繼天測靈也。及乎天已至於可繼。靈已至於可測。雖聰明淵懿亦莫得而言矣。何則。極道德之精。則粗不足以盡之也。彼百姓與仁智則不然。其質與聖人未嘗不同。而其修與聖人未嘗不異。是以雖有存乎人之天。而不能開之以物。於有累。雖有貴於物之靈。而不能盡之以器。於有窮。夫以有累。

有窮之具。而欲繼無爲之天。測無不得之靈。其難也可明矣。嗚呼。於是知聖人之所以聖人也。

變化論

萬物不能常有。有極則入於無。亦不能常無。無極則出於有。變者。自有入於無者也。化者。自無入於有者也。方其入也。則質散而返形。形散而返氣。氣散而返於芒忽之間。闢陰以爲陽者有矣。闢陽以爲陰者有矣。其巧妙其功深。故難窮難終。此物之極者。所以由之也。方其出也。則芒忽之間。合而成氣。氣合而成形。形合而成質。移剛以爲柔者有矣。易柔以成剛者有矣。其巧顯其功淺。故隨起隨滅。此物之生者。所以由之也。是故物生謂之

化。物極謂之變。變者。天道也。君道也。聖人之事。而化之所以始也。化者。地道也。臣道也。賢人之事。而變之所以終也。是二者猶生之有死。晝之有夜。動之有靜。往之有來。常相待爲用。而未有能獨成者也。二者雖不能獨成。而亦不能兩立。何則。一氣不頓進。變進則化退矣。一形不頓虧。化進則變退矣。一進一退。迭相出入。而神用無窮焉。故曰變化者進退之象也。又曰知變化之道者。其知神之所爲乎。昔之論變化者。有先變而言者。有先化而言者。有兼變化而言者。易曰形而上者謂之道。形而下者謂之器。化而裁之謂之變。夫道者變之統也。器者化之字也。有形者不能相有。是以雖器也而制之者。亦存乎道。雖化也而裁之

者亦存乎變故曰化而裁之謂之變此所謂先化而言者也中庸曰其次致曲曲能有誠誠則形形則著著則明明則動動則變變則化蓋自致曲而至於變化者由人以盡天道自變而至化者由天以盡人道盡天道所以率性盡人道所以立教故曰變則化此所謂先變而言者也荀卿曰誠心守仁則形形則神神則能化矣誠心行義則理理則明明則能變矣變化代興謂之天德夫變者所以原始化者所以要終獨化則不能以生獨變則不能以形生生形形而道之用盡矣故曰變化謂之天德此所謂兼變化而言者也蓋先變者以言乎自無而出有先化者以言乎自有以入無而兼變化者以言乎出有入無相待爲

用而已矣。然則主變者天也。司化者地也。而荀氏皆以爲天德何也。曰天道成終而成始。凡言變者亦可以兼化。地道無成而待有終。凡言化者則不可以兼變。易於乾曰乾道變化而於坤則曰萬物化生。蓋乾者用陽氣以統天地。天旣可以兼化。則乾固不獨變矣。地不可以兼變。則坤固止於化矣。故曰闢戶謂之乾。闔戶謂之坤。一闢一闔謂之變。又曰在天成象。在地成形。變化見矣。由是觀之。變化者神之用也。神無方無方則無乎不在。故在天則乾道是已。在地則坤道是已。在人則聖人是已。故曰天地變化。聖人効之。此之謂矣。

君子終日乾乾論

天任命人任力君子之道原於天而相之以人安於命而輔之以力故凡乘勢以應變因時以立功雖一聽於自然而進德修業未始不以自強不息爲主何則力有所不盡則未可以言命而人有所不至則未可以言天故也乾九三所謂君子終日乾乾夕惕若厲無咎者蓋亦以此矣夫九三以不中之位據重剛之險前有五之可至後有二之可終非所至而至則失義非所終而終則失幾失義則驕失幾則憂於時也可謂危矣可謂難其處矣此其所以終日乾乾而夕猶惕若也日者有爲之時夕者無爲之時也於有爲之時乾乾以致其力於無爲之時則惕若以致其心夫亂生於所忽治生於所憂安安者危亡亡者存

固天之理也外既有以致其力而內又有以盡其心然則德其有所不進業其有所不修而過其有所不補者乎故曰君子終日乾乾夕惕若厲無咎而孔子亦曰乾乾因其時而惕雖危無咎也易曰無咎者善補過也蓋當勇於進而安於苟簡而不能果於自強能以無咎者寡矣嗚呼非深知天人力命之說者何足以與於此

以德分人謂之聖論

古之聖人其道本於成已而終於成物得其始不知其終則蔽於爲我見其末而遺其本則蔽於爲人爲我之蔽溺於楊而爲人之蔽流於墨二者所事不同要皆不該不徧一曲之所爲而

非道德之正也。聖人則不然。其入不藏。其出不陽。入而不藏。故德先乎身。而有以公於物。出而不陽。故道濟天下。而有以私於己。夫公於物。仁也。私於己。智也。公公私私。仁智兩得。聖人之道盡矣。傳曰。以德分人。謂之聖。其此之謂乎。夫天下之人。因其性而觀之。則未嘗不同。因其習而觀之。則未嘗不異。使天下皆知性之無不同也。則其俛仰之際。語默顰笑之間。固足以官陰陽而府萬物矣。又奚聖人之俟哉。夫惟不知。故尊其習者。有至於上智而卑其習者。或至於下愚。夫以本同之性。而異於上下相遠之習。此天下所以有俟於聖人。而聖人者。所以不可一日無於天下也。故古之人。當其德未成。則修之於己。既成。則分之於

人其大也以其所知覺所未知以其所覺覺所未覺其小也以其所中養所不中以其所才養所不才既以與人已愈有既以爲人已愈多仁者得仁智者得智得其精者足以治身得其緒餘足以治國家天下豈固有求於外以爲人之所以望吾而吾之所以與人者適當然而已矣且上覆下大容小高者抑之下者舉之有餘損之不足與之理之當然也彼聖人以德分人也豈固有意於是哉蓋以爲人之所望吾吾之所以與人者亦理之適當然而已矣

淮海集卷二十四

傳

浩氣傳

氣之爲物至矣。其在陽也成象而爲天。其在陰也成形而爲地。陽沴於上。則日月星辰之光悖。陰沴於下。則草木山川之精變。氣也者。天之所以旋。地之所以運也。況於人乎。夫氣之主在志。志之主在心。心者神之合也。志者精之合也。氣者魄之合也。神虧則精不復。精弊則魄不寧。君子虛心以養志。弱志以養氣。故能外探事物之奧。內安性命之情。浩然無際。與道自會。豈特通體乎天地。同精於陰陽而已哉。嗚呼。氣之爲物亦已至矣。此公

是修鍊家
秘密藏

弱志之說
子輿氏所
遺

孫丑所以問之。悉而孟子所以告之。詳也。凡進以禮退以義。動而智靜而仁者。皆性也。窮通之有數。廢興之不常者。皆命也。君子審去就之分。循得喪之理。以盡其性。則寵辱於已猶蚊蚋之一過。死生於已猶夜旦之一易。皆命之偶然者也。烏足概其心哉。故曰。夫子加齊之卿相。得行道焉。雖由此霸王不異矣。如此則動心否乎。對曰。否。我四十不動心。傳曰。色盛者驕。力盛者奮。未可以語道也。二十曰弱。弱則未足以窮理。三十曰壯。壯則未足以盡性。所以窮理盡性四十其時也。四十而不能斯。亦不足畏也已。故於四十曰不動心。孟子所謂不動心。孔子所謂不惑者也。不以內蔽外。故曰不惑。不以物役已。故曰不動心。不惑者。

理學宗語
也宋儒中
不可多得

未必知命也。故孔子五十而後知命。不動心未必知義也。故告子猶以義爲外焉。然則孟子遂無喜怒哀樂之情乎？曰：非也。吾之所謂不動心者，卽有而無，卽實而虛，其於外也應而不遷，其於中也受而無止。雖終日言，猶不言；終日爲，猶不爲也。安可以喜怒哀樂之形哀樂之發而累其所謂不動者耶？君子固有以與人同，亦有以與人異。所同者外，所異者內也。自其同者視之，則孟子之勇有似於孟賁，不動心有似於告子。故曰：若是則夫子過孟賁遠矣。對曰：是不難。告子先我不動心，夫矢石相攻，鋒刃相搏，壯士遇之，雄入而不顧，彼得全於勇，猶若是，況得全於道者乎？故刺其膚而不撓，注於目而不逃，其思已也，一毫之挫若市。

朝之撻其視人也萬乘之尊若褐夫之賤無嚴諸侯惡聲至必
反之此北宮黝之養勇也視強如弱進不量敵之大小會不慮
勝之中否曰舍豈能爲必勝哉能無懼而已矣此孟施之養勇
也昔曾子事親主於養志子夏之門人先於灑埽應對而已舍
之所養者本也故似曾子之約黝之所養者末也故似子夏之
詳由二子觀之則本固宜可以勝末約固宜可以勝詳由君子
觀之則二子之養皆氣而已未足以知義也故曰夫二子之養
勇未知其孰賢然而孟施舍守約也夫知勇而已者有時而窮
知勇知怯者無時而屈自反而不縮雖褐寬博吾不憚焉所謂
知怯者也自反而縮雖千萬人吾往矣所謂知勇者也夫曾子

不漏過于
實妙

之守約所以異於孟施舍之守氣者豈有他哉勇而能怯與義
偕行而已矣故曰孟施舍之守氣又不如曾子之守約也然則
不言子夏何也曰黜養勇之詳固不若舍所養之約舍似曾子
而不及則黜之不若子夏從可知矣蓋黜之與舍可謂不動心
而與夫告子之養者同矣曾子子夏可謂知義而與夫孟子之
所養者亦有以同之也故夫丑問不動心之道而告以四子之
養勇則孟子所以異於告子者固已存乎其間矣言心之聲也
心氣之主也不得於本固可以勿求諸末不得於文則不可以
勿求諸實故曰不得於心勿求於氣可不得於言勿求於心不
可而有以知告子所求者外也人以心爲君以志爲帥以氣爲

師以體爲國。君欲虛而靜。師欲知而專。師欲和而勇。國欲實而彊。四者自正治之美也。四者失道而亂莫大焉。故曰志氣之帥也。氣體之充也。以言志立於心而足以率氣。氣役於志而足以實體。志有強有弱。故以帥言之。氣一滿一虛。故以克言之。夫帥之所適。師之所從也。志之所之。氣之所止也。故曰志至焉。氣次焉。帥不專則銳。師不能以取勝。帥不和則良。帥不能以有功。志之與氣亦猶是也。故曰持其志無暴其氣。夫有尤物足以移人一物之玩且或喪志。況情僞之感利害之攻乎。孟子曰。此天之所以與我者。先立乎其大者。則其小者不能奪也。持其志之謂也。朝氣銳晝。氣墮暮。氣歸朝暮之變。且或動其氣。況自少而壯。

自壯而老乎。孔子曰：君子有三戒，無暴其氣之謂也。雖然，此猶有待也。若夫縱心而動，順性而游，處眾枉不失其直，與天下並流而不流其域，若然者，無持志之念，有持志之功，有暴氣之迹，無暴氣之患，彼且烏乎待哉？既曰志至焉，氣次焉，又曰持其志，無暴其氣，何也？蓋可以善惡邪？正久而遷者，志也，而亦足以害氣，可以喜怒哀樂驟而干者，氣也，而亦足以害志。故曰：氣壹則動，志壹則動，氣凡物壅之則壹，而相與鬱散之則疏，而相與通蹶者，動之逆也；趨者動之順也，逆順不同，皆非志使之然也。氣而已矣。故曰：今夫蹶者趨者是氣也，而反動其心氣以心爲本反者，所以復本也。夫知言然後可以不惑，養氣然後可以不

動心誠淫邪遁之辭莫不畢見所謂知言也至大至剛以直養而無害則塞于天地之間所謂養氣也外不惑於人內不動於己雖孟子之長又何以加于此故曰敢問夫子惡乎長對曰我知言我善養吾浩然之氣天下之理固有可以言論者固有可以意致者可以言論則言之也易可以意致則言之也難故曰何謂浩然之氣曰難言也言之雖難猶爲可言者爾彼言之所不逮意之所不一者又烏可以言言耶大者氣之體也剛者氣之用也氣之體不可圍故曰至大氣之用不可屈故曰至剛夫晝動則氣擾夜息則氣安此人情之常愚智之所同也君子外不勞精於事內無思慮之患抵時投隙以自得爲功故雖晝動

曾不異於夜息眾人反是雖一夜之靜且或不能息也矧旦晝之所爲此非天之所與者殊也不能以直養氣使之無害而已矣夫能以直養氣率理而往循命而趨不爲貧賤富貴之所移威武之所屈則俛仰之近六合之遠固無適而不得矣豈不全其所謂浩然者耶老子曰天地之間其猶橐籥乎虛而不屈動而愈出氣之養也亦猶是矣故曰以直養而無害則塞于天地之間然則亦有出于天地者乎曰方其配義則塞于天地之間而已矣及其配道則固有出于天地者也虛形萬物所道謂之道因緣無事天下之理得謂之德理生昆羣兼愛無私謂之仁列蔽度宜謂之義德非道不神仁非義不立自義而入於天則

極於道自道而出於人則極於養氣之養也直而推之則無不宜此其所以配義也擴而克之則無不在此其所以配道也集者自然而至也夫所謂配者豈固有因而求合於彼乎直而推之無不宜擴而克之無不在則自然與之合矣故曰配義與道又曰是集義所生非義襲而取之也以其自然故於集曰生以其有因故於襲曰取心有餘曰慊腹不足曰餒慊則有裕於中而餒則有求於外老子曰聖人之治虛其心實其腹蓋虛其心者所以欲其慊實其腹者所以惡其餒故曰無是餒也又曰行有不慊於心則餒矣孟子之所以數闢告子何也曰君子惡似而非者使天下之人善如堯惡如桀微君子其誰不知天下之

所以不知者疑似之間也邪與正同門情與僞同鄰至情莫之能分是以君子懼焉被告子之不動心誠有似於孟子然而以生爲性以義爲外使天下相率而從之則將求性於形而求義於物矣此其所以闢之也故曰告子未嘗知義以其外之也豈唯於告子之若是乎其所以距楊墨者亦如此而已矣夫所謂正心者有無意而自正者有有意而正之者聖人之心如眾籟然冷風則小和飄風則大和厲風濟則眾覈爲虛其應物也如是而已所謂無爲而自正者也被眾人則不然有所距有所受有所將有所迎一事之至必欲正其心以應之弊弊然若操五寸之矩一尺之規以求合乎天下之形器者焉吾見夫心勞於

中智盡於外而形器之不能合也此所謂有意而正之者也故
曰必有事焉而勿正心夫知天而不知人者無以與俗交知人
而不知天者無以與道遊夫既有意而正其心矣則於事也豈
免以命廢力而以人勝天者乎故曰勿忘勿助長以命廢力是
忘之也以人勝天是助之也莊子曰善養生者若牧羊然視其
後者而鞭之又曰爲天下者亦奚以異於牧馬者哉亦去害馬
者而已然則君子之修身治天下鞭其後去其害可也必欲弊
精神而求益勞智慮而遠成則命之分有所不安而害且至矣
故曰以爲無益而舍之者不耘苗者也助之長者揠苗者也非
徒無益而又害之嗚呼人之於性也豈欲揠而使長哉亦去其

害性者而已不平謂之陂有過謂之淫畔於正謂之邪逃其本
謂之遁蔽於一隅者其言不平故諛辭知其所蔽陷於一曲者
其言有過故淫辭知其所陷離道者其言畔正故邪辭知其所
離術窮者其言逃本故遁辭知其所窮此四者淺深固殊然以
一邪說之家則足以具之矣楊墨之類是也夫爲我者智也兼
愛者仁也雖孟子之道亦未始離乎此而二氏之所以失者知
其一不知其二有見於此無見於彼而已矣若此者謂之蔽其
弊也爲己者至於不拔一毛兼愛者至於摩頂放踵往而不知
反焉若此者謂之陷其甚也則爲楊者反以仁爲失已爲墨者
反以智爲失物始於毫末之差終以千里之繆亦其理之然也

若此者謂之離又其甚也則爲已者至於無君兼愛者至於無父無父無君是禽獸也若此者謂之窮其於言也蔽而後淫淫而後邪邪而後遁其於心也蔽而後陷陷而後離離而後窮亦其序也以心對政則心爲內政爲外以政對事則政爲大事爲小生於內必形於外故曰生於其心害於其政發於大必及於小故曰發於其政害於其事孔子曰聖人之作易也將以順性命之理然則君子之所以有言者豈固拂其所有而疆其所無哉亦述性命之理而已矣唯如此是以前乎吾者可以稽之而不悖後乎吾者可以俟之而不惑何者命無異性性無異理故也故曰聖人復起必從吾言矣然則又曰作於其心害於其事


作於其事害於其政聖人復起不易吾言矣何也蓋前則因知
言而發原邪說之所起也後則以楊墨而言闢邪說之旣成也
原邪說之所起者以理言之也故曰生曰發而先政後事闢邪
說之旣成者以事言之也故曰作而先事後政理藏於無形則
疑於可違故曰必從事見於有迹則疑於可變故曰不易其言
雖殊考之各有所當也雖然彼邪說者其所謂道亦吾之道也
其所謂德亦吾之德也道德與吾同而所以與吾異者倚於一
偏蔽於一曲如僚之於丸秋之於奕各師其習而不能相通是
以君子疾之焉耳楊子曰適堯舜文王者爲正道非堯舜文王
者爲他道正與他雖不同然而莫非道也而後世之學者徒見

君子之疾之也遂以爲彼之所謂道德非吾所謂道德者焉則亦已過矣然則孟子論不動心之道而止及於知言養氣何也曰能知言則不惑於外能養氣則不動於內外不爲邪說之所干內不爲妄情之所溺則吾之心也復何爲哉以此事上以此臨下退居而閒遊進爲而撫世固無施而不可此孟子之深意也蓋體合於心心合於氣氣合於無則介然之有唯然之音遠在八荒之外近在眉睫之間來于我者我必知之況詖淫邪遁之辭乎潛行不窒蹈火不熱行乎萬物之上而不慄是純氣之守也況卿相之位霸王之權乎雖然是道也豈唯聖人有之天下莫不有也是其道與之命天與之性晝而動夜而息者曷嘗


落處無痕
有斲輪游
刃之趣

不與聖人同乎。惟其外不能知言，內不能養氣，是以予之則驚，
奪之則怨。惛於操捨之際，汨於寵辱利害之交，氣與魄俱擾，志
與精俱弊，而心與神俱亡。若然者，雖一語嘿，一嘖笑，設之或不
當也。況治身以及家、治國以及天下乎。嗚呼！聞孟子之風，可以
興起矣。

淮海集卷二十四終








PL
2687
C13
v.5
淮海集卷二十五

傳說

陳偕傳

偕姓陳氏淮南廣陵人家故饒財而偕與其弟獨喜學畫其後
技日以進家日以微遂以爲業士大夫旣喜其畫且愛其爲人
往往稱之然非偕之好也其言曰予從事於茲有年矣凡古今
之畫不見則已苟有見焉雖敝縑裂素之餘未嘗不學一不可
於意輒復易之舐筆濡墨欣然忘勞蓋是時余方以畫爲事固
其勢不得不然乃今思之亦良苦矣且物之有形如浮埃聚沫
來無所從去無所詣一興一債於無窮之中而我方汨汨然隨



而畫之可不惑歟彼好事者又從而玩之至藏於巾笥且不欲以數閱可不謂大惑者歟嘻今老矣顧家貧無以給衣食之奉聊復俛仰於其閒至於得失精麤不復經意也又曰有學於余者眾矣余將教之必使縱心之所勤肆筆之所成以觀其天蓋工而不雅者有矣疏而不俗者有矣詳略得宜意氣容與卓乎遂若無與及者亦或有焉余從而告之曰其後當然其後當然已而果然夫畫固技之微者也其猶若是又況有貴於畫者哉其子直躬亦世其學而所言尤異嘗曰昔宋元君時畫圖有一史解衣槃礴元君曰是真畫者也夫解衣槃礴固倜儻之所得閒暇之所好也元君乃以爲真畫其意果安在乎有得於此然

後可以言畫而或說以謂神定意閑固以異於他史其亦失元君之意矣余聞而異之又從而思之豈所謂自得於己者耶抑亦得於人者耶將內雖不克其言而頗亦有志於是耶人固未易知然比夫銜技以夸人賈能以售污俗者相去亦遠矣古之君子聞一言中於理必書之故漁人之所賦孺子之所歌皆得載於前史矧其有合於道德之要者乎於是爲傳其言以遺同好亦時觀之以自擇焉

眇倡傳

美倡有眇一目者貧不能自贍乃計謀與母西游京師或止之曰倡而眇何往而不窮且京師天下之色府也美眇巧笑雪肌

而漆髮曳珠玉服阿錫妙彈吹籍於有司者以千萬計使若具
兩目猶恐往而不售況眇一焉其瘠於溝中必矣倡曰固所聞
也然諺有之心相憐馬首圓以京師之大是豈知無我儷者遂
行抵梁舍於濱河逆旅居一月有少年從數騎出河上見而悅
之爲解鞍畱飲燕終日而去明日復來因大嬖取置別第中謝
絕姻黨身執爨以奉之倡飯少年亦飯倡疾不食少年亦不食
囁嚅伺候曲得其意唯恐或不當也有書生嘲之曰聞者缺然
不見意有奇遇乃從相矢者處乎少年忿曰自余得若人還視
世之女子無不餘一目者去佳目得一足矣又奚以多爲贊
曰前史稱劉建康嗜瘡痂其門下二百人常遞鞭之取痂以給

膳夫意之所蔽以惡爲美者多矣何特眇倡之事哉傳曰播糠眯目則天地四方易位余嘗三復其言而悲之

魏景傳

魏景字同叟淮南高郵之隱君子也身長六尺骨如削石瞳子碧色有光嘗賣繒於市遇華山元翁從授鍊丹鑄劍長生之術元翁名碧天其師曰劉海蟾海蟾之師曰呂洞賓洞賓之師曰鍾離權自權至景凡五世矣景問元翁曰余欲兼忘其方奈何翁曰執汝身守汝一謹而勿失景曰執害通守害變則如之何翁曰不然子以爲構中天之臺者土木未考則能無經乎適千里之國者車馬未館則能無行乎故將欲通之必固執之將欲

變之必固守之此其理也於是景以爲然乃述碧天之意著書
萬餘言論神仙事號太冲子云太冲子曰道者盜也釋者識也
盜天地陰陽之機謂之道識萬物之理謂之釋甚矣人心之神
也雖造化亦無加焉今夫天地之生物煦之以陽肅之以陰然
後乃成人心則不然一舉而物已生矣故天生萬物地生萬物
人心生萬物是故人心之形象天地陰中生陽陽中生陰非陽
不能養陽非陰不能養陰故修陽法者去陰以純其陽修陰法
者去陽以純其陰陽用其精陰假諸物此陰陽之法也水之性
潤下火之性炎上眾人離上而坎下故不交真人坎上而離下
故交炁真炁也氣穀氣也真人真炁純眾人穀氣雜神仙之道

有中立無無中立有死而不亡者至矣一身而形二者次矣不死不亡一身而形不二者又其次也其大略如此同叟穎脫彊記得於自然凡陰陽醫藥鍛鍊之技無所不精而能諱其術所以世莫知焉頗解屬文亦工於詩其贈元翁篇云幽斷青松骨鍊盡江月心佳句多此類也嗚呼自大道隱學者各師異習鮮得其本真於是趨滅而不知生者爲佛氏之緣覺趨生而不知滅者爲道家之神仙二者不同其蔽一也然比夫生而行死而伏冥然日用而不知者固有閒矣如同叟者雖不足以窺老莊之藩翰亦葛稚川之流乎余素與之友善別之且六年矣旣思其人而不可見又惜其事泯泯不少概見於世如古之所謂隱

逸者也乃撰次行義并擇其言之雅者書而記之聊以致余之意云

汝水漲溢說

汝南風物甚美但入夏以來水潦爲患異時道路化爲陂波汝水漲溢城堞危險溼氣重蒸殆與吳越間不異郡人歲歲如此漢書稱汝南有鴻隙陂翟方進爲相始奏罷之郡人怨甚切意鴻隙陂者非特爲灌溉之利菱芡蒲魚之饒實一郡瀦水處也大陂旣廢水無歸宿則自然散漫爲害又水經稱汝水至汝南郡西北枝左別出一枝又屈而東轉南會汝形如垂瓠故號懸瓠城今汝水故道已亡惟存別枝水潦暴降則有泛溢之患亦

其勢然也在漢時爲豫州刺史治之諸邑皆春秋時沈江道柏之國事迹甚多暇爲作記無文字檢耳

心說

心本無說說之非心也雖本無說而不得不有說默而神之與道全之說而明之與道散之其全爲體卽體而有用其散爲用卽用而有體體用並游於不窮而俱止於無所極者其唯心而已矣而世之君子迷已於物沈真於僞而莫之見焉此心說之所以作也目無外視耳無外聽遺物忘形在我而已此其心歟曰非也心不在我然則目無內視耳無內聽馳神游精在物而已此其心歟曰非也心不在物然則物之有色我因視焉物之

有聲我因聽焉來則御之去則將之彼是兩忘在物我之間而已矣此其心歟曰非也心不在物我之間然則心無所不在乎曰惡得而無在也雖不在我未始離我雖不在物未始離物雖不在物我之間而亦未始離乎物我之間者此心之真在也譬如虛空焉虛空者卽之不親遠之不疏萬物方有則與之有萬物方無則與之無俛仰消息唯萬物之與俱夫虛空之於心猶一星之於天而一塵之於地也及其至猶若是又況於心乎哉是故卽心無物謂之性卽心有物謂之情心有所感謂之意心有所之謂之志意有所歸謂之思志有所致謂之慮故合精以止謂之魄配神以行謂之魂與神爲一謂之精不離於精謂之

神此十者入則一出則不一出入無常要皆以心爲主爾不得
乎主未有得乎臣者也是以古之通乎此則動爲一氣靜爲二
儀動靜有萬物鼓舞有死生若然者陰可以開陽可以闔天地
可以倒置日月可以逆行上焉造物者不得臣下焉外形體忘
始終者不得友而況富貴之倘來死生之小變乎其不能累也
亦明矣彼世之君子則不然知其曲不知其通安於近而迷於
遠有見於外者則求心於物有見於內者則求心於我又其甚
則蔽形而忘其神以謂心者特在乎方寸胸臆之間外此則物
而已矣嗚呼其亦不智也哉有人於此棄邑而取宮棄堂而取
室世必以爲不智人矣是何也所有者小而所遺者大也心之

形非特宮與室之微心之神非特堂與邑之廣而所取者如此而所棄者如彼豈不惑哉一人惑之一國笑之一國惑之天下笑之天下盡惑孰笑之哉悲夫是皆不見心之真在之過也由此觀之太上見心而無所取捨其次無心其次虛心其次有心有心者累物眾人之事也虛心者遺實賢人之事也無心者忘有聖人之事也見心之真在而無所取捨者死生不得與之變神人之事也嗚呼安得神人而與之說心哉

二侯說

閩有侯白善陰中人以數鄉里甚憎而畏之莫敢與較一日遇女子侯黑於路據井傍佯若有所失白怪而問焉黑曰不幸墮

珥於井其直百金有能取之當分半以謝。夫子獨無意乎。白良
久計曰彼女子亡珥得珥固可給而勿與。因許之脫衣井旁。縋
而下。黑度白已至水則盡取其衣亟去。莫知所塗。故今閩人呼
相賣曰我已侯白。伊更侯黑。余謂二侯皆俚巷滑稽之民適相
遭而角其技勢固不得不然於其所親戚游舊未必爾也。而今
世薦紳之士閒居負道德矜仁義羞漢唐而不談真若無徇於
世者一旦爵位顯於朝名聲彰於時稍迫利害則釋易而趨險
叛友而誣親擠人而售已更相伺候若弈碁然唯恐計謀之不
工。僥倖一切之勝而曾白黑之不若者。武相仍袂相屬也。則二
侯之事亦何所怪哉。

十二經相合義說

易曰同聲相應同氣相求九流溼火就燥雲從龍風從虎嘗以謂知易之說則十二經相合或以相生或以相剋者固理之自然而無所可疑之矣何以知其然耶經曰南方生熱熱生火北方生寒寒生水西方生燥燥生金中央生溼溼生土是則水者寒之形溼者土之氣夫水之於土妻道也故水流溼火者熱之形燥者金之氣火之於金夫道也故火就燥或以陰求陽或以陽求陰也管輅曰龍者陽精而居於淵故能興雲虎者陰精而居於山故能運風是則龍陽中之陰也惟陽中之陰爲能召陰中之陽故雲從龍虎陰中之陽也惟陰中之陽爲能致陽中之

陰故風從虎夫陰陽之道固有因同類而相感者亦有以異類而相感者同聲相應同氣相求所謂同類而相感者也同異雖殊於其相感一也十二之經相合亦何異於是哉經曰少陽之上火氣治之中見厥陰又曰厥陰之上風氣治之中見少陽厥陰風木也位東方少陽相火也位南方火與木相生故厥陰與少陽合而肝膽三焦命門所以相爲表裏也經曰陽明之上燥氣治之中見太陰又曰太陰之上溼氣治之中見陽明太陰溼土也位中央陽明燥金也位西方土與金相生故陽明與太陰合而脾與胃肺與大腸所以相爲表裏也經曰太陽之上寒氣治之中見少陰又曰少陰之上熱氣治之中見太陽少陰君火

也。位南方太陽寒水也。位北方水與火相配。故太陽與少陰合而心與小腸腎與膀胱。所以相爲表裏也。蓋木位東方則陽之中也。金位西方則陰之中也。土位中央則陰陽之中也。水位北方則陰之正也。火位南方則陽之正也。凡陰陽中則和。和則相生。故金木火土以相生而合。陰陽正則相配。故水火以相配而合。相生而合者。所謂同類而相感也。相配而合者。所謂異類而相感也。故經曰。水火者。陰陽之徵兆。金木者。生成之始終。蓋水火者。日之與月。坎之與離。而男之與女也。萬物之所以有也。金木者。因其有而生成。始終之而已矣。於徵兆則以相配言之。於生成則以相生言之。亦其理也。又水火譬之。則夫婦也。金木火

土譬之則父子也。夫婦以異而相合。父子以同而相合。有夫婦然後有父子。有水火然後有金木。四者具然後有土。同類雖殊其合一也。嗚呼陰陽之爲道博而要小而大數之可十者推之可百數之可千者推之可萬萬之大不可勝也。然其要一也。故遠之於天地近之於父子之間又其悉也。至於言笑飲食莫不具而有焉。苟直而推之曲而求之則何所而不得也。雖然今之所謂學醫惡足以語此哉。

淮海集卷二十五終

淮海集卷二十六

表

代賀坤成節表

竊以聖誕當期嚴秋在序協氣蟠乎穹壤頌聲溢於華戎中伏
惟太皇太后陛下德並神明功參覆載斷鼇立極追配於媯皇
用楫濟川責成於傳說忠謀入而姦黨破弊事革而嘉應來巍
乎在唐虞之閒卓然出馬鄧之右嘉辰旣屬率土交歡臣猥緣
肺腑之親叨分符竹之寄前瞻觀闕阻奉萬年之觴遠託封章
庶比千秋之鑑

代賀興龍節表

大呂飛灰爰屬星迴之序靈樞繞電實當聖誕之期凡屬生成
所同并蹈中賀恭惟皇帝陛下裁成天地參並神明以言乎道則

持盈而守成以言乎時則重熙而累洽昭哉嗣服續六聖之洪
休大矣孝熙備三宮之至養清風發而羣陰伏元首明而庶事
康令節載逢鴻儀斯舉加籩折俎初嘗露酌之醇擊石彈絲始
奏鈞天之妙可謂一時之嘉會故得四海之歡心臣猥以葭莩
廁於藩翰十章獻鑒空懷唐相之誠萬壽稱觴莫預漢庭之列
代賀太皇太后受冊表

臣某言伏審今月某日太皇太后於某殿受冊者續繼鴻休亘
華夷而共慶昭明鉅禮極天壤以均歡臣某誠歡誠喜頓首頓

首恭以太皇太后陛下鍾睿知之資御休明之運以至仁而子
養萬國以盛德而母儀三朝造舟爲梁始作文王之合斷鼂立
極終成媯氏之功忠邪辨而和氣通威惠行而頌聲作旣增光
於聖統宜受禮於神孫典章載崇寰海交并臣猥被藩室之寄
叨居肺腑之親不獲隨例稱慶闕庭無任踴躍歡欣之至謹具
表陳賀以聞

代賀皇太后受冊表

臣某言伏審今月某日皇太后於某殿受冊者稽酌天人備嚴
典禮孝治旣先於宮闈歡心自得於寰區賀中恭以皇太后妙道
生知英能天縱自長門而登長樂法度無違以太姪而事太姜

晨昏不懈至於彌成先帝之治保佑聖子之功幽通神明顯被
動植施之大者報必厚實之富者名必隆位號既昭華夷增并
臣謬通屬籍叨假郡章不獲隨例稱慶闕庭無任踴躍歡欣之
至

代賀皇太后生辰表

考厯占星氣應元英之候稱觴獻壽禮行長樂之宮凡在照臨
所同欣忭

中賀

恭以皇太后德符坤載位正母儀淵冲自平生知

慈惠本乎天縱彌成文考既隆逮下之風共養太姜益著思齊
之美內宣陰化日嗣徽音矧當孝治之朝猶崇慶誕之節鼓鐘
具舉環珮畢臻歡聲動於宮闈佳氣蟠於觀闕某繆通屬籍叨

守近藩匪惟宗族之同榮實與吏民而共慶

代賀明堂禮畢表

有司備物親嚴三歲之祠率土均恩實賴一人之慶照臨所逮

欣忭攸同

中賀

伏惟皇帝陛下道貫神明功參覆載昭哉嗣服繼

六聖之洪休大矣孝熙備三宮之至養擢英髦而共政革苛弊
以濟時庶事用康善祥斯應物無疵癘民不怨咨天地得以清
寧草木遂其零茂九功之德既皆可歌四海之臣亦各來祭乃
遵彝典爰盡孝思時以季秋之良日用上辛之吉始告虔於原
廟遂嚴配於合宮精意感通景貺昭荅大賚而兆人富肆眚而
眾心新實萬世無疆之休益千載不逢之會臣乍辭帷幄方守

藩垣徒欣右饗之成莫預駿奔之列瞻望闕庭云云

代賀皇太妃受冊表

臣某言伏審今月某日皇太妃於某殿受冊者史官揆日宗伯

陳儀舉令典於宮闈溢歡聲於方夏

賀中

恭以皇太妃挺生淑質

休應昌期贊陰化於椒塗嗣徽音於彤管晨昏共養之禮簡在
兩宮動靜謙肅之風形於六寢在先朝則有警戒相成之道於
聖主則有劬勞罔極之恩中外所瞻情文宜稱肆被冊書之美
爰昭位號之隆臣猥被瓜牙叨居藩屏不獲隨例稱慶闕庭無
任踴躍歡欣之至

辭史官表

竊以史屬之除聖朝所慎若非承父兄之教詔世守其言則必
積師友之淵源材克厥職臣於二者實無一堪聞命若驚撫躬
增懼重念臣少而愚賤長更屯奇積累歲時尙慮人情之未與
超踰涯分豈爲物議之所容以叢爾不勝任之材處灼然非所
居之地必招官謗上累恩私況儒館之中資任高於臣者不少
班行之內學術過於臣者甚多與其容菲薄以濫居不若擇英
豪而改授伏望聖慈追寢新命檢會臣近申三省除臣一外任
差遣

代蘄守謝上表

奉法明時方悔推行之誤分符近地俄蒙假貸之私祇荷寵恩

載深感涕伏念臣資材闇昧問學空疏遭逢昌辰叨竊劇任徒冀事功之立靡思罪釁之成昨以出按荆車兼程鹽課猥虞曠廢妄致勤勞屬吏承風不無過當小民競利豈免怨猶雖不待於人言卽行改正儻追論其事迹殆可誅夷敢祈造物之恩猶竊長人之任矧斬春之便郡實淮右之名區風氣和平獄訟稀少平時來者尙樂寬閒謫官居之眞爲僥倖此蓋伏遇太皇太后陛下惟天地之賜回日月之光黜陟不失其所宜輕重各當其所適察臣過舉止於四月之間許臣自新付以一州之寄念捐軀而莫報徒撫已以增慚復路迴車顧迷途其未遠輸肝剖膽庶報効之可圖

聯語流活
宛轉乃爾

代程給事乞致仕表

臣某言臣聞未老遽歸非臣子報君之義既衰猶仕豈儒生處
已之方惟去就適合其時乃進退不愆於禮輒陳悃悃仰瀆高
明臣誠惶誠恐頓首頓首伏念臣家本單微材猶綿薄早緣章
句聲律之末技偶中上科繼以簿書獄訟之微勞誤更劇任三
持使節八領郡麾以至承乏小行人之官備位大司農之屬山
川跋涉幾偏於五方日月推移殆踰於四紀遂叨蘭省之秩仍
忝祕殿之名每撫心而自循縱沒齒其焉報昨以蒙恩罷守被
旨歸班身雖寄於海隅夢已升於帝所非不知懷金結綬侍清
光而足榮佩玉鳴騶聯法從之爲幸但以風霜漸迫蒲柳遽衰

爰及上印之期。當批乞骸之懇。日莫途遠。顧已分之。非安漏盡。鍾鳴。亦人言之可畏。伏惟皇帝陛下。恢覆載之量。廓照臨之明。憐其實知止而請身。察其非偷安而避事。俾還官政。獲反里閭。況臣北陌東阡。雅多遊舊。左食右粥。良給歲時。是以誦歌真主之稀逢。盛述聖朝之難遇。馬方羸老。徒結戀於軒墀。木已朽枯。或能蒸於芝菌。臣不任祈天俟命。激切屏營之至。

代王承事乞回授一官表

臣聞緹縈納身贖父。文帝因之變法。王縉削爵請兄。肅宗爲之推恩。夫漢唐之主。豈欲撓不刊之典。而詭從女子輔臣之意哉。蓋以子弟之願獲伸。則孝悌之風寢廣。天下忠順之俗。於是乎

始成。故不以所輕廢所重也。恭惟陛下神聖功德參並天地。固非漢唐之主所能擬倫。臣雖愚陋。不敢自比於王縉。然生遇休明。名列仕版。不猶愈於緹紫之女子乎。輒冒死亡。斧鉞之誅。瀝血陳誠。上干天聽。惟陛下賜察哀憐。不勝大願。切念臣父昨於元豐四年得罪。蒙朝廷放歸田里。逮今已及四年矣。初出於特旨。有司旣無敘法可舉。而中外臣寮。又以臣伯父待罪宰相。懷避嫌疑。莫敢言者。臣伏覩陛下近以功成治定。因時制作。建列聖之廟。而申以大需正百官之制。而授以新書。其遠至於亡沒之裔。尙被甄收。其微至於胥史皂隸之能。猶得自効。和氣旣洽。頌聲並作。符貺屢至。年穀胥熟。此所謂千載一時不可逢之嘉

會而臣父獨嬰罪釁流寓江海天高日遠自新無路臣誠私心痛之臣昨自元豐元年蒙恩授大理評事繼奉新制改承事郎逮及七年未曾磨勘臣願以合轉宣義郎一官同授臣父乞賜敘用伏望陛下推覆載之恩生骨肉之惠惻然憐之特垂愈允況陛下自臨御以來坐法之人未嘗終棄爲親之請多所願從竊以近事言之王安國自著作佐郎放歸田里比踰暮年起承大理鄧忠臣以宣德一官爲母求封奏書旣上得邑壽昌以臣父方之安國則四年之廢久於暮年以臣比之忠臣則爲父之請重於爲母若獲遠繼緹縈王縉之事近依安國忠臣之例使臣父復得齒於士大夫之列則臣雖身先犬馬填委溝壑無所

復恨臣無任瞻天望聖激切屏營之至

淮海集卷二十六終

淮海集卷二十七

表

代謝勅書獎諭表

臣某言今日進奏院遞到勅書一道伏蒙聖恩以臣云云特
賜獎諭者捕翦兇徒蓋守臣之常職降頒溫詔實聖世之異恩
祇服寵靈重增愧懼中伏念臣凜材繇薄受性顛愚因緣肺腑
之親昧冒藩宣之寄浩穰十邑每懷曠敗之虞僂俛再期敢起
覲覲之望憶昨凶年乏食狂盜干誅初鼠竊於村墟俄鴟張於
道路殺傷吏卒攘奪印章居民以此震驚列郡爲之騷動至煩
廟諭申命使車輟悍將於山東募驍兵於隴右尙且遊魂疆場

假息朝昏臣志欲埽除日思方略忽知囊橐之處近在掌股之間竊以爲稽討蕩則桂萼而蜂屯待會合則張皇而烏散遂令募吏譖引將兵從閒道以兼行指孤巢而突擊渠魁格鬪既就殲夷餘黨散亡尋皆殄滅臣旣不能如子賤任德使民不忍欺又不能如龔遂卻兵致盜亦皆罷仰慙睿化方虞黜責之嚴豈謂宸音遽有旌嘉之寵此蓋伏遇皇帝陛下聖仁天覆盛德海涵欲庶職之咸修雖微勞其必錄是致鋸刀之割亦膺袞字之褒臣敢不効螢燭之光竭犬馬之力誓糜捐於軀命期補報於恩私臣無任

代謝加勳封表

宗祀以配上帝盛禮載陳大封而錫善人彝章具舉寵靈誤逮

媿懼交深

中謝

伏念臣學術本迂器能素拙徒屬休明之運獲參

英俊之遊發金匱石室之藏討論何補承神州赤縣之乏瘝曠
偶逃晚自喉舌之司亟更管轄之任辱甄收之已過知報稱之
尤難比出近藩猶通祕籍會考我將之頌頗稽公王之圖路寢
爰開總章斯寓涓季秋而精享肅羣后以駿奔熙事備成既盡
情文之典湛恩汪濊遂周中外之臣曾是孤蹤亦膺殊祉崇勳
遽進眞食驟增奉綸綍以凌兢仰雲天而隕越此蓋伏遇皇帝
陛下天仁丕冒海德包涵尙記蠢愚嘗陪於國論更憐衰晚方
守於郡章俾異數之併加示純禧之均畀甘泉緬邈難望屬車

之塵清都邃嚴徒夢鈞天之奏。

代賀元會表

十三月爲正前既稽於夏道二千石上壽仍參用於漢儀盛旦
載逢彝章具舉中賀伏惟皇帝陛下財成天地參並神明命義和
之二官謹春秋之五始調和元氣撫御中區肆屬春之朝肇
修元會之禮雞人呼旦庭燎有光外則虎賁羽林嚴宿衛之列
內則謁者御史肅班行之容漏未盡而車輅陳蹕旣鳴而鼓鐘
作應龍高舉雲氣畢從北極上臨星宿咸拱受四海之圖籍拜
萬國之衣冠歲月日時於焉先正聲明文物粲爾可觀邁康王
鄴宮之朝揜高帝長樂之事謦頌聲而並作鬱協氣以橫流臣

比遠天光遠更年籥職拘藩國莫瞻龍袞之升心折宸居但想
獸樽之列瞻望闕庭云

云

代工部文侍郎謝表

入司太僕已慚稱效之虛進貳冬官尤愧選掄之誤顧叨塵之
已甚念辭避之弗容承命惟驚撫躬以懼中謝伏念臣身承家訓
世受國恩荷先朝特達之知蒙二聖生成之賜左選都司之要
既獲備員內閣祕殿之嚴更容通籍以至外專兩郡內閱三卿
徒爲歲月之淹莫見事功之舉方虞罷黜退伏於田廬敢意推
遷遽陪於法從材微任過恩重報難此蓋伏遇盛德海涵至仁
天覆以臣父某歷四朝而被遇登三事以退居知父子至情欲

慰桑榆之景、念君臣難遇、遂收菅蒯之才、豈惟一敝族之榮時、乃百執事之勸、臣敢不鞭策駑蹇、淬礪鈍頑、以捐軀報國之誠、爲竭力事親之義、

代中書舍人謝表

孫君孚

臣某言、伏奉制命、除臣中書舍人、仍改賜章服者、蒙恩承乏、方懷曠職之憂、拜命爲眞、更竊非才之愧、寵榮遽逮、驚懼交增、伏以三省之興、實先朝之盛典、西禁之任、猶當代之要津、上潤色於訓詞、下稽參於政理、自非文章妙絕、可先諸子之鳴、吏術精通、能最羣工之課、則何以當文士之極、任備宰相之屬、官如臣者、地胄素寒、資材猶戇、以童子雕蟲之技、偶得科名、用司空城

旦之書嘗更州縣比從柱後擢立螭頭閱歲月之推移之毫分之稱効惟虞罷斥歸耕寂寞之濱豈謂遭逢入直禁嚴之地光增末路望過初心此蓋伏遇皇帝陛下在宥中區統和元氣上則承周太姒求賢之意下則納召康公用士之言耆老畢歸俊英咸事鑄鄒滿庫未忘一割之鋌刀騅駼成羣不棄十駕之駑馬遂令拔擢爰及鈍頑臣敢不敬佩德音恪居官守竭心思之逮及効耳目之間知經宿進碑敢效矜夸於近世累年無草願希愼密於前人臣無任感天荷聖激切屏營之至

代中書舍人謝上表

左螭清近顏無咫尺之違右掖峻嚴言有絲綸之出皆一時之

妙選爲四海之聳觀承命震驚撫躬愧懼伏念臣搢紳末胄淮海孤生弓必爲箕嘗奉父兄之教柄不量鑿莫爲姻黨之容自亦笑其闊迂人或憐其狂直分甘常調望絕顯途屬二聖之載營收羣英而自助巍然大老皆歸圖任之中葢爾小才亦備兼收之數越從戎幕擢預憲臺猥陳狂瞽之言屢瀆高明之聽間嘗罷去旋復召還惟是七年之間遂叨兩制之列而況訓詞之任政教所原除授不當者得以論而封還指麾或隱者得以白而改正號爲要地當慎選掄豈伊鄙人所能堪克此葢伏遇太皇太后德配任姒道稽唐虞用機以濟大川斷鼇而立四極雖節儉正直在位若羔羊之時而思念憂勤進賢如卷耳之際致

令頑鈍誤辱寵靈臣敢不慎出王言審求國體非特修異日祖
宗之事亦以信平生師友之謀報德未期悵念歲時之晚捐軀
有處敢懷家室之私

代南京請上表

訓詞失當宜正嚴誅恩貸特優止從外補任忝別都之重職叨
祕殿之華祇荷寵靈載深感涕伏念臣猥以一介之賤誤蒙二
聖之知本出書生朝無黨援屢爲御史身有怨仇閒雖竊於科
名實不長於文字因緣寵數冒昧班聯旣不能被命固辭以防
涯分之過又不能先時引去以避賢俊之升滿器難持孤根易
毀及越樽而求治果代斲以致傷然猶冒文儒筭翰之名玷侍

從均勞之地省循備至。僥倖實多。此蓋盛德海涵至仁天覆念
嘗更於任使遽未忍於棄捐。雖去掖廷猶分宮鑰。天都甚邇常
瞻佳氣之鬱蔥。鄉國非遙益見湛恩之汪濊。永期糜潰用報生
成。

代中書舍人謝上表

方爲左史注二聖之起居。遽入西臺命百官之進退。顧叨塵之
已甚。念辭避之莫容。仰對寵靈伏深震懼。竊以周分內史出王
命之策書。漢列從官參相臣之辨論。後世放其遺意制此近班
職分四禁之嚴事。押六曹之重。必得或遲或速。文兼枚馬之長
知古知今。學擅高崔之富。然後可以與紫薇之進。畫贊黃閣之

調和如臣者門地素寒資才猶贛早更州縣奉司空城旦之書
晚玷班聯任柱下惠文之事初無補報祇取怨猶身投韁鎖之
中足寄風波之上惟虞罷斥復奔走於東西豈意推遷備論思
於朝夕光增末路望過初心此蓋伏過

闕文

代謝厯日表

被命守藩方念闕庭之遠蒙恩告朔重驚歲月之新仰服訓詞
俯增愧汗伏惟欽崇天道敬授人時頒太史之占前謹清臺之
課候罷諸家之疏遠正厯世之繆差上考鄧平法取黃鍾之妙
下參一行術推大衍之微斗建龍躔於焉有序珠聯璧合由是
可窺豈惟百辟之奉行足使四夷之承用臣猥緣寄委叨奉寵

靈宣布詔條預識金穰之歲。省觀風俗。不疑絳老之年。

淮海集卷二十八

啓

謝及第啓

光靈遽被愧幸特深竊以聖神臨御之初實惟祖宗熙洽之後
戈兵收偃經藝著明風俗莫榮於爲儒材能咸恥乎末仕園冠
方屨求自試者幾千萬焉血指汗顏獲見收者纔四百耳旣甚
嚴其程度宜盡得於豪英如某者淮海孤生衣冠末系志在流
水嘗辱子期之知困於鹽車頗爲伯樂之顧徒以爲養而求仕
故雖被黜以忘慙懲於羹者吹鑿自知其妄不量鑿而正柄人
指爲狂豈意力田而逢年亦稱長袖而善舞大羹焉用以貴本

而不遺。昌歆甚微緣嗜，偏而見取。方賢書之上，獻俄吏議之旁。連竊鈇，致疑事非在我。解驂見贖，世鮮其人。尙賴平反，卒蒙昭雪。折劍旣以重鑄，死灰因而復燃。究其倚伏之難常，益信窮通之有定。屬皇明之繼照，推睿澤以橫流。特免試言，徑躋仕版。技能莫效，初如不戰而屈人。名宦亟成，更類無功而受祿。退而省察，殆有夤緣。此蓋伏遇某官誘進人材，主張士類，離奇蟠木，素爲左右之先。璀璨餘光，復自比鄰之借。致茲寒陋，亦預採收。敢不愼操修之方，明出處之致。庶期末路獲報，明恩過此以還。未知所措。

賀呂相公啓

伏審光膺宸命顯正台司凡在生成舉同并蹈竊以媯皇補天
之際高宗夢帝之初未就泥金正資陶鑄不調琴瑟方賴更張
是謂大有爲之時必得非常人之佐恭惟中書僕射相公累朝
元老當世大儒力足以扶持顛危風足以興起貪懦青天白日
奴隸亦知其明璞玉渾金鑒識莫名其器既天資之篤實加地
胄以高華四世五公勲在王室一門萬石寵冠廷臣宗族謂之
小許公夷狄以爲真漢相果從人望爰享天心方司左轄之嚴
遽踐鸞臺之峻獻可替否而思矯激之過解紛挫銳而有調和
之能必欲成仁之始終非特潔身之去就繇是端人全集異黨
寢微寬大之澤四覃苛刻之風一變名旣得功而竝立位當與

詩話典故

德而俱崇。明詔始班。吉士交慶。太公入國。固知天下之父。歸伊尹。得君益見聖人之任重。某猥緣幸會。叨被題評。昔陪北海之樽。有同夢寐。今望平津之館。如隔雲天。但欣眾正之路開。始信太平之責塞。願稽故事。就封富民之侯。請與諸生。復上得賢之頌。

賀蘇禮部啓

伏審光膺睿命。八拜儀曹。凡有識知。所同欣忭。竊以大儒之出處。實爲當世之重輕。三仁去而商寢微。二老歸而周始大。長孺仕漢。諸侯寢謀。中立相唐。列藩聽命。殆亦天時之有數。豈伊人力之能爲。伏惟禮部郎中先生。道貫神明。智周事物。決科射策。

亟聞董相之風逆指犯顏屢奪史魚之節周旋臺閣而風采可畏流落江湖而容貌不枯蓋好仁無以尙之故特立有如此者斯文未喪果蒙日月之照臨吾道將興更屬風雲之盛會旣補郡守俄遷侍郎雖未厭於人情漸當陪於國論昔神龍失水幾爲螻蟻之所侵今猛虎在山將見藜藿之不採某久操笈簞獲侍門牆歎刻鵠之未成念攀鴻而何敢聞之不寐知告於人覲見曰消頗動雪雲之態屢成相賀獨申燕雀之私

賀中書蘇舍人啓

光膺中詔進直西垣伏惟慶慰恭以某官當世大儒斯民先覺論議爲四海之輕重出處繫一時之安危蕭夫子之文章蠻夷

亦慕張使君之威望。草木猶知。始從記注之嚴。爰掌絲綸之重。姦邪聞命。投匕筋以自驚。忠義承風。引壺觴而相慶。某猥緣幸會。謬接光儀。昔者先生嘗蒙論次。茲焉伯氏又獲追攀。竊聞進拜之崇。倍切欣愉之至。

謝程公闢啓

某啓。比緣省覲。薄游句踐之都。獲執埽除。叨預老聃之役。辱品題之。已過慚報効之。何從伏念。某少也妄庸。長而屯賤。柄方乖鑿。人指爲狂。鉤直失魚。自知其拙。碌碌抱簣中之恥。棲棲銜跨下之羞。不謂修撰給事。誤賜采詩。曲加推轂。引置金臺之館。俾參珠履之游。蕭灑蘭亭。嘗繼孫王。而奉筆風流。蓮社屢陪。劉阮。

以焚香。既令馮子而出。與仍爲穆生而設醴。至於升將軍之故第。泛賓客之舊湖。與與天橫。情隨水遠。牙檣錦纜。擁南國之佳人。玉罍金罍。醉西園之清夜。往來乎十洲三島之上。俯仰乎千巖萬壑之間。曾微瓊玉以報刀。祇枉明珠而彈雀。從游八月。大爲北客之美談。酬唱百篇。永作東吳之盛事。退而省察。何以堪勝。血指汗顏。徒爲今日輸肝剖膽。期在異時。庶追王國之風。少盡門人之禮。

謝館職啓

法同博士。閱五載而遷官。例比編書。通三年而改秩。寵靈旣逮。愧懼實深。伏念某。族系單微。器能淺陋。少時好賦。僅成童子之

雕蟲中歲窮經未究古人之糟粕始策名於進士俄充賦於直
言濫居方物之前叨被傳車之召文章末技固非道義之尊箕
斗虛名祇取謗傷之速亟從引避幾至顛隳褒未就於袞華惡
已成於瘡痍三期之內王尊乍佞而乍賢七年之中魯田一與
而一奪但以偏親垂老生計屢空聊復覲顏以居未能投劾而
去日期沙汰分絕進升豈期積日以累勞輒亦逢年而遇合束
縵還婦雖蒙假借之私懲羹吹虀尙慮譴訶之及竊觀前史具
見鄙宗西蜀中郎孔明呼爲學士東海釣客建封任以校書雖
爲將相之品題實匪朝廷之選用夫何寡陋遽有遭逢此蓋伏
遇某官道欲濟時仁能錫類始憐貧女稍分秦璧之光終念播

臣爲激越江之水矧茲奇蹇亦與甄收敢不以古人行已之方爲國士報君之義千金弊帚聊依翰墨以自娛一割鉛刀或冀事功之可立過此以往未知所裁

賀崔學士啓

伏審顯膺明命榮領近藩凡在庇庥所同欣并恭以知府學士妙知德輿精契道真斥百氏之奇偏傳七師之要妙著於書者乃其糟粕見乎業者亦其緒餘卽之如渾金璞玉而難名望之如高山深林而莫測作歌而去陋晁董之不爲應聘而興指罍夔而自許旣參璧水之直俄預道山之遊八則陪國論於五房出則督工徒於二監世推前輩地號要津然而了不器於盈虛

澹無心於舒卷願奉二年之最固辭五兵之曹邸音播騰士論
聳歎矧汝南之奧壤爲右輔之名區僊聖所棲英豪斯聚競欲
識先生之杖屨匪徒瞻太守之旂旂昔誦高辭極大行之表裏
行觀美化遍汝水之陰陽尙疑未駕於征輶固已召還於法從
某謬聯服役叨預婚姻顧罪悔之方虞幸依歸之遽獲軍逢峻
阪空嗟兩耳之垂船在中流實有一壺之望

代賀呂司空啓

伏審光膺顯命正位公台伏惟慶慰恭以司空相公學師古始
道造淵微以一代之人英爲四朝之國老允迪厥德克世其家
言乎時則韋平豈可分道而行論其事則袁楊安得同日而語

年高德邵而臣節益峻功成名遂而帝眷愈隆進拜冬官非止
居四民而時地利平章國論實惟有一德以享天心聖王之文
章具焉天下之能事畢矣某叨分符節辱在陶鎔陪班謁以無
緣第承風而竊抃

代賀中書僕射范相公啓

伏審光奉明恩進陞右弼伏惟慶慰恭以中書僕射相公器兼
文武學備天人出處繫一時之安危議論爲四海之輕重臨大
節而不奪雖小善其必爲荀氏羣龍茲明爲最河東諸鳳伯褒
尤奇投閑散而聞望愈隆陟憂患而精誠益壯果濟世美簡在
上心昔執鴻樞旣致干戈之戢今居端揆何難禮樂之興坦然

眾正之路開行矣太平之責塞某叨分符節

云云

代賀門下孫侍郎啓

伏審光奉明恩進陞東省伏惟慶慰恭以門下侍郎星躔異稟
嶽鎮殊鍾先朝藩邸之舊臣今日廟堂之耆老正直如羔羊之
德信厚有麟趾之風解劇樞庭乃心不怠均勞輔郡報政斯成
民心竚以旋歸國論倚之進斷粵從琳館入踐鸞臺薄夫撫已
以自慙吉士舉酒而相慶矧同升之俊又皆妙選於搢紳三王
之法本人情固無過舉六官之長皆民譽茲謂昌期其辱在陶
鈞叨分符節第承風而竊并念稱慶以無緣

代賀中書劉侍郎啓

伏審光奉明恩進深西省伏惟慶慰恭以中書侍郎智周事變
道本誠明語默不愆其時進退必度於禮雪霜旣降知松柏之
後凋鳥雀或鳴見鷹鷂之必擊君未比隆於二帝我則若撻於
市朝民有失所之一夫我則如擠於溝壑大任旣降英聲益飛
豈止邦家之光實爲天地之紀逮茲進拜尤慰具瞻廉陞難躋
益致高堂之峻股肱克壯重增元首之尊某辱在陶鈞

云云

淮海集卷二十八終

淮海集卷二十九

啓

代賀王左丞啓

伏審光奉明恩進升左轄伏惟慶慰恭以左丞太中夙鍾閒氣
早擅英聲學窮游夏之淵源文列班楊之伯仲周旋不撓出處
可觀共推天下之中庸自得賢人之簡易其退也如陂萬頃撓
不濁而澄不清其進之若火一然用彌明而宿彌壯大任斯降
貴名益昭曉達吏方戴胄旋更於二轄潤飾儒術平津卽至於

三公某辱在陶鈞

云云

代賀胡右丞啓

伏審光奉明恩進升右轄伏惟慶慰恭以右丞太中抱英傑之
器屬休明之期智無不照而御之以寬學無不窺而守之以約
待時藏器未嘗枉尺而直尋肆筆成書惟欲作雕而復朴風采
凜乎其可畏議論坦然而易行俄鑿柄之相投遽囊錐之穎出
擢丞御史人無間言進轄文昌朝有故事面折廷爭已聞國士
之風內平外成行見大儒之效某叨分符節

云

代賀京西運判啓

伏審光奉睿恩榮分漕計恭惟慶慰恭以運判道師古始識造
淵微身兼數器而用之以時學備諸家而守之以約討論不乏
嘗編簡以成圖俯仰無心任摘山之變法屢奉三年之最亟更

一道之權舉屬吏以傾心於前旌之入境矧是右輔實惟奧區
南則控引於荆揚西則轉輸於秦雍奉嚴陵寢備繕河防於措
置以爲難在選掄而尤重登車攬轡初承使者之風結綬懷金
行被從官之召

賀京西運使啓

伏審光奉宸恩榮分漕計伏惟慶慰恭惟運使知周事變識照
幽微挺忠鯁之一心兼縱橫之數器英標特出早膺神聖之知
劇任屢更果見事功之立比繇太府來領外臺回卿月之餘光
動使星之異色邸音初播屬部增欣蹔駕輕輶坐使邦財之阜
佇歸法從進謀王體之嚴

代賀簽書趙樞密啓

伏審光膺睿命進貳鴻樞伏惟慶慰恭以樞密太中器猷宏博
學術精微敏識照於未然奇節見於已試犯顏逆旨屢輸汲黯
之忠別嫌明疑力折董宏之妄進退周旋而可度艱難險阻而
不渝俄被召以旋歸遽千霄而直上粵自卿曹之貳進陪樞筦
之崇邸音播騰士論欣快亟聞趙武越四等以將上軍行見千
秋以一言而取宰相某叨分符節云

代賀蔡相公啓

光膺制書榮還內殿伏惟慶慰恭以判府觀文相公道貫精微
智周事變以文章擅一時之舉以器業結萬乘之知姚元崇入

贊鴻鈞初聞遠略霍子孟建承顧命益見忠謀勳業顯隆夷夏
歡頌惟三郡均勞之久當二聖圖舊之勤既奉綸言復青氎之
舊物竚瞻繡袞反黃閣之故居某猥辱異知欣承嘉命屬繆分
於符竹阻祇慶於門闥系頌實深敷宣罔旣

代賀司馬相公啓

顯奉明恩進陞上宰老成登用區夏均驩竊以大河之渾持寸
膠不能以止積歲之旱待霖雨然後乃蘇故當大有爲之時必
得非常人之輔伏惟相公望隆一代節著四朝力足以扶持顛
危風足以興起貪懦青天白日奴隸亦知其明璞玉渾金鑒識
莫名其器果符物論克享天心伊尹得君恥一物之失所姚崇

作相陳十事而後爲姦邪失七箸而自驚忠義引壺觴而相慶
某夙叨記省方預陶甄欣眾正之路開信太平之責塞願稽故
事就封富民之侯請與諸生更上得賢之頌

代賀胡右丞知陳州啓

均逸中臺承流右輔地接王畿之重職兼禁殿之華凡在底庥
所同欣忭恭以某人智周事變道本神明學窮游夏之淵源文
列傳班之伯仲霜雪旣至知松柏之後彫烏雀或鳴見鷹鷂之
必擊旣承御史遂轄文昌語默惟時獨任天下之事卷舒以道
有古大臣之風邸音播騰士類聳歎矧是淮陽之郡實惟太昊
之墟風氣和平獄訟稀少屈英游而臥治俟惠政之立成騰實

飛聲已用半千之用貪元經體竚歸尺五之天某夙以單微嘗
蒙題品念使旌之在望嗟吏役之攸拘

賀錢學士啓

被渥帝宸升華儒館伏惟慶慰恭以學士天資英發地習高嚴
翻然鵠止於碧梧卓爾珠遺於滄海申之以聞見之洽重之以
探討之精咸五登三出屬休明之運駢四儷六尤多絕妙之詞
敏疾擅枚舉之風雅健得子長之體倚馬可待下筆不休所以
特受眷於先朝屢見稱於元老矧冊府校讐之號洎刑曹勾稽
之司惟實與名旣清且要熊掌兼魚膾之美自古爲難羔裘加
豹飾之華於今蓋寡緬彼文學之貴見乎諸吏之中雖出異恩

實繇公議芸臺畫省諒難歲月之淹黿禁掖垣行復風雲之會

代賀提刑啟

光奉宸恩就持憲節伏惟慶慰恭以提刑器識深宏材猷敏邵
進退必度於義夷險不易其誠程輦轂之工徒亟聞善狀督江
湖之治鑄益著能聲既累效於事功肆就分於使指矧茲右輔
實號要區士林承命以欣愉屬部望風而悚跂傳車夙駕暫煩
僕御之勞法從進聯諒非歲月之久

代回胡右丞年節啟

天端肇正人統全生實萬類引達之期乃四序調和之始恭以
某官受時閒氣爲國寶臣天資英發而持之以謙地胄高華而

守之以約履茲獻歲茂擁休祥治譽藹聞已備賜環之寵恩靈
下逮行膺錫馬之蕃頌願之私敷宣罔旣

代回呂吏部啓

密室飛灰見陽生於本律清臺課候知日起於初躔恭惟某官
望重本朝材高當世一時千載韋平之遇已稀四世五公袁楊
之興未艾旣承召節仍屬嘉辰宜戢穀之駢臻願言而何旣
代謝中書舍人啓

一時承乏方慙越俎以代庖數月爲眞更愧操刀而製錦才微
任過恩重報艱切以三省之興實先朝之盛典四禁之任尤當
代之要津上則潤色於典謨訓誥誓命之文下則稽參於吏戶

禮兵刑工之事自非詞章妙絕吏術精通何以特被選揚預從
班於仗內遂叨任使專外制於筆端如某者少也鈍頑長而屯
賤請鄰祭竈聊爲寄食之資賣劍買牛行作歸耕之計豈意千
齡之會誤蒙二聖之知猥從冗員屬居言責雖奮身不顧頗摧
當路之豪彊而燭理未明莫正本朝之缺失日求罷退聊避謗
譏忽叨左史之除俄冒西垣之選曾非踴躍治金偶就於莫耶
惟是青黃溝木遂成於犧象此蓋伏遇某官道師古始識造麓
微成就人才爲今天下之計主張善類有古名臣之風肆令衰
病之餘獲預禁嚴之列某敢不溫尋舊學激勵晚途作漢文章
何敢望相如之輩正唐鹽法庶幾爲處厚之徒過此以還未知

所措

代賀運使啓

伏審光奉制函榮分漕計伏惟慶慰恭以運使郎中器猷宏敏
道術精微資之以問學之優侈之以聞見之博持綱憲府風聲
豈畏於悍彊贊治天官冰鑑無私於微眇惟茲右輔實號奧區
祿廩兵食之資異時或屈陵寢河防之費他路所無肆輟名郎
出爲膚使符檄未加於一道威名已肅於列城外幹邦財頗鬱
搢紳之論進謀王體諒非歲月之淹

代賀提刑落權發遣字啓

榮膺睿旨寵進華資伏惟慶慰恭以提刑風猷妙敏襟韻疏明

智無不燭而待之以寬謀無不周而斷之以必傑出名臣之後
謫居庸使之前持節陝關倉廩於焉充實按刑淮海囹圄爲之
虛空屬右輔之浩繁屈高材而刺舉旣被賜環之寵仍蒙增秩
之榮詔音播騰士論欣快嵩山汝水旣久滯於星軺金馬玉堂
佇歸聯於法從

謝胡晉侯啓

伏審光奉明恩寵登上第伏惟慶慰恭以深恩先輩器猷閎博
問學淵源挺生旌表之門優入英雄之彀臂折惟久終號良醫
璞獻者三竟爲美瑞雖遭迴之可歎建遭際以尤榮如觀者昔
陪絳帳之生近被棘闈之屬兒寬早歲嘗爲褚大之徒夢得晚

年翻作奇章之客矧惟季弟又獲同年交情既重於他人喜氣亦殊於他日追惟二紀有同夢寐之遊復會一時如閱簡編之事未修鄙牘遽辱華緘感佩之私數陳罔旣

代參寥與鍾公實啓

伏承較藝數奇獻書遇合起家戎幕受職儒宮榮動一時寵踰三舍伏惟歡慶竊以文高徐樂才瞻馬周性理內融事機旁照扣角負鼎無羨昔人轉海回天復聞今日某夙親談讌猥與從游覩此盛隆竊深欣忭

淮海集卷二十九終

淮海集卷三十

簡

答傅彬老簡

彬老足下昨奉手教所以慰誨甚勤并蒙錄示寄蘇登州書并題眉山集後尊賢善道發於誠心詞旨清婉近世所希見也發函展讀殆不能釋手欽想高風益增企系屢迫賤事修報後時悚愧何已然僕昧陋不能具曉盛意中間有未然處輒爲左右具言之惟閣下恕其僭易幸甚幸甚閣下謂蜀之錦綺妙絕天下蘇氏蜀人其於組麗也獨得之於天故其文章如錦綺焉其說信美矣然非所以稱蘇氏也蘇氏之道最深於性命自得之

際其次則器足以任重識足以致遠至於議論文章乃其與世周旋至粗者也閣下論蘇氏而其說止於文章意欲尊蘇氏適卑之耳閣下又謂三蘇之中所願學者登州爲最優于此尤非也老蘇先生僕不及識其人今中書補闕二公則僕嘗身事之矣中書之道如日月星辰經緯天地有生之類皆知仰其高明補闕則不然其道如元氣行於混沌之中萬物由之而不知也故中書嘗自謂吾不及子由僕竊以爲知言閣下試羸數月之糧謁二公於京師不然取其所著之書熟讀而精思之以想見其人然後知吾言之不謬也文翁哀詞杼思久矣重蒙示諭尤增感愴時氣尙熱未及晤見千萬順時自愛因風無惜以書見

及幸甚

與蘇公先生簡

某頓首再拜知府學士先生比參寥至奉十二月十二日所賜
教慰誨勤至殆如服役把玩彌日如晤玉音釋然不知窮困憔悴
之去也卽日伏惟尊候動止萬福某鄙陋不能脂韋婉變乖
世俗之所好比迫於衣食彊勉萬一之遇而寸長尺短各有所
施鑿圓柄方卒以不合親戚游舊無不憫其愚而笑之此亦理
之必然無足歎者但以再世偏親皆垂白而田園之入殆不足
奉裘褐供饘粥犬馬之情不能無悒悒爾然亦命也又將奚尤
惟先生不棄而時賜之以書使有以自慰幸甚幸甚窮冬末由

侍坐伏乞爲國自重下慰輿情不宣某頓首再拜

同前

頃蒙不閒鄙陋令賦黃樓自度不足以發揚壯觀之萬一旦迫於科舉以故承命經營彌久不獻比緣杜門多暇念嘉命不可以虛辱輒冒不韙撰成繕寫呈上詞意蕪迫無足觀覽比之途歌野語解顏一笑可也又多不詳被水時事恐有謬誤并太鄙惡處皆室就垂改竄庶幾觀者不至詆訶以重門下之辱素紙一軸敢冀醉後揮掃近文并芙蓉城詩時得把玩以慰馳情幸甚幸甚

同前

某頓首昨所遣人還奉所賜詩書伏蒙獎與過當固非不肖之迹所能當也愧畏北辰伏惟尊候萬福某比侍親如故做廬數閒足以庇風雨薄田百畝雖不能盡充饘粥絲麻若無橫事亦可給十七家貧素無書而親戚時肯見借亦足諷誦深居簡出幾不與世人相通老母家人見其如此又得先生所賜詩書稱借過當副之藥物亦可以湔所敗辱爲不朽矣參寥時一見過他客旣以奔軍見棄又不與之往還因此遂絕頗得專意讀書學作文字性雖甚愚戇亦時有所發明差勝前時汨汨中也懋誠集引尋已付邵君刻石畢寄上次黃樓賦比以重違尊命率然爲之不意過有愛憐將刻之石又得南都著作所賦但深媿

畏也文與可學士尙未至如過此當同參寥往見矣春初未侍坐閒伏乞保衛尊重下慰惓惓不宣某再拜

同前

某頓首再拜去冬伏奉所賜教旋又李獻甫過此甚得興居之詳欣慰何可勝言尋欲上狀而區區之情欲布於左右者一日復一日人事無閒斷而自春以來尤復擾擾家叔自會稽得替便道取疾入京改官令某侍大父還高郵又安厝亡孀靈柩在揚州且買地趁今冬舉葬入夏又爲諸弟輩學時文應舉而家叔至今雖已改官尙滯京師未還老幼夏閒多疾病更遇歲饑聚族四十口食不足終日忽忽無聊賴本欲作書詳道至今不

果甚可笑也想公當悉此意矣卽日初寒伏惟尊侯萬福前得
所賜書承用道家方士之言自冬至後屏去人事室居四十九
日乃出又李漕傳到城都大慈寶藏記文誦書讀記想見公超
然逸舉於形骸埃壒之外雖欲從之不可得也辱誨諭且令勉
彊科舉如某者實無所有豈敢求異於時但長年頗慙爲兒女
子所嗤笑耳得公書重以親老之命頗自摧折不復如向來簡
慢盡取今人所謂時文者讀之意謂亦不甚難及試就其體作
數首輒有見推可者因以應書遂亦蒙見錄今復加工如求應
舉時矣但恐南省所取又不同儻只如此恐十有一二可得也
前寄呈亂道繼亦作得十數篇未敢附上子駿以公言顧遇甚

厚嘗令作楊州集序并辯才法師見囑作龍井記言師囑作雪齋記二記皆黃魯直爲書已刻成尙未寄到今且錄艸去因便卻乞并此書轉到高安先生處幸甚幸甚子駿以保任不當罷去莘老復固辭不來此亦是無聊一事也莘老云有兩書託公擇寄去不知曾有書去否渠云非求答但欲知達否爾昨過此不多日然相聚甚款未嘗無一日不數十次及公昆仲也雖不求楊州爲公作黃樓主人亦是吾黨中一段佳事某來歲東歸時庶幾到徐見之也黃魯直去年過此出所爲文尤非昔時所見其爲人亦稱是真所謂豪傑間出之士也但恨去速不得與之從容參寥在阿育王山璉老處極得所比亦有書來昨云已

斷吟詩聞說後來已復破戒矣某數日間便西行未緣侍坐伏
乞與時自重下慰瞻依不宣某再拜

與邵彥瞻簡

某頓首啓日月不相貸借奉違未幾已復清明緬惟還自諸邑
尊履勝常欽企欽企春色遂爾藹然艸木魚鳥各有佳意廣陵
多登陵之美臨風把盞所得故應不貲古語有之良辰美景賞
心樂事四者難并今又以風流從事從文章太守游淮海佳郡
豈不爲七難并得乎甚盛甚盛邑中少所還往杜門忽忽無以
自娛但支枕獨臥追惟舊游而已欲南去屬私故未能伺舟但
增引悵不宣某頓首

同前

頃蒙以集瑞圖序文見屬此固盛時之事前世詞臣墨客所頌
歎者不特爲南方之美君家之祥也不腆之文何以稱此然重
逆盛意又竊喜託名圖上以爲榮故不敢固辭輒撰次并揚州
集序寄呈中間尤惡處不惜指示就與改竄尤幸或要手寫可
先具素令畫史圖一本異時淶水堂中爲設清酒一樽芍藥數
枝可乘醉一揮也揚州集序雖鄙陋然頗能道廢興遷徙之詳
如無他文似不若寘之於前使觀者開卷便知作集之意也望
與史君議之仍得其集一觀幸甚幸甚

與孫莘老學士簡

某頓首司諫學士丈丈屢奉所賜教誨慰殷勤雖父兄之於子弟無以過此仰荷盛意不復勝言幸甚幸甚比日伏惟鎮撫餘暇尊候萬福某自入夏得中暑疾去之不時至秋遂大作伏枕餘月今雖少閒而疲頓非常氣息僅屬人事殆廢起居之間曠然不進於下塵職此之故前書聞姨婆縣君服藥甚久徐氏弟兄及妻子皆憂撓不知所爲近聞得僧法賓者調治已平可勝忻意南方險遠風氣固非人所安然丈丈行已二年北歸之期甚近更善調護數月卽達中州矣越州祖父得書甚安頃蒙教以先至會稽迎侍祖父還家家叔徑入都甚荷畱意已封所賜教取稟於越州矣蘇黃州雖不得書然昨蘇子由著作過此及

南來士大夫具云在黃甚能自處了不以遷謫介意日但杜門
蔬食誦經讀書而已昔之論者常患其才高太銳今日之事尤
足以成其盛德也前日辱齒及亂道誨喻尤詳某雖不肖請終
身誦之矣自越歸後頗無事幸不廢所學但久去門下聞見日
益昏塞雖復區區卒無所得耳詩文數篇謾錄呈左右因風更
乞指喻教育之賜幸甚幸甚

與黃魯直簡

某頓首奉違甚遽殊不盡所欲言者每覽焦尾弊帚兩編輒悵
然終日殆忘食事昔人千里命駕良有以也歲莫苦寒不審行
李已達何地奉惟榮養吉慶昨揚州所寄書中得次韻莘老斗

野亭詩殊妙絕來者雖有作不能過也及辱手寫龍井雪齋兩
記字畫尤清美殆非鄙文所當已寄錢塘僧募勒入石矣幸甚
幸甚比又得眞州所寄書及手寫樂府十月十二日泊江口篇
諷詠久之竊已得公江上之趣矣李端叔後公十數日遂過此
南如晉陵爲畱兩日斗野詩八音二十八舍歌并公所寄詩皆
和了今錄其副寄上所要子由金山詩并某所屬和者今奉寄
八音歌次韻斗野亭黃子理憶梅花詩凡四首亦隨以呈聊發
一笑耳皖口見公擇李六不知相從幾多時恨不同此集也餘
歲就畢杜門忽忽殊無佳意何時展晤以盡所懷未間願與時
自愛千萬千萬不宣某再拜

與蘇子由著作簡

某頓首再拜著作先生頃過南都幸一拜清重扁舟東下迫於
同行不獲款聽緒言以厭所願但增於悒耳比日苦寒伏惟尊
候動止萬福某受性庸昧與世異馳昨迫於衣食疆出應書僥
倖萬一之遇旣而擯棄乃理之當然無足道者顧親已老田園
之入殆不足以給朝夕之養犬馬之情不能無堙鬱耳此外亦
復何恨惟先生不棄時教之以書使無聊之中有以自慰幸甚
幸甚未緣侍坐伏乞爲國自頤以副輿願不宣

同前

某再拜不肖之迹雖復爲世所棄而杜門謝客頗得專意讀書

衡茅之下，有以自適。古語有之：蘭生幽宮，不爲莫服而不芳。某雖不敏，竊事斯語。但鄉閭士子，類皆從事新書，每有所疑，無從考訂。而先生長者，皆在千里之外。以此良悵悵耳。比因冬後，輒爲古詩一首，寄獻下執事，繕寫以呈。雖詞意鄙迫，不足以道盛德之萬一。然區區之慕望庶幾於此。少見之伏，惟少賜覽閱，幸甚幸甚。

與李德叟簡

某頓首。昨得遞中所寄書，甚慰馳仰。尋欲作報，會得傷寒疾，甚重，不食七八日，伏枕又踰月，乃平。遂因循至此。黃魯直去，必能道所以然也。歲莫苦寒，伏惟奉養吉慶。某去年除日，還自會稽。

鄉里交朋皆出仕宦所與游者無一二人杜門獨居日益寡陋
秋閒本欲一至黃州因過舒奉見不意遭此疾病遂不能遠去
親側頗負平時區區之意夫復何言別後所論者想甚多殊不
寄一二何也然觀所枉書詞翰妙絕足以知他皆準此矣仰服
仰服魯直過此爲畱兩日雖忽遽不盡所懷然有益於人多矣
其弊帚焦尾兩編文章高古邈然有二漢之風今時交游中以
文墨自業者未見其比所謂珠玉在傍覺人形穢信此言也未
緣展奉願與時自重慰此馳情十一月十五日不宣

與蘇黃州簡

某再拜白聞被旨入都遠近驚傳莫知所謂遂扁舟渡江比至

吳興見陳書記錢主簿具知本末之詳以先生之道仰不愧天
俯不忤人內不愧心某雖至愚亦知無足憂者但慮道途頓撼
起居飲食之失常是以西鄉憫憫有兒女子之懷殆不能自克
也比聞行李已達齊安燕居僧坊水飲蔬食有以自適然後私
所念慮一切俱亡且知平時有望於先生者爲不謬矣彼區區
所謂外物者又何足爲左右道哉本欲便至齊安屬久離侍下
未可遠適問道或在秋杪也惟親近藥餌方書以節宣和氣臨
紙於悒不盡所懷

與李樂天簡

某頓首昨在會稽游雖不數然誦盛文講高誼熟矣及還淮南

是一篇小
遊記

又得所寄書詞古而義高超。然有從我於寥廓之意。豈所謂有心相知者邪。幸甚幸甚。僕散漫可笑人也。去年如越省親。會主人見畱。辭不獲去。又貪此方山水勝絕。故淹畱至歲莫耳。非僕本意也。自還家來。比會稽時。人事差少。杜門卻掃。日以文史自娛。時復扁舟循邦溝而南。以適廣陵。泛九曲池。訪隋氏陳迹。入大明寺。飲蜀井。上平山堂。折歐陽文忠所種柳。而誦其所賦詩。爲之喟然以歎。遂登摘星寺。寺迷樓故址也。其地最高。金陵海門諸山。歷歷皆在履下。其覽眺所得佳處。不減會稽望海亭。但制度差小耳。僕每登此。竊心悲而樂之。人生豈有常所遇而自適。乃長得志也。以閣下趣尙高遠。非復今時舉子之比。得以發

其狂言他人聞之當絕倒矣未展晤閒與時自重不宣

與參寥大師簡

某頓首懶慢滋甚不奉問幾一年中閒屢蒙惠書賜責亦不加切參寥師真知我者也幸甚幸甚僕自去年還家人事擾擾所往還者惟黃子理子思家兄弟子思又已分居困於俗事彥瞻每行縣輒得數日從游此外但杜門塊處而已甚無佳興至秋得傷寒病甚重食不下咽者七日汗後月餘食粥畏風如見俗人事事俱廢皆緣此也比蒙錄示黃州書并跋尾幸甚觀其詞意憂患固未足以干其中愈令人畏服爾僕所題名此卻無本煩囑聽師寫一通相寄爲望仍并蘇公跋尾前所寄者已爲端

叔彊取去矣昨聞蘇就移滁州然未知實耗果然甚易謀見也
蓋此去滁纔三程公便可輟四明之游來此皆往瑯琊山水亦
不減雪竇天童之勝子由春間過此相從兩日僕送至南埭而
還後亦未嘗得書渠在楊州淹畱甚久時僕值寒食上冢故不
得往從之耳莘老壽安君竟不起子實遂丁憂遠方罹此禍故
殊可傷也傳師已聞作司農簿聲聞籍甚恐旦夕得一美除公
擇近亦得書說秋初嘗至湯泉到寄老庵見顯之恨不與吾儕
同此樂顯之恐十數日間來此爲十數日之會今已到天長矣
黃魯直近從此赴太和令來相訪爲畱兩日得渠新詩一編高
古妙絕吾屬未有其比僕頃不自揆妄欲與之後先而驅今乃

知不及遠甚其爲人亦放此蓋江南第一等人物也黃詩未有
力盡翻去且錄數篇嘗一嚮足知一鼎味也又爲僕手寫兩記
今封去如辯才無擇要入石便可用此摸勒僕自病起每把筆
如讎不知何謂得此公爲我書殊增氣也其字差瘦更爲潤色
開時令盡墨爲妙中間更未安及不是處但請就改之若開得
成囑二師各寄數本李端叔在楚音間不絕比如毘陵過此相
見極歡揚州太守鮮于大夫蜀人甚賢有文僕頗爲其延禮有
唱和詩數篇今錄一通去當一笑也頃聞公不作詩有一小詩
奉戲又已復破戒矣可謂熟處難忘也聰師有書來要字序僕
近日無好意思明年又應舉方欲就舉子學時文恐未有好言

語今但爲渠取字曰聞復蓋取楞嚴所謂聞復翳根除者也錢塘多文士可求人爲作不必須僕也蔡彥規已卒關中今歸葬山陽可傷朋友彫落如此獨有僕數人朴鈍落魄者無恙又多病少佳意人世良可悲耳何時合并以盡此懷不宣

淮海集卷三十一

文

謁先師文

惟公聖神所鑄號古哲人凜然高風聞者爲起諸生不敏承學累年依憑餘光以得名官時方尙德進爵旣崇祭重報先敢忘大賜祠以薄饌公其鑒之

祈晴文

凡物平爲福有餘爲禍雖陰陽之大猶不免焉乃季春以來雨澤不止漫溝壑漲川澮麥苗垂敗將弗克有秋是用禱于爾神惟神廟食此土當赫厥靈以福于民民亦將有以事神而不敢

解尚饗

祭馬通議文

惟公盛德之後克承厥先不激爲高不詭爲偏不見瑕疵器實
渾然踐更中外垂五十年長者之風四方是傳始使六路國用
充委旋帥二邊羌虜唯唯毫許江都下車風靡法度具存頌聲
未已我來此邦公適厭事杖履阡陌優游卒歲方期暇日從公
遊詣孰云奄然棄我而逝日月飄忽端如筭絃承凶未幾遽卜
新阡惟時淮海春御戒旋悲鳥號木愁雲蔽川念公此行無復
來還奠觴薦詞用訣終天尚饗

弔鏹鐘文

嘉魚縣傍湖中比歲大旱水皆就涸而夜常有光怪赫然屬天鄉人相與誌其處而掘之得古鐃鐘焉其形有兩欒如合兩瓦面左右九乳總三十六牙鼓鉦舞鐃衡旋幹之類考之不與禮合者無幾縣令施君識其寶謀獻之太常未果乃輸武昌庫中會其守解秩佐攝事見而惡之曰那得背時物畜之不祥也亟命投於兵器之冶嗚呼物之不幸有如是邪昔九江吏盜顏忠肅之碑材寘其所述歐陽詹聞而弔之以詞予悲夫鐃鐘古樂之器先王所以被功德而和人神審音之士至有振車鐸於空地而求之者非若九江碑材因人而貴也而辱於泥塗無所自效遇其非鑒以觸廢毀好古之士焉得默默而已乎乃作文以

弔之詞曰

嗚呼眾方之生，謬形殊器，更首迭尾，雌雄相廢，朝爲姜姬，夕爲
憔悴，或奇偶之相續，或九舛而一躋，清、餓、和、黜、刑、王、眇、貴、生、犢、
失明、得駿、折髀、洞所遇之參差，莽循環於一氣，傳曰黃鐘毀棄，
瓦缶雷鳴，余始以爲不然，今乃信之矣。嗚呼，罇鐘何世所爲質，
不呈剛形，不露奇，協律中度，渾如天資，掩抑雖久，不見瑕疵，爰
有兩轡，三十六乳，厥音琅然，小大隨叩，曷所挺之，環偉而偶，沈
於幽陋，尋泥塗之污漫，厭鱗鬣之腥臭，嗟筍簋之一辭，遽月絃
之幾設，幸陽愆而水涸，天日悅其復覲，謂庭貢之是充，獲效鳴
於金奏，何夜光之暗投，卒按劍而莫售，嗚呼，赤刀大訓，天球河

圖秦璽。漢劒。趙璧。隋珠。犍爲之磬。汾陰之鼎。曲阜之履。天澤之
弧。歷世相傳。以華國都。下至威斗錯刀。羯鼓之捲。破鏡缺符。遺
簪墮珥。信無益於經綸。猶見收於好事。是鐘也。郊廟所薦。樂之
紀綱。統和元氣。舞獸儀鳳。令大河而更清。使左角其不芒。變化
風俗。返乎義皇。而乃廢於深淵。出而遇毀。殆藻盤之不如矧牛
鐸之敢企。此義夫志士所爲疾心而切齒也。然余聞之。陰精之
純。燥氣之裔。雖從火革。其質不變。一晦一明。昔者旣然。饋而復
起。可無畢年。嗚呼。鍾乎。今焉在乎。豈復爲樂。激宮流羽。以嗣其
故乎。將憑化而遷改。象易制以周於用乎。豈爲錢爲鏹。爲銓爲
釜。以供耕稼之職。將爲鼎爲鼐。以效烹飪之功乎。豈爲浮圖老

子之像巍然瞻仰於緇素乎豈爲麟趾裴蹄之形翕然玩於邦國乎豈爲干越之劍氣如虹霓掃除妖氛於指顧之間乎將爲百鍊之鑑湛如止水別妍醜於高堂之上乎新故相代未始云畢紛然殊途必有一出決不泯泯草亡木卒嗚呼鑄鐘又將奚卹

遣瘧鬼文

王百穀之
倏而炮烙
倏而負水
升不宛肖
經覺未雅

邦溝處士秋得瘧瘧之疾發以景中起於毛端伸欠乃作其始也淒風轉雨灑然薄人其少進也如洄壑陰崖單衣犯雪龜穹蠖屈奄奄欲絕寒威既替熱復大來畢方媒毒回祿嗣災躁外渴中臥已復興欲挾斗杓東適淳澥酌以汪隘未足爲快徂酉

盡成漉然。霑汗然後乃已。於是處士乃澡心慮。斥聰明。枕石藉
茅。偃於洞房。疲極而寐。夢五鬼物。異服醜形。朱丹其髮。運斤鼓
橐。縻綆注缶。揮以大箠。跳踉而進曰。嘻。良苦。惟子昔年學道。名
山把握風雷。與斗爭威。吏兵雲屯。使者火馳。呼吸元氣。懸鬼以
嬉。我屬蓄忿怒。候閒隙之日久矣。孰爲爾來。荒唐是師。跣跣是
友。果於自爲。橫心肆口。隨世上下。金鎔木揉。嘗於禁戒。隳滅應
手。交親指議。傳笑十九。而子岸然恬不爲醜。我屬緣是得而甘
心焉。於是處士驚遽若失。所以對者。眾鬼大笑。處士叱之曰。來
汝鬼物。向吾示汝神明之機。天收其武。地藏其文。七緯十精。亡
失光耀。而汝朋儔。漫不復省。瞽矇之前。藻繪徒施。叩宮流徵。而

瞶者勿知。嘗以爲未然。乃今言之。蹇吾妙齡。志于幽玄。明師我
違。以溺奇偏。疑信相寇。于茲有年。披收氛霧。乃覩青天。樊然故
藝。一夕棄捐。飫食酣寢。以還本源。若夫嬪御如雲。珍貨山積。後
房彈吹。秀色可食。馬有副車。有二人所同好。吾亦勿避。久宦無
成家。徒壁立。彈劍而哦。援柔自慰。風埃藍縷。兒女所羞。人所共
惡。吾亦勿求。好惡我無。與天下俱。故造物之父。與吾並駕而遊。
固非汝曹知也。嗟汝鬼物。亦道之孫。經緯星辰。啓陰開陽。何獨
迷繆。自喪耿光。依憑草木。爲此不祥。於是眾鬼相視失色。涕泗
交頤。呿而不合。悔其所爲。稽首再拜。稱弟子而去。處士寤亦失
厥疾矣。

祭洞庭文

紹聖三年十月己亥朔十一日丁卯前宣義郎秦觀敬以錢馬
香酒茶果之奠望洞庭青草湖境上敬祭於岳州境內洞庭昭
靈王青草安流王淵德侯順濟侯忠潔侯孝烈靈妃孝感侯之
神觀罪戾不肖頃緣幸會嘗厠朝列備員儒館承乏史臣福過
災生數遭重劾蒙恩寬貸投竄湖南老母戚氏年踰七十久抱
末疾盡室幼累幾二十口不獲俱行既寓浙西方令男湛謀侍
南來敬惟諸神皆以威烈忠孝著在方冊廟食此方分風擘流
有禱如響觀之得罪本末諸神具知願加哀憐老母異時經彼
重湖賜以便風安然獲濟仍願神貺早被天恩生還鄉邑觀以

疾走便道不遑躬詣祠下盡此血誠故修薄奠以伸惻悞心切
詞迫瀆瀆至靈俯企惶懼唯諸神明鑒之

謁宣聖文

郡守被命于朝既至治所則必告于境內之明神禮也矧惟宣
聖實我儒師薦見之禮敢後羣祠是率僚屬爰及士子躬趨於
庭以報祀事尙饗

告狄梁公廟文

惟公昔以盛德爲唐名臣嘗刺此州風流具存越王之禍玉石
俱焚二千餘人賴公獲免宜千萬年血食茲土豫之子孫報仰
何窮舊祠迫隘不稱明靈爰築新室以安貌像敢涓時日薦告

于庭

告李太尉廟文

唐之中葉盜據此方歲行四宮天誅不訖公時銜命實帥西師
披此姦巢市不易肆虵豕遺種化爲平民公於蔡人厥功懋矣
廟貌雖久棟宇穿頽易而新之得是亢爽千秋萬歲公其安焉
祭勾芒神文

日窮于次歲時肇興爰卜土牛以送寒氣惟神佐成震治于民
有功敢稽禮經用修常祀尙饗

代蔡州太守謁先聖文

惟王道備天人功崇列聖大成旣集六藝斯明內聖外王所同

憲法山川鳥獸咸亦裕如萬世尊親天下通祀惟時士子生逢
休明讀玩棄餘作爲藝業有司論定天澤遂覃推本所從實王
芑貺敢涓時日薦見廟庭

代蔡州太守謁嶽廟文

維神望秩岱宗實長羣嶽有嚴祀事在于此邦守土之臣旣見
民吏敢羞牲酒進見于庭

代蔡州太守謁城隍文

淮南古城形若垂瓠帶以汝水生齒實繁惟神廟食此土芑貺
一方敢致酒牲用嚴薦見躬趨於庭疇敢後時

代蔡州祈晴文

謹以清酌庶羞之奠敢昭告于某神粵自去冬陰氣爲沴雪積
表丈逮茲獻歲寒不時歸雪又復作道途梗塞物價翔踴四郊
農事茫然無期是用奔走乞晴于爾明神廟食此土宜赫厥靈
揮卻慘鬱屏除翳昏還我大明毋使斯民久罹重苦

代蔡州謝晴文

謹以清酌庶羞之奠敢昭告于某神閒者久陰不解大雪薦作
寒氣總至民不聊生於是率僚屬吏士奔走分告乞晴於神神
享其誠荅以景貺閉陰啓陽變慘爲舒清風旣發大明遂昇一
方熙然僅有生意吏實不德何以克堪敢憑酒殽以謝神貺

淮海集卷三十一終

淮海集卷三十二

文

謝雨文

謹以清酌庶羞之奠敢昭告于某神惟大荒落陽氣寢驕沮傷
天和怒風鳴條川池既耗土山行焦念土之毛民慘不聊祇奉
明命爰率我僚禱雨于神惠此東臯日走祠下莫敢告勞神享
其誠精禋且交油然作雲遂不崇朝其散如絲其沃如膏焦卷
一變蔚爲美苗罷遣兒曹無復叫號巫覡反室藏緘鼓簫秋成
可期玉燭遂調樽有旨酒豆有嘉殽拜貺于神神鑒其昭尙饗

代獲賊祭諸廟文

謹以清酌庶羞之奠告于某神之靈乃者羣盜竊發剽劫閭里遊魂疆場境內騷然賴神威靈咸伏其辜鯨鯢旣殲民以休靖敢用牲酒以荅神休尚饗

代蔡州赦後省賽文

維今日日德音

云云

謹以清酌庶羞之奠告于某神祇奉綸言

徧修羣祀導迎善氣加惠元元敢不蒸進酒牲備嚴薦獻以承休命神其鑒之尚饗

代祭歐陽夫人文

吁嗟夫人出于華宗來嬪高門實配文忠惟我文忠一世之師道德餘事發爲文辭如天有斗如歲有春四方以正萬物爲新

吁嗟夫人其德惟稱內宗外姻俱承厥慶文忠前薨朝野涕泗
今夫人逝士亦永歎矧在敝族晚通姻好承凶矍然舉室驚悼
新鄭之原文忠之塋歸合有期千車送行守土汝南征駕莫遑
敬致薄辭以奠一觴

代祭韓康公文

嗚呼我宋受命網羅羣英諸夏用康百餘年閒異人閒出左右
辟王公以盛德出入四朝文武自將入爲上宰厥有不續盟府
是藏出爲長城臨制萬里姦變銷亡伯氏仲氏迭秉國鈞榮莫
與亢功成事畢奉身而退與道翱翔歲在執徐爰請于朝言還
許昌百官奉旨祖道供張于國之陽禮未及行遽卽窀穸漠然

聲光二聖震驚法駕臨奠哀動周行哲人其萎實舍于許里門
相望遲公之歸執爵承飲稱壽公堂承訃泫然涕泗橫集精遊
出疆許道如砥喬木交覆比通大梁不見安輿乃見喪車人具
盡傷悲來填膺辭不成文聊侑一觴

祭醕神文

比者善氣始應霖潦屢降溝壑流通事既有望矣而越自雨闕
以來飛蝗蔽天敢爲妖孽土之毛髮所過爲盡嗚呼其不仁也
哉大旱之後而得霖雨是天有意於恤民也惟爾有神亦當上
承天意驅率醜類入于江海自求多福無或違天以速愆咎

登第後青詞

文以詞達
爲上藻績
次之

竊以天運至神固不期於報効羣生多故實有賴於祈禳敢伸
惻惻之私仰瀆高明之鑒伏念臣生而固陋長更屯奇奔走道
塗常數千里淹流場屋幾二十年旣利欲之未忘在過愆而奚
免深懼風霆之譴竊萌豺獮之心乃與母親戚氏爰自往年願
修醮事今則猥塵科第叨預仕塗豈微軀之克堪皆造物之冥
賜輒取甲寅之歲祇就海陵之官依按靈科酬還素志伏願上
眞昭荅列聖顧懷增壽考於慈親除禍殃於眇質私門安燕無
疾病之潛生官路亨通絕謗傷之橫至臣無任
云云

代蔡州進興龍節功德疏

貝葉微言善會權而歸實藥珠妙旨能卻老以延年方茲誕聖

之晨可託効愚之意恭趨精宇嚴備淨筵梵唄徹於紫霄龍蘭鬱乎藻井皇帝陛下伏願皇圖鞏固睿筭增新下感羣生與松椿而共茂上通列宿將箕翼以並明

代蔡州正賜庫功德疏

歲功告備方圖歸報之因誕節屆期當具祝延之禮爰修勝會用達愚衷初入寶樓不假善財之彈指遍行香飯何煩金粟之遣人助以風林水鳥之音雜以玉珮金鐺之韻皇帝陛下伏願聖躬如月宸筭後天日聞萬歲之呼歲受千金之鑒

興龍節疏二道

號登元祐鬱佳氣以橫流節遇興龍藹頌聲而並作非具祝延

之禮莫輸歸報之誠爰詣梵坊仍趨真境儼朱紫以具在布紛
緇而畢臻合覺背塵探寶王之妙教長生久視發藏室之靈篇
萬物循而其聲不窮四海竭而此飯無盡庶因勝會稽致愚誠
皇帝陛下伏願睿命增新皇圖鞏固驚蹕所至日聞嵩嶽之呼
文軌攸同歲効封人之祝

電昔繞樞協氣已蟠於穹壤葵今向日頌聲復溢於華戎恭詣
寶坊廣延緇侶致上方香積之饌開西土貝葉之文妙會惟修
愚衷斯罄伏願睿圖鞏固神筭增隆日月無私永照臨於下上
風雲不閒常感會於中天

代蔡州進生辰功德疏

格王休旦夷夏同瞻文母誕辰天人合慶非具祝延之禮莫輸
歸報之誠肆就寶坊具伊蒲之盛饌遂延緇侶閱貝葉之眞文
梵音清越以干雲香穗縈回而成蓋庶憑妙會稍達愚衷皇太
后伏願景命逾新清躬益固導迎馭穀豈惟如月之就盈增續
年齡將見後天而難老

神宗皇帝晏駕功德疏

宮車晏駕卒土崩心爰輪殞裂之誠用結精嚴之會伏願皇靈
妙湛天仗超搖大圓鑒中旣證無生之忍妙高峯上更旋不退
之輪慶逮邦家澤流寰海

高郵長老開堂疏

善用禪宗
當家語
笑成文
之蕭洒者

棒頭取證。尤爲瓦解冰消。喝下承當。未免龍頭蛇尾。況乃不快。
漆桶無孔。鐵鎚徒認影以迷頭。但抱賊而叫屈。豈知填溝塞壑。
無非碧眼胡僧。積嶽堆山。盡是黃面老子。伏惟和尚。腳根點地。
鼻孔遼天。眞匠子之鈴鎚。實作家之鑪鞴。諸方舉唱。要須十字。
縱橫。大眾證明。但看一場敗闕。

寶林寺開堂疏

彌勒開門。惟善財而能入。毗耶丈室。非摩詰以難居。寶林禪院。
南宋遺區。東吳勝概。本惠休繡經之地。實澄觀隸業之坊。法水
灣環。妙峯孤秀。下奩玉鑑。涵日月於昏明。傍穴金蚪。化風雷於
呼吸。旣川源之綉錯。仍舟楫之鼎新。飛閣浮堦。就山爲勢。方疏

圓井。因水成姿。卽之而智慧生。望之而塵勞破。九重鴈塔。現多寶之莊嚴。萬石鯨鐘。示觀音之方便。允非開士。難稱覺場。大師雅稱聖箭。素號禪關。投虎峯而出家。遇龍浮而得法。祖師衣鉢。昔因書壁而傳。首座山林。今以躍瓶而獲。了無異議。實有聖緣。往開大揔持門。以繼鑠迦羅眼。

乾明開堂疏

竊以離塵求覺。已乖調御之心。卽幻見真。方契飲光之望。聖因時遠。人與法差。執空而取者。依一精明。任相而求者。認四顛倒。守癡禪爲定力。運乾慧爲悲光。習以自欺。久則難變。旣安耶解。沈迷有漏之因。宜得正宗。開示無生之忍。昭慶上人洞該真際。

圓證法空於旋流轉徙之途得妙湛摠持之力反聞聞性體已徧於塵沙自覺覺他功未周於毫刹輒勤三請願繼一音說現在心作將來眼

醴泉開堂疏

毛端寶刹曾何新故之常天下大禪安有去來之累惟古佛廟實今醴泉自百年香火之餘治一國風煙之際塔閣連環之玉骨殿藏及錦之貝文然而飛鳥啣花空存勝境真珠撒帳未遇明師逮軍旅之薦興獲法筵之初啓芳公長老少通教相晚悟宗乘密行則鄉黨之所依歸妙法則天龍之所回向遊方旣久止海滋深願辭臃腫之居亟返歸來之駕爲談不二以度無邊

淮海集卷三十二終

淮海集卷三十三

誌銘

李狀元墓誌銘

元祐三年春三月上始臨軒策有司所貢士被選者凡數百人而廩延李君爲第一君諱常寧字安邦自嘉祐中舉進士數爲春官所卻至是始獲奉大對於庭上刺六經之文旁獵百氏之言下通當世之務其詞奧衍有漢唐之遺風進御一讀遂爲舉首天下莫不異之是時朝庭耆老謀王體斷國論者皆累朝舊臣君於斯時年踰知命裒然得雋於翰墨之場世以爲萬戶侯如以契券取也而君釋褐授宣義郎簽書鎮海軍節度判官是

歲六月以疾卒享年五十有二有司以聞詔賜錢三十萬卹其家天下莫不悲之君困於科舉蓋三十年其得名宦纔數月爾嗚呼何起之難而償之易邪然君子疾沒世而名不稱焉君以諸生崛起名動海內其視碌碌無聞而歿者亦可以無憾君結髮學問晚而彌勵事親孝於二弟友愛爲人恭儉潔廉其取予一毫不妄也曾祖諱益祖諱知進世居開封廩延不仕考諱永昌始仕爲從事郎鼎州司戶參軍夫人秦氏先大父承議之女也後君四年卒雖除君喪猶布衣蔬食以終其身平生端烈類如此子二人長曰弼有學行次未名女二人尙幼以卒之年葬於開封府雍丘縣大善鄉裴村西谷山林之原先府君之兆初

君襄事期迫不暇納幽堂之銘逮夫人祔葬始鑱銘而納之銘
曰帝初臨軒策士于庭有器晚成冠我羣英大道孔夷其御又
良閭闔玉堂行矣翱翔慶者在門弔者在閭胡亟只且世爲嗟
呼如霆忽厲風雨奄至俛仰而闕孰知其自大椿久榮朝茵暫
敷竟復何殊同於空虛隋渠之壩杞國之疆佳城蒼蒼刻文是
藏

慶禪師塔銘

師諱昭慶字顯之俗姓林氏泉州晉江人也少跡弛以氣自任
嘗與鄉里數人相結爲賈自閩粵航海道直抵山東往來海中
者十數年資用甚饒皇祐中祀明堂恩度天下僧師爲兒時父

母嘗許爲僧名隸漳州開元寺籍至是輒謝諸賈以財物屬同
產使養其親徒手入寺毀鬚髮受具戒鄉人異之居無何謂其
曹曰出家兒當尋師訪道求脫生死若匏繫一方乃土偶人耳
遂去開元遍參知識至禾山楚才禪師會中因看風幡話忽然
有悟以爲道妙盡於此矣及見黃龍惠南禪師示以佛手驢腳
因緣輒漫不省因服役左右數年不去始盡得黃龍之道故師
後出世法嗣黃龍云熙寧中遊淮南往來廣陵天長高郵之間
三邑之人見師如舊相識莫不靡然心服願爲弟子而高郵之
人遂以乾明請師出世凡三住道場初高郵之乾明次烏江之
惠濟最後廣陵之建隆惟惠濟僻在深山中地有湯泉人跡罕

至心樂居之。乾明建隆皆爲檀越。士大夫所疆遯去不獲。非其好也。師所得法廣大微妙。又學術無不通達。其爲人法。或以經論。或以老莊。或以卜筮。或以方藥。下至種種一切俗諦之事。隨其根器。示大方便。不獨守古人言句而已。自唐以來。禪家盛行於世者。惟雲門臨濟兩宗。是時雲門苗裔分據大刹。相望於淮瀾之上。臨濟之後。自江以北。惟師一人。故雲門之徒。或不以師爲然。師聞而笑曰。此吾所以爲臨濟兒孫也。晚歲多病。謝住持事。寓止高郵醴泉法嗣處安會中。一日。召安師及諸禪者。以偈兩首示之。明日飯後奄然歸寂。實元祐四年八月十六日也。俗壽六十三。僧臘四十一。其徒智勤等一十有二人。與廣陵檀越。

奉師靈骨歸建陵起塔而葬焉。明年智潭自廣陵走京師乞銘於某。嗚呼！始師出世某之外舅。故潭州寧鄉縣主簿徐君賡實爲檀越。首及師在惠濟某嘗從故龍圖閣直學士孫公覺莘老錢塘僧道潛參寥訪師於湯泉山中。時烏江令則今承議郎閣君木求仁也。高郵士大夫孫闔諸公皆參問於師而爲役之久。緣契最深者殆莫如某。然則銘師之塔某何敢辭。乃爲銘曰：嗚呼！我師法妙難思，與物並作而不磷緇。經論老莊，卜筮方藥，是皆黃龍佛手驪腳。我從中證，決定無疑。非遷陀客，當大笑之。山河旣露水，鳥又談能事畢矣。汝復何參？少賈之雄，老禪之伯，求其異相，亦不可得有。岡崑崙南直海門，盡未來際，我師長存。

葛宣德墓銘

君諱書舉字規叔姓葛氏其先廣陵人唐天祐中遠祖濤始徙
常州之江陰曾祖諱祥不仕祖諱惟甫贈吏部尚書考諱密承
議郎致仕承議與其兄兵部侍郎官相繼策名及其仲季皆以
德善壽考爲搢紳所推諸子若孫行學問於時者相屬闔門百
口有古雍睦之風今東南大族稱孝友者曰江陰葛氏君弱不
好弄五歲遭夫人憂哀毀如成人與葷血輒揮去不食及長篤
行力學敏於文詞熙寧三年中進士第調杭州餘杭縣主簿詔
舉學官侍臣有欲以君充賦者檄取所爲文君嫌於求售竟謝
不與是時朝廷興修二浙水利議者謂茗雪二水出于天目之

山而溢于太湖書曰三江旣入震澤底定今二江並廢獨一松江入海故太湖之水壅而吳興被患遂欲廢北關長安二埭上塘之渠以與下塘相通又於餘杭之南股引苕溪之水達于漕渠穿錢塘之市而入于江以紓吳興之患時多以爲然部使者檄君行視君以爲吳興之水原於太湖太湖廣袤四萬八千餘頃旁占數郡其所灌輸非獨苕霅也書稱三江震澤說者不同就如議者之言則尋常溝瀆之流豈可以比二江之任祇益紛擾耳且錢塘二埭其來久矣大役之興古人所重固執不可議者不能奪其事遂寢故龍圖閣直學士李公常時守吳興聞君之說貽書嘉歎而部使者亦知君而交薦之移衛州共城縣令

丁承議憂服除授淮南節度推官知蔡州真陽縣事改左宣德
郎知開封府長垣縣事三邑皆有惠愛民到于今思之長垣有
地訟更數令不決其人執康定元年二月書契爲證君至謂訟
者曰爾所執僞契也康定改元在寶元之冬豈復有二月耶訟
者訕服吏大驚君之爲政明多此類也元祐六年六月十六日
卒於長垣之官舍享年五十有四君爲人篤於孝悌而毅然有
守不爲利害所移觀其風節議論朝廷器也而閒關數邑以卒
悲夫娶夏侯氏故司門員外郎淇之女子男三人張仲牧仲子
仲皆舉進士女四人在室以八年九月丙申葬於常州江陰縣
屠村之原前期諸孤以狀來請銘余舉進士時常與君同學在

汝南復與君同官君之登科與儂仲父同年而張仲又余之壻也然則非余其誰宜銘者銘曰葛以國氏其支覃亂離瘼矣遷江南崛起貳卿諸弟參長垣詞德知不漸有地百里如子男侯挽不來迄今談其積如京發二三有如不信銘斯鑱

徐氏夫人墓誌銘

夫人姓徐氏眞州楊子人供備庫副使諱昌言之孫太子左清道率府致仕諱守約之女年二十一歸清河張氏爲內殿承制諱文英之夫人治平三年閏月二十八日以疾卒于京師享年五十三生男五人清臣良臣堯臣舜臣禹臣堯臣舉進士以學行聞舜臣應天府軍巡判官監楚州五祐鹽場女二人長適進

士王構次適進士王諤早卒以元豐四年十月癸酉祔葬于揚州江都縣東興鄉馬坊里承制君之墓承制君元配劉氏無子早卒既升朝故事得封妻爲縣君夫人請先劉氏承制君義而從之故夫人未及封而卒後二年以恩始追贈壽昌縣君銘曰懿懿壽昌女子之師渾然平夷不妄笑嬉初在厥家孝謹是處逮嬪德門益踵前武維親及黨不汝瑕疵豈伊黽俛天實我資承祭奉賓事嚴且飭以身先之疇敢不力既美于躬又相其夫子多俊髦亦澤之餘崑崙之西岡阜蟠踞鑱詞幽墟以照不腐

虞氏夫人墓誌銘

夫人姓虞氏諱麗華越州山陰人助教昱之季女年十九歸同

郡陸氏爲承議郎知高郵縣事化之夫人踰八年而卒卒後十年葬于山陰縣野人原其舅朝議公所生母袁夫人之兆實熙寧三年五月某日也元豐六年天子有事於南郊夫人以承議君陞朝恩封仙源縣君云承議君嘗謂予曰虞雖越之著姓世以財雄亡妻婉孌恭儉如出寒素之家仰事舅姑旁接內外之宗姻下撫僮使之眾殆無一人失其意者不幸短折以死生一女嫁進士史安術比已死矣余深悲之幸蒙明恩追錫封邑而葬時迫其幽堂之銘實尙未刻予與予故人也願爲論次其事將穿其墓前而納之以致予意焉是時予將赴汝陽治裝薄遽雖許其作而未暇而君每見余輒以仙源之銘爲囑至于八九

而不倦。嗚呼。夫婦俗薄久矣。仙源之沒。幾三十年。而君尋繹悼
念。眷眷不忘如初。非風義之厚。出于天性。何以此耶。乃爲之
銘曰。惟夫人。胃東陽。嬪德門。家有光。命雖絕。慶未央。刻斯文。誌
幽荒。

李氏夫人墓誌銘

至中和先君遊太學。事安定先生胡公。歲時歸覲。具言太學人
物之盛。數稱海陵王君觀。及其從弟覲。有高才力學而文流輩
無與比者。余時爲兒侍左右。聞而心慕之。願卽見。蓋不可得。後
數年。二君相繼舉進士中第。其試於有司。皆爲開封第一名。實
旣發所與。皆一時之豪。余遂以故人子獲從之遊。元豐六年七

月二十六日寺丞君觀之母李夫人卒宣德君覲以書抵余曰
世母葬有日矣伯氏荒迷不能請願有銘嘻先君友執之命也
其可以辭謹按夫人李氏諱仁用世爲泰州如皋人年二十六
歸王氏爲府君諱惟清之夫人享年八十有二以卒之年九月
四日祔葬于如皋之赤岸鄉府君之墓子男一人寺丞君也女
四人其壻趙世昌爲內殿崇班蔡實丁傳夏侯煦皆舉進士孫
男一人曰譚孫女二人一早卒次尙幼夫人性通達治事有法
度凡內外之宗姻下逮婢使靡不得其歡心子旣出仕供養甚
厚及坐法免生理蕭然恬不以介意雖高年視聽不衰手足便
利迄終無一言亂者銘曰於維夫人閒且穆來嬪王宗祇厥職

內嚴外順宗姻懌既壽又康時酒食變故相詭獨處廓氣形逮
反超不失藏從其夫古原宅詞詔後來有幽刻

掩關銘

元豐初觀舉進士不中退居高郵杜門卻掃以詩書自娛乃作
掩關之銘其詞曰門有衡衢兮蹄踵聯世不我謀兮地自偏渾
沌是師兮機械焚何以玩心兮有討論插架萬軸兮星宿懸口
咥日披兮遊聖賢偶與意會兮欣忘飡植芳樹美兮亦既蕃執
耰搏虎兮更眾難自覈不迷兮邈考槃蹇民多艱兮戒求全高
明家室兮鬼笑喧速成亟壞兮理則然蔓蔓荆棘兮上造天竄
窟一作窟磨牙兮交術吁勿應其求兮啣深冤掩關自娛兮解憂

患啜菽飲水兮顏悅歡優哉游哉兮聊永年

劉氏研銘

溪之精石之靈紫雲氣亟明星爲穎窟作刃礪永寶用塥斯銘
銘穎師研

穎師十二歲以書爲東坡大滌二公所稱他時豈易量哉予以
紫石硯贈之銘其下曰三生懷素法穎上人時於此處轉大法
輪

瀘州使君任公墓表

元豐中朝廷治西南乞弟之罪至於斬將帥綴監司兩蜀騷然
四年而後定余嘗怪乞弟裔夷耳兵不過二千人非有冒頓強

悍之威結贊狡險之謀蛇豕微種乃爲邊患如此及觀瀘州使
君任公事迹然後知累年之役實部使者爲之裔夷何足責也
任公諱汲字師中眉州眉山人少學讀書通其大義不治章句
性任俠喜事與其兄孜相繼舉進士中第知名於時眉人敬之
號二任而蘇先生洵尤與厚善熙寧某年其察訪使熊本薦知
瀘州州上接夔道下連南平控引蠻夷千有餘里如甬望箇恕
羅氏鬼主沙取諸郡皆歲來互市而守將任輕無節制之權非
有奇略遠謀則不幸往往有事公旣至威信大著夷夏便之歲
滿當更詔畱再任比滿又特轉一官畱之元豐二年納溪砦互
市有歐羅胡苟里夷人死者故事漢人殺夷人旣論死仍償其


資謂之骨價時若將欲勿與夷人大志爭譟而出公馳至境上具以禍福曉之相與投兵請降亂者入安其六既聽命矣而轉運判官意與公異乃移瀘州不與措置事專爲攻討之計公爭弗能得乃歎曰邊患自此始矣卽具奏言羅胡苟里本瀘州熟戶夷也比因殺傷求索骨價爲侵境上故是常事與異時生夷反叛不同臣招納垂畢而使者貪功生事因欲討之臣恐窮迫無所竄伏轉投生界則甫望箇恕諸部更相結連益鴟張而難制矣會女孫卒不果上七月詔涇原路副總管韓存寶以陝右兵五千人經制其事存寶在瀘攻羅胡苟里滅之諸夷驚潰果奔甫望箇恕其年冬箇恕之酋乞弟遂稱兵反皆如公所料云

初乞弟自納溪砦互市還過江安縣縣令犒之既去數十里遣親信楊節一毛以一馬謝令令辭不受一毛去至夷牢口爲土夷所邀一毛死焉楊節者本嘉州卒吏避罪亡入夷中夷人愛之用事號爲羅判至是節自度不免乃以矢房中乞第所八馬二千緡券來降公以中國不失信于小夷宜斬節歸券責以納亡之罪則乞弟憚威而愧德矣而轉運使固執不從三年乞弟果以一毛爲辭入寇路分都監王宣以兵二千人禦之戰于羅箇牟國爲賊所敗宣與其子某及裨將十有四人死之於是詔韓存寶復以陝右兵五千人經制其事存寶至瀘逗畱不進陰使人誘乞弟以書降遽分屯奏功天子得書怒甚更遣環慶路

副總管林廣代之命御史何正臣中人梁從政至蜀雜治獄具
斬存寶于瀘州流監軍韓承式於海島除轉運使董鉞名四年
廣進兵抵乞弟之巢賊空壁遁去廣不得已竟納其降而還天
子亦不復責矣自是瀘州守將始加沿邊安撫之名專治軍政
部使不得輒與未幾使者復以開邊田賦生稅爲請天子一切
不許而西南夷復安堵矣由是言之前日之役豈非部使者實
爲之初公旣奏羅胡苟里之事雖不果上而使者聞知內銜切
骨日夜謀中公以法公知其謀乃錄使者不法事關瀘州十有
五條上之使者薄遽不知所爲卽誣奏公乞弟過江安時不時
掩擊及延儒生講書疑有私謁朝廷疑之乃先免而下章於它

部各窮竟所考未具而公既卒矣時當途者以公既歿爲使者
地公之子大防三詣闕上書陳寃狀獄不敢變使者竟免公爲
吏通敏吏民畏而愛之其通守齊安也嘗遊於定惠院既去郡
人名其亭曰任公時蘇先生之長子翰林公軾以譴遷齊安人
知其與公善也復於其側爲師中庵曰師中必來訪予將館於
是明年公卒郡人聞之相與哭於定惠者百餘人飯僧於亭而
祭公於庵而蘇先生之少子中書公轍復爲之記余嘗從翰林
中書公遊聞二任之風久矣後爲汝南學官始識大防於是得
公之行事公以元豐四年三月二十四日卒于遂州西禪佛舍
享年六十有四六年五月二十二日葬于光山縣淮信鄉午步

原其世次官邑御史頓君既爲幽堂之誌此不復著著其瀘州之事與誌之闕不書者揭于墓原以脩史官之擇云



PL 2687
.C53
v.1
淮海集卷三十四

贊跋



龍丘子真贊

惟龍丘子以大塊爲興元氣爲駒放意自娛遊行六區世莫我
踈亦莫我親追配古者葛天之民

李潭漢馬圖贊

前一馬驪就樹摩癢百骸佳快厥意可想中間四馬或顧或嬉
飲嚙自如不相瑕疵最後一駢尾鬣奮驚背而號鳴若聞其聲
寬閒之鄉水遠草長無羈無繫樂未渠央

南都法寶禪院一長老真贊



欲老不老。八反九倒。昔是西庵。今爲法寶。文雅臺邊。清冷池畔。大地山河。且舉一半。

建隆慶和尚眞贊

大因緣。十八年。結跏座。帶刀眠。汝鼻孔。未遼天。呼我作。無事禪。書王蠋後事文

古之世有不去商紂之虐君。以從周武之聖臣。而守死西山者。其人曰伯夷。伯夷者。孔子稱爲仁。孟子稱爲聖。不在乎學者能道之也。古之人有不愛刳身戮尸之患。以求盡忠極節於其君者。其人曰比干。比干者。孔子稱爲仁。孟子稱爲賢。不在乎學者能道之也。古之人有不愛將軍之印。不願萬家之封。引身卽死。

以明君臣之大義而求自附於伯夷比干之事者。其人曰王蠋。王蠋無孔子孟子之稱而其名亦不獲自附於伯夷比干焉。學者亦不可不道也。當燕人之破齊。齊王走莒也。臨菑之地汶篁之疆爲齊者無幾也。齊之臣平居腰黃金結紫綬論議人主之前者。一旦狼顧鳥竄分散四出不逃而去。則屈而降無一人爲其君出身抗賊以全齊者。方是時王蠋齊之布衣也。積德累行退耕於野。口未嘗食君之粟。身未嘗衣君之帛。獨以謂生於齊國。世爲齊民。則當死於齊君。乃奮身守大節。守區區之畫邑。以待燕人。燕人夷爲之郤三十里不敢近。其後燕將畏蠋之賢。念蠋之在而齊之卒不滅也。數爲甘言啗之曰。我將以子爲將。封

如此立論
方關係得
大不然止
一義士耳

子以萬家不者屠畫邑。蠋曰：忠臣不仕二君，正女不更二夫，國忘矣。蠋尚何存？今劫之以兵，誘之以將，是助桀爲虐也。與其無義而生，固不若烹，乃經其頭於木枝，自奮絕脰而死。士大夫聞之，皆太息流涕曰：王蠋布衣也，義不北面於燕，况在位食祿者乎？於是乃相與迎襄王於莒，而齊之殘民始感義奮發，閉城守。人人莫肯下燕者，故莒卽墨得數戰不亡，而田單卒能因其民心奮其智謀，卻數萬之衆，復七十餘城。王蠋激之也，始予讀史記至此，未嘗不爲蠋廢書而泣，以謂推蠋之志，足以無憾於天，無忤於人，無欺於伯夷比干之事。太史公當特書之，屢書之以破萬世亂臣賊子之心，柰何反不爲蠋立傳，其當時事迹

乃微見於田單之傳尾使蠋之名僅存以不失傳而不足以暴天下甚可恨也且夫聶政荆軻之匹徒能瞋目攘臂奮然不顧以報一言一飯之德非有君臣之讎而懷七首袖鐵椎白日殺人以喪七尺之軀者太史公猶以其有義也而爲之立傳以見後世後世亦從而服之曰壯士蘇秦張儀陳軫犀首左右賣國以取容非有死國死君之行朝爲楚卿暮爲秦相不以慊於心太史公猶以其善說也而爲之立傳以見後世後世亦從而服之曰奇材以至韓非申不害之徒刑名之學也猶以原道附之老聃淳于髡鄒衍田駢慎到接子環騶奭之徒迂闊之士也猶以爲多學而附之孟子然則世有殺身成仁如王蠋之事者獨

不當傳之以附於伯夷之後乎。噫。昔者夫子作春秋。其大意在於正君臣。嚴父子。使當時君臣正。父子嚴。則春秋不作矣。後世愚夫庸婦。一言一行。近似者。皆當筆之春秋。况夫卓然有補世教者。得無特書之屢書之乎。此予所以爲太史公惜也。

書輞川圖後

元祐丁卯。余爲汝南郡學官。夏得腸癖之疾。臥直舍中所。善高符仲攜摩詰輞川圖視余。曰。閱此可以愈疾。余本江海人。得圖喜甚。即使二兒從旁引之。閱於枕上。恍然若與摩詰入輞川。度華子岡。經孟城埭。憩輞口莊。泊文杏館。上斤竹嶺。並木蘭砦。絕茱萸泚。躡槐陌。窺鹿柴。砦返於南北垞。航欽湖。戲柳浪。濯纓家。

瀨酌金屑泉。過白石灘。停仍里館。轉辛夷。搗抵漆園。幅巾杖屨。綦弈茗飲。或賦詩自娛。忘其身之匏繫於汝南也。數日疾良愈。而符仲亦爲夏侯太沖來取圖。遂題其末而歸諸高氏。

高無悔跋尾

無悔將家子。爲人沈鷺有奇略。習知邊事。結髮與羌人戰。大小數十遇。未嘗敗北。斬級捕虜。獲牛馬橐駝。動以萬計。與其兄館使皆爲邊人所推。號二高云。元豐五年。延師與二詔使城永樂。問於無悔。對曰。永樂羌人必爭之地。而無險阻。無水泉。一日寇至。何以能守。詔使大怒。以爲沮議。遣歸延安。旣城永樂。羌人數十萬。奄至城中。戍者纔三萬人。館使謂詔使曰。虜眾十倍於我。

若其盡至不可當也我嘗破其眾於無定河川今前隊囂甚有懼我心及未定擊之雖眾可走詔使不許曰王者之師不鼓不成列館使以足頓地曰事去矣已而城外圍數重諸將出戰無生還者俄奪我水寨城中穿井數十皆不獲泉士卒饑渴困甚不能執兵城遂陷二詔使及館使皆死之於是議者皆以二高料敵有古良將之風惜乎詔使之不能用也元祐二年余爲汝南學官被詔至京師以疾歸無悔亦以失邊帥意徙內地鈐轄此郡兵馬相從於城東古寺日飲無閒絕口不挂時事余酒酣悲歌聲震林木無悔瞋目熟視髮上衝冠人多恠之余二人者自若也無悔一日出諸公所與尺牘自韓魏公以下百餘番屬

余跋尾。余欣然濡筆，因以永樂之事載之。庶幾見諸公，所以稱道無悔者，非虛語也。

裴秀才跋尾

裴本秦之別姓。自漢以來，世有顯者在唐。尤爲望族。五房之裴，爲宰相者十有七人。裴氏衣冠於斯，爲盛而東。眷房晉公度，實唐第一等人。君晉公之裔孫也。少篤學，鋒氣銳甚，頗有志於天下之事。已而舉進士，屢不中，乃嘆曰：人生如寄耳，用是區區者爲哉？於是退居許之陽翟，葛巾藜杖，日閱佛書，惟以專精神、養壽命爲事。元祐三年冬，君之弟朝散君通判察州君自陽翟藍輿過之，踰月而去。將行，謂朝散君曰：吾絕意世閒事久矣。比閱

麓中故人書札見麻溫故郎中昔所贈詩懽然感心不能自己
聞秦少游方爲此郡學官願因弟丐一言庶幾異時有知我者
余聞而嘆之昔馬援南征謂官屬曰吾從弟少游常哀吾慷慨
多大志曰士生一世但取衣食裁足乘下澤車馭款段馬爲郡
掾吏守墳墓鄉里稱善人斯可矣致求贏餘但自苦耳當吾在
浪泊西里虜未滅之時下潦上霧毒氣薰蒸仰視飛鳶跼跼墮
水中臥念少游平生時語何可得也朝散君起家四十爲郎聲
聞籍甚所謂功名富貴蓋未易量而君羸老疾病臥於衡茅之
下氣息奄奄僅屬旣不求人知人亦莫君知者弟兄出處異矣
然以二馬觀之二裴之事孰爲得失哉麻君博雅君子其所以

將古事一
引跌入此
作法最省
又最醒
東坡獵
虎序同

稱道君者宜不謬。後之君子讀其詩者，可以知君少時之志。而讀余文者，可以識君莫年之心云。

錄壯愍劉公遺事

壯愍劉公未顯時，凡三與賊遇，始爲常州無錫縣尉。有梟賊劉鐵槍者，起浙西，轉擾諸郡，捕盜官不能制。公一日霑醉，夜歸，適報鐵槍入境，遂乘酒赴之，與賊接戰，手殺鐵槍及其徒五人。餘悉散走。部使者上其功，改大理評事。後知果州南充縣，丁先太師憂，解官東還。道出興州境上，遇羣賊奄至，掠其行李，發之，惟文書百餘帙，布數匹，賊魁詈其徒曰：「此窮官人，何足劫！」公時在後，聞變，馳至，瞋目叱之。賊眾披靡，俄發三矢，輒斃三人。餘遂遁。

去雍師寇萊公表其事詔遷官知瀘州後移倅汝陰過安陸遇
故人畱飲家屬先行復遇盜劫倒囊得一銀釰劒泊一礪石腰
帶持去後賊敗於齊安獄具法歸贓於主有司以聞時陝西轉
運使員缺執政方以公進擬真宗曰是人爲郡守而止有一礪
石帶廉可知也遂除公行狀墓誌及國史本傳皆載無錫及興
州事獨安陸一節遺而不書元祐壬申歲公之子隰州使君某
與余會於京師嘗道公之遺事具以天禧中劄示余因論次之
附於中劄之後以補史氏之缺云

淮海集卷三十五

跋

法帖通解序

通卷可入
書法譜

法帖者太宗皇帝時遣使購摹前代法書集爲十卷摹刻於板藏之禁中大臣初登二府詔以一本賜之其後不復賜世號官帖故丞相劉公沆守長沙日以賜帖摹刻二本一置郡帑一藏於家自此法帖盛行於世士大夫好事者又往往自爲別本矣今可見者潭絳二郡劉丞相家潘尙書師旦家劉御史次莊家宗將世章家凡六本雖有精粗然大抵皆官帖之苗裔也頃爲正字時見諸帖墨蹟有藏於秘府者字皆華潤有肉神氣動人

非如刻本之枯槁也。蓋雖官帖亦其糟粕耳。又當時奉詔集帖之人，苟於書成不復更加研考，頗有僞蹟濫廁其間。至於標題次序乖錯，逾甚士大夫以字畫小枝，莫有論次之者。投荒索居，無以解日，輒以其灼然可考者疏記之。疑者闕之，名曰法帖通解云。

漢章帝書

衛巨山云：漢興而有草書，不知作者姓名。至章帝時，齊相杜度號善作篇，是章帝時已有草書矣。然千字文者，乃梁武帝得王羲之所書千字，使周興嗣以韻次之。時南平王偉令蕭子範亦製此文。蔡遠浪釋辰宿一帖，興嗣文也。豈得爲漢章帝之書耶？

歐陽文忠以謂前世學書者已有此語不獨始於羲之按漢武帝時司馬相如作無將篇無復字元帝時黃門令史游作急就篇成帝時將作大匠李長作元尚篇元始中楊雄作訓纂篇班固續之無復字皆小學家也千字文者蓋擬諸篇而作今急就篇之類尚有存者其詞高古讀之不問可知爲漢人之文與興嗣所作殊不類也文忠此說殆亦可疑爾

倉頡書

易曰上古結繩而治後世聖人易之以書契百官以治萬民以察蓋取諸夬而說者或以爲書契始於伏羲或以爲始於倉頡蓋伏羲畫八卦則書契已兆至倉頡觀鳥迹則書契遂詳始於

伏羲而成於倉頡爾。古者八歲入小學。故周官保氏掌國子教之六書。謂象形、象事、象意、象聲、轉注、假借也。謂之小學。家自至。秦焚燒典籍。始用篆隸。而古文滅矣。漢武時魯共王壞孔子舊宅。於壁中得尚書、春秋、論語、孝經。時人以不復知有古文。謂之科斗書。又北平侯張蒼獻春秋。左氏傳。郡國亦往往於山川得鼎彝。其銘則前代之古文。皆自相似。時王莽司空甄豐改定古文。有謂古文奇字、義書、佐書、繆篆、鳥書。凡六體。所謂古文者。孔氏壁中書也。魏初傳古文者有邯鄲淳。衛覬嘗寫淳尚書。後以示淳。而淳不別。至正始中。在三字不雜。轉失淳法。因科斗之名。遂効其形。太康元年。汲縣人盜發魏襄王冢。得簡書十餘萬言。

案魏氏所出猶有髣髴古書亦數種其一卷論楚事者最爲工妙齊文惠太子爲雍州時盜發楚王冢亦得竹簡青絲綸簡廣數分長二尺皮節如新有得十餘簡者王僧虔云是科斗書記周官所闕文以此論之凡稱古文者皆倉頡遺法也古文雖非科斗書而世常謂之科斗者以其類科斗爾此帖題曰倉頡書而了不與科斗相類乃近大小二篆蓋可疑也

仲尼書

魯司寇仲尼書者吳季子墓銘也銘在季子墓上其字皆徑尺餘唐張從紳記云舊本湮滅開元中玄宗命殷仲容摹搨其書以傳至大厯中蕭定又刻于石此小字者蓋後人依効爲之者

也。歐陽文忠公謂孔子平生未嘗至吳，以史記世家考之，其歷聘諸侯，南不逾楚，推其歲月蹤跡，未嘗過吳，不得親銘季子之墓，又其字特大，非古簡牘所容，然則季子墓銘其真者，猶疑非仲尼書，又况依倣爲之者歟。

史籀李斯

史籀者周宣王太史作大篆十五篇，與古文時有同異。先王之時，天下之書同文，及其衰也，諸侯各自爲政，而字畫之形亦異殊矣。秦兼天下，丞相李斯乃奏罷不合秦文者，而斯作倉頡篇，車府令趙高作爰歷篇，太史令胡毋敬作博學篇，皆取史籀大篆，或頗省改，是爲小篆。是時天下多事，篆字難成長安下士人

程邈得罪繫寧陽十年，從獄中增減大篆，去其繁複，奏之，始皇以爲善，出邈爲御史，名其書曰隸書。凡奏事令隸人書之，故又謂之佐書。自爾秦書有大篆、小篆、刻符、包匏、隸書等，凡八體焉。倉頡爰歷博學三篇，至漢時閭里之師，并爲倉頡篇，而檣文至建武時已六篇矣。今稱史檣之迹者，惟歧陽石鼓文、李斯之書，惟泰山詔爲真蹟。二世詔嶧山之碑，近世傳者出於徐常侍、夏英公家，自唐封演已疑非真。杜甫直謂野火焚棗木，傳刻爾不知此謂史檣、李斯二帖者，何從得之也。今漢碑在者，皆隸字，而程邈此帖乃是小楷，觀其氣象，豈敢遂信以爲秦人書。

鍾繇

鍾繇賀捷表其後云建安二十四年閏月九日南蕃東武亭侯
鍾繇上歐陽文忠公嘗問孫集賢思恭云建安二十四年閏在
何月集賢精於歷學以漢家所用四分乾象歷推之是歲己亥
三歷皆閏十月文忠以陳壽三國志考與集賢之言合然文忠
考魏吳二志乃權以是歲閏十月方征關羽至十二月獲之明
年正月始傳首至洛陽鍾繇安得於閏十月先賀捷也由是疑
此表爲非真焉

懷素

懷素唐僧字藏真此帖稱王右軍云吾真書可比鍾繇而草故
不減張芝僕以爲真不如鍾草不如張又嘗見其一帖云漢時

張芝言書爲世所重。非老僧莫入其體。則懷素自謂抗張芝而過右軍矣。昔栢元自謂右軍之流。論者以比孔琳之。齊高帝謂張融曰。卿書殊有骨力。但恨無二王法。答曰。非恨臣無二王法。亦恨二王無臣法。前世善書者。蓋嘗欲與右軍抗衡矣。而每不謂公論所許。懷素此言。其果然歟。歐陽文忠公嘗謂法帖者。乃魏晉時人施於家人朋友。其逸筆餘興。初非用意。自然可喜。後人乃棄百事。而以學書爲事。如一未至。至於終老窮年。疲弊精神。而不以爲苦。是真可歎也。懷素之徒。是已。文忠此論。可謂名言。然天下之事。畢竟亦何所有。孰爲可學。孰爲不可學者。自古以藝自名家。至於文章學術。大功大名。世所謂不朽者。其人方

從事於其閒也。曷嘗不棄百事而爲之。至於終老窮年。疲弊精神而不以爲苦也。由後世觀之。其異於懷素之學草書也。幾何邪。

書晉賢圖後

此畫舊名晉賢圖。有古衣冠十人。惟一人舉杯欲飲。其餘隱几杖策。傾聽假寐。讀書屬文。了無霑醉之態。龍眠李叔時見之曰。此醉客圖也。蓋以唐寶蒙畫評。有毛惠遠醉客圖。故以名之焉。叔時善畫。人所取信。未幾轉相摹寫。徧於都下。皆曰此真醉客圖也。非叔時疇能辨之。獨譙郡張文潛與余以爲不然。此畫晉賢宴居之狀。非醉客也。叔時易其名。出奇以眩俗耳。余舊傳聞

江南有一僧以貲得度未嘗誦經聞有書生欲苦之詣僧問曰上人亦嘗誦經否僧曰然生曰金剛經幾卷僧實不知卒爲所困卽誣生曰君今日已醉不復可語請俟他日書生笑而去至夜僧從鄰房問知卷數詰旦生來僧大聲曰君今日乃可語耳豈不知金剛經一卷也生曰然則卷有幾分僧茫然瞪目熟視曰君又醉耶聞者莫不絕倒今圖中諸公了無醉態而橫被沈湎之名然後知昔所傳聞爲不謬矣雖然余懼叔時以余與文潛異論亦將以醉見名則余二人者將何以自解也叔時好古博雅君子其言宜不妄豈評此畫時方在醕酖邪圖中諸客泊予二人孰醉孰不醉當有能辨之者

書蘭亭敘後

蘭亭者。晉右將軍會稽內使瑯琊王羲之逸少所書詩序也。右軍以穆帝永和九年三月三日。與太原孫統丞公。孫綽興公。廣漢王彬之道生。陳郡謝安安石。高平郗曇重熙。太原王蘊發仁。釋支遁道林。及其子凝之。徽之。操之等。四十有一人。修祓禊於山陰之蘭亭。酒酣賦詩製序。用蠶繭紙。鼠鬚筆。書凡二十八行。三百二十四字。字有重者。皆構別體。而之字最多。至二十許字。他日更書數十本。終無及者。右軍亦自愛重。畱付子孫。至七代孫智永爲比丘。俗呼永禪師。永卒傳其書於弟子辨才。才俗姓袁氏。梁司空昂之玄孫。唐正觀中。太宗銳意學二王書帖。摹搨

殆盡惟未得蘭亭凡三召辯才詰之固稱薦經喪亂亡失不知
所在後遣監察御史蕭翼微服爲書生以詭辯才始得之命供
奉揭書人趙模韓道政馮承素葛貞等四人各榻數本以賜皇
太子諸王近臣貞觀二十三年高宗奉遺詔以蘭亭入昭陵惟
趙模等所榻者傳於世事見何延之蘭亭記

淮海集卷三十五終

淮海集卷三十六

行狀

鮮于子駿行狀

公諱侁字子駿其先成湯之裔箕子封于朝鮮子仲食采於于
爲鮮于氏世家漁陽唐初詔爲閬州刺史歿于官子孫家焉遂
爲閬中人開元時仲通叔明節制兩川叔明以功賜姓李氏後
復故姓於公十二世祖也曾祖演祖瓘皆不仕父至自號隱居
先生爲蜀名儒以公贈金紫光祿大夫母趙氏追封安德郡太
夫人公自少莊重不苟力學有文鄉黨異之年二十登景祐五
年進士科調京兆府櫟陽縣主簿到官數月丁外艱服除授江

陵府右司理參軍慶厯中天下大旱有詔中外臣僚實封言事
公上書推災變所興有四一曰言不從二曰厥咎僭三曰欲得
不明四曰上下皆蔽言甚切直移歙州歙縣令歙俗喜訟善持
吏長短吏稍繩以法輒得罪去公爲黜又嘗攝婺源其治皆爲
諸邑最豪強畏之改著作佐郎知河南府伊闕縣事遷秘書丞
通判黔州未行改通判絳州左縣遠郡自守將以下皆曰課吏
卒供薪炭芻豆蔬菜而贏取其直公到悉罷之守將已下聞之
亦罷其風遂絕清獻趙公使蜀首薦之朝轉屯田員外郎賜五
品服英宗初爲皇嗣公上疏言儲號未正橫置未宜今皇嗣初
定未聞選經術識慮之士以擁護羽翼乞妙選賢德以爲宮僚

陛下清躬小有寢食不順朝夕左右固惟婦寺願復漢侍中之
職令二府番休宿衛覃恩遷都官員外郎通判保安軍何公郊
帥承興辟公發書其節度判官廳公事改職方員外郎覃恩轉
屯田郎中代還用三司使薦除蔡河撥發神宗初卽位詔中外
直言闕失公應詔言十六事其目曰納諫諍以輔德訪多士以
圖治嚴法令以制世崇節儉以富民明黜陟以考實去貪暴以
崇厚重臺諫以委任選監司以督姦閱守宰以求治慎遷易以
去弊重根本以圖固復選舉以澄源申武備以警姦治軍旅以
除患謹邊防以重內練將帥以禦戎其末曰願陛下事兩宮以
孝待大臣以禮侍從知其邪正近習防其姦淫上愛其文出以

示御史中丞滕元發曰此文不減王陶王陶東宮舊臣上所信重故以公擬之而陶亦雅相知嘗薦公明經術知治體切直不阿宜僉顧問後爲三司使又奏爲其判官不從熙寧初有詔侍從之臣各舉所知范蜀公時爲翰林學士以應詔除利州路轉運判官執政有沮議者上曰鮮于某有文學執政曰陛下何以知之上曰有章疏在執政乃不敢言王荆公用事公上疏言時政之失曰可爲憂患者一可爲太息者二其它逆治體而起人心者不可概舉又曰陛下聰明過於文帝而羣臣無賈生之才西方議用兵公以兵將未擇關陝無年未宜輕動乃移書勸安撫使宜如李牧守鴈門故事遠斥堠謹烽火堅壁清野使寇無

所獲密戒諸路選將訓兵蓄銳俟時須其可擊而圖之安撫使
不能用師果無功未幾慶州兵叛關中震擾巴峽以西皆警成
都守與部使者爭議發兵屯要處書檄旁午於塗公一皆止之
示以無事蜀人遂安公以劔門形勢之地當分權以制內外今
帥劍南者舉全蜀之權以畀之非便宜循唐制成都益昌各自
置帥以消姦雄窺伺之心書累上不報是時初作助役青苗之
法詔諸路監司各定所部役錢之數轉運使李瑜欲以四十萬
緡爲額公以利路民貧用二十萬緡足矣與瑜論不合各具利
害以聞上是公議謂判司農寺曾布曰鮮于某所定利路役書
可爲諸路法遂罷瑜而以公爲轉運副使兼提舉常平農田水

利差役事而青苗之法獨久之不行執政怪焉亟遣吏問狀公曰詔書稱願取卽與利路之民無願取者豈可強與之耶歲滿有旨再任及罷又畱之轉都官郎中西京左藏庫使知利州事周永懿貪暴不法前使者憚其凶狡置不敢問公具得其姦贓卽遣吏就捕械送于獄永懿竟除名編管衡州初利州以兼益利路兵馬都監故事武臣爲守至是公上言乞堂選文臣知州事別置路分都監以懲永懿之弊又言劔門關葭萌寨使臣兼知縣事類多不習文法宜各置令專領邑事詔皆報可遂爲定制其他深計遠畫公私便之而人所不及者益不可悉數十餘年使若有欲變其法者父老泣曰老運使之法何可變也益公

之猶子師中嘗使利路故民以老運使別之公奉使九年閭爲
名郡方新法初行諸路騷動而公平心處之鄉人無異議者今
翰林蘇公以謂上不害法中不傷民下不廢親爲三難云移京
東西路轉運副使過關陞見面賜三品服遷司封郎中時河決
曹村梁楚之地被害公移檄諸郡具爲科條所以拯救之術甚
備議者或謂浚河東流入海自其本往宜勿復塞公曰東州平
衍充鄆單濟曹濮諸河其所歸納惟梁山張澤兩灤夏秋霖潦
猶能爲害矧縱大河衝注於中則諸郡生聚其爲魚乎乃作議
河一篇數千言上之又乞下澶州早行閉塞上皆嘉納初京東
分東西兩路後以財用虛贏不相通和詔復合爲一路升公爲

轉運使更盡領其事召還賜對勞問甚厚上欲畱公京師而公固求守郡遂除知揚州事官制行換朝請大夫未幾坐舉吏受賕免降爲朝散大夫方在譴中又聞故吏以賕敗者或勸公宜懲前事自陳公曰吾專刺舉十二年所任吏四百餘人寧盡保其往耶然旣已薦之於朝豈可反覆爲自全計卒不首也復朝請大夫管勾西京畱守司御史臺公之在西京也今樞密范公亦領臺事而司馬溫公提舉崇福官三人相得歡甚摺紳慕其游及二聖臨御圖任老成於是拜溫公爲門下侍郎起范公帥環慶復除公爲京東轉運使溫公曰子駿不當使外顧東土承使者聚斂之後民不聊生煩子駿往救之耳比公行又謂所親

曰福星在矣安得百子駿布在天下乎公至則奏罷萊蕪利國
監鐵冶乞變鹽法依河北路通商遂勾當公事之刻薄者二人
發濰州守姦賊東人大悅又言高麗朝貢可令瀕海州郡爲禮
不煩朝廷若其自欲商賈聽往閩越州麗人無以辭矣召還爲
太常少卿三省太常會議神宗配享功臣或欲用王荊公吳正
憲公者公曰富文忠公勲德終始天下具知宜配食議遂定因
上言本朝舊制配享雖用二人宜如唐用郭子儀故事止用寓
公一人詔從之元祐元年明堂禮畢拜右諫議大夫旣拜命卽
以辯邪正之說爲獻其言君子小人相爲消長之理甚備又言
近歲人物衰少凡一官有缺差擬爲艱宜許六曹寺監長史各

舉僚屬嚴其論薦之法亦以見達官之所舉而執政大臣可以
優游論道蓋宰相擇臺省長官臺省長官薦舉僚屬知人安民
之道於斯爲得自保甲之法行民以藝能入等授班行者卽爲
官戶免役時祥符縣至一鄉止有一戶可差公言僥倖太甚宜
依進納官例充役如故須其陞朝乃免有旨治諫官直廬不得
與東兩省相通以防漏泄公上言昔漢武帝嘗命文學之士遞
宿禁中凡公府欲行之政俾之閱視辯論中外相應以義理之
文故文章爾雅訓詞深厚炳然與三代同風唐太宗臨御每遇
宰相平章事必命諫官俱入小有頗失隨卽箴規故正觀之治
企及三代今乃屏置諫官使與兩省不相往還恐非朝廷開言

路以副聖上納諫之義，又劾大臣不宜輔郡者，請加譴黜以示天下。其餘乞復制舉，分經義詩賦爲兩科以求人材。罷大理獄以省事，罷帳司檢法以省官。嚴出官之法，減特奏名人數以抑濫進。再言京東鹽禁不便宜，弛以利民。許蔡河撥發統制縣道以便程督，罷戎瀘保甲以卹民力。行浙中舊法以省漕運。復三路義勇以寬保甲，沙汰學官以熄異議。事多施行。明年春以病不任朝謁，乞郡數，賜告不俞。章三上乃拜集賢殿修撰知陳州。事仍有旨滿歲除。待制夏五月辛未終于州。寢享年六十有九。累勳柱國，賜爵侯。諡男。前數日語諸子曰：「吾心無不足者，惟以不得歸老陽翟別著易說爲恨。無它言，公忠亮果斷出於天。」

性自小官以至進擢數上書言天下事咸具利害移諫官御史其言或用或不用未嘗小加損益爲政以經術自輔所至有迹其去民追思之熙寧元豐之間士大夫驚於功利更其素守者多矣公雖屢更使指而屹然於新進少年之中號爲正人晚登侍從益厲鋒氣知無不言在職九十餘日所言當世之務略盡嗚呼使公不疾病且死得大用於時其勲業豈易量哉然公起諸生仕爲諫官供奉仗內言聽計行天下受其賜比夫當軸處中初無益於縣官者蓋得失相萬也由是言之雖病疾且死弗克大用於時亦可以無憾矣喜推轂士士之游其門者後皆知名治經術有師法論注多出於新意晚年爲詩與楚辭尤精秦

山孫復嘗與公論春秋歎曰今世學經術未有如公者蘇翰林
讀公八詠自謂欲作而不可及讀公元誦以謂有屈宋之風今
天子賜之詔書亦曰學足以邇古才足以御今智足以應變強
足以守官深於經術達於人情又曰金石之節皓首不衰則公
之德善於是可考也所著文集二十卷傳二十卷周易聖斷七
卷典說一卷治世讜言七卷諫垣奏藁二卷刀筆集三卷其餘
未編次者尙多娶陳氏太常寺太祝藩之女恭儉婉孌治家有
法封某君前公一年終男五人復早卒頡河南府偃師縣尉羣
鳳州司法參軍綽假承務郎焯未仕皆有學行而頡尤自立士
大夫多稱之女四人長早卒次適趙氏次適蒲氏皆前卒次適

永安縣主簿張球孫男一人崧孫女二人公兩得任子恩皆以子兄之子故焯猶未仕凡嫁內外親族之女若干人諸孤將以某年某月某日葬于潁昌府陽翟縣大儒鄉高村之原前期頡以書走汝陽請狀公之行義將乞銘於知公者某被遇最厚又嘗辱薦於朝議不敢辭輒加論次而公之行能謀議過人者甚多難以具舉取其可考不誣繫國家之大者著之以告夫當世之君子云

徐君王簿行狀

君姓徐氏諱某字成甫其先泰州興化人遠祖湘自興化徙揚州之高郵家焉湘生嗣嗣生亮亮於君曾祖也咸不仕祖元吉

有厚德鄉人尊愛之終於高郵軍司理父格前通州司戶參軍
參軍磊落豪縱不耐細務自司理之沒事計多以委君家既右
族金錢邸第甲於一鄉公私斂施交錯重複君操其綱維批贅
補隙抉剔貪負日縱月收市筭么麼無所遺漏於是參軍以爲
能謂所親曰吾有子矣將不復與家事熙寧某年以入粟試將
作監主簿又五年始至京師授潭州寧鄉主簿皆非其好也君
事親至孝四時甘新未進不以輒嘗待昆弟族人一主於恩義
叔父某爲不悅者所構刺史惑之會有人誣君笞殺家奴刺史
大怒以君屬吏諷并致其叔君曰罪緣某不繇叔也榜脇萬端
不服獄吏嘉之爲請於刺史得脫友人以貧不能葬其親者君

聞之曰是余過也卽爲買田出錢以辦喪事而友人之親得葬者五喪此其可見者也至於字親族之孤急交遊之難賴其施者甚眾而能諱不自言雖妻子有不得而知者矣雅性寬厚給使阜隸或時犯之殊不介意婚姻之事不幸至於甚難處者君指顧從容顏色不變而事以兩全繇此見其材智度量信有以過人者焉頗涉傳記陰陽醫藥筭術之學無所不窺晚節尤厭人事思與佛侶處士杖屨相從蔬食清淡爲忘年之計惜乎未及而卒矣實熙寧八年閏月十八日也享年四十一初娶張氏有賢德前君若干年卒更娶蔡氏節行益奇君病殆時至取毒藥自引後君二日卒於是又見所以刑諸家者也子男五人曰

文通文仲文剛文饒文昌女三人曰文美文英文柔初君好學
間聚書幾萬卷欲舉進士而父祖不從乃嘆曰子當讀書女必
嫁士人其後四子藝業蔚然有成而文通尤自立又以文美妻
余如其志云葬有曰矣文通泣謂余曰惟先人行義可質諸幽
明不幸以多貲之故士大夫以嫌自戒者或不能究言諸孤良
懼泯滅盍爲我圖之余旣相與泣下因掇其尤著白者爲行狀
以俟夫自信之君子考而誌焉

蔡夫人行狀

夫人姓蔡氏楚州山陽人故潭州寧鄉主簿徐君諱某之妻而
守祕書省校書郎致仕諱中正之女也幼聰敏有才藝父母獨

奇愛之異於他女年十四適同郡環生生故疾病成禮十六日而卒夫人雖幼居喪事舅姑孝謹如成人已而其舅又卒爲之斬衰蔬食誦佛經無復更嫁意於是其母與諸昆弟率親族數十人卽環館奪之曰若十四而適人十六日而夫死爲夫之喪三年舅之喪又三年若爲人婦亦至矣又不欲更嫁無迺過乎且環父子俱亡嗣若雖欲守志將誰與居夫人悲哀迫不得已遂去環氏一年而歸徐君徐君高郵人號佳士所與遊者皆一時之豪夫人旣得賢夫所爲益進宗族甚重之俄而君病且殆夫人曰身踐二庭女子之辱也矧又如此生復何聊吾其沒矣因不食潛使一媼市砒霜給曰吾侍君疾將佩之以壓惡氣媼

爲市與之遂以白服家人大驚亟求解樂以進夫人曰是豈復
欲生耶趨使持去強之終不肯下徐君沒二日而夫人亦卒矣
卒之日里巷相傳皆歎曰異哉若人者豈前古所謂烈女者歟
時熙寧八年閏月二十日也在三十九夫人性卓犖斬斬不爲
兒女事旣生大家而所適又皆富贍金繒服玩取足於身餘輒
以散親族作佛事無一毫愛惜旣死篋中索然徐君前娶張氏
妾生一女一男夫人所出才一女而已旣撫諸子猶己之子又
奉張母虞氏時節勞問如己母故其卒也諸子洎虞氏及余哭
之如君云仲兄繩亦以操行知名於時出殯自山陽屢來因得
訊夫人之舊事而并余之所見書焉

清海集 卷三十六
圖通禪師行狀

師諱懷賢字潛道俗姓何氏温州永嘉人也在襁褓中能合掌
僧坐父母異之時郡之西山有僧嗣仁修西方白蓮淨觀行甚
高眾歸之勤號嗣仁社主乃以師從社主出家天禧二年普度
天下僧遂落髮受具戒時年四歲也師既得法器又幼得高僧
爲之依歸藝行日進同輩無與比者有講肄輒往聽未幾盡傳
其學及長慨然有游方之志卽辭社主去遍參知識所至處延
居上遊最後見達觀禪師曇穎於潤之因聖遂得其法皇祐初
潤守王公琪雅聞師名乃具禮請傳法於甘露而太平之繁昌
亦以隱靜召師以甘露近城邑而隱靜僻在深山中遂從太平

繁昌之請開堂於郡之瑞竹院初師從瑞新禪師遊十有二年具知宗門承襲賓主之事自謂無以復加矣比至達觀會中聞所開示類皆世緣俗諦或雜以鬼瑣談諧之言又嘗以事斥一僧去每升堂輒追罵至累日猶不已師心陋之乃潛詣文室請達觀曰爲人天師當只說法柰何預以世俗閒事且僧有過斥去則已矣何足追罵至累日乎達觀領而不答師因此省悟至是以信香嗣達觀法云居隱靜七年王公移守金陵復召師以清涼辭不赴明年達觀自明州雪竇徙金山之龍游州乃以雪竇召師旣行道過龍游畱一月會達觀示寂潤州之衣冠縉素因以狀詣郡守請止師繼焉而龍游王者故事當稟於朝廷郡

守以白部使者上之報可龍游自火災之後棟宇灰燼瑞新禪
師實中興之功未旣而卒師至修新公故事大興土木積八年
殿堂廊廡皆具今官室之盛冠絕淮海者蓋始於新而成於師
然其地當孔道客至無虛日師頗厭之熙寧元年遂謝去隱於
金牛山去丹陽縣數十里人迹罕至事委其徒覺澄主之師一
切不問庭養猿鶴孔雀鸚鵡白鷗皆就掌取食號五客各爲一
詩贈之士大夫欲相見者就山中訪焉三年劉公述謫守九江
以圓通召師師素聞匡廬山水之富常以未至爲恨得疏欣然
從之題詩壁閒而其卒章云歲晚當期返竹門至圓通一年果
謝去復還金牛明州復以雪竇來請固以疾辭史館刁公約謂

師曰雪竇東南名山明覺達觀嗣居其地二十年閒請者三至可謂勤矣今又不赴無乃孤其望乎師素厚刁公心善其說遂登舟由海道去北轉海門遇大風卒起風檣摧敗夜漂至慈溪之東岸舟破從者百餘人皆散走師獨安坐水中不動從者還救之乃免居雪竇一年復謝去還金牛以元豐五年九月甲午示寂俗壽六十七僧臘六十三覺澄等卽以某月丁未葬師于金牛之西壠累墳遂塔焉師操行卓越而遇人有恩意雖對賓客未嘗與眾異饌夜輒從眾僧寢于堂中不入丈室雅性樂施行得金錢緡帛率緣手盡其徒以此歸之又多才藝工於詩字畫有法閒居絕口不掛事事雖交至錯出處之晏然無不集者

當時賢士大夫聞其風皆傾意願與之游始用參知政事高公若納奏賜紫方袍又用節度使李公端愿奏賜號圓通大師凡十被請從之者四皆天下名山巨刹道化方行輒託事隱去州郡雖欲挽而留之不可得也弟子五十有五人所著詩頌文集凡五卷又撰次其自少至老出處之迹一篇號釋耄典記以自見云謹狀

錄寶林事實

寶林禪院始於宋元徽中浮圖惠基得郡人皮道輿所施宅因山以造梁大同中賜號寶林寺唐會昌中廢乾符中復興更號應天寺本朝因之其山一名寶林一名飛來一名龜山上有鰻

并歲旱禱雨輒應事見圖記熙寧十年八月丙申一夕火棟宇
灰燼十月給事中集賢修撰程公來領州事登其山故址而歎
悼之於是郡之衣冠縉素數十人詣州自陳請修復故寺公爲
具其事以聞逾月賜號寶林禪院以明年三月興工復率僚屬
親至其上勸勞之衆皆感激思奮奔走承事下至刮摩塼石之
技咸盡其能而貧富各以財力施其制蓋卽山巔爲多寶塔塔
有環屋其北爲羅漢殿殿旁如塔之制其南降而夷山腹爲法
堂法堂之東爲寢堂又東爲方丈又降而南得平地爲佛大殿
殿有兩廡以達于東西序前爲三門其左則鍾樓幡刹廚庫之
所相望也其右則轉輪經藏僧堂之所相屬也繚以高垣甃以

方璧未輸再期而金石土木之觀侈於舊三倍都人士女俯仰
瞻歎疑有神鬼相之凡吳越之間塔廟以火廢者其復未有如
寶林之遽者也蓋越之城南左右數十里疾馳屹立皆屬於秦
望而秦望又率其左右之山因鑑水謁于越越城之中能與秦
望爲主客者凡三山臥龍寶林戴山也臥龍爲郡守所治而戴
山少東不能正受秦望之謁是越之形勢自臥龍已下未有如
寶林者其地如此宜其廢不踰時而復興矣方寺之未火時便
房曲道各自爲家山川之勝敝虧隔闕者十六七而前世詞臣
才士如元稹李紳徐浩之徒猶誦歎不已見於篇章矧今制度
一新神工天巧廓然披露可以岸巾憑几而盡得之使數子而

在其所誦歎又可知已然則前日之廢豈非所以爲今日之興乎公一日率賓客至其上顧謂觀曰寶林之中興天也余何力焉雖然不可使其事掩抑不少概見於世前日賜號革爲十方集賢孫公旣爲之記矣今棟宇垂備將乞文於集賢林公子亦與見吾事者也盍撫厥實以請庶幾二集賢之文相與傳於無窮不亦偉歟觀承命掇其大概并公之意而次之號曰寶林事實以獻諸集賢云

代蔡州進銀絹狀

大鈎播物難酬垓北之恩墜露增流以致眇微之意前件物山澤所寶箱篚攸資屬茲誕聖之辰式備充庭之貢

代蔡州進瑞麥圖狀

勘會本州自春已來屢得雨澤已於某月日具狀奏聞訖今來二麥並已成熟地無高下所收斗斛數倍當年及諸縣節次申送致麥苗有一莖二穗或三穗其多有至五穗者甚多父老等皆云數十年來無此豐熟亦未嘗見有麥苗一莖至數穗者以此見二聖臨御已來功化日新利興害去善氣充塞致此嘉應臣待罪郡守目覩其事不敢隱默謹畫成圖子一本隨狀上進以聞謹奏

代薦蔡奉議奏狀

竊以管下居住具位蔡駟少以文翰見推流輩仕宦所至皆有

能聲安貧守道恬於進取有士如此豈敢不言伏望聖朝特賜
考察擢充臺省清要任使

淮海集卷三十六終

淮海集卷三十七

書

上王岐公論薦士書

門下相公閣下某淮海一介之士行能無取比汲汲焉惟犬馬之養是營釜鍾之祿是干行年三十有七矣而脂韋汨沒德不加充學不加進可謂無以別於常人者豈復有意求知於搢紳先生之門哉比者先人之友喬君執事奉使吳越道過淮南具言常辱相公齒及名氏屬喬君喻意使進謁於門下夫布衣之賤獲見知於宰相此古人所以書函上日掃門而求者也顧某之不肖何以辱此幸甚幸甚然嘗聞之禍莫大於蔽賢福莫長

於薦士。漢武之大臣其功莫如衛霍，其酷莫如張湯。青去病之後，侯失國除，其傳不過一再，而湯之子孫茅土相襲逮乎東京。何哉？一身之功過，不足以易天下之利害，故青去病受蔽賢之禍，而湯獲薦士之福。雖微二三子，古之人其孰不然哉？一沐三握髮，一飯三吐哺，起以待士，猶恐失天下之賢人，蓋其封於少昊之墟，曲阜廟食者三十有四世，其別封者又爲凡蔣邴茅胙祭之國。夫周公之求賢，豈有意於求福哉？天之報施，自當然耳。伏惟相公輔先帝已來，陰陽調和，廢政具舉，吏民効職，夷狄賓貢，其度數聲名文物之盛，粲然與唐虞同風，逮承顧命立今，夫子宗社至計，定於從容已事，缺然若無所與其功德，可謂冠百

辟而通神明矣。當此之時，雖持尊養嚴卻客疎士，固於盛致未可云損。然猶區區訪諏發於至誠，如某之不肖，尚掛左右之餘論。又况盛德尊行，魁奇儔偉之才乎？誠推所以辱賜不肖之意，恩天下所謂盛德尊行，魁奇儔偉之才，抱能而不試，已用而未顯者，兼收並進之，使朝野內外才能各當其分，無一人失其所者，則相公雖不求於天，天之所以報王氏之子孫者，當不下於周公矣。惟相公察焉，干冒鈞嚴，俯伏惟命，不宣。

上呂晦叔書

五月日進士秦某謹再拜獻書知府大資閣下。某聞天下之功成於器識，來世之名立於學術。古之大臣以道事君，不可則止。

未始有意於功名然其器識學術博大而精微則功名歸然與
時自至雖欲深閉固拒揮而去之不可得也昔漢昭宣之時霍
光以宿衛之臣任漢室之寄大器將傾徐起而正之神色不變
此其器識實有以過人者然操持國柄不知消息盈虛之運身
死肉未及寒而宗族滅矣則學術不明之弊也其後順桓之間
李固以一時名儒位居三事扼姦臣之吭而奪其氣此其學術
真有古之遺風然易舉輕發不能定大計於無形至爭以口舌
申之書牘事固不就身亦隨之喪焉則器識不宏之弊也非特
二子爲如此大抵西漢之士器識優於學術故多成功而名不
足東漢之士學術優於器識故多令名而功不成夫君子以器

爲車以識爲馬。學術者所以御之耳。西漢之士如環人之車。馬以馱馱。驅通道上峻阪。無所不可。然而日暮途遠。倒行逆施者有焉。東漢之士如豆泰氏持策攬轡。圓旋中規。方折中矩。然而車弊馬羸。轉薄於險阻之間。則固已敗矣。某狂妄嘗以此說推論歷世豪傑之士。又以默觀當今之時。而搢紳先生有告某者。以謂器足以任天下之重。識足以致無窮之遠。學足以探天人之赜。術足以偶事物之變。如古之所謂大臣。非閤下不足以與於此。又曰。閤下之道如元氣行乎渾茫之中。其發爲風霆雨露者。特糟粕耳。某時方食聞之。投匕箸而起。遂欲身從服役之後。求備掃洒之列。而困於無介。紹莫獲自通。竊伏淮海。抱區區之

願缺然未厭者有年矣。比者天幸閣下來守是邦，而某邱墓之
邑實隸麾下。是以輒忘賤陋，取其不腆之文錄在異卷，贄諸下
執事。又述其願見之說爲書先焉。夫大治無棄金，大陶無棄土。
江海不卻水，王侯不遺士。某雖不能廉小謹曲，以自託於鄉閭，
然古人所以處廢興而擇去就者，竊嘗講其一二矣。儻閣下不
賜拒絕而辱收之，請繼此以進于冒台，嚴俯伏待命，不宣。

謝王學士書

史院學士閣下。某愚不自揆，竊嘗以謂衣冠而稱士者，宜有以
異於流俗，而以古人自期。故凡方冊所載，簡牘所存，不見則已，
苟有見焉，未嘗不熟誦其文，精覈其義，縱觀其形勢，而私掇其

英華敝精神勞筋力不能自休已者十年於茲矣然志大而才
不揜事左而身益困每觀今時偶變投隙之士操數寸之管書
方尺之紙無不拾取青紫爲宗族榮耀而已獨碌碌抱不售之
器以自濱於饑寒鄉人憫其愚而笑之干祿少年至指以爲戒
雖某亦自疑焉因計曰劒工之惑劒劒之似莫耶者惟歐冶能
名其種王工之眩玉玉之似碧盧者惟猗頓不失其情夫宗工
碩儒亦後進之歐冶猗頓也何重惜一見以質其胸中之疑乎
於是試取其所爲文投執事而諸公見之乃大稱借以爲非世
俗之所知復激勸之使卒其業故前輩諸公在東南者多得與
之游焉然某之私意尙有所不滿者獨以未見閣下也前日復

衣食所迫求試有司遂得進謁左右屬賓客盛集不獲薦其區
區方謀繼見而閣下固已得其鄙文於從游之間伏蒙猥賜薦
寵以爲可教亦如諸公所云某於是自決不疑益知前志之不
謬俗議之不足卹而古人爲可信也古之人有立行著書而舉
世莫或知者猶業之如故以俟後之君子況不至於是者耶天
不爲人惡寒而輟其冬地不爲人惡險而易其廣君子不以小
人之匈匈而易其行某雖不肖竊誦此久矣自擯棄以來尤自
刻勵深居簡出幾不與世人相通獨念昨出都會閣下在告私
懷惓惓有所未畢適有西行之便故復略而陳之并以近所爲
詩文合七篇獻諸執事伏惟閣下道德文章爲一時君子之所

望鄙陋之迹固已獲進於前日矣。宜更賜指教。水導而木植之。使駑驂蹇服。知所趣向。不繆於先進之迹。亦君子樂育人材之義也。惟深賜憐察。幸甚幸甚。

謝曾子開書

史院學士閣下。某不肖竊伏下風之日久矣。顧受性鄙陋。又學習迂闊。凡所辛苦而僅有之者。率不與世合。以故分甘委棄。不敢輒歎於縉紳之門。比者不意閣下於遊從之間。得其鄙文。而數稱之士大夫聞者。莫不竊疑私怪。以爲故嘗服役於左右。而某未嘗一望閣下之履舄也。竊觀今之士子。峩冠大帶。求試於有司。殆五六千人。學官儒館。以教育自任者。無慮百數。其因緣

親故以爲介紹。談說道真。以爲贊獻善詞。令以干謁者。俛理色以叩閤人。冒汗忍恥。僥倖人之已知者。迹相仍袂相屬也。然而得善遇者。十無五六。與之進而教誨者。十無二三。至於許之以國士之風。借之以齒牙餘論者。蓋百無一二焉。其售愈急。其價愈輕。亦其勢之然也。某與閤下非有父兄之契。姻黨鄉縣之舊。介紹不先。贊納不前。謁者未嘗知名。閤人莫識其面。而閤下獨見其骯髒之文。以爲可教。因曲推而過與之。傳曰。鳴聲相應。仇偶相從。人由意合。物以類同。嗚呼。閤下之知某某之受知於閤下。可謂無愧乎今之人矣。前日嘗一進謁於執事。屬迫東下。不獲繼見。以盡所欲言。旋觸聞罷。遂無入都之期。燕居閒處。獨念

無以謝盛意之萬一。輒因西行之便略陳固陋。并近所爲詩賦
文記合七篇。獻諸下執事。伏惟閣下旣推借之於其始。宜成就
之於其終。數灌溉以茂其本根。削垢翳以發其光明。不閒疎賤
而教之以書。使晚節末路獲列於士君子之林。則某與閣下非
特無愧於今之人。又將無愧於古之人矣。古語有云烹牛而不
鹹。敗所爲也。此言雖小。可以喻大。惟閣下裁之。

與喬希聖論黃連書

某比聞公以眼疾餌黃連至數十兩。猶不已。不知果然否。審如
所聞。殆不可也。某頃年血氣未定。頗好方術之說。讀醫經數年。
嘗記釋者云。服黃連苦參久而反熱。甚以爲不然。後乃信之。蓋

五味入胃各歸其所喜故酸先歸肝苦先歸心甘先歸脾辛先歸肺鹹先歸腎入肝則爲溫入心則爲熱入肺則爲清入腎則爲寒入脾則爲至陰而血氣兼之皆謂增其氣不已則臟氣有所偏勝有所偏勝則必有所偏絕黃連苦參性雖大寒然其味至苦入胃則先歸於心久而不已則心火之氣勝火勝則熱乃其理也眼疾之生本於肝之熱肝與心爲子母夫心爲子肝爲母心火也肝亦火也腎孤臟也人嘗患一水不勝二火今病本于肝而久餌苦藥使心有所偏勝是所謂以火救火命之曰益多其不可亦明矣夫藥所以療病其過也適所以爲疾聞比初作時十已損其七八正宜節藥慎護飲食以俟其自平非如浸

疵潰癰可以忽然一朝去也輒具以進惟畱意而聽之無忽

與鮮于學士書

昨蒙左右不以觀之不肖猥賜論薦以備著述之科假借過當
伏增悚懼觀重惟結髮以來明公以先人之故比諸子弟而教
誨之受性狂妄動取悔尤常恐一旦蒙擯絕則內傷先人之聞
上負門下之義死不瞑目敢圖始終假借以及於此賜非望始
榮幸實深論報無緣愧懼滋甚韓退之與陳給事書云始之以
日隔之疎加之以不專之望以不與者之心而聽忌者之說閤
下之門由是無愈之跡矣觀之去門下于今七年明公自畱臺
奉使京東入爲九列進拜諫議大夫供奉仗內士因緣介紹有

生人惟此
樂雖死勢
位富厚不
與焉

候門牆希望明公一顧者，肩相摩跡相接也。觀以聲聞過情，深爲同進所忌，閉關卻掃，罪惡日聞。然則明公之門，宜其無觀之迹矣。而詔書比下，明公首以觀充賦，乃知君子之所爲，自有常度。豈以顯晦數疏而易其意哉？汝南雖當孔道，人事絕少，風氣和平，魚稻蔬菓，不減於淮海。士子亦樂於相從，養親讀書之計，極爲安便。但創置之官，居處什物之類，百色皆無，自供職已來，千乞營繕，殆無須臾之閑，久不獲進，左右之間，緣此故也。伏望垂悉幸甚。

自承拜命，卽欲致左右之間，屬守將驟易日迫賤事，乃爾後時。皇恐無地，議者謂今中書舍人皆以伯仲繼直西垣，前世以來

要言不煩

未有其事誠國家之美非特衣冠之盛也除書始下中外欣然
舉酒相屬況如觀者自先舍人已來獲備服役之列其爲慶慰
何可勝言引領門仞但有傾倒而已

婚書

早年擁篲嘗趨大丞相之門末路紬書實佐先翰林之事重以
世母出於伯姜旣事契之久敦宜婚姻之申結敬承佳命增慰
夙心

海集卷三十七終

淮海集卷三十八

記

御書手詔記

元豐元年八月詔以先臣某爲天章閣待制環慶路安撫經略使三年四月環州肅遠寨募家白子等剽屬羌構兵馬亂攻殺旁族先臣遣第二將張守約走馬承受陸中招降之誅其不聽命者於是羌族始定而亡入夏國者凡三百人復遣守約屯寨上檄夏人使歸其眾夏人承命震恐以其眾歸初募羌之叛也附置以聞有詔得亡者無小大長少皆卽其地斬之至是斬其酋豪百二十有二人而錄其脇從幼弱婦女百四十有二人請

于朝詔皆原之既又別賜手詔褒論先臣跪捧伏讀感激涕下
退謂臣等曰我本孤生蒙上識拔寵遇如此白度無以報萬一
惟與汝曹共誓捐軀而已明年先臣下世臣等銜奉遺訓夙夜
殞越念無以致區區者輒求金石具刻明詔以爲不朽之傳蓋
亦先臣之念也昔唐相權德輿嘗讀太宗所賜手詔至流涕曰
君臣之際迺爾耶臣以爲萬世之後當有讀明詔而感動復如
德輿者矣豈特今日爲百執事之勸哉六年月日承務郎臣俞
次皋記

五百羅漢圖記

五百羅漢圖一軸入定於龕中者一人○蔭樹鉢坐而說法者一

人左右侍聽者八人說經者六人課經者六人課已而收經與
誦而倚杖者各一人環坐指畫而議論者塵揮手杖支頤相嚮
而談者各六人歸依寶塔者五人和南合座者六人稽首舍利
光者八人飯餓鬼者四人食烏鵲者施魚鼈者各五人雲升者
六人指現五色光者鉢現白光者泉湧於頂者火燃於踵者袒
而洗耳金環手隨求而立者各一人受齋請者七人受龍女珠
獻者六人受兩貌花獻者四人受往生花獻者七人受衣冠從
三牛謁者五人受胡輸驢者七人受胡從兩橐駝而致琛者四
人受海神跪寶者五人騎龍者跨虎者乘馬者象駕者獅子馭
者各三人爲犀說法者一人後座者三人植錫而座巨蟒上者

一人背樹矚山鵲者六人注孫升者仰鳳集者閱麋鹿者各四人俛伏獮者翫舞鶴者各五人擷菡萏者一人從後者五人書蕉葉者五人持蕉葉而涉筆者二人焚香而茗飲者六人臨流而滌鉢者三人滌已而持歸者一人浣衣者就樹絞衣者浣已而歸者將浣而進者隔岸而覘者各一人洗屨者後洗而納屨者振衣而去者各一人削髮者爲削髮者沐而待者解衣者旣解收衣者各一人補毳者二人操刀尺者一人治綫者三人泉涌於石遠近而觀者十六人度石梁者三人欲度者四人行杖錫者二人導者二人贊者三人芒屨檐簦而歸者三人束裝而行者一人或坐或行或立踟躕歛欠杖柱笠負數珠白紵山曲

水隈塗觀而卒遇者十八輩合一百二十有三人或坐或行或立背樓觀憑欄楯據危迫險俛瞰仰睇直視轉盼側睨旁顧近相曰遠相望者二十八輩合一百三十九人凡羅漢五百人而佛處其中焉佛之旁又有寶冠珠絡持如意執蓮花座貌象者菩薩二右袒徒跣曲拳和南而後侍者弟子十瞻贊而前謁者十六甲冑椎髻挺劍秉鉞立左右者善神二別三十有一焉又童子有抱經室王茶僞荷策持餅典湯徹器凡十有六鬼有馭龍馭馬象受施食送齋書鱗身鳥喙衣短後隱樹而窺者凡十有四雜人物有白衣胡跪獻花香珍怪衣冠而謁驅牛以從載犀象挈筐篚而進被甲服弓矢愕而瞻歎者凡十有九鳥獸有

鳳鶴鵲烏龍虎犀象獅子馬牛橐駝蟠螭戲狴猿獠大小四十
有三。然以羅漢爲主。故號五百羅漢圖。世傳吳僧法能之所作
也。筆畫雖不甚精絕。而情韻風趣。各有所得。其縣密委曲。可謂
至矣。昔戴逵常畫佛像。而自隱於帳中。人有所臧否。輒竊聽而
隨改之。積數年。而就余意法能亦當研思若此。然後可成。非率
然而爲之淺也。余家旣世崇佛氏。又嘗覽韓文公畫記。愛其善
敘事。該而不煩。緝詳而有軌律。讀其文。恍然如卽其畫。心竊慕
焉。於是倣其遺意。取羅漢佛之像而記之。顧余文之陋。豈能使
人讀之。如卽其畫哉。姑致敘之私意云爾。元豐二年正月十五
日。弟子秦某記。

雪齋記

雪齋者杭州法會院言師所居室之東軒也。始言師開此軒汲水以爲池，累石以爲小山，又灑粉於峯巒草木之上，以象飛雪之集。州倅太史蘇公過而愛之，以爲事雖類兒嬉而意趣甚妙，有可以發人佳興者，爲名曰雪齋。而去後四年，公爲彭城復命，郡從事畢君景儒篆其名，并自作詩以寄之。於是雪齋之名浸有聞於時。士大夫喜幽尋而樂勝選者，過杭而不至，則以爲恨焉。杭大州也，外帶濤江漲海之險，內抱湖山竹林之勝，其俗工巧，羞質朴而尚靡麗，且事佛爲最勤，故佛之宮室，綦布於境中者，殆千有餘區。其登覽宴遊之地，不可勝計。然獨不至雪齋，則

人以爲恨何也。蓋公之才豪於天下，斥其棄餘以爲詞章字畫者，亦皆絕妙。一時讀而翫之，使人超然有孤舉遠擢之意。是齋雖褊小，無足取稱於人，而公所書詩實在其壁。士大夫過杭而不能一至其地，以寓目焉。是豈所謂喜幽尋而樂勝選者哉？以爲恨焉，宜矣。昔李約得蕭子雲飛白大書蕭字，持歸東洛，遂號所寘亭爲蕭齋。余謂後之君子將有聞雪齋之風，不可得而見者矣。豈特爲今日之貴耶？言師名法，言字無擇，泊然蕭洒人也。蓋能作雪齋從蘇太史遊，則不問可知其爲人。元豐三年四月十五日記之。

龍井記

龍井舊名龍泓距錢塘十里吳赤烏中方士葛洪嘗鍊丹於此
事見圖記其地當西湖之西淞江之北風篁嶺之上實深山亂
石之中泉也每歲旱禱雨於他祠不獲則禱於此其禱輒應故
相傳以爲有龍居之然泉者山之精氣所發也西湖深靚空闊
納光景而涵煙霏菱芡荷花之所附麗龜魚鳥蟲之所依憑漫
衍而不迫紆餘以成文陰晴之中各有奇態而不可以言盡也
故岸湖之山多爲所誘而不克以爲泉淞江介於吳越之間一
晝一夜濤頭自海而上者再疾擊而遠馳兕虎駭而風雨怒遇
者摧當者壞乘高而望之使人毛髮盡立心悼而不禁故岸江
之山多爲所脇而不暇以爲泉惟此地蟠幽而踞阻內無靡曼

之誘以散越其精外無豪捍之脇以虧踈其氣故嶺之左右大率多泉龍井其尤者也夫畜之深者發之遠其養也不苟則其施也無窮龍井之德益有至於是者則其爲神物之託也亦奚疑哉元豐二年辯才法師元靜自天竺謝講事退休於此山之壽聖院院去龍井一里凡山中之人。有事於錢塘與游客之將至壽聖者皆取道井旁法師乃卽其處爲亭又率其徒以浮屠法環而呪之庶幾有慰夫所謂龍者俄有大魚自泉中躍出觀者異焉然後知井之有龍不謬而其名由此益大聞於時是歲余自淮南如越省親過錢塘訪法師於山中法師策杖送余於風篁嶺之上指龍井曰此泉之德至矣美如西湖不能淫之使

疑是東坡
作

幽絕

遷壯如剡江不能威之使屈受天地之中資陰陽之和以養其
源推其緒餘以澤於萬物雖古有道之士又何以加於此盍爲
我記之余曰唯唯

龍井題名記

元豐二年中秋後一日余自吳興過杭東還會稽龍井辯才法
師以書邀予入山比出郭已日夕航湖至普寧遇道人參寥問
龍井所遣籃輿則曰以不時至去矣是夕天宇開霽林閒月明
可數毛髮遂棄舟從參寥杖策並湖而行出雷峯度南屏濯足
于惠因澗入靈石塢得支徑上風篁嶺憩龍井亭酌泉據石而
飲之自普寧經佛寺十皆寂不聞人聲道旁廬舍或燈火隱顯

草木深鬱。流水激激悲鳴。殆非人間有也。行二鼓矣。始至壽聖院。謁辯才於潮音堂。明日乃還。

閒軒記

建安之北。有山巋然。與州治相直。曰北山。山之南有澗。澗之南有橫阜。背山而面阜。據澗之北濱。有屋數十楹。則東海徐君大正燕居之地也。其名曰閒軒。去軒數十里。有田可以給饘粥。供絲麻賓婚燕祭之用。取具。君將歸而老焉。而求記於高郵秦觀。觀曰。士累於進退久矣。弁冕端委於廟堂之上者。倦而不知歸。據莽蒼而佃橫清冷而漁者。閉距而不肯試。二者皆有累焉。君雖少舉進士。而便馬善射。慷慨有氣略。天下奇男子也。夫以精

悍之姿遇休明之時齒髮未衰足以任事而欲就閒曠處幽隱
分猿狖之居廁麋鹿之遊竊爲君不取也乃爲詞以招之曰山
之雲兮油然作水循澗兮號不斂雲爲雨兮水爲瀆時不淹兮
難驟得念夫君兮武且力矢奔星兮弧挽月夜參半兮投袂起
探虎穴兮虜其子破千金兮購奇服撫劒馬兮氣橫出山之中
兮歲將闌木樛枝兮水驚湍鷹隼擊兮蛟龍蟠熊咆虎嘯兮天
爲塞四無人兮誰與言膏君車兮秣君馬軒之中兮不可以久
閒

芝室記

河南張倪老旣以其父宣義君命奉其母彭城君之喪殯于廣

陵石塔佛舍遂與其弟曼老沖老廬於殯側數月有芝生于廬中余聞而謁觀焉蓋附土而出者數本其色正赤澤而堅悍若傅髮彤余撫而歎曰天下之物固有未易詰其所以然者夫濡雨露而生被霜雪而死下芟而上蔓者草之常性也今芝亦草耳而學士大夫之家則生賢諸侯之國則生明天子之世則生徙之不可蒔之不能豈所謂未易詰其所以然者歟有浮屠聞而笑之曰是不然天下之物皆吾心也心之本體明白空洞實無一毫可得而有惟其覺真蔽於塵幻由是清激而升者爲想濁污而墮者爲情夫情想之於心猶珠鑑之有影像江海之有浪漚形固具存非其本矣故無窮如虛空有物如天地爰逮曰

月斗星金石草木之屬凡悅可於吾心意者皆善想之所變而憎惡於吾耳目者皆惡情之所生也吾聞彭城君承其先夫人之凶五日而以毀死諸子廬於殯側刺血書經哀動道路善想交感室爲生芝異於凡草理固然矣其又奚疑若夫善惡畢寂情想究空芝於此時瑞爲何物已而歎曰奇哉吾不能以告子矣余未嘗讀佛書固不知所論中否然竊惟其語宏博瓌奇有足觀者明年張氏兄弟服除而歸廣陵士大夫因號其廬曰芝室懼來者之不知也而囑余爲記余旣論次其事遂追疏浮屠之語而并載之倪老名康伯以召試中選今爲南都教授曼老名節孫前參海陵軍沖老名康道云

祖氏先塋芝記

大夫祖公無頗自西蜀使者得請以崇福祠官燕居于蔡將還朝謂高郵秦觀曰祖氏本幽州之范陽晉將軍逖實我遠祖其後稍徙深州至道閒始來居蔡今汝陽縣陽安鄉十里岡之源則我先府君之墓也元豐初有芝數十本產于塋中其後歲歲有之迄今不絕夫豈一氣之運偶然感發莫詰其所以然耶抑天時人事之際或有以致之也予其爲我記之觀曰草之有芝猶鳥之有鳳獸之有鱗從古相傳以爲瑞物今乃歲生於先塋之中者殆汝南和氣之應祖氏方大之祥其非偶然淩也何以明之汝南在漢爲佳郡陳蕃黃憲二許諸袁之徒實皆郡人俗

尙風節。輕勢利。士不守道。則妻妾恥之。故天下號汝南爲名氏之區。迨唐之世。始建彰義節度使。屯宿重兵。而李希烈、吳元濟、秦宗權之屬。盜有其地。王澤不流。民眊無知。父以弄兵詔子。兄以殺人誨弟。故天下號淮西爲盜賊之藪。皇朝受命。定都大梁。蔡去京師七驛。遂爲輔郡。百餘年間。良二千石接武而至。興學校。修貢舉。以宣布教化。故盛德尊行。魁奇俊偉之才。相繼出焉。蓋唐之舊俗浸微。而漢之遺風復起。當此之時。祖氏一門顯者數人。府君之仲弟士衡。掌誥掖垣。從子無擇。通籍內閣。大夫踐更。中外爲省名郎。作時膚使行。且登用諸子。森然多有植立其慶。未艾也。由是言之。芝爲汝南和氣之應。祖氏方大之祥。豈不

信然昔新豐市李興廬于父之墓左有紫芝白芝二本生於廬上柳宗元以爲孝治神化陰中其心克致斯事矧今芝出於股肱之郡侍從之家也哉宜得一時文學之士比物屬辭歸美於上度爲樂歌薦之郊廟追配元封齋房之篇觀也何足以與於此姑承大夫之命論次其事以備作者採擇而已府君諱士龍字德驤云元祐八年四月吉日記

羅君生祠堂記

羅君之爲江都以誠心爲主恥言鈎距惠文之事凡民有訟曲直徑淩於前不以屬吏註誤若小過輒誨諭遣去視鰥寡孤獨之有失其所者如已致焉黎明視事入夜猶不已或譏其太勞

君曰與其委成於吏民有不盡之情孰若勞予之耳目哉居數月政化大行民知其長者不忍欺給之訟者益少君乃出行諸郊所過召其耆老問以疾苦及所願欲而不得者爲罷行之始復大石湖改名元豐廣袤數百步溉田千有餘頃是歲大穰畝收皆倍於是遠近自陳願復陂塘溝渠之利者相屬君一切聽許親至其地與之經始築大隄以卻潮之患疏潦水而注諸江凡水利之興復者五十有五溉田六千頃而桑之以課種者亦八十五萬有奇徙其治於東南爽塏之地爲屋數百楹以其贏材新驛堠亭館之在境者又頗出私錢營致藥劑以給疾病之民所瘉至不可勝計歲或乾溢有禱羣祠雨暘輒應如響世益

謂神其享之歲滿代去其民思之不置乃聚而謀曰我民之德羅君至矣顧無以自效聞古有召伯者善治民民追思之至不忍伐其所憩之棠又有謝公者亦其流也嘗以斯城北築埭後人因名其埭曰召埭今埭實在江都之北境蓋卽其地堂畫羅君之像而祠之以慰吾民且曰使羅之名與召謝共傳而不朽不亦可乎眾曰善於是卽召埭之東法華佛寺置生祠焉羅君名適字正之台州寧海人學術有本末通於世務風節凜然國士也嘗再被召見皆以不合罷歸其蒞官行已所可書者甚有書在江都者以爲生祠記云

勅書獎諭記代

元祐二年夏五月詔以臣某知蔡州軍州事三年春盜發陳蔡
穎之閒甲而兵者四十餘人皆慄悍善鬪其渠魁頗能拊眾得
其死力每刦大姓之家獨取金幣斥其錢粟以予小民小民德
之樂爲囊橐通行饋食捕盜言以故稀復遇閒遇之又輒爲所
敗俄轉入淮南界光壽都巡御史素戰不勝其子死之奔仙居
縣尉朱記吏卒死傷甚眾旣而引還陳蔡穎之閒復擾於是
有旨合京西南北部使者督捕移將官於京東募弓箭手騎兵於
渭州增立賞格得其渠魁者官三班供職錢六十萬餘黨一人
四十萬是時諸捕盜官相望者十餘屯無晝夜夜不解甲而賊
眾詭秘出沒如神終莫能得臣旣陰布耳目察其所在又預募

將兵以備掩擊會謀知其區處而諸屯皆遠不可遽召於是令權節度推官翟元衡統所募兵夜從閒道去果遇賊於高佐之北斬其渠魁并其妻等六級梟於市元衡又與諸捕盜官圍殘黨於李曲殲其眾遯免者以次皆擒或自相屠殺棄屍於水中獲仙居縣尉朱記前後斬首凡三十四級生得者六人獲鎧甲旗幟仗械二百二十有七是時渭州弓箭手騎兵猶未至奏卻於途諸捕盜官各解去而陳蔡穎之閒安堵矣四年六月蒙恩賜勅書獎諭臣竊惟二聖臨御以來神功聖化鼓動海內陰陽調和菑害絕息臣於此時幸緣肺腑備位郡守偶因薄效遽賜褒嘉承命震驚榮懼交至敢憑金石具刻明詔傳示無窮又論

次其事而并載之元祐四年六月二十八日臣向宗回記

遊湯泉記

漳南道人昭慶隱湯泉山之八月集賢孫公謂其游曰漳南去
幾時已甚久且聞其所寓富山水盍往訪焉於是余與道人參
寥請從之具駿馬戒徒御翼日出高郵西郭門馳六十里宿神
居山之悟空寺神居高不踰三四引而股趾盤薄甚大旁占數
墟俗呼土山或曰昔老姥煉丹於此功成仙去今寺有石藥臼
者乃其遺物也又馳四十里宿黃公店從者以雨告止焉又馳
六十里次六合館壽聖寺之香積院院有龐眉老僧主之應客
淡然若無意於世者與之言心如其貌蓋有道者也又馳七十

里次真相院明日漳南來逆相勞苦如平生歡遂與俱行馳二十五里至湯泉館惠濟院院則漳南之所寓也景申遂浴於湯泉之墟西惠濟二百步周袤不踰一成有泉五一曰太子湯舊傳梁昭明所遊今廢於野一在居民朱氏家其三則隸于惠濟而惠濟三泉旁皆甃石爲八方斛竅其兩崖一以受虛一以泄滿泉輸其中晨夜不絕其色深碧沸白香氣襲人爬搔委頓之病浴之輒愈贏糧自遠而至者無虛時劉夢得和州記云地有沸井卽此泉也噫泉之爲湯者眾矣彼汝水驪山嘗爲乘輿後宮之所臨幸方其盛時綺疏璇題魚龍飛動眩人目睛勢徂事變鹿豕得而辱焉其僻昧不聞於是者又皆蔽於叢薄堙於土

塗抱清懷潔。歷千百年莫或稍試於用。二者皆有恨焉。獨是泉
出無亢滿之累。其仁足以及物。豈所謂無出而陽無入而藏。柴
立乎其中。與者歟。余三人者。旣嘉泉之近於道。又貪其有功於
塵垢疾病也。日不一至。再日必至焉。率以爲常。越三日。烏江令
閻求仁來求仁。余鄉友也。遂與俱行。東南馳八里。至龍洞山下。
棄馬而徒步。山形斗起。蒙籠曲道。尤難登捫。蘿進者五里。然後
至其山椒。是日風噎。望建業江山。蟠龍踞虎之狀。皆依約而得
之。自山椒轉而西南。盤紆徑復。又二里而至龍洞。其上巉巖崆
岑。不可窮竟。門則大穴也。漸下十數丈。窅然深黑。日光所不及。
揭炬然後可行。腹中空豁。可儲粟數萬斛。屏以青壁。而泉嚙其

趾蓋以乳石而鼠家其實仰而視之。或突然傲岸而出若有恃者。或侵尋而卻。若有畏者。雲撓而鳥企。鼻口呀而斷齟露其陬牙橫逆卒愕之變。疑生於鬼神。雖智者造謀而巧者述之。未必能爾也。惜乎闕於龕巖。覓絕人迹罕至之地。世莫得而窺焉。夫豈負天下之奇勝者。固不欲售其伎。必待夫至誠篤好之士。然後與之接耶。或曰洞有小蛇青色而赤章旱歲禱雨多應。云景夕還惠濟。惠濟有庵二。一在太子泉南百步崦中。隱者陳生居之一。未構基在院西六十步大丘之原。丘勢坡陁。前有小澗。涓涓而流。藩以齊籐。闔以雙松。每冷風自遠而至。泛籐薄。激松梢。度流水。其音嘈然如奏笙簫。巽嚮而望。自定山轉而西服。光晷

薄星辰亘二百里。迅馳而矗立。如危而恬。壯分秀而取奇。各挾其伎以効履。鳥之下。孫公愛其地勝。欲寄以老焉。因請名曰寄老庵。相率作詩以約之。明年庵成。發二奇石於雙松之下。形勢益振。於是環山數百里。嘗以遊觀名者。遷延辭避。推寄老焉。西庵之成久矣。其地迫遽。無流水。非枯槁自謀之士。莫能居之。故茂有聞者。是庵始基也。爲賢士大夫所矚及。成遂以眺望浮遊之勝。甲於一方。物之興固自有時也哉。湯泉之事。旣窮。余又獨從參寥西馳七十里。入烏江。邀求仁謁項羽祠。飲繫馬松下。憑大江以望三山。憩于虛樂亭。復還惠濟。翌日乃歸。蓋自高郵距烏江三百二十五里。凡經佛寺四。神祠一。山水之勝者三。得詩

三十首賦一篇。至於山林雲物之變。溪瀨潺湲之音。故墟荒落。晨汲暝春之狀。悠然與耳目謀。而適然與心遇者。蓋不可勝計。嗚戲茲游之所得。可謂富矣。明年漳南自湯泉來會于高郵。追敘去年登臨之美。且歎日月之速。盛遊之難再也。因撰次之以備湯泉故事。時與同好者覽之。以自擇焉。熙甯十年九月記。

淮海集卷三十九

序

俞紫芝字序

余昔游玉笥山周行二十四峯訪蕭子雲故隱道見靈芝焉生
乎磐石之上回環而有葉秀澤而不根信天下之異草也竊愛
久之留不能去俄有童子朱顏紺髮自松陰中距石輒止撫芝
嘆曰嘻道人無本其亦如是矣余異而問曰適吾子有緒言不
敏未知所謂願終其說童子笑曰子求終乎終之矣矣以爲未
耶沒身無終雖然嘗試爲汝言其崖略夫德人以有本爲宗道
人以無本爲宗天下皆知有物所以失已也不知有已所以失

已也而德人知之於是內觀無是外觀無彼無是故能以已爲物無彼故能以物爲已已物不二謂之真一夫是謂以有本爲宗天下皆知有僞所以喪真也不知有真所以喪真也而道人知之於是前際無捨後際無取無捨故不斷一切僞無取故不任一切真真僞兩忘亦無真一夫是之謂以無本爲宗蓋非有本則不能離相而歸空非無本則不能卽空而證實有本然後明心無本然後見性夫子識之人間所謂道德者固不出乎此矣雖然有本無本吾豈能識之哉語未既有老人復杖策自松陰中來顧謂童子曰適何所言童子欲語老人引杖擊之童子走松陰忽然不見還視老人亦以亡矣於是余茫然自失私識

其言。後九年游京師遇金華居士俞紫芝請余改字因思昔日玉笥童子之言字曰無本復以其說爲序贈焉

曹號州詩序

號爲州在關陝之間其地不當孔道無稱使過客之勞刺史之宅有水池竹林其樂可以忘老故自唐以來號爲佳郡朝之士大夫樂靜退者多願往焉元和中劉使君作三堂新題二十一章昌黎韓文公爲屬和於是亭臺島渚之勝天下稱之譙國曹子方比自尙書郎出守茲郡左丞相汲郡呂公引昌黎故事送之以詩子方至陝右以書抵余曰待罪司勳初無裨補疾病求去丞相不加譴假以一州幸矣又賜詞詩以寵其行幸孰甚焉

且其卒章之意欲因某以警來者將摹刻於三堂之上其爲我
序之余曰木不能飛空託泰山則干靑雲人不能蹈水附樓航
則絕大海自唐迄今守虢者多矣而劉使君獨傳於世者非以
昌黎文公故耶今得丞相之詩則曹劉二使君皆當傳於不朽
知虢之亭臺島渚將益顯於天下朝之卿大夫願往者又加多
也余未嘗至虢竊誦丞相之詩已若幅巾杖屨從子方於水竹
之間子方守虢之樂爲可知也然士大夫皆謂子方賢者宜同
樂於天下不當獨樂於虢子方盍專精神近藥物亟還天朝以
慰士大夫之論毋爲水池竹林之所留也傳曰懷與安實敗名
子方其慎之

逆旅集序

余間居有所聞輒書記之既盈編軸因次爲若干卷題曰逆旅集蓋以其智愚好醜無所不存彼皆隨至隨往適相遇於一時竟亦不能久其留也或曰吾聞君子言欲純事書欲純理詳於誌常而略於紀異今子所集雖有先王之餘論周孔之遺言而浮屠老子卜鑿夢幻神仙鬼物之說猥雜於其間是否莫之分也信誕莫之質也常者不加詳而異者不加略也無迺與所謂君子之書言者異乎余笑之曰鳥棲不擇山林唯其木而已魚游不擇江湖唯其水而已彼計事而處簡物而言竊竊然去彼取此者縉紳先生之事也僕野人也擁腫是師懈怠是習仰不

知雅言之可愛。俯不知俗論之可卑。偶有所聞。則隨而記之耳。又安知其純與駁耶。然觀今世人謂其言是。則矍然改容。謂其言信。則適然以喜。而終身未嘗信也。則又安知彼之純不爲駁。而吾之駁不爲純乎。且萬物厯厯。剗歸一隙。眾言喧喧。歸于一源。吾方與之沉。與之浮。欲有取捨。而不可得。何暇是否信誕之擇哉。子在矣。客去。遂以爲序。

揚州集序

揚州集者。大夫鮮于公領州事之二年。始命教授馬君希孟採諸家之集。而次之。又搜訪於境內。簡編碑板亡缺之餘。凡得古律詩。泊箴賦。合二百二篇。勒爲三卷。號揚州集。云按禹貢曰。淮

海惟揚州彭蠡既瀦三江旣入震澤底定而周禮職方氏亦稱東南曰揚州其山鎮曰會稽其澤藪曰具區川曰三江浸曰五湖則三代以前所謂揚州者西北劇淮東南距海江湖之間盡其地自漢以來旣置刺史於是稱揚州者往往指其刺史所治而已蓋西漢刺史無常治東漢治厯陽或徙壽春又徙曲阿魏亦治壽春或徙合肥吳治建業西晉後魏後周皆因魏東晉宋齊梁陳皆因吳惟宋常以建業爲王畿而東揚州爲揚州東揚州者會稽也隋以後皆治廣陵繇是言之凡稱揚州者東漢指厯陽或壽春或曲阿中原自魏至周指壽春或合肥江左自吳至陳指建業或會稽隋唐五代乃指廣陵廣陵在二漢時嘗爲

吳國江都國廣陵郡宋爲南兖州北齊爲東廣州後周爲吳州
唐初亦爲邳州其爲揚州自隋始也繇是言之凡稱吳國江都
廣陵南兖東廣吳州邳州者皆今之揚州也此集之作自魏文
帝詩以下在當時雖非揚州而實今之廣陵者皆取之其非廣
陵而當時爲揚州者皆不復取至楊子雲箴本約禹貢爲辭則
廣陵自在其中固不得不錄也旣成公又屬某推表廢興遷
徙之跡而究其端使夫覽之者有攷焉

會稽唱和詩序

給事中集賢殿修撰廣平程公守越之二年南陽趙公自杭以
太子少保致仕道越以歸南陽公與廣平公其登進士第也爲

同年其守浙東西也爲鄰國又皆喜登臨樂吟賦故其雅好視
遊從中爲厚而山川覽矚之美酬獻之娛一皆寓之於詩舊所
唱和多矣集賢林公旣爲之序而道於越也復得二十有二篇
東南衣冠爭誦傳之號爲盛事以後見爲恥或曰昔之業詩者
必奇探遠取然後得名於時今二公之詩平夷渾厚不事才巧
而爲世貴重如此何耶切嘗以爲激者辭溢夸者辭淫事謬則
語難理誣則氣索人之情也二公內無所激外無所夸其事核
其理富故語與氣俱足不待繁於刻劃之功而固已過人遠矣
鮑昭曰謝康樂詩如初發芙蓉自然可愛蓋如其言也某旣獲
覩盛德之事爲幸因手寫二十二篇之詩以遺越人使鑱諸石

又述其所以然者發其端云

懷樂安蔣公唱和詩序

會稽之爲鎮舊矣。豈惟山川形勢之盛。實控扼於東南哉。其勝遊珍觀。相望乎楓栴竹箭之上。枕帶乎藻荇芙蕖之濱。可以從事雲月。優游而忘年者。殆亦非他州所及。而卧龍山鑑湖。尤爲一郡佳處。蓋府第之所占。城堞樓雉之所憑。非若窮崖絕壑。遊鹿豕而家魚龍。不可與民同樂者也。前太守二卿樂安蔣公。嘗以山富草木。樵蘇所採。爲令於公府止之。湖地沃衍。田於豪奪。爲表於朝廷。復之又廢。山西淫祠。分湖之別派。覆以締構。爲流觴曲水。以追永和故事。於是湖山自然之觀。始深密空明。不復

爲人力所敗聞山水間棹歌之詩至今稱焉熙甯十年廣平程公以給事中集賢殿修撰來領州事覽其遺迹而嘆曰此前賢所以遺後來也使子無一日之雅猶當奉以周旋況嘗被其知遇乎乃述樂安之志手植松千餘章於卧龍山之上狂枝惡蔓斬薙以時秀甲珍牙無得輒取每春秋佳日開池蘊具舟艦與民共遊而樂之復爲詩以記其事元老名儒屬而和者凡六人而樂安之從子金部預焉公素以詩名天下其所述作必有深屬遠寄不獨事章句而已翟公曰一死一生乃見交情時樂安之沒幾三十年而公想像風流眷眷不忘如此然則是詩之作也豈特與山水俱傳而不朽哉聞其風者可以興起矣

送錢秀才序

此種真率
文字古人
往往多見
然無筆致
最易近俚
勿視為益

去年夏余始與錢節遇於京師一見握手相狎侮不顧忌諱如平生故人余所泊第節數辰輒一來就語笑終日去或遂與俱出遨遊飲食而歸或闕然不見至數浹日莫卜所詣大衢支徑卒相覲逢輒嫚罵索酒不肯已因登樓縱飲狂醉各馳驢去亦不相辭謝異日復然率以為常至秋余先浮汴絕淮以歸後踰月而節亦出都矣於是復會於高郵高郵余鄉也而邑令適節之僚壻為留數十日余既以所學迂闊不售於世鄉人多笑之恥與遊而余亦不願見也因閉門却掃日以文史自娛其不忍遽絕而時過之者惟道人參寥東海徐子思兄弟數人而已節

聞而心慕之數人者來節每偕焉循陋巷欵小扉叱奴使退卽
自褫帶坐南軒下余出見之相與論詩書講字畫茗飲奕碁或
至夜艾而絕口未嘗一言及曩時事也於是余始奇節能同余
弛張而節亦浸知余非脂韋泊沒之人矣客聞而笑之曰子二
人者昔日浩歌劇飲白眼視禮法士一燕費十餘萬錢何縱也
今者室居而輿出非澹泊之事不治掩抑若處子又何拘也罔
兩問景曰曩子坐今子起曩子行今子止何其無持操歟子二
人之謂矣余對曰吾二人者信景也宜乎子之問也當爲若語
其凡夫思慮可以求索視聽可以聞見而操履可以殆及者皆
物也歌酒之娛文字之樂等物而已矣顧何足以殊觀哉漁父

有云滄浪之水清兮可以濯我纓滄浪之水濁兮可以濯我足
夫清濁因水而不在物拘縱因時而不在己余病弗能久矣不
意偶似之也而復何苦竊竊焉隨余而隘之哉客無以應一日
節曰我補官嘉禾今期至當行矣盍有詩以爲送乎比懶賦詩
又重逆其意因敍遊從本末之迹并以解嘲之詞贈焉節吳越
文穆王之苗裔翰林之孫起居之子儻好事有父祖風云

王定國註論語序

元豐二年眉陽蘇公用御史言文涉謗訕屬吏獄具天子薄其
罪責爲黃州團練副使於是梁國張公涑水司馬公等三十六
人素厚善眉陽得其文不以告皆罰金而太原王定國獨謫監

濱州鹽稅定國相家子少知名一朝坐交遊斥海上人皆意其
日飲無何不復以筆硯爲職矣而定國至濱益自刻勵晨起入
局視鹽稅之事唯謹退則窮經著書或賦詩自娛非疾病慶弔
輒不廢七年罷還詣東上閣門奏書曰臣無狀幸緣先臣之故
獲齒仕版不能慎事陷于罪戾念無以自贖間因職事之暇妄
以所見注成論語十卷未敢以進唯陛下裁筭之明日詔御藥
院取其書去未報而神宗棄天下嗚呼自熙甯初王氏父子以
經術得幸下其說於太學凡置博士試諸生皆以新書從事不
合者黜罷之而諸儒之論廢矣定國於時處放逐之中蠻夷瘴
癘之地乃能自信不惑論著成一家之言至天子聞之取其書

非其氣過人何以及此傳曰天不爲人之惡寒而輟其冬地不爲人之惡險而輟其廣君子不爲小人之匆匆而易其行於斯言可信余比多事未獲請觀其書而定國迺以副本來屬予爲序顧余文之陋豈能發定國之所蘊乎姑掇其大概使夫覽之者知定國著書之時爲如此又知神宗嚮經術亦非主於一家而已

集瑞圖序

熙甯九年燕國邵舜文與諸弟持其先君之喪於宜興數月有雙瓜生于後圃後二年又生紫芝三雙桃雙蓮一凡六物於是鄉之耆老聞而嘆曰邵氏其興乎何其瑞之多也舜文因集六

物者而圖之號集瑞圖云余謂萬物皆天地之委和而瑞物者又至和之所委也至和之氣磅礴氤氲而不已則必發見於天地之間其精者蓋已爲盛德爲尊行爲豪傑之材其浮沉而下上者則又爲景星卿雲甘露時雨醴泉芝草連理之木同穎之禾而松栢荆蓀乎其中者則又爲鳳凰麒麟神馬靈龜之屬嗚乎光景色象之異也藹乎華實臭味之殊也卓乎形聲文章之無與及也於是世指以爲瑞焉繇是言之世之所謂瑞者乃盛德尊行魁奇之才所鍾和氣之餘者耶邵氏之祖考旣以潛德隱行見推鄉閭至舜文彥瞻端仁又以文學收科第弟兄相繼有聞於時而諸子森然皆列於英俊之域則是至和之氣鍾於

其家久矣宜其餘者發爲草木之瑞也昔楊寶得王母使者白環四枚而寶生震震生秉秉生賜賜生彪凡四世爲三公以往推今卽邵氏六物之瑞豈徒生而已夫蓋有應之者矣

送馮梓州序

上卽位之明年有詔侍從之官各舉部使者二人故龍圖閣直學士滕公與二三耆老皆以馮侯叔明應詔卽日除陝西路提點刑獄公事觀嘗問於滕公曰馮侯何如人公曰有守君子也觀曰何以知之公曰昔高平范公之帥環慶也環將种古以甯守史籍變其熟羌獄上書訟寃且言高平公不法者七事朝廷疑之卽甯州置獄而馮侯以御史推直實奉詔往訊是時高平

公坐言事去執政有惡之者欲中以危法久矣此獄之起人皆爲懼及馮侯召對神宗曰帥臣不法萬一有之恐誤邊事然范純仁爲時名卿宜審治所以遣吏者政恐有差誤耳卽賜緋衣銀魚馮侯拜賜出執政謂曰上怒慶帥甚君其慎之馮侯曰上意亦無他因誦所聞德音執政不悅及考按連逮熟羗之獄實不可變而古所言高平公七事皆無狀附置以聞執政殊失望會史籍有異詞詔遣韓晉卿覆治執政因言范純仁事亦恐治未竟願令晉卿盡覆神宗曰范純仁事已明白勿復治也獄具如馮侯章於是籍古皆得罪而高平公獨免執政大不快未幾高平公復爲鄰帥所奏謫守信陽而馮侯失用事者意亦竟罷

去繇是言之非有守君子而何觀曰如公所云殆古之遺直也
豈特部使者而已哉後六年馮侯自尙書郎出守梓潼加集賢
校理實始相識質其事信然嗚呼古語有之人能勝天天定亦
能勝人信斯言也方高平公被誣上有明天子之無私下有良
使者之不撓可以免矣而二三子表裏爲姦始終巧請至於抵
罪而後已可不謂人能勝天乎然當時所謂用事之臣與諸附
麗之者今日屈指數之幾人爲能無恙而高平公方以故相之
重保釐西洛郊馮侯亦通籍儒館持節鄉郡其福祿壽考功業
未艾也可不謂天定亦能勝人乎馮侯將行同舍之士二十有
八人餞飲于慈孝佛寺又將屬賦詩而觀以拙陋所欲言者不

能盡之於詩乃以舊聞并以嘗所感嘆者爲序贈之

淮海集卷三十九終

淮海集卷四十

哀挽

大行太皇太后挽詞二首

東朝制詔九年稱烈武功高後世興坐舉不周天柱正親扶陽
谷日車升班行尙想延和殿羽衛俄趨永厚陵洛水嵩峯宵漢
外百官西望涕難勝

保扶明主自春宮萬國昇平出至公顧命一時聊共政思齊千
古遂同風外家恩數仍長信原廟烝嘗卽治隆欲敘聖功歌挽
者乾坤難入畫圖中

韓樞密夫人挽詞二首

奕葉貂蟬後宗姻樂靜閒從夫登兩地看子入三山舊像瞻榆關遺音想佩環百年川閱水不復更西還

天上開華屋丘山忽返真內人歸賄盛挽者轉哀新鸞詔初乾墨魚軒已暗塵藹然多德善論次有蒼珉

俞公達待制挽詞二首

詞場英妙氣如虹出入青雲見事功流馬木牛通蜀漕葛巾羽扇被渠戎風生使者旌旄上春在將軍俎豆中詔墨未乾人奄忽傷心江漢日傾東

一麾出守著威名凶訃西來上爲驚玉帳笑談成昨夢錦囊書札見平生衣冠漸散紅蓮府鎧馬還歸細柳營可道風流回首

盡芝蘭庭下粲朝榮

陳承事挽詞

明時就養寄淮壖忽歎舛艱以柩旋八尺衣冠成繪事百年風
誼列幽鐫銘旌暮暗黃梅雨鄉路秋橫碧玉天遙想葬期豪傑
會高車連軫駐新阡

永壽縣君挽詞二首

廷尉蒙恩後蘭臺就養初大椿宜更壽流水遽焉如鸞錦封花
誥蛛絲細板輿百年誰考德琬琰在幽墟

明世辭隆養哀榮道路傳賻喪從上宰歌挽出羣仙素幔傷秋
泛青缸慘夜船玉峰歸葬處木拱雁連天

會子固哀詞

皇受命而熙洽兮實千祀而一時協氣鬱而四塞兮與盛德其
俱升麟鳳出而旁午兮猶氤氲而扶輿篤生我公兮以文章爲
世師公神禹之苗裔兮肇子爵而鄧封建去邑而爲氏兮季葉
汨其南征祖騫翔而續著兮考蹉跎而文鳴公旣生而多艱兮
踵祖武而好修旣輕車又良御兮遂大放乎厥詞發天人之奧
秘兮約六藝而成章元氣含而未泄兮洞芒芴而窅冥挽天河
而一瀉兮物應手而華昌揖楊馬使先路兮咸告公曰不敢彼
崔蔡之紛紛兮孰云窺其藩翰辰來遲而去速兮固前終以跋
蹙方盤礴而上征兮遽相羊而補外皇揆公之忠誠兮卽商墟

清疏流利
不事組纈
仙賈長沙

而賜環紬史謀乎東觀兮裁誥命乎西垣典章絕而復作兮世
爭覩而快先正經緯乎終古兮配維斗而昭然變化詭而難常
兮雖司命其或昧忽遭艱而去國兮遂銜哀而卽世述作紛其
具存兮悵爽靈之焉詣信百年不斯須兮適電滅而焱逝天不
愍遺一老兮固縉紳之所傷矧不肖以薄技兮早獲進於門墻
路貫江而修阻兮曾莫奠乎酒漿悲填膺而第鬱兮聊自記於
斯文

蔡氏哀詞

惟夫人之高誼兮真一時之女英既富有此好德兮又申之以
令儀帶幽蕙之縹緲兮佩明月之陸離人自操舍之不一兮雅

獨取善以自持。何報施之或忒兮。罹禍艱於不虞。顏色炫而未
暮兮。所天忽以殞殂。痛平素之偕處兮。忍此奄奄而發居。漉哀
血以自誓兮。甘餌毒而捐軀。佩珠玉以死真兮。固眾女之所嗤。
曷卓越以不顧兮。棄性命其如遺。美不可強有兮。信天資之所
開。要反心以內省兮。豈或售乎人知。嗟三晨之未浹兮。遂俱遊
而莫留。死者有知兮。羌魂魄以並遊。日黃昏而不見兮。庭室窈
其無人。惟哀風以歸來兮。動素幔之澹澹。何平生之款密兮。遽
音聲之不可尋。儼遺跡以在目兮。紛百憂而攻心。豈至理不吾
喻兮。如意厚而悲深。撫雙襪以增慟兮。涕漬血而洒襟已矣哉。
人生有死兮。自前古而旣然。精魄忽其不駐兮。惟修名之可延。

忍錄錄以寓世兮。信烈者之所羞。儻佳志之獲申兮。雖奄忽其焉悼。

時宣義挽詞

奮發多難裏。哀榮厚夜中。妙年推正行。末路見陰功。風雨雙龍合。山川弔鶴空。懸知青史上。又載一平公。

中書侍郎挽詞二首

崛起商巖後。清忠士論歸。法知商鞅弊。議折董宏非。遷謫生華髮。騫騰上紫微。又騎箕尾去。朝野涕空揮。守道無夷險。如公實寡仇。望從烏府重。官到鳳池休。二品追褒峻。千金賻恤優。摺紳終有恨。王駿不封侯。

呂與叔挽章四首

舉舉西州士來爲邦國華藝文尤爾雅經術自名家正有高山
仰俄成逝水嗟賢人各有數不獨歲龍蛇

數日音容隔人琴遂已虛門生應有謚國史可無書舊室懸蛛
網遺編走蠹魚定無封禪草平日笑相如

追惟獻歲發春間和我新詩憶故山今日始知詩是讖魂兮應
已度函關

風流雲散了無餘天祿空存舊直廬小吏獨來開鎖鑰案頭塵
滿校殘書

東平夫人挽章

錢穆夫人

相閼風流盛王家地勢雄室中蘭作佩庭下玉成叢啼鳥悲春
檻荒原入夜宮遺芳得鴻筆論次詔無窮

開府李公挽章二首

報國封章數論交意氣真先朝貴公子當代老成人月動融尊
酒花催鄭驛賓誰知古原上馬鬣一朝新

戚里薨耆舊哀榮世未如襁加三事袞奠致兩宮輿鹵簿前衢
墮歌鍾後院虛英風知不墜芝玉茂庭除

孫萃老挽詞四首

同功一體盡調元獨抱沉疴反故園壺遂暮年非不遇人生到
此可忘言

青春芸閣妙文詞進讀金華鬢若絲轉守七州多異政奉常處
處有房祠

月旦嘗居第一評立朝風采照公卿門生故吏知多少盡向碑
陰刻姓名

華屋丘山可奈何百年光景一投梭故人唯有羊曇在慟哭西
州不忍歌

陳用之學士挽詞

禮經三百鬢毛班追述先儒伯仲間誰請尙書重給札盡抄遺
稿入名山

崒嶢共閣上參天直舍相依欲二年願寫此情歌挽者淚濡毫

素不成篇

雲臺觀者候昏明
奎壁躔中失二星
上界真人重離別
陰風一夜攪青冥

牢落公車待詔時
白頭掌故更棲棲
一生勤苦成何事
只得銘旌數尺題

滕達道挽詞二首

早歲戢冠待冕旒
白頭淹卹外諸侯
篋中尚有東風草
塞下曾無北顧憂
心繫漢廷長入夢
氣吞胡虜不防秋
經綸未了埋黃土
精爽還應屬斗牛


江南江北奉周旋
合散如雲二十年
春郡勝遊花蔽馬
夜山清

話雨連天。共驚萬里長城壞。獨把千金寶劍。懸平日書題多散。
亂呼兒尋聚。一潸然。

自作挽詞

嬰釁徙窮荒。茹哀與世辭。官來錄我素。吏來驗我屍。藤束木皮
棺。稿葬路傍陂。家鄉在萬里。妻子天一涯。孤魂不敢歸。惴惴猶
在茲。昔忝柱下史。通藉黃金閨。奇禍一朝作。飄零至於斯。弱孤
不堪事。返骨定何時。修途繚山海。豈免從閹維。荼毒復荼毒。彼
蒼那得知。歲晚瘴江急。鳥獸鳴聲悲。空濛寒雨零。慘淡陰風吹。
殯宮生蒼蘚。紙錢掛空枝。無人設薄奠。誰與飯黃縑。亦無挽歌
者。空有挽歌辭。

淮海集卷四十終



淮海後集目錄

卷之一

詩 五言古

進南郊慶成詩 并表

幽眠

越王

隕星石

山陽阻淺

次韻參寥莘老

送洪景之循州叅軍



茶

茶臼

石魚

劉公幹

贈醫者鄒放

贈張潛道

荷花

酬曾逢原參寥上人見寄山陽作

吳興道中

無題二首

喜雨得城字

東城被盜得世字

夢伯收文公

秋夜病起懷端叔作詩寄之

送孫誠之尉北海

抱甕

讀列子

和顯之長老

清夜

南池

和王定國

題五柳亭

秋興擬韓退之

秋興擬孟郊

秋興擬韋應物

卷之二

詩 七言古

宿金山

別賈耘老

李端叔見寄次韻

陳令舉妙奴詩

自警

陪李公擇觀金地佛牙

雪浪石

和蔡天啓贈文潛之什

秋興擬李白

秋興擬玉川子

秋興擬李賀

卷之三

詩 五言律 排律附

次韻孔彥常舍人曝書

悼子開五首

次韻安州晚行寄傳師

次韻莘老

以下排律

送陳太初道錄

贈蘇子瞻

觀寶林塔張燈次胡瑗韻
還自湯泉十四韻

卷之四

詩 七言律 絕句附

送佛印

次韻公闢會流觴亭

次韻公闢會蓬萊閣

送羅正之兩浙提刑

辨才法師嘗以詩見寄繼聞示寂追次其韻

次韻公闢州宅月夜偶成二首

次韻公闢卽席見寄

次韻公闢將受代書蓬萊閣

次韻公闢聞角有感

寄公闢

呈公闢

奉和荅老

秋興擬杜子美

秋興擬杜牧之

秋興擬白樂天

中秋口號 并引

致政通議口號 并引

口號 并引 以下七言絕句

早春

赴杭倅至汴上作

無題

蘇子瞻記江南所題詩本不全余嘗見之記其五絕今

以補子瞻之遺

東坡跋并詩
見正集十卷

金山晚眺

病中

聞雁懷邵仲恭

冬蚊

白馬寺晚泊

雪上感懷

和程給事贈虞道判六首

處州閑題

春詞絕句五首

秋詞二首

齊逸亭

春日

雪中寄丹元子

宿乾明寺方丈

新開湖送孫誠之有龍見於東北因成絕句

呈李公擇

落日馬上

次韻參寥三首

和書天慶觀秘監堂三首

和書觀妙庵

早春題寺舍

盆池釣翁

賞酴醾有感

首夏

卷之五

雜文

代蘄州守謝上表

代程給事乞祝聖表

坤成節功德文疏

代答范相公啓

賀孫中丞啓

賀吏部傅侍郎啓

代何提舉賀范樞密啓

賀門下呂僕射啓

謝穎州呂吏部啓

答丁彥良書

與許州范相公書

祭監稅主簿文

卷之六

雜文

清和先生傳

法雲寺長老然香會疏文

越州請立程給事祠堂狀

精騎集序

故龍圖閣直學士中大夫知成都府事李公行狀

雜說

通事說

蠶書

種變

時食

制居

化治

錢眼

鎖星

添梯

車

禱神

戎

書丁彥良明堂議後

錄龍井辯才事

書王氏齋壁

題彭景山傳神

淮海閒居集自序

卷上

長短句

望海潮四首

沁園春

水龍吟

八六子

風流子

夢揚州

雨中花

一叢花

鼓笛慢

促拍滿路花

長相思

滿庭芳三首

江城子三首

滿園花

迎春樂

卷中

長短句

鵲橋仙

菩薩蠻

減字木蘭花

木蘭花

畫堂春

千秋歲

踏莎行

蝶戀花

一落索

醜奴兒

南鄉子

醉桃源

何傳二首

浣溪沙五首

如夢令五首

阮郎歸四首

滿庭芳三首

桃源憶故人

卷下

長短句

調笑令十首

并詩

王昭君

樂昌公主

崔徽

無雙

灼灼

盼盼

崔鶯鶯

採蓮

烟中怨

離魂記

虞美人三首

點絳脣二首

品令二首

南歌子三首

臨江仙二首

好事近

詩餘

搗練子

秋閨

憶王孫

春景

如夢令

春景二首

浣溪沙

春閨

阮郎歸

春閨

旅況

書堂春

春怨

海棠春

春曉

眼兒媚

春景

柳梢青

春景

桃源憶故人

春閨

鷓鴣天

春閨

蝶戀花

感舊

滿庭芳

春景

南歌子

贈妓陶心兒

金明池

春遊


淮海後集目錄終

淮海後集卷一

詩 五言古

進南郊慶成詩 并表

右臣伏覩皇帝陛下肇修典禮冬日之至親有事於南郊仍復
祖宗故事以皇天地祇合祭前期之日陰雲蔽空將祀之夕月
躔畢宿詩云月離于畢俾滂沱矣於法當雨而是夜開霽特甚
晏溫星月昭明禮畢之明日雨雪乃作朝市郊野相告欣然頌
歎之聲形於中外非二聖有作上當天心神祇顧享何以逮此
臣雖疎賤通籍祕省預見熙事不勝犬馬區區之情輒將輿人
之頌撰成郊禮慶成五言二十韻詩一首隨狀上進干冒宸嚴



臣無任瞻天望聖激切屏營之至

於赫龍飛後中區八月秋合嚴天地祀遠繼祖宗休熙事將興
舉彝章預講諏紛然曲臺議斷自太妊謀宗伯方承命元龜遂
告猷三錢封內帑五瑞輯諸侯路寢前齋玉清宮復射牛長迎
南至日圓卽自然丘扈蹕三千劍干霄十二樓鈎陳嚴御座太
一奉宸遊好雨虛聞畢生陽不待鄒浮雲依斗散華月亘天流
宵被黃裯卻霜空曲蓋收堪輿同顧饗河嶽盡懷柔麾日初鳴
仗旂風不滿旒回鑾龍入馭傳詔鶴爲郵崇慶天難老華胥聖
不憂衣冠千玉簡宇宙一金甌可但豐年屢當知世德求慙無
班馬手作頌配商周

幽眠

幽眠起常晚，冬晷復不長。中間數十刻，倏如驚燕翔。晨餐廳云畢，申鼓鳴相望。忽忽竟何就，念之動中腸。天地一逆旅，死生猶轉商。暫來旋云去，遲速乃所常。較計亦何補，徒然非慨慷。不如聽雨行一槩，付酒觴。北風吹老槐，白日轉紙窗。布衾一覺睡，身世成渺茫。宿莽冬不衰，蘭茝幽更芳。無庸傷局促，速此髣髴霜。

越王

越王念吳役，寢興常不安。有臣曰種蠡，實與同艱難。終酬會稽恥，列國不敢干。智者見未兆，愚夫暗前觀。范公拂衣去，扁舟五湖間。清輝照四海，秋月耿雲端。種也竟不悟，處之若無難。屬鏤

句意真率
雁

一朝至身與名俱殘。兔走獵狗悲鳥盡。良弓閑自古身不退。多爲世所歎。

隕星石

蕭然古丘上有石。傳隕星胡爲霄漢閒。墜地成此精。雖有堅白。委塊然誰汝靈。犬眠牛礪角。終日蒙羶腥。疇昔同列者。到今司賞刑。森然事芒角。次第羅空青。俛仰一氣中。萬化無常經。安知風雲會。不復歸青冥。

山陽阻淺

一日行一尺。十日行一丈。豈不歎淹留。所幸無波浪。悲風動深夜。原野眇森爽。青天行蟾蜍。枯水轉魍魎。此時蓬茅下去心。劇

於癢棄置勿復論通塞如反掌

次韻參寥莘老

迅風薄高林萬象號虎豹紛披枳與棘爾復鼓狂闐我垣旣已
頽我棟又以撓豈無一木支橫力難與較黎明忽自罷晴日射
魚罩死水失狂瀾衰木回故貌勞生眞夢事往趨如睡覺炊黍
焚黃鵠吾其理歸棹

送洪景之循州參軍

寒梅不自重輒花桃李先矯枉有佳菊最後眾芳妍各因一時
美難以相嗤憐物理固若是士林亦宜然夫子南國俊聲猷推
妙年數奇晚方偶參軍古龍川龍川雖云遠風物號清鮮羅浮

不相下。頡頏巉荒天。雲鬢二三子。聊足奉周旋。行矣試老拳。歸歟遠翔騫。

茶

茶實嘉木英。其香乃天育。芳不愧杜蘅。清堪揜椒菊。上客集堂葵。圓月探奩盞。玉鼎注漫流。金碾響丈竹。侵尋發美鬯。猗猗生乳粟。經時不銷歇。衣袂帶紛郁。幸蒙巾笥藏。苦厭龍蘭續。願君斥異類。使我全芬馥。

茶曰

幽人耽茗飲。剡木事擣撞。巧制合臼形。雅音侔柷枵。虛實困亭午。松然明鼎窗。呼奴碎圓月。搔首聞錚鏦。茶仙賴君得。睡魔資

爾降所宜玉兔擣不必力士扛願偕黃金碾自比白玉缸彼美制作妙俗物難與雙

石魚

佛官琢琳瑯懸魚警羣聰緩扣集方袍急拊趨百工雖無筍虞器自協徵與宮犁然當人心邈有炎氏風山泉自疏數珮玉相玲瓏朝昏聞鐘鼓清響傳無窮惟有寶陀山於音獲圓通一聞如得解石鞏亦拔弓

劉公幹

鄴中多賢豪公幹氣飄逸弱歲頗徊徨飄零低金室君王事遨宴下馬列琴瑟豪吹挾哀彈娛歡非一日當年侍賡酬珠玉在

揮筆五字一何工妙絕冠儔匹所得雖經寄未得偏人失

贈醫者鄒放

百工皆聖作惟醫有書傳緒餘起人死妙處實通天鄒子本淮海弱齡加討研岐扁逢卷中遂知百病先往歲遊京室公侯紛薦延國工不敢妬遣兒求執鞭晚棄本州役青衫鬢蕭然臨衢開大肆旁午送金錢嗣子頗不凡文場早周旋行期拾青紫善積神所憐

贈張潛道

張生何爲者落魄不自拘獨攜三尺琴笑別妻與孥一來泊吾里忽已月再虛朝遊故人館暮止佛子廬雖無食羹餘所樂常

意致澹遠

晏如我欲有所進，生聞勿煩紆。君子閑有道，不專塊然居。無道祇深適，鳴戲亦已愚。願生脫塵鞅，從我滄海隅。

荷花

方塘收雨腳，落日半遙岑。芙蕖淨娟娟，麗服撫翠衾。無言意自遠，欲渡秋水深。緬懷平生人，對此詎可尋。弄芳惜晷晚，酒至誰與斟。天涯有歸雲，聊寄相思心。心開獲清賞，芙蕖一何綺。美人豔新妝，斂袂照秋水。端如蕩子妻，顧自良家子。黃金選燕趙，搖落對江芷。薄暮風雨來，獨立淚如洗。望君君詎知，傾宮定誰似。

酬曾逢原參寥上人見寄山陽作

倦客當老秋，忽忽少佳意。孰云塵滓地，劉阮肯俱至。一披清骨

毛再見失身世，有如執盛熱，傖月濯涼吹，又如觀巨梓，卻覘蕭
葦細，十辰同遨遊，不覺日車逝，嗟予逃空虛，終日面林翳，聞人
足音喜，況乃道所契，方念衣袖分，明月忽我舁，眷言何以酬，白
髮同所詣。

吳興道中

黽勉葦門下，十年守一方，胡爲御舟者，挽我置此傍，青山不肯
盡，流水故意長，雖云道理遠，瓦樽有酒漿。

無題二首

君子有常度，所遭能自如，不與死生變，豈爲憂患渝，西伯囚演
易，馬遷罪成書，性剛趣和樂，淺淺非丈夫。

又

世事如浮雲飄忽不相待歟然化蒼狗俄傾成章蓋達觀聽雨
行昧者乃多態舍旃勿重陳百年等銷壞

喜雨得城字

陰陽有常職代御不可并一氣或錯繆愆伏相寇兵惟時四月
交南國厭久晴風師挾帝令呼號肆徂征雲師畏推逐蓄意不
敢爭雨師曠厥官所苟朝夕生黃塵暗如霧掩彼日月明帝眷
一夕回旱議沮莫行番然需膏澤夜半來雨聲黎明縱遐眺溝
澮各已盈青秧散廣畝白水涵孤城耕夫欣有託水鳥飛且鳴
乃知化工妙悠然信難名行矣耘我穡歲終并坻京

東城被盜得世字

野人無機心觸事少防衛所至輒酣寢屢墮穿窬計孤亭夜深
墨風死雨初霽有盜穴壁來攘取逮衾袂微思不敵怒弱力鼓
虛銳起搏且復呼可否誰量勢誰云同室鬪函丈莫相繼兩奴
眠牖旁矯首但睥睨棄之倚柱休盜亦從此逝慚無牛缺賢幸
脫燕人斃亡弓豈須求失馬不必涕黎明成感歎事往若異世
良賈號深藏無閤稱善閉君子勿我誇得喪求無際

夢伯牧文公

昨夜夢故人心顏少歡趣自嗟棄有司卻言歸山路君王下明
詔羣英翕爭赴焦鵬共揮翮跛鼈亦騁步擾擾天地閒飛鳥不

知數何意獨蕭條。命與時相忤。空復蔽馬牛。不爲匠人顧。昔爲土中花。行待東風煦。今爲簷下草。遠矣霑秋露。老母鬢成絲。寒妻被無絮。歲莫多嚴風。絺綌將焉度。覺來不復見。撫枕淚如注。安得萬頃陂。活此舟中鮒。

秋夜病起懷端叔作詩寄之

寢瘳當老秋。入夜庭軒空。天光脆如洗。月色清無縫。風飈戾戾輕。露氣霏霏重。簷花伴徐步。籠燭窺孤諷。緬惟情所親。佳辰誰與共。夫子淮海英。材大難爲用。秉心旣絕俗。發語自驚眾。塵尾扣球琳。筆端攢螭螭。雄深迫楊馬。妙麗該沈宋。浮沈任朝野。魚鳥狎鯢鳳。與時真楚越。於我實伯仲。爾來居邑鄰。頗便書札貢。

上憑鴻雁傳下託鯉魚送二物或愆時已辱移文訟人生無根
柢泛若淩波葑昧者復汲汲晨暝趨一閭陰持含沙毒射影期
必中自匿嫫母容對客施錦幪溘然一朝逝萬事俱成夢形骸
猶汝辭利勢猶君動思之可太息傷之爲長慟所以古達人脫
身事高縱我生尤不敏胷腹常空洞彊顏入規模垂耳受羈鞅
行謀買竿棹名理就折衷但恐狂接輿煩君更嘲弄

送孫誠之尉北海

吾鄉如覆盂地據揚楚脊環以萬頃湖黏天四無壁蜿蜒戲神
珠正晝飛霹靂草木無異姿靈氣殊鬱積所以生郡材各抱荆
山璧小爲百夫防大爲萬人敵夫子少邁倫暗鳴阻金石奏賦

明光宮，玉座瞻咫尺，翻身墮雲霄，十載迫窮厄，焚舟更一戰，得尉滄海北。五月乘畫船，簫鼓事遠適，天橫齊山青，雨帶楚水黑。勿云晚方仕，四十乃古昔，勿云名位卑，九萬自此擊。幽求尉朝邑，鬢髮森已白，元振尉通泉，律令非所卽。一朝會風雲，顧眄立四極，行矣壯舊圖。

此下缺文

抱甕

搢搢抱甕人，忙呼治其內，仲尼爲所輕，子貢無以對。捨器欲還樸，爲量固已隘，苟得渾沌真，甯羞事機械。

讀列子

咄咄兩小兒，多言空爾爲，後之日無定，不覺心有期。尺捶探蒼

溟但令傍者嗤誰謂不能決孔丘乃真知

和顯之長老

禪子觀因緣寸晷無復餘講人治經論
艾夜猶未除冷風奏哀松寒月挂碧
虛此意了不諭悲哉同翳如

清夜

子夜天無雲稀星耿頑碧茫茫行役者
對此焉不息胡爲蝸角端相與競尋尺
勸君歸去來飛空鳥無跡

南池

汎汎池中鳧上下與水俱不與水爭力
所以全其軀遇物貴含垢修身戒明污
胡能若雲月浪自驚羣愚

和王定國

崢嶸歲月徂物色，莽於邑歡言公子至。坐失百憂集，宵箔蕙煙橫。寒炮玉脂泣，勉旃決南圖。荷華行滿隰。

題五柳亭

結構依流水，新題五柳亭。登臨有遺味，攀折不勝情。隔岸闔閤鼓，遶軒舟舫橫。此下缺文

秋興擬韓退之

逍遙北窗下，百事遠客慮。無端葉閒蟬，催促時節去。愁起如亂絲，縈纏不知緒。日月豈得已，還復役朝暮。人生均有得，悲歎我不悟。春秋自天時，感憤亦真趣。

擬孟郊

曉風有暴信，暮蟬無好聲。曉風與暮蟬，自與時節爭。獨客辭故鄉，推車謁梁城。梁城道迢遞，區區役吾生。不如歸舊山，藜藿安性情。

擬韋應物

坐授林下石，秋聲出疎林。林閒鳥驚棲，豈獨傷客心。物亦有代謝，此理共古今。鄰父縮新醅，林下邀同斟。癡兒踏吳歌，姪足訛音。日落相攜手，涼風快虛襟。

淮海後集卷二

詩 七言古

宿金山

山南山北江水流，半空金碧隨雲浮。
我來仍值風日好，十月未寒如晚秋。
山僧引客尋蒼翠，厯卷參差到平地。
萬里風來拂骨清，卻憶人間如夢寐。
夜深無風月入扉，相對老人如槁枝。
流水與天爭入海，共笑此心誰得知。
下山卻向中泠望，番憶當時在屏障。
老母思兒且欲歸，回首雲峯已天上。

別賈耘老

若有人兮雪之濱，服火齊兮冠切雲。
有才不爲世所掄，盡入詩

七言古
覽更公之所
張

句爲奇新。忘歸繁弱。不浪陳發。必中的疑有神。目關飛鳥。緡蒼
鱗。俛仰自娛。忘賤貧。緊我與君。素參辰。孰爲一見同天倫。共指
飛光。易沈淪。莫若痛飲還我真。況有內子賢文君。終日叫呼不
怒嗔。酒酣往往出前珍。瓦甌竹飭。羞青芹。左列文史。右紅裙。樽
前不覺徂清晨。念我行當西道秦。拏舟來別。非所欣。欲託毫素
通殷勤。郢匠旁矚難揮斤。人生百齡。同臂伸。斷梗流萍。暫相親。
行行飲酒且勿云。丈夫萬里猶比鄰。

李端叔見寄次韻

君文豪贍無與儔。使我吟諷忘離憂。浩如元湘起陽侯。翻星轉
日吞數州。華章藻句饒風力。頃刻朱紅迷畛域。一班縱復爲管

窺萬派終難以蠡測區區文墨倦高情解鞅還游恍惚庭半槽
新水六尺簾臥視雲物行空青伊我籃輿抵京縣溽暑黃埃負
初願君家只在御城東彌月不能三兩見求仙未若醉中真蟻
鬪蛾飛愁殺人清都夢斷理歸棹回首一樹瓊枝新歸來草木
春風換世事蜉蝣毛那可算幸謝故人頻寄書莫笑元郎自呼漫

陳令舉妙奴詩

西湖水滑多嬌嬈妙奴十二正芬芳肌膚皙白髮腳長含語未
發先有香溪上夜燕侍簪裳皎如華月墮滄浪音聲入雲能斷
腸不許北客辭酒漿主人藹藹邦之良少年射策謁未央俊詞
偉氣森開張玉杓貫斗生怒芒天欲文采老更昌故使斂翮窺

羣翔五十僅補尙書郎。浩歌騎牛倚倘佯。東風戲雨花草狂。二溪泱泱青黛光。妙奴勿倦侑羽觴。主人正欲游醉鄉。

自警

古人去後音容寂。何處茫茫尋舊迹。君看草遍北邙山。骼骹猶來丘壟積。那堪此地日黃昏。長途萬里傷行客。只知恩愛動傷情。豈悟區區頭已白。莫嫌天地少含弘。自是人心多褊窄。爭名競利走如狂。復被利名生怨隙。貪聲戀色鎮如癡。終被聲色迷阡陌。休言七十古稀有。最苦如今難半百。聞道蓬宮仙子閑。紅塵不染無瑕謫。日月遲遲異短明。三峯秀麗皆仙格。女蘿覆石蔓黃花。芝草琅玕知幾尺。桃源長占四時春。漾漾華池眞水碧。

乘槎擬欲扣金局。巨浪洪波依舊隔。歸來芳舍與誰儔。老鶴松
間三四隻。喚天聲動彩雲飛。對我時時振長翮。驂鸞未遇且悠
悠。盡日琴書還自適。紛華任使投吾前。爭柰此心終匪石。拜命
懷金誰謂榮。低頭未免拾言責。從茲俗態兩相忘。笑指青山歸
路僻。同人有志覓長生。運氣休糧徒有益。須知下手向無爲。莫
學迷徒賴針灸。

陪李公擇觀金地佛牙

薄伽梵相含空虛。化人分段同璠璣。爾來示滅二千歲。眞骨萬
里傳中區。錢塘有尼號法照。得自禁掖藏金鋪。欲因此勝高構
閣。假設象似開羣愚。偶從好事至雪上。持出瞻玩相歡娛。靈牙

寶色玉不如上有無數光明珠莊嚴一一出御帑蜿蜒繡袋榮
碑礫是時賓客盡上士回向已登十地初殷勤稱讚出軟語坐
人顧眄驚俗污因悲人生信如夢浪逐聲勢霜鬢鬚一源清淨
誰復無枉入諸趣更崎嶇願因今日詣真際古松白日常蕭疎
一知金仙妙難測餘潤普及霑凡枯況復老尼亦才辯朱薨碧
瓦非難圖行看昭嶢倚青嶂翁嫗頌說傾三吳

雪浪石

漢庭卿士如雲屯結綬彈冠朝至尊登高履危足在外神色不
變惟伯昏金華掉頭不肯住乞身欲老江南村天恩許兼兩學
士將兵百萬守北門居士彊名曰天元寤寐山水勞心魂高齋

引泉注奇石，迅若飛浪來。雲根朔南修，好入十載兵。法雖妙，何足論。夜闌番漢人馬靜，想見雉堞低金盆。報罷五更人吏散，坐調一氣白元存。

和蔡天啓贈文潛之什

蔡侯飽學困於釜，濯足清江起南土。劇談頗似燕客豪，快奪范雎如墜雨。東城橋梓未足論，栢直何爲口方乳。蔣信山中伴香火，三年不厭長蔬苦。平生瑰瑋有誰同，要得張侯三日語。書閑那自運甓忙，時清不用聞雞舞。桓榮歡喜見車馬，書冊辛勤立門戶。要當食肉似班超，猛虎何嘗窺案俎。

秋興擬李白

芙蓉露濃紅壓枝。幽禽感秋花畔啼。玉人一去未回馬。梁邊燕子三見歸。江頭白蘋老波底。尺書不來空相望。斜吹疏雨溼秋江。霜風暗引芙蓉香。石上菖蒲三尺長。綠頭鴨兒棲萍草。採蓮女郎笑花老。木蘭船上動江水。不覺鴛鴦帶波起。

擬玉川子

南州有病客起臥北窗下。玉兔銜花照清夜。故人別我京洛遊。不寄一行三改秋。秋色變冷客裘薄。漸覺衣袂寒颼颼。作詩欲寄君未語。先有愁。不如呼童起危坐。北窗下一杯寬我千日憂。眼前俗事何擾擾。此夕盡向杯中休。何必懷黃金印兮。爵通侯。

擬李賀

魚鱗。鰓空排嫩碧。露桂梢寒挂團壁。白蘋風起。吹北窗。尺鯉沈
沒。斷消息。燕子將鷗欲歸去。沈郎病骨驚遲暮。濃愁茫茫。寄何
處。萬里江南芳草路。

淮海後集卷二終

淮海後集卷三

詩 五言律 排律附

次韻孔彥常舍人曝書

上帝圖書府傳觀詔特容嘉賓蒼佩玉盛饌紫駝峯散帙牙籤
亂開函錦襲重君羹如可請願備北堂供

悼王子開五首

我昔官房子長懷忠穆賢里無行馬第山有臥牛阡當代三公
後惟君五福全桐棺遠歸祔追舊幾潸然

其二

早爾金閨彥頎然玉筍班周旋三友益零落十年閒輾轉靈輶

動悠揚素旄還暮年還抱愛應復辨追攀

其三

蕭散竹林風平生約略同官班嵇叔夜年輩晉安豐民詠濡須
政朝推胸臆功九原無復作埋玉恨何窮

其四

南浦維舟訪東堂抵榻眠後期猶指日輕別遂終天墨妙今初
貴詩名久已傳清風如未墜諸子更翩翩

其五

已矣知無憾賢愚共此途白駒馳白日黃髮掩黃壚和氏終歸
趙干將不葬吳拏痾如可強猶擬奠生芻

次韻安州晚行寄傅師

投暮安州北，蒼煙亂眼昏。茅茨人外路，砧杵月邊村。野水飛雲薄，空林噪雀繁。幾人堪此樂，逢客莫輕論。

次韻莘老

排律

妙齡隨計日，紺髮度關年。較藝先豪俊，飛聲動眇綿。祕書窺甲乙，密室詣溫宣。已叶半千運，仍親尺五天。御香春晚炷，宮蠟夜深燃。漢殿螭頭筆，岐蕃幕下蓮。孔鸞人共貴，蘭蕙世皆憐。附尾方瞳若提刀，獨若然皂囊封細札。青簡續遺編，壁府深難造。龍謀雋莫先，大農叅奏計。宗伯與興賢，玉鉉行真卽。金甌忽浪傳，兩輪茗上駕。百丈剡中牽，荏苒馮唐老。淹回賈傳還，星霜俄九

換金竹遽三遷鼓吹吳雲外旌旛楚水壩經綸殊未倦憂患復
相連惡草空掘毒羣蝸謾污涎松筠終不易雨露竟無偏憔悴
千株橘荒涼二頃田幾書借船帖屢廣絕交篇禪譽推龐蘊親
評主閔騫懶因閑處極樂向靜中全歲月黃塵裏鶯花白髮前
冰臺清照底玉海湛無邊身世尤飛隼功名眇蛻蟬蕉心難固
待楮葉謾勞鐫佇續清都夢還隨濁世緣泉虬淹已久風翮去
應便預想朝元處簪裾立萬仙

送陳太初道錄

先生簪紱後世系本縣瓜駐馬生枯骨回車濟病虵帶雲眠酒
市和月醉漁家落日千山路西風一枕霞幾年流俗笑一旦五

一語詠老
僧更切

侯誇暮惜春深日琴憎雨後蛙背因書字曲髮爲注經華地轉
東淮水天回北斗車新宮黃道近舊隱白雲遐顧我身多累逢
君意謾誇空提方士劍未上客星槎何日同歸去重飛九轉砂

贈蘇子瞻

歎息蘇子瞻聲名絕後先衣冠傳盛事兄弟固多賢感慨詩三
百流離路八千直心羞媚竈忠力欲回天縲紲終非罪江湖祇
自憐饑寒常併日疾病更連年明主無終棄西州稍內遷奏言
深意苦感涕內人傳前席須宣室非熊起渭川君臣悅相遇願
上角招篇

觀寶林塔張燈次胡瑗韻

飛來峯上塔然密奉慈觀互照三山豕分輝七寶欄勢擎金界
迴影蘸玉奩寒次第邊烽舉高低祭燭攢虹旌排陣堞火傘御
靈官魏乘珠千顆隋帆錦萬端華敷連藏海光集匝宮壇罔罔
連青昊熒熒逼翠巒月卿秋抒思星將夜濡翰繼聽鈞天奏尤
知屬和難

還自湯泉十四韻

歲晚倦城郭聯驂度業我天黃雲腳亂村黑鳥翎訛潦水侵生
路晴天落漫坡澄江練不卷溫井鑑新磨漁火分星遠沙鷗散
點多霸祠題玉筍龍窟受金波琬琰存吳事兒童記楚歌孤龕
瘦居士雙塔老頭陀飛鼠鳴深穴胡蜂結巧窠晚參圓白足昏

梵禮青螺，雲馭沈荒。輦仙春沒淺莎。杖藜從莫逆，談笑入無何。
滲澹日連霧，蕭騷風轉阿。華清俄夢斷，回首失煙蘿。

淮海後集卷三終

淮海後集卷四

詩 七言律 絕句附

送佛印

抱包初捨蔚頭藍江月松風處處參他日惠林爲上首幾年彌
勒作同龕眞珠撒帳開新座飛鳥銜花繞舊庵雲散虎溪蓮社
友獨依香火思何堪

次韻公闢會流觴序

偷引湖光一派飛詠觴還卻似當時吳歌送酒隨流急越豔浮
花轉曲遲山廟早因前守徹冰盤元是故工遺年年禊飲今非
昔不到蘭亭到北池

次韻公闢會蓬萊閣

林聲撼撼動秋風，共躡丹梯上臥龍。
路隔西陵三兩水，門臨南鎮一千峯。
湖吞碧落詩爭發，塔湧青冥畫幾重。
非是登高能賦客，可憐猿鶴自相容。

送羅正之兩浙提刑

豈爲鱸魚憶故邱，東南昏墊賴良謀。
一封莫別雲間閣，三組秋歸海上州。
子政暫爲都水使，千秋終作富民侯。
贈君一語君應笑，競注江河本不流。

辨才法師嘗以詩見寄繼聞示寂追次其韻

遙聞隻履去翛然，詩翰纔收數月前。
江海盡頭人滅度，亂山深

處塔孤圓。憶登夜閣。天連鴈。同看秋崖月。破煙尙有眾生未成。
佛肯超欲界。入諸禪。

次韻公闢州宅月夜偶成二首

新秋過雨。月如霜。緩足蓬萊徹上方。翠水玲瓏藏寶界。白煙濃。
淡鎖華堂。書名越豔。誰興發。角動單于自感傷。山似臥龍。天似。
水。卻疑身在海中央。

又

繚繞千重雨。後涼月含秋色。上東方。風催絡緯歸金井。月轉檀。
欒。蔭畫堂。游目騁懷佳興。發感時撫事。壯心傷。歸來枕簟清無。
夢。臥看明星到未央。

次韻公闢卽席呈太虛

與君鄰並共煙霞乘興時時過我家更漏一新聞曉角門闌數
級看秋花湖山對值全如買風月相期不用賒賴有醉毫吟更
苦他年分作句圖誇

次韻公闢將受代書蓬萊閣

城連湖岸水爲關旦暮樵風自往還龜負寶林新佛地龍蟠使
宅老仙山平生仕宦今何得終日登臨獨未閑歲滿徘徊難遽
別就中瀟灑異人間

次韻公闢聞角有感

一聽胡笳動越吟聲潛地底氣逾深千宮月色單于曲萬里天

光魏闕心秉燭何人猶把盞挑燈有女正穿針早寒時節黃昏
後更逐西風應遠砧

寄公闢

憶昔都門手一攜春禽初向苧蘿啼夢回金殿風光別吟到銀
河月影低舞急錦腰迎十八酒醒玉盞照東西何時得遂扁舟
去邂逅從君訪剡溪

呈公闢

東歸行路歎賢哉碧落新除寵上才白傅林塘隨畫去吳山花
鳥入詩來唱酬自有微之在談笑應容逸少陪除此兩翁相見
外不知三徑爲誰開

奉和莘老

童子何知幸最深久班籍湜奉登臨挾經屢造芝蘭室揮麈常
聆金玉音黃卷香焚春晚晚絳紗人散夜蕭森明朝只恐絲綸
下回首青雲萬里心

秋興擬杜子美

紫領寬袍漉酒巾江頭蕭散作閑人悲風入意催林葉落日無
情下水濱車馬憧憧諸道路市朝衮衮共埃塵覓錢稚子啼紅
頰不信山翁篋笥貧

擬杜牧之

鼓鼙夜戰北窗風霜葉鋪階疊亂紅一段新愁驚枕上幾聲悲

調弱不似

得白翁懶
漫自適意

雁落雲中眼前時節看馳馬日下生涯寄斷蓬弟妹別來勞夢寐杳無消息過江東

擬白樂天

不因霜葉辭林去的當山翁未覺秋北里酒錢煩屢索南洲詩債懶頻酬欲歌金縷羞紅粉擬插黃花避白頭底事登臨好時節等閑收拾許多愁

中秋口號

并引一云雲
山閣白語

伏以四難并得既爲尊俎之佳期五福具膺實號搢紳之盛事矧中秋之屆候宜公燕之交歡恭惟判府大資身遇聖神家傳將相時應半千之運論歸尺五之天姓名久在於金甌方面暫

分於玉節浮堦飛閣、引南國之佳人、豪竹哀絲、奏西園之清夜、
雲山簷楯接低空、公宴初開、氣鬱蔥、照海旌旛、秋色裏、激天鼓、
吹月明中、香槽旋滴珠千顆、歌扇驚圍玉一叢、二十四橋人望、
處、台星正在廣寒宮、

致政通議口號

并引一作
秋燕口號

竊以五福具膺、資搢紳之盛事、四難并得、亦尊俎之佳期、恭惟
致政通議馬鶴、英姿鼎槐、華胄身見六朝之盛位、登兩省之崇
北陌、東阡、時命青牛之駕、左圖右史、日從赤松之遊、判府左丞
神嶽殊鍾、星躔異稟、方面雖分於玉節、姓名已覆於金甌、舉白
飛觴、極水陸四方之饌、彈絲擊石、盡賓主一時之歡、

秋空畫隼照新晴。符隱庵前小隊停。玉罍金醪通繾綣。鳳笙龍管入青冥。靚妝醺酒花侵席。寶獸呀香霧滿庭。太史應占豫州分。上台星近老人星。

口號

并引

以下七言絕

美酒忘憂之物。流光過隙之駒。不稱人心。十事常居八九。得開口笑。一月亦無二三。莫思身外無窮。且覩尊前見在。功名富貴何異。楚人之弓。城郭人民。問取遼東之鶴。付與香鈿畫鼓。盡歡美景良辰。欲奏長謠。聊陳短韻。

平原居士今無影。鸚鵡空洲誰舉杯。猶有漁陽搥撾鼓。爲君醉後作輕雷。

淺語自俊

早春

黃金軟軟滿垂楊。尚有春寒到畫堂。酒力漸銷歌扇怯。入簾飛雪帶梅香。

赴杭倅至汴上作

俯仰觚棱十載閒。扁州江海得身閒。平生孤負僧牀睡。准擬如今處處還。

無題

埽地燒香閉閣眠。簾紋如水帳如煙。客來夢覺知何處。挂起西窗浪接天。

蘇子瞻記江南所題詩本不全余嘗見之記其五絕今以

又香又
作詞調那
得不佳

補子瞻之遺

東坡跋并三絕見正集第十卷擬織錦詩注下

紅窗小泣低聲怨。永夕春風斗帳空。中酒落花飛絮亂。曉鶯啼破夢。恁恁。

其二

晞草露如郎倖薄。亂花飛似妾情多。歸鴻見處彈珠淚。語鶯聞時斂翠蛾。

其三

琴絃斷續愁兼恨。嶺水分流西復東。深院小扉紅日落。繡窗閑倚更誰同。

其四

參橫霽色天沈水。鳥宿寒枝竹。瑣煙衾惹舊香。清夜半。淚凝殘燭。畫堂前。

其五

寒信霜風似葉黃。冷燈殘月照空牀。看君記憶傳文錦。字字愁縈惹斷腸。

金山晚眺

西津江口月初弦。水氣昏昏上接天。清渚白沙茫不辨。只應燈火是漁船。

病中

疎簾薄幔對青燈。鸛鶴喧喧自轉更。風雨渺漫人臥病。地爐湯

鼎更悲鳴

聞雁懷邵仲恭

楚澤吳天去未遲。煩君且傍蒜山飛。白袍居士如相問。爲說緇塵欲滿衣。

冬蚊

蚤蠆蜂螭罪一倫。未知蚊子重堪嗔。萬枝黃落風如射。猶自傳呼欲噬人。

白馬寺晚泊

濛濛晚雨暗回塘。遠樹依微不辨行。人物漸稀疎磬斷。綠蒲叢底宿鴛鴦。

書上感懷

七年三過白蘋洲。長與諸豪載酒游。舊事欲尋無處問。雨荷風蓼不勝秋。

和程給事贈虞道判六首

刀圭雲母具晨飧。門對三層步斗壇。夜考鶴經分七九。曉占歲氣辨齡丹。

其二

火棗交梨近可飧。不須地肺及天壇。龜藏坎海毛皆綠。鳳宿離宮色自丹。

其三

紫府沈沈掩夜關
竹陰清埽月中壇
歲星偷得桃枝碧
董奉栽成杏子丹

其四

囊中玉色已經殮
醉拂絲桐坐杏壇
應笑倦游塵滓客
鬢毛蕭瑟事鉛丹

其五

漢武遊心縹緲閒
文成五利盡登壇
何如屈曲韓夫子
不羨神君白玉丹

其六

使君本住道家山
時訪元都太古壇
陰惠已能追許令
治功不

獨過韋丹

處州閑題

清酒一杯甜似蜜。美人雙鬢黑如鴉。莫誇春色欺秋色。未信桃花勝菊花。

春詞五首

蒲萄裯暖蕙薰微。紅日窺軒睡覺時。人倦披衣雙燕出。青絲高罥木蘭枝。

其二

弱雲停午弄春嬌。高柳無風妥翠條。懶讀夜書搔短髮。隔垣時聽賣餠簫。

其三

都城春富百花披，長憶人歸駐馬時。
淺色微黃應好在，爲誰還發去年枝。

其四

風驅白雨洗園林，蔽地飛花一寸深。
狂紫浪紅俱已矣，老春雖在亦何心。

其五

顛毛漸脫風情少，匣劍空存俠氣銷。
人遠地偏無酒肉，春深花烏謾相撩。

秋詞二首

雲惹低空不更飛
班班紅葉欲辭枝
秋光未老仍微暖
恰似梅花結子時

又

無數青莎繞玉階
夕陽紅淺過牆來
西風莫道無情思
未放芙蓉取次開

齊逸亭

燄發郎君更不歸
故亭蕭瑟異當時
玉笙金管渾如夢
只有梅花三四枝

春日

殘臘渺茫雲外日
新春彷彿夢中來
雪霜便覺都無力
只見桃花

花次第開

雪中寄丹元子

陰風一夜攪青冥風定紛紛雪片零想是玉清真境上白虛光裏誦黃庭

宿乾明方丈

漫天白雪無端現佛室夜艾烏更啼相逢解頤足自慰勿語俗子念心攜

新開湖送孫誠之有龍見於東北因成絕句

狂客走影暗悠悠菡萏吹風五月秋黃綬不爲無氣槩蒼龍隨尾送行舟

呈李公擇

青箋擘處銀鈎斷。紅袂分時玉筍懸。雪腳漸收風色緊。半規斜日射歸船。

落日馬上

日落荒阡白霧深。紫騮嘶顧出疎林。回頭已失來時路。杳杳金盤墮翠岑。

次韻參寥三首

武陵漁子入花源。但見秦人不得仙。會有黃鸝鳴翠柳。何妨白眼望青天。

其二

長安仕路與雲齊
倦僕羸驂不可躋
但得玄暉曾折簡
何須平子更安題

其三

且折花枝醉復醒
人間時節易崢嶸
屠龍肯自羞無用
畫虎從人笑不成

和書天慶觀賀祕監堂三首

老仙舊地枕東城
古木參天警晝聲
我亦願爲方外友
風流何必並時生

其二

史君平昔慕高清
一到祠堂意一新
戶外黃冠應指點
公應便

是謫仙人

其三

衣履蕭條氣久清
豪家門館未嘗行
朱簷碧瓦何從得
疑有陰兵夜助成

和書觀妙菴

龍瑞宮中種玉人
誅茅結室傍秋雲
自言洞裏山川別
此處千分未一分

早春題僧舍

東園紫梅初破蕊
北澗綠水方通流
歸去一春花月夢
定應常在此中遊

盆池釣翁

誰刻仙材作釣翁。尺池終日釣微風。令人卻憶鴟夷子。散髮五湖狂醉中。


賞酴醿有感


春來百物不入眼。唯見此花堪斷腸。借問斷腸緣底事。羅衣曾似此花香。


首夏

節物相催各自新。癡心兒女挽畱春。芳菲過盡何須恨。夏木陰陰正可人。

淮海後集卷四終








PL
2687
.c53
v.8

淮海後集卷五

表啟

代蘄州守謝上表

愚罪著明，當以萬死。聖恩寬大，尙假一麾。顧惟昧冒之深，第積
戰兢之至。伏念臣不學無術，寡偶少徒。荷先帝之誤知，繇常員
而擢用。始欲悉力而舉職，莫知長慮以佐時。自取悔尤，至煩揮
黜責其妄作，便可屏之遠方。憫其知非，猶當投於散地。敢圖生
死而肉骨，尙容宣化以承流。況臣粵自去冬，嘗陳愚懇，願歸使
節，求綰郡章。雖此左遷，正符宿願。恩旣深而逾望，感亦極而難
言。此蓋伏遇皇帝陛下大德海涵，至仁天覆，謂災眚之可赦，以



過失爲當憐寬其未棄之誅開以自新之路辨之不早嗟已迫於桑榆來者可追幸未填於溝壑誓捐軀幹上報恩私

代程給事乞祝聖表

本州管內舊有應天寺者造於宋元徽中其地據寶林山巔南直秦望北負臥龍蔽山挾其左鑑水趨其前園視井邑如閬圖畫越之形勝十得六七比於熙甯十年八月遇火金石土木之觀一夕殆盡樓觀宮室化爲邱墟父老過之徜徉悼歎若失所依憑者因相率詣州自陳願以私錢修復故寺本州尋具其事上聞仍乞易爲十方蒙朝廷報可賜號寶林禪院於是郡之衣冠縑素無不悅豫鼓舞以謀報上因大出力財爭先請奮浮圖

棟宇次第告成曾未踰年已復舊觀蓋所據之地勝故興也易
所遭之時盛故成也速不然何以至是哉謹按寶林禪院其地
本名龜山前世文士見於篇章上有鰻井歲旱禱雨輒應臣等
竊以爲龜神物也有先事之智而壽踰千歲鰻龍類也有施澤
之仁而功被萬物位正南方與時相見勢出人境足以有臨稽
之於名効之於物參之於方位考之於形勢而酌之於民情理
從事順實宜永爲頌祝陛下聖壽之地臣等自今後每遇同天
節只於本院啓建道場及禱祠雨澤吉祥齋供其餘官中道場
並不令於本院啓建夫下達士民之願上報君父之恩臣子之
職也臣等荷國厚恩無以答生成之萬一庶幾因緣塔廟少伸

犬馬之誠仰瞻闕庭不勝大願伏望聖慈特賜俞允

坤成節功德文疏

寶曆開祥爰屬補天之運金行御氣適當夢帝之期躬詣精廬
妙修勝會致上方香積之飯閱西土貝多之文庶憑調御之緣
少効華封之祝太皇太后伏願睿圖鞏固宸算增隆日月無私
永照臨於下土風雲不開長感會於中天

代答范相公啓

堯夫

器兼文武道備天人始列周行綽有棟樑之器及參大政鬱爲
社稷之臣果振家聲遂當國相昔韋平嗣興於西漢袁楊繼起
於東京張公錫延賞之名陸氏取象先之意雖云華族未必熙

朝然猶前史以爲美談當世謂之榮事固未有百年遇太平之
運四世膺爰立之求以今言之一何盛也某夙登門叨嘗頌感
容念班謁以無由第承風而竊抃

賀孫中丞啓

光奉明恩進陞中憲伏惟慶慰恭惟中丞侍郎受天閒氣爲世
眞儒力足以扶顛持危器足以致遠任重巍然如衣服之有冠
冕卓爾若鳥魚之有鳳鯢三朝充諫諍之官奮身不顧七郡任
蕃宣之寄爲民所思動靜不失其時遜逆必求諸道比支物望
簡在上心粵自貳卿遂登執法嚴霜被野旣知松柏之後凋猛
戰居山將見藜藿之不采某叨持符節久遠門闌

賀吏部傅侍郎啓

光膺帝命進貳天官

云

某官道術淵微器猷宏博更險夷而

不測其操踐中外而不易其心漢節初歸常折董宏之妄楚郊
臥治尤推汲黯之忠方傳報政之成已聽除書之下亟辭右輔
復踐中臺邦人遮轍以顙留朝士舉酒而相賀吏曹三綜既知
冰鑑之無私王體一謀當見鈞衡之益重某屬驅軺傳阻造門
闌

代何提舉賀范樞密啓

光膺睿命進貳中樞碩輔登崇溥天均慶竊以天運無積蓋由
八柱之仰成歲功不虧亦自四時而分治矧媯皇補天之際當

商老和羹之初儻非心德之素同難冀事功之必立伏惟某官
器兼文武學備天人雖小善而必爲臨大節而不奪人參臺省
佇聞折檻之風外總戎機寢罷爭桑之釁負謗傷而精神益勵
處閑散而聞望愈隆逮神聖之纂臨屬風雲之感會念昔仁祖
虛懷於慶曆之間惟時先公奏對於天章之下謂道可行於反
掌而世亦至於容刀盛世難逢事空傳於故老嗣賢復出天實
慰於斯民旣被召以旋歸遂干霄而直上千尋廣廈欣然慰多
士之心萬里長城足以制四夷之命某夙登門初久曠書牕方
從沙汰之餘未卜棲翔之所側聞進拜倍切驩愉巖石雖瞻尙
鬱搢紳之論衮衣遂有方醺區夏之情

賀門下呂僕射啓 微仲

伏審光奉明恩進陞左輔伏惟慶慰恭以某官當世大儒斯民
先覺毀譽莫爲之損益窮通靡得而變渝北平如高山深林人
何可測巨源若渾金璞玉器孰能名卓乎在搢紳之中屹然有
公輔之望果踐西臺之峻遂躋端揆之崇邸音喧騰士類交慶
納忠有素詎須德裕之六箴應變無方不止姚崇之十事

謝潁州呂吏部啓

叨奉宸恩謬當藩郡境預四鄰之末潤霑九里之餘憑几占書
未進河南之牘朶雲號體俄蒙郇國之函仰荷謙冲退增悚愧
恭以某官器周事變學造淵微出四世五公之門遇千載一時

之運文辭則操觚立就政事則投及皆虛荀氏八龍盡繼高陽之美河東三鳳尤推鸞鷟之奇會公旦之相周俾伯禽而侯魯布宣詔令已成師帥之功近省君親行陟股肱之任某承風茲久覲德未遑企頌之懷敷宣罔旣

答丁彥良書

某啓尋書及詩備悉雅旨且承邇來爲況甚休以感以慰竊味詩之大意率多辛酸耿愴之旨君生長素富貴而喜作寒士語何耶因知詩非能窮人詩窮然後工得非政欲以此合古人語乎兼審薄挂吏議小累不足以玷遠猷母甚怏怏也知罷官里閭慕義嗜學是所以增其志尙爾白玉微瑕千丈松礫硯不害

他日爲大器跡弛之士自有御之者幸順時自愛區區不宜某再拜

與許州范相公

某再拜安撫相公閣下某淮海一介之士行能無取比因緣科第獲列仕版又屬朝廷復置賢科而一二邇臣猥以充賦名實乖戾果致多言相公當國憐其孤單不卽聞罷使得自便引疾而歸僥倖深矣比遇相公均逸藩輔而某承乏之地實在節制之下疵賤無介紹不敢以書自通眷眷私懷何以云喻豈圖相公過有採聽首賜論薦使備著述之科檄書初至發函伏讀且喜且懼蓋相公於某昔既有保全之賜今又有論薦之恩願惟

狂愚何以辱此屬拘官守不獲進謝門閭又不敢具啓事以敘
悃悃區區俗禮非國士所以報知己者也惟相公裁察

祭監稅主簿文

維年月日具銜姓名謹以清酌庶羞之奠致祭於歿故監稅主
簿之靈嗚呼賢才懿德宜顯周行以尹德厚宜享壽康仕旣未
達人其云亡顧天理之莫究茲僚友之永傷嗚呼西風蕭颯長
夜淒涼靈車戒道丹旆飛揚有殽在俎有酒盈觴臨岐伸奠歸
安故鄉尙饗

淮海後集卷五終

淮海後集卷六

雜文

清和先生傳

慧巧語真
堪解頤滑
稽之雄者

清和先生姓甘名液字子美其先本出於后稷氏有粒食之功其後播棄或居於野遂爲田氏田爲大族布於天下至夏末世衰有神農之後利其資率其徒往俘於田而歸其倔彊不降者與彊而不釋甲者皆爲城旦春賴公孫杵臼審其輕重不盡碎其族徙之陳倉與麥氏穀氏鄰居其輕者猶爲白粲與鬼薪侔已而逃乎河內又移於曲沃曲沃之民悉化焉曲沃之地近於甘古甘公之邑也故先生之生以甘爲氏始居於曹受封於鄭

及長器度汪汪澄之不清撓之不濁有醞藉涵泳經籍百家諸
子之言無不濫觴孟子稱伯夷清下惠和先生自謂不夷不惠
居二者之間而兼有其德因自號曰清和先生云士大夫喜與
之游詩歌曲引往往稱道之至於牛童馬卒閭巷倡優之口莫
不羨之以是名漸徹於天子一召見與語竟日上熟味其旨愛
其淳正可以鎮澆薄之徒不覺膝之前席自是屢見於上雖郊
廟祠祀之禮先生無不預其選素與金城賈氏及王卮子善上
皆禮之每召見先生有司不請而以二子俱見上不以為疑或
爲之作樂盛饌以待之歡甚至於頭沒杯案先生旣見寵遇子
孫支庶出爲郡國二千石往往皆是至於十室之邑百人之聚

先生之族無不在焉。昔最著聞者中山宜城湓浦皆良子弟也。然皆好賓客。所居冠蓋駢集。賓客號呶出入無節。交易之所在委積。由是上疑其濁。小人或乘閒以賄入。欲以逢上意而取寵。一日上問先生曰。君門如市何也。先生曰。臣門如市。臣心如水上。曰。清和先生今乃信其清和矣。益厚遇之。由是士大夫愈從先生游。鄉黨賓友之會咸曰。無甘公而不樂。旣至則一座盡傾。莫不注揖。然先生遇事多不自持。以待人斟酌而後行。嘗自稱沽之哉。沽之哉。我待價者也。人或召之不問。貴賤至於斗筲之量。絜瓶之智。或虛已來者從之。如流布衣寒士一與之遇。如挾纊。惟不喜釋氏。而僧之徒好先生者亦竊與先生游焉。至於學

道隱居之士多喜見先生以自晦然先生愛移人性情激發其
膽氣解釋其憂憤可謂能令公喜能令公怒者邪王公卿士如
灌夫季布李景儉桓彬之徒坐與先生爲黨而被罪者不可勝
數其相歡而奉先生者或至於敗家破產而不悔以是禮法之
士疾之如讐如丞相朱子元執金吾劉文叔郭解長孫登皆不
悅未嘗與先生語時又以其士行或久中道而變不承於初
咸毀之曰甘氏孽子始以詐得終當以詐敗矣久之或有言先
生性不自持無大臣輔政之體置之左右未嘗有沃心之益或
虞以虛閑廢事上由此亦漸疎之會徐邈稱先生爲聖人上惡
其朋比大怒遂命有司以光祿大夫秩就封宗廟祭祀未嘗見

逐終於鄭仕於郡國者皆不奪其官初先生旣失寵其交游往往謝絕甚者至於毀棄素行以賣直自售惟吏部尙書畢卓北海相孔融彭城劉伯倫篤好如舊融嘗上書辨先生之無罪上益怒融由此亦得罪而倫又爲之頌與當世爲有故不著今掇其行事大要者著於篇

太史公曰先生之名見於詩書者多矣而未有至公之論也譽之者美逾其實毀之者惡溢其真若先生激發壯氣解釋憂憤使布衣寒士樂而忘其窮不亦薰然慈仁君子之政歟至久而多變此亦中賢之疵也孔子稱有始有卒者其惟聖人乎先生何誅焉予嘗過中山慨然想先生之風聲恨不及見也乃爲之

傳以記

法雲寺長老然香會疏文

竊以香者妙通法性冥動聞機大則香積如來。令天人而入戒律。次期香嚴童子。得羅漢而證圓通。覺至性之清嚴。破塵寰之濁穢。肆求善友同結勝緣。漸沈水之密圓。斥棗膏之昏鈍。規模既遠。誓愿尤長。若秣若圓。得無礙法。非煙非火。轉不退輪。偶就印以成文。常於空而作蓋。無前後去來之際。有解脫知見之因。曄乎若光明之雲。佳哉如鬱蔥之氣。反聞聞性。八百之功德。以成自覺。覺他。億萬之河沙斯徧。

越州請立程給事祠堂狀

浙水之東七州獨越爲都會凡七州之軍事督焉其地西帶江
北被海多雄山傑澤有桑麻魚稻藤薜竹箭之饒土沃而流水
清而不迫非舟車足力所會故其民喜耕耨勤織紵尊本而薄
末狡獪詆欺之弊視他州爲少然以險阻之故豪強惡少跌宕
不逞之民一失其業則往往什聚伍行剽攘攻刦於江海之上
不時去之則蔓延而成大盜矣爲太守者審知風俗之厚刑政
竝修則一方可以指麾而治不然雖憊力勞心猶無益也熙甯
十年詔以給事中集賢殿修撰廣平程公知軍州事公素以治
行稱天下越人無不踴躍竦企願見公之所爲及至政尙簡肅
不爲苟且苛細之事事至而後必行亦無所假借發隱摘伏敏

捷如神每得所謂豪強惡少跌宕不逞之民草斬而獸逐之至斷絕乃已於是距吳際聞楚千里肅然盜賊不敢發川行途止如卽其家訟獄衰息風雨時至仍歲大穰乃禮賢俊仁老孤簡練士卒繕修宮寺至於郵亭刻漏爲之一新頽廢偃僵斬然俱起然後知公之才所遇縱橫無窮其所厭伏東西逆銷變故於未形者多矣非特越人受其賜也使行且大用於朝推其道於天下則其所就者又可量耶先是太子少保南陽趙公有惠政於越旣去而公承其後故議者謂近世越州之政未有如二公者南陽公嘗命畫史圖太子少師天水趙公并公與已游從之像號三老圖而越之好事者遂作三老堂以寘之元豐二年公

還朝郡之衣冠縉黃耆艾之士若干人乞畱於部使者三爲之上不報因相與泣曰公去矣其像雖存於三老堂然吾人之心未厭也聞公嘗帥洪福廣三郡三郡皆有生祠豈越獨無有今寶林院者公之所興建也若卽其地爲堂立公之像如三郡故事以慰吾人之思不亦可乎眾曰然故是又以狀白使者請立公之祠堂焉是時某適自淮南來省親將還越人謂某曰吾州更飢歉札癘之後程公實撫養而教誨之去年冬福州太守司諫孫公嘗道於此具見其事今祠堂成有日矣謀爲記宜莫如孫公者聞子與孫公鄉里且門人也盍撫厥實以爲我請乎某旣歎程公之政有以媚於民又嘉越人能大其施而推報之也

乃爲論次其事并州之風俗具而載之以備孫公之采擇焉

精騎集序

予少時讀書一見輒能誦暗疏之亦不甚失然負此自放喜從滑稽飲酒者游旬朔之間把卷無幾日故雖有彊記之力而常廢於不勤比數年來頗發憤自懲艾悔前所爲而聰明衰耗殆不如曩時十一二每閱一事必尋繹數終掩卷茫然輒復不省故雖然有勤苦之勞而常廢於善忘嗟夫敗吾業者常此二物也比讀齊史見孫臏答刑詞云我精騎三千足敵君嬴卒數萬心善其說因取經傳子史事之可爲文用者得若干條勒爲若干卷題曰精騎集云噫少而不勤無如之何矣長而善忘庶幾

以此補之

故龍圖閣直學士中大夫知成都軍府事管內勸農使充
成都府利州路兵馬鈴轄上護軍隴西郡開國侯食邑一
千一百戶食實封三百戶賜紫金魚袋李公行狀 曾祖
諱宗誼故不仕 祖諱知至故不仕 父諱東故任江甯
府溧水縣尉累贈特進

南康軍建昌縣李常字公擇年六十四李氏宗出唐宗室郇公
諱遠祖濤五代時號稱名臣仕皇朝爲兵部尙書封莒國公莒
公少時仕於湖南氏有一子畱江南公其裔孫也故今爲南康
建昌人公少警悟好學強記爲文章捷敏初若不經意而比成

粲然屬寓深遠皇祐中登進士甲科授防禦推官權江州軍事判官丁昌源郡太夫人憂解官又丁光祿公憂服闋權宣州觀察推官監漣水軍轉般倉故大理寺丞知洪州奉新縣未行用韓公獻肅薦爲三司檢法官神宗卽位詔大臣舉館職曾宣公以公應詔召試學士院除祕閣校理編校史館書籍兼太常博士兼史館檢討置三司條例司檢詳官看詳中書條例權判尙書考功改右正言同管勾國子監公事是時王荊公輔政始作新法諫官御史論不合者輒斥去公上疏力詆其非以爲始建三司條例司雖致天下之議而善士猶或與之至於均輸之論興青苗之法立公然取息傳會經旨以爲無嫌則天下固已大

駭而善士亦不復與矣時荆公之子雱與溫陵呂惠卿皆與國
國論凡朝廷之事三人者參然後得行公言陛下與大臣議某
事安石不可則移而不行安石造膝議某事安石承詔頌焉呂
惠卿獻疑則反之詔用某人安石惠卿之所可雱不說則又罷
之孔子曰祿去公室政在大夫陪臣執國命今皆不似之耶而
其論青苗尤爲激切至十餘上不已於是落職通判滑州歲餘
復職知鄂州徙知湖州遷尙書祠部員外郎賜五品服徙知齊
州齊故多盜公至痛懲艾之論報無虛日盜猶不止他日得黠
盜察其可用刺爲兵使直事鈴下閒問以盜發輒得而不衰止
之故曰此繇富家爲之囊使盜自相推爲甲乙官吏巡捕及門

擒一人以首則免矣公曰吾得之矣乃令得藏盜之家皆發屋破柱盜賊遂清始公在武昌吳興政尙寬簡日與賓客縱酒笑詠吏民安樂之郡以大治於是世知公之才所值無不可也屬決河灌山東諸郡公捍禦有術部使者以聞降詔書獎諭從淮南西路提點刑獄遷尙書度支員外郎坐厚善直史館蘇公軾得其詩文不以告罰金寄祿格行換朝散郎遷朝請郎試太常少卿公去國十五年至是還朝士大夫喜見於色以謂正人復用也以職事對稱旨面賜三品服未幾試禮部侍郎文昌府成車駕臨幸恩遷朝奉大幸恩遷朝散大夫上卽位覃恩遷朝請大夫試吏部侍郎遷朝議大夫俄試戶部尙書詔百官轉對公

以七事應詔一曰崇廉恥二曰存貢舉三曰別守宰四曰去賊
貪五曰慎疑獄六曰擇師儒七曰修役法皆當時急務而其言
役法尤合公論又取差免二法折衷爲書上之以爲法無新陳
便民者良法也論無彼已可久者確論也又曰貧富俱出貲則
貧者之所難堪使富者出貲貧者出力庶乎其可也大略如此
遷中大夫除御史中丞兼侍讀加龍圖閣直學士初元豐河決
小吳神宗以河勢方趨西北難以力回詔勿復塞須其自定增
立隄防而或者以謂非悠遠之策請開澶淵游河分殺水勢又
欲自蘇村口截爲隄導還故處詔遣公視之還奏非便又遣吏
部侍郎范公百祿給事中趙公君錫覆視奏與公合而或者猶

執前議銳於興役朝廷疑之至是公申論其弊章六七上而其役竟罷公又請分詩賦經義兩科以盡取士之法別自致因人爲兩途以究省官之術其忠言讜論蓋不可以一二舉至於因時乘閒導迎和氣者多密以啓聞故莫得而知也俄守兵部尙書固辭不受懇求外補章屢上遂出知鄧州數月徙成都府行及陝府閬鄉縣暴卒於傳舍實元祐五年二月二日也累勳至上護軍隴西郡侯公風度凝遠與人有恩意而遇事彊毅不爲苟合初善王荊公荊公當國冀其爲助而詆之乃力於他人荊公嘗遣雋喻意曰所爭者國事少存朋友之義公曰大義滅親況朋友乎自存益確士論以此歸之少時讀書於廬山五老峯

下白石菴之僧舍後身雖出仕宦而書藏於山中如故每得異書輒益之至九千餘卷山中之人號李氏山房仲兄布蚤卒事其嫂張敬甚撫其子秉彝如己子自奉清約所俸入多少以贖親族捐館之日無贏貲朝廷聞之常賻外特賜五十萬有文集若干卷藏於家初娶狄氏襄陽遵度主簿之女早卒贈某縣封遵度亦俊傑士寶元慶曆間以文章顯名再娶魏氏光祿卿琰之女亦早卒贈遂甯縣君又娶遂甯之弟封安康郡君子男四人長曰攄揚州江都縣尉早卒次曰遷承奉郎次曰逵承務郎次曰迢承務郎女三人長適郢州長壽縣主簿孫端次適郊祀齋郎邱楫次適進士黃叔敖諸孤自閨鄉扶柩南歸而公之伯

兄時爲江南西路轉運使遂以其年十月丙午葬公於南康軍建昌縣千秋之原前期諸孤請狀公之行治而公之美實多難以具著著其出處始終之大者以告諸史氏謹狀

雜說

唐杜湓江夏人也自罷漢陰令居泗水上烈日笠首親督耕夫一年而食足二年而衣食兩餘三年而屋室完新六畜肥繁器用皆備自墾荒起家十五年爲富家翁不假一人之力一毫之助彼嘗謂人曰夫忍恥入仕不困妻子衣食者幾希彼忍恥我勞力皆衣食耳顧我何如由功名之士觀之則誠爲拘繫跼促人也若夫恬於進取安分潔已者蓋有取焉爾

通事說

文以說理爲上序事爲次古人皆備而有之後世知說理者或失於略事而善序事者或失於悖理皆過也蓋能說理者始可以通經善序事者始可以修史

蠶書

予閑居婦善蠶從婦論蠶作蠶書

考之禹貢揚梁幽雍不貢繭物充筐織文徐筐玄織纁青筐底纁域組豫筐纖纁青筐壓絲皆繭物也而桑土旣蠶獨言於充然則九州蠶事充爲最乎予游濟河之間見蠶者豫事時作一婦不蠶比屋言之故知充人可爲蠶師今予所書有與吳中蠶

家不同者皆得究人也

種變

臘之日聚蠶種沃以牛溲浴於川毋傷其藉迺縣之始審臥之
五曰色青六曰白七日蠶已蠶尙臥而不傷

時食

蠶生明日桑或柘葉風戾以食之寸二十分晝夜五食九日不
食一日一夜謂之初眠又七日再眠如初旣食葉寸十分晝夜
六食又七日三眠如再又七日若五日不食二日謂之大眠食
半葉晝夜八食又三日健食乃食全葉晝夜十食不三日遂繭
凡眠已初食布葉勿擲擲則蠶驚毋食二葉

制居

種變方尺及乎將繭乃方四丈織萑葦範以蒼葦竹長七尺廣五尺以爲筐建四木宮梁之以爲槌縣筐中間九寸凡槌十縣以居食蠶時分其居糞其葉餘以時去之萑葉爲籬勿密屈葉之長二尺者自後茨之爲簇以居繭蠶凡繭七日而採之居蠶欲溫居繭欲涼故以萑鋪繭寒之以風以緩蛾變

化治

常令煮繭之鼎湯如蟹眼必以筯其緒附於先引謂之餵頭母過三系則系麤不及則脆其審舉之凡系自鼎道錢眼升於鎖星星應車動以過添梯乃至車

錢眼

爲版長過鼎面廣三寸厚九黍中其厚插大錢一出其端橫之鼎耳後鎖以石緒總錢眼而上之謂之錢眼

鎖星

爲三蘆管管長四寸樞以圓木建兩竹夾鼎耳縛樞於竹中管之轉以車下直錢眼謂之鎖星

添梯

車之左端置環繩其前尺有五寸當車牀左足之上建柄長寸有半匝柄爲鼓鼓生其寅以受環繩繩應車運如環無端鼓因以旋鼓上爲魚魚半出鼓其出之中建柄半寸上承添梯添梯

文武考工
更腴而勁

者二尺五寸片竹也。其上揉竹爲鉤以防系竅。左端以應柄。對鼓爲耳。方其穿以閑添梯。故車運以牽環繩。繩簇鼓。鼓以舞魚。魚振添梯。故系不過偏。

車

制車如轆轤。必活其兩輻以利挽系。

禱神

臥種之日升香以禱天駟。先蠶也。割雞設醴以禱婦人。寓氏公主蓋蠶神也。毋治堰。毋誅草。毋沃灰。毋室入外人。四者神實惡之。

戎治

唐史載于闐初無桑，丐鄰國不肯出，其王卽求置婚，許之。將迎，乃告曰：國無帛，可持蠶自爲衣。女聞置蠶帽絮中，關守不敢驗。自是始有蠶，女刻石約無殺蠶蛾，飛盡蠶蛾乃得治繭。言蠶爲衣，則治繭可爲絲矣。世傳繭之未蛾而竅者，不可爲絲。頃見鄰家誤以竅繭雜全繭治之，皆成桑焉。疑蛾蛻之繭也，欲以爲絲，而其中空，不復可治。嗚呼！世有知于闐治絲法者，肯以教人，則貨蠶之死，可勝計哉！予作蠶書，哀蠶有功而不免，故錄唐史所載以俟博物者。

書丁彥良明堂議後

祀國事之大者，歷世洪儒碩生，議論考訂，往往自相違戾。丁俠

以世家子早假蔭以官少年彊學援質有根柢訶詆前載惜乎未能以此獻諸朝得付有司禮官博士相與校正以備一代缺文君不能姑愛惜遵養以待云

錄龍井辯才事

熙甯九年秀州嘉興縣令陶彖有子得疾甚異形色語笑非復平人令患之乃大出錢財聘謁巫祝厭勝百方終莫能治是歲辯才法師元淨適以事至秀法師高僧也隱於錢唐之天竺山傳天台敎學者數百人又特善咒水疾病者飲其所咒水輒愈吳人尊事之令素聞其名卽馳詣師具狀告曰兒始得疾時見一女子自外來相調笑久之俱去稍行至水濱遺詩曰生爲木

卯人死作幽獨鬼泉門長夜開衾幃待君至自是屢來且有言
曰仲冬之月二七之間月盈之夕車馬來迎今去妖期逼矣未
知所處願賜哀憐師乃許諾因杖策從至其家除地爲壇設觀
音像於中央取楊枝霑水灑而咒之三遶壇而去是夜兒寢安
然不復如他時矣明日復來結跏趺座引兒問曰汝居何地而
來至此答曰會稽之東卞山之陽是吾之宅古木蒼蒼師又問
汝姓誰氏答曰吳王山上無人處幾度臨風學舞腰師曰汝柳
姓乎乃靦然而笑師良久呵曰汝無始已來迷已逐物爲物所
轉溺於淫邪流浪千劫不自解脫入魔趣中橫生災害延及無
辜汝今當知魔卽非魔魔卽法界我今爲汝宣說首楞嚴祕密

神咒汝當諦聽痛自悔恨訟旣往過愆返本來清淨覺性於是
號泣不復有云是夜謂兒曰辯才之功汝父之虔無以加焉吾
將去矣後二日復來曰久與子遊情不能遽捨願一舉觴爲別
因相對引滿旣罷作詩一章曰仲冬二七是良時江下無緣與
子期今日臨岐一杯酒共君千里遠相離遂去不復見予聞其
事久矣元豐二年見辯才於龍井山問之信然

書王氏齋壁

皇祐元年末先大父赴官南康道出九江余實生焉滿歲受代
猶寓止僧舍未幾代者卒叔瞻之先君來領其職事通家相好
也至和元年叔瞻始生於南康後予迎老母來爲汝南學官也

而叔瞻亦奉太夫人閒居於郡之西郭時余之先大父母先人皆捐館而叔瞻之先君亦沒於瀘州皇祐逮今四十一年中間豐瘁得喪死生休戚不可悉記獨兩家之孤各奉其母相遭於此甚可悲也

題彭景山傳神

內殿崇班致仕彭崇仁字景山胸中有韜略吏事精密所至士大夫翕然稱之年四十不幸喪明家居無餘而目不可治如老驥伏櫪志未嘗不在千里聞北風則耳聳然自道觀之物無幸不幸以得喪觀之豈異世有所負耶然人之有德慧智術者常存乎疾疾惟深也能披剝萬象而見已安知景山不得之沈冥

中耶

淮海閒居集序

元豐七年冬余將西赴京師索文橐於囊中得數百篇辭鄙而
悖於理者輒刪去之其可存者古律體詩百十有二雜文四十
有九從遊之詩附見者五十有六合二百一十七篇次十卷號
淮海閒居集云

淮海後集卷六終

淮海後集卷上

長短句

望海潮四首

廣陵懷古

星分牛斗疆連淮海揚州萬井提封花發路香鶯啼人起朱簾
十里春風豪俊氣如虹曳照春金紫飛蓋相從巷入垂楊畫橋
南北翠煙中追思故國繁雄有迷樓挂斗月觀橫空紋錦製
帆明珠濺雨甯論雀馬魚龍往事逐孤鴻但亂雲流水縈帶離
宮最好揮毫萬字一飲拚千鍾

又

越州懷古

秦峯蒼翠耶溪瀟灑千巖萬壑爭流鴛瓦雉城譙門畫戟蓬萊

燕閣三休天際識歸舟。泛五湖煙月。西子同遊。茂草荒臺。芋蘿
村冷。起閑愁。何人覽古凝眸。恨朱顏易失。翠被難留。梅市舊
書。蘭亭古墨。依稀風韻。生秋。狂客鑑湖頭。有百年臺沼。終日夷
猶。最好金龜換酒。相與醉滄州。

又 洛陽懷古

梅英竦淡冰。漸溶洩。東風暗換年華。金谷俊游。銅駝巷陌。新晴
細履。平沙長記。誤隨車。正絮翻蝶舞。芳思交加。柳下桃蹊。亂分
春色。到人家。西園夜飲鳴笳。有華燈礙月。飛蓋妨花。蘭苑未
空。行人漸老。重來是事堪嗟。煙暝酒旗斜。但倚樓極目。時見棲
鴉。無柰歸心暗隨流水。到天涯。

可人風味
在此語意
殊絕

尋常淺詔
自是生情

又別意

奴如飛絮。郎如流水。相沾便肯相隨。微月戶庭。殘燈簾幙。慙慙共惜佳期。纔話暫分攜。早抱人嬌咽。雙淚紅垂。畫舸難停。翠幃輕別。兩依依。別來怎表相思。有分香帕子。合數松兒。紅粉脆痕。青牋嫩約。丁甯莫遣人知。成病也因誰。更自言秋杪。親去無疑。但恐生時。注著合有分于飛。

沁園春
春思

宿靄迷空。膩雲籠日。晝景漸長。正蘭皋泥潤。誰家燕喜。蜜脾香少。觸處蜂忙。盡日無人簾幙挂。更風遞。遊絲時過。牆微雨後。有桃愁杏怨。紅淚淋浪。風流寸心。易感但依依。竚立回盡柔腸。

念小奩瑤鑑重。勻絳蠟。玉籠金斗。時熨沈香。柳下相將遊冶處。
便回首。青樓成異鄉。相憶事。縱蠻牋。萬疊難寫微茫。

水龍吟 贈妓婁東正

小樓連苑橫空下。窺繡轂。雕鞍驟。踈簾半捲。單衣初試。清明時
候。破暖輕風。弄晴微雨。欲無還有。賣花聲過。盡斜陽院落。紅成
陣。飛鴛鴦。玉珮丁東。別後悵佳期。參差難又。名韁利鎖。天還
知道。和天也。瘦花下。重門柳邊深巷。不堪回首。念多情。但有當
時皓月。向人依舊。

八六子

倚危亭。恨如芳草。萋萋剗盡還生。念柳外青驄別後。水邊紅袂。

分時愴然暗驚，無端天與娉婷夜。月一簾幽夢，春風十里柔情。怎柰向歡娛漸隨流水，素絃聲斷翠綃香減。那堪片片飛花弄晚，濛濛殘雨籠晴。正銷凝黃鸝又啼數聲。

風流子

東風吹碧草，年華換行客。老滄洲見梅吐舊英，柳搖新綠惱人春色。還上枝頭，寸心亂北隨雲黯黯。東逐水悠悠斜日，半山暝煙兩岸數聲橫笛。一葉扁舟，青門同攜手前歡，記渾似夢裏楊州。誰念斷腸南陌，回首西樓。算大長地久，有時有盡柰何。縣此恨難休，擬待倩人說與生怕人愁。

夢揚州

晚雲收正柳塘煙雨初休燕子未歸惻惻輕寒如秋小欄外東
風軟透繡幃花密香稠江南遠人何處鷓鴣啼破春愁長記
曾陪燕遊酬妙舞清歌麗錦纏頭殢酒困花十載因誰淹留醉
鞭拂面歸來晚望翠樓簾捲金鈎佳會阻離情正亂頻夢揚州
雨中花

指點虛無征路醉乘斑蚪遠訪西極見天風吹落蒲空寒皇女
明星迎笑何苦自淹塵域正火輪飛上霧捲煙開洞觀金碧
重重觀閣橫枕鼇峯水面倒銜蒼石隨處有奇香幽火杳然難
測好是蟠桃熟後阿環偷報消息在天碧海一枝難遇占取春
色

一叢花

年時今夜見師師雙頰酒紅滋疎簾半捲微燈外露華上煙裊
涼颼簪髻亂拋，偎人不起彈淚唱新詞。佳期誰料久參差愁
緒暗縈絲相應妙舞清歌罷又還對秋色嗟咨惟有畫樓當時
明月兩處照相思。

鼓笛慢

亂花叢裏曾攜手窮豔景迷歡賞到如今誰把雕鞍鎖定阻遊
人來往好夢隨春遠從前事不堪思想念香闥正杳佳歡未偶
難畱戀空惆悵。永夜嬋娟未滿歎玉樓幾時重上那堪萬里
卻尋歸路指陽關孤唱苦恨東流水桃源路欲回雙槳仗何人

細與丁寧問呵我如今怎向

促拍滿路花

露顯添花色月彩投窗隙春思如中酒恨無力洞房咫尺曾寄
青鸞翼雲散無蹤跡羅帳薰殘夢回無處尋覓輕紅膩白步
步薰蘭澤約腕金環重宜裝飾未知安否一向無消息不似尋
常憶憶後教人片時存濟不得

長相思

出調高爽
不向纖麗
詞家正聲

鐵甕城高蒜山渡闊干雲十二層樓開樽待月掩箔披風依然
燈火楊州綺陌南頭記歌名宛轉鄉號溫柔曲檻俯清流想花
陰誰繫蘭舟念淒絕秦絃感深荆賦相望幾許凝愁勤勤裁

語雖蹈襲
然入詞猶
是當家

尺素柰雙魚。難渡瓜洲。曉鑑堪羞。潘髻點吳霜。漸稠。幸于飛。鴛鴦未老不。

滿庭芳三首

山抹微雲。天連衰草。畫角聲斷譙門。暫停征棹。聊共飲離樽。多
少蓬萊舊事。空回首。煙靄紛紛。斜陽外。寒鴉數點。流水繞孤村。
銷魂。當此際。香囊暗解。羅帶輕分。謾贏得青樓薄倖。名存此
去。何時見也。襟袖上空惹啼痕。傷情處。高城望斷。燈火已黃昏。
晁云斜陽外三句雖不識
字人亦知爲天生好言語

又

紅蓼花繁。黃蘆葉亂。夜深玉露初零。霽天空闊。雲淡楚江清。獨

棹孤篷小艇悠悠過煙渚沙汀金鈎細絲綸慢捲牽動一潭星
時時橫短笛清風皓月相與忘形任人笑生涯泛梗飄萍飲
罷不妨醉臥塵勞事有耳誰聽江風靜日高未起枕上酒微醒
又

碧水驚秋黃雲凝暮敗葉零亂空堦洞房人靜斜月照徘徊又
是重陽近也幾處處砧杵聲催西窗下風搖翠竹疑是故人來
傷懷增悵望新懽易失往事難猜問籬邊黃菊知爲誰開謾
道愁須殢酒酒未醒愁已先回憑闌久金波漸轉白露點蒼苔
江城子三首

西城楊柳弄春柔動離憂淚難收猶記多情曾爲繫歸舟碧野

朱橋當日事，人不見，水空流。
韶華不爲少年畱，恨悠悠。
幾時休，飛絮落花時候，一登樓。
便做春江都是淚，流不盡，許多愁。
詞人佳句多是翻案古人語如淮海此詞便做春江都是淚流不盡許多愁可謂警句雖用李密數隋檄語亦自李後主問君都有幾多愁卻似一江春水向東流變化名家如此類者不可枚舉亦一法也

又

南來飛燕北歸鴻，偶相逢。
慘愁容，綠鬢朱顏，重見兩衰翁。
別後悠悠君莫問，無限事，不言中。
小槽春酒滴珠紅，莫怱怱，滿金鍾。
飲散落花流水各西東，後會不知何處是，煙浪遠，暮雲重。

又

棗花金釧約柔荑，昔曾攜。
事難期，咫尺玉顏和淚鎖金閨。
恰似

小園桃與李，雖同處不同枝。
玉笙初度顫鸞篴，落花飛爲誰
吹。月冷風高，此恨只天知。
任是行人無定處，重相見，是何時。

滿園花

一向沈吟久，淚珠盈襟袖。
我當初不合苦攔，就慣縱得軟頑，見
底心先有。行待痴心守，甚捻著脈子，倒把人來僝僽。
近日來
非常羅皂醜，佛也須眉皺。
怎掩得眾人口，待收了孖羅罷了，從
來斗從今後休道，共我夢見也不能得勾。

迎春樂

菖蒲葉葉知多少，惟有箇蜂兒妙。
雨晴紅粉齊開了，露一點嬌
黃小。
早是被曉風力暴，更春共斜陽俱老。
怎得花香深處作

渾似元人
雜劇口吻

箇蜂兒抱

花香原作香香
恐是當時語

淮海後集卷上終

淮海後集卷中

長短句

鵲橋仙

纖雲弄巧，飛星傳恨，銀漢迢迢暗度。金風玉露一相逢，便勝卻
人閒無數。柔情似水，佳期如夢，忍顧鵲橋歸路。兩情若是久
長時，又豈在朝朝暮暮。

菩薩蠻

蟲聲泣露驚秋枕。羅幃淚溼鴛鴦錦。獨臥玉肌涼。殘更與恨長。
陰風翻翠幔。雨澀燈花暗。畢竟不成眠。鴉啼金井寒。

減字木蘭花

雪少情多

天涯舊恨，獨自淒涼。人不問、欲見回腸。斷盡金爐小篆香。黛蛾長斂。任是東風吹不轉，困倚危樓。過盡飛鴻字字愁。

木蘭花

秋容老盡芙蓉院。草上霜花勻似翦。西樓促坐酒杯深。風壓繡簾香不捲。玉纖慵整銀箏鴈。紅袖時籠金鴨暖。歲華一任委西風。獨有春紅畱醉臉。

畫堂春

落紅鋪徑水平池。弄晴小雨霏霏。杏園憔悴杜鵑啼。無柰春歸。柳外畫樓獨上。凭闌手撚花枝。放花無語對斜暉。此恨誰知。

千秋歲

此淡語之
有情者也

水邊沙外城郭春寒退。花影亂鶯聲碎。飄零疎酒盞。離別寬衣帶。人不見。碧雲暮合空相對。憶昔西池會。鵷鷺同飛蓋。攜手處。今誰在。日邊清夢斷。鏡裏朱顏改。春去也。飛鴻萬點愁如海。

踏莎行

霧失樓臺月迷津渡。桃源望斷無尋處。可堪孤館閉春寒。杜鵑聲裏斜陽暮。驛寄梅花魚傳尺素。砌成此恨無重數。郴江幸自遶郴山。爲誰流下。瀟湘去。
坡翁絕愛此詞尾兩句自書於扇云少游已矣雖萬人何贖釋天隱注三體唐詩謂此二句實自沅湘日夜東流去不爲愁人住少時變化然郴之悲彼泉水亦流於淇已有此意秦公蓋出諸此又王直方詩話載黃山谷惜此詞斜陽暮意重欲易之未得其字今郴志遂作斜陽度愚謂此亦何害而病其重也李太白詩騰彼落日暮卽斜陽暮也劉禹錫烏衣巷口夕陽斜杜工部山木蒼蒼落日曛皆此意別如韓文公紀夢詩中有一人壯非少

石鼓歌安置妥帖平不頗之類尤多豈可亦謂之重耶山
谷當無此言卽誠出山谷亦一時之言未足爲定論也

蝶戀花

曉日窺軒雙燕語似與佳人共惜春將暮屈指豔陽都幾許可
無時霎閑風雨流水落花無問處只有飛雲冉冉來還去持
酒勸雲雲且住憑君礙斷春歸路

一落索

楊花終日空飛舞奈久長難駐海潮雖是暫時來卻有箇堪憑
處紫府碧雲爲路好相將歸去肯如薄倖五更風不解與花
爲主

醜奴兒

夜來酒醒清無夢。愁倚闌干。露滴輕寒。雨打芙蓉淚不乾。佳
人別後音塵悄。瘦盡難拚。明月無端。已過紅樓十二間。

南鄉子

妙手寫徽眞。水翦雙眸點絳脣。疑是昔年窺宋玉。東鄰。只露牆
頭一半身。往事已酸辛。誰記當年翠黛顰。盡道有些堪恨處。
無情。任是無情也動人。

醉桃源

卽阮郎歸

碧天如水月如眉。城頭銀漏遲。波風動畫船移。嬌羞初見時。
銀燭暗。翠簾垂。芳心兩自知。楚臺橫斷曉雲飛。幽歡難再期。

河傳二首

亂花飛絮。又望空闌合。離人愁苦。那更夜來一霎薄。情風雨暗。
掩將春色去。籬枯壁盡。因誰做。若說相思佛也。眉兒聚。莫怪
爲伊抵死。縈腸惹肚。爲沒教人恨處。

又

恨眉醉眼甚。輕輕覷著神魂迷。亂常記那回。小曲闌干西畔。鬢
雲鬆。羅襪剗。丁香笑吐嬌無限。語軟聲低。道我何曾慣。雲雨
未諧。早被東風吹散。悶損人天不管。

浣溪沙五首

漠漠輕寒上小樓。曉陰無賴似窮秋。澹煙流水畫屏幽。自在
飛花輕似夢。無邊絲雨細如愁。寶簾閑挂小銀鉤。

又

香靨凝羞一笑開。柳腰如醉暖相挨。日長春困下樓臺。照水
有情聊整鬢。倚闌無緒更拋鞋。眼邊牽恨懶歸來。

又

霜縞同心翠黛連。紅綃四角綴金錢。惱人香麝是龍涎。枕上
忽收疑是夢。燈前重看不成眠。又還一段惡因緣。

又

腳上鞋兒四寸羅。脣邊朱粉一櫻多。見人無語但回波。料得
有心憐宋玉。只應無奈楚襄何。今生有分共伊麼。

又

妙在景中
生情

淮海後集 卷中

錦帳重重卷暮霞，屏風曲曲鬪紅牙。恨人何事苦離家，枕上
夢魂飛不去。覺來紅日又西斜。滿庭芳草襯殘花。前段用元微
後斷婉約有味尾
句尤含蓄深思

如夢令五首

門外鴉啼楊柳，春色著人如酒。睡起熨沈香，玉腕不勝金斗。消
瘦消瘦，還是褪花時候。

又

遙夜沈沈如水，風緊驛亭深閉。夢破鼠窺燈，霜送曉寒侵被。無
寐無寐，門外馬嘶人起。

又

幽夢忽忽破後妝粉亂痕霑袖遙想酒醒來無柰玉銷花瘦回首回首遶岸夕陽疎柳

又

樓外殘陽紅滿春入柳條將半桃李不禁風回首落英無限腸斷腸斷人共楚天俱遠

又

池上春歸何處滿目落花飛絮孤館悄無人夢斷月堤歸路無緒無緒廉外五更風雨

阮郎歸四首

褪花新綠漸團枝撲人風絮飛秋千未折水平堤落紅成地衣

遊蝶困乳鶯啼怨春春怎知日長早被酒禁持那堪更別離

又

宮腰裊裊翠鬟鬆夜堂深處逢無端銀燭殞秋風靈犀得暗通
更有限恨無窮星河沈曉空隴頭流水各西東佳期如夢中

又

瀟湘門外水平鋪月寒征棹孤紅妝飲罷少踟躕有人偷向隅
揮玉筯酒眞珠梨花春雨餘人人盡道斷腸初那堪腸也無

又

湘天風雨破寒初深沈庭院虛麗譙吹罷小單于迢迢清夜徂
鄉夢斷旅魂孤崢嶸歲又除衡陽猶有鴈傳書郴陽和鴈無

滿庭芳三首 詠茶

北苑研膏方圭圓璧萬里名動京關碎身粉骨功合上凌煙尊
俎風流戰勝降春睡開拓愁邊纖纖捧香泉濺乳金縷鷓鴣斑
相如方病酒一觴一詠賓有羣賢半扶起燈前醉玉頽山搜
攬胸中萬卷還傾動三峽詞源歸來晚文君未寢相對小妝殘

又

曉色雲開春隨人意驟雨方過還晴高臺芳榭飛燕蹴紅英舞
困榆錢自落秋千外綠水橋平東風裏朱門映柳低按小秦箏
多情行樂處珠鈿翠蓋玉轡紅纓漸酒空金盞花困蓬瀛豆
蔻梢頭舊恨十年夢屈指堪驚凭闌久疎煙淡日寂寞下蕪城

此詞正少游所作
人傳王觀撰非也

又

雅燕飛觴清談揮麈使君高會羣賢密雲雙鳳初破縷金團窗
外爐煙似動開尊試一品奔泉輕淘起香生玉乳雪濺紫甌圓
嬌鬟宜美盼雙擎翠袖穩步紅蓮坐中客翻愁酒醒歌闌點
上紗籠畫蜀花驄弄月影當軒頻相顧餘歡未盡欲去且畱連

桃源憶故人

玉樓深鎖薄情種清夜悠悠誰共羞見枕衾鴛鳳悶卽和衣擁
無端畫角嚴城動驚破一番新夢窗外月華霜重聽徹梅花
弄

淮海後集卷下

長短句

調笑令十首

并詩

王昭君

詩

漢宮選女適單于明妃斂袂登擅車玉容寂寞花無主顧影低
回泣路隅行行漸入陰山路目送征鴻入雲去獨抱琵琶恨更
深漢宮不見空回顧

詞

回顧漢宮路捍撥檀槽鸞對舞玉容寂寞花無主顧影偷彈玉

節未央宮殿知何處目送征鴻南去

樂昌公主

詩

金陵往昔帝王州樂昌主第最風流一朝隋兵到江上共抱恹
恹去國愁越公萬騎鳴笳鼓劍擁玉人天上去空攜破鏡望紅
塵千古江楓籠輦路

詞

輦路江楓古樓上吹簫人在否菱花半壁香塵汚往日繁華何
處舊歡新愛誰爲主啼笑兩難分付

崔徽

詩

蒲中有女號崔徽輕似南山翡翠兒使君當日最寵愛。坐中對客常擁持。一見裴郎心似醉夜解羅衣與門吏西門寺裏樂未央樂府至今歌翡翠

詞

翡翠好容止誰使庸奴輕點綴裴郎一見心如醉笑裏偷傳深意羅衣深夜與門吏暗結城西幽會

無雙

詩

尚書有女名無雙蛾眉如畫學新妝伊家仙客最明俊舅母唯

只呼王郎尙書往日先曾許數載睽違今復遇聞說襄江二十年當時未必輕相慕

詞

相慕無雙女當日尙書先曾許王郎明俊神仙侶腸斷別離情苦數年睽恨今復遇笑指襄江歸去

灼灼

詩

錦城春暖花欲飛。灼灼當庭舞柘枝。相君上客河東秀。自言那得傍人知。妾願身爲梁上燕。朝朝暮暮長相見。雲收月墮海沈沈。淚滿紅綃寄腸斷。

詞

腸斷繡簾捲。妾願身爲梁上燕。朝朝暮暮長相見。莫遣恩遷情
變。紅綃粉淚。知何限。萬古空傳遺怨。

眇眇

詩

百尺樓高燕子飛。樓上美人顰翠眉。將軍一去音容遠。只有年
年舊燕歸。春風昨夜來深院。春色依然人不見。只餘明月照孤
眠。回望舊恩空戀戀。

詞

戀戀樓中燕。燕子樓空春日晚。將軍一去音容遠。空鎖樓中深

怨春風重到人。不見十二闌干倚遍。

崔鶯鶯

詩

崔家有女名鶯鶯。未識春光先有情。河橋兵亂依蕭寺。江愁綠慘見張生。張生一見春情重。明月拂牆花影動。夜半紅娘擁抱來。脈脈驚魂若春夢。

詞

春夢神仙洞。冉冉拂牆花樹動。西廂待月知誰共。更覺玉人情重。紅娘深夜行雲送。困彈釵橫金鳳。

採蓮

詩

若耶溪邊天氣秋。採蓮女兒溪岸頭。笑隔荷花共人語。煙波渺渺蕩輕舟。數聲水調紅嬌晚。掉轉舟回笑人遠。腸斷誰家遊冶郎。盡日踟躕臨柳岸。

詞

柳岸水清淺。笑折荷花呼女伴。盈盈日照新妝面。水調空傳幽怨。扁舟日暮笑聲遠。對此令人腸斷。

煙中怨

詩

鑑湖樓閣與雲齊。樓上女兒名阿溪。十五能爲綺麗句。平生未

解出幽閨謝郎巧思詩裁翦能使佳人動幽怨瓊枝璧月結芳期斗帳雙雙成眷戀

詞

眷戀西湖岸湖面樓臺侵雲漢阿溪本是飛瓊伴風月朱扉斜掩謝郎巧思詩裁翦能動芳懷幽怨

離懷記

詩

深閨女兒嬌復痴春愁春恨那復知舅兄唯有相知意暗想花心臨別時離舟欲解春江暮冉冉香魂逐君去重來兩身復一身夢覺春風話心素

詞

心素與誰語。始信別離情最苦。蘭舟欲解春江暮。精爽隨君歸去。異時攜手重來處。夢覺春風庭戶。

虞美人三首

高城望斷塵如霧。不見聯驂處。夕陽村外小彎頭。只有柳花無數。送歸舟。瓊枝玉樹頻相見。只恨離人遠。欲將幽恨寄青樓。爭柰無情江水不西流。

又

碧桃天上栽和露。不是凡花數。亂山深處水縈洄。可惜一枝如畫爲誰開。輕寒細雨情何限。不道春難管。爲君沈醉又何妨。

祇怕酒醒時候斷人腸

又

行行信馬橫塘畔。煙水秋平岸。綠荷多少夕陽中。知爲阿誰凝恨。背西風。紅妝艇子來何處。蕩槳偷相顧。鴛鴦驚起不無愁。柳外一雙飛去。卻回頭。

點絳脣二首

桃源

醉漾輕舟。信流引到花深處。塵緣相誤。無計花閒住。煙水茫茫。千里斜陽暮。山無數。亂紅如雨。不記來時路。

又

月轉烏啼。畫堂宮徵生離恨。美人愁悶。不管羅衣褪。清淚斑

班揮斷柔腸寸。嗔人問背燈偷搵拭盡殘妝粉。

品令二首

幸自得一分索強教人難喫好好地惡了十來日恰而今較些
不須管啜持教笑又也何須肱纖纖倚賴臉兒得人惜放軟
頑道不得

又

掉又矐天然箇品格於中壓一簾兒下時把鞋兒踢語低低笑
咭咭每每秦樓相見見了無限憐惜人前強不欲相沾識把
不定臉兒赤

南歌子三首

湘湘後集 卷下
玉漏迢迢盡銀潢淡淡橫夢回宿酒未全醒已被鄰雞催起怕
天明 臂上妝猶在襟閒淚尙盈水邊燈火漸人行天外一鉤
殘月帶三星

又

愁髻香雲墜嬌眸水玉裁月幙風幌爲誰開天外不知音耗百
般猜 玉露沾庭砌金風動瑄灰相看有似夢初回只恐又拋
人去幾時來

又

香墨彎彎畫燕脂淡淡勻揉藍衫子杏黃裙獨倚玉闌無語點
檀脣 人去空流水花飛半掩門亂山何處覓行雲又是一鉤

新月照黃昏

臨江仙二首

千里蕭湘接藍浦。蘭橈昔日曾經。月高風定露華清。微波澄不
動。冷浸一天星。獨倚危樓情悄悄。遙聞妃瑟泠泠。新聲含盡
古今情。曲終人不見。江上數峯青。

又

髻子偎人嬌不整。眼兒失睡微重。尋思模樣早心忪。斷腸攜手
何事太匆匆。不忍殘紅猶在臂。翻疑夢裏相逢。遙憐南隸上
孤篷。夕陽流水紅滿淚痕中。

好事近

夢中作

春路雨添花花動一山春色行到小溪深處有黃鸝千百飛

雲當面化龍蛇天矯轉空碧醉臥古藤陰下了不知南北東坡跋云

供奉官莫君沔官湖南喜從遷客游尤爲呂元鈞所稱又能誦少游事甚詳爲予誦此詞至流涕乃錄本使藏之魯直跋

云少游醉臥古藤下誰與愁眉唱一杯解作江南斷腸句只今惟有賀方回

淮海後集卷下終

詩餘

見草堂集
本集失載

明錢塘鄧章漢輯

搗練子

秋閨

心耿耿○淚雙雙○斜月斜風冷○透窗人○去○秋來宮漏永○夜深無語○
對銀缸○

春閨景物
妍麗秋閨
思味淒涼
此詞爲得
之

憶王孫

春景

萋萋芳草憶王孫○柳外樓高○空斷魂○杜宇聲聲○不忍聞○欲黃昏○
雨打梨花深閉門○

梨花帶雨
清幽斷腸
復映王孫
芳草恰恰

寺余

生情

如夢令

曲名小梅花

春景

見綠陰而聞鳥聲正是景物相應處

門外綠陰千頃。兩兩黃鸝相應。睡起不勝情。月到碧梧金井。人靜。人靜。風弄一枝花影。

又

點景造微入妙

鶯嘴啄花紅。溜燕尾。點波綠。皺指冷玉笙寒。吹徹小梅春透。依舊依舊。人與綠楊俱瘦。

浣沙溪

春閨

乍雨乍晴。則愁則悶。

清杏園林。煮酒香。佳人初試薄羅裳。柳絲搖曳燕飛忙。乍雨。

二句淺淡
中傷春無
限

沈吟應割
遲便是元
人樂府句

乍晴花易老。閑愁閑悶。日偏長。爲誰消瘦。減容光。

阮郎歸

春閨

春風吹雨遶殘枝。落花無可飛。小池寒綠欲生漪。雨晴還日西。
簾半捲。燕雙歸。諱愁無柰眉。翻身整頓著殘棋。沈吟應割遲。

旅況

滿天風雨。破寒初。燈殘庭院虛。麗譙吹徹小單于。迢迢清夜徂。
人意遠。旅情孤。崢嶸歲又除。衡陽猶有鴈傳書。郴陽和鴈無。

畫堂春

春怨

東風吹柳日初長。雨餘芳草斜陽。杏花零亂燕泥香。睡損紅妝。
香篆暗消龍鳳。畫屏縈遶。瀟湘暮寒輕透。薄羅裳無限思量。

海棠春

春曉

流鶯窗外啼聲巧。睡未足把人驚覺。翠被曉寒輕。寶篆沈煙裊。
宿醒未解。宮娥報道。別院笙歌會。早試問海棠花。昨夜開多少。

眼兒媚

一名秋波媚

春景

樓上黃昏杏花寒。斜月小欄杆。一雙燕子。兩行歸鴈。畫角聲殘。

少游佳境
不第殘陽
亂鴉爲警
語

山
綺窗人在東風裏。無語對春閑也。應似舊盈盈秋水。淡淡春

柳梢青

春景

岸草平沙。吳王故苑。柳裊煙斜。雨後寒輕。風前香軟。春在梨花。
行人一棹天涯。酒醒處。殘陽亂鴉。門外鞦韆。牆頭紅粉。深院
誰家。

桃源憶故人

春閨

碧紗影弄東風曉。一夜海棠開了。枝上數聲啼鳥。妝點知多少。

如雲恨雨腰肢裊眉黛不堪重掃薄倖不來春老羞帶宜男草

鷓鴣天

春閨

看少游後三句則十二時無間矣此非深于閨恨者不能道

枝上流鶯和淚聞新啼痕閒舊啼痕一春魚鳥無消息千里關山勞夢魂無一語對芳樽安排腸斷到黃昏甫能炙得燈兒了雨打梨花深閉門

蝶戀花

感舊

如此題能不韻語極

鐘送黃昏雞報曉昏曉相催世事何時了萬古千愁人自老春

不易得

來。依。舊。生。芳。草。忙。處。人。多。閑。處。少。閑。處。光。陰。幾。個。人。知。道。獨。
上。小。樓。雲。杳。杳。天。涯。一。點。青。山。小。

滿庭芳

春景

鞦韆外綠
水橋平
景語却無
限清宛

晚。兔。雲。開。春。隨。人。意。驟。雨。纔。過。還。晴。古。臺。旁。柳。飛。燕。蹴。紅。英。舞。
困。榆。錢。自。落。鞦。韆。外。綠。水。橋。平。東。風。裏。朱。門。映。柳。低。按。小。秦。箏。
多。情。行。樂。處。珠。鈿。翠。蓋。金。轡。紅。纓。漸。酒。空。醺。酥。花。困。蓬。瀛。豆。
蔻。梢。頭。舊。恨。千。年。夢。屈。指。堪。驚。凭。欄。久。疎。煙。淡。日。微。映。百。層。城。

南歌子

贈妓陶心兒

未句謂心
字

玉漏迢迢盡，銀潢淡淡橫。夢回宿酒未全醒，已被鄰雞催起，怕天明。臂上妝猶在，襟間淚尚盈。水邊燈火漸人行，天外一鉤殘月，帶三星。

金明池

春遊

瓊苑金池，青門紫陌，似雪楊花滿路。日淡天低，晝永過三點，兩點細雨。好花枝，半出牆頭，似悵望芳草，王孫何處。更水遠人
家，橋當門巷，燕燕鶯鶯飛舞。怎得東君長爲主，把綠鬢朱顏
一時畱住。佳人唱金衣，莫惜才子倒玉山，休訴況春來，倍覺傷
心念。故國情多，新年愁苦，縱寶馬嘶風，紅塵拂面也，則尋芳歸

去

詩餘終

